

唐 房玄齡 等撰



書

局

第

六〇至 卷六七

卷

)四(傳) 册

晉書卷六十

列傳第三十

解系 弟結 結弟育

解系字少連,濟南著人也。父脩,魏琅邪太守、梁州刺史,考績爲天下第一 0 武帝受

禪,封梁鄒侯。

等曰:「我與卿爲友,應向我公拜。」勵又曰:「我與尊先使君親厚。」系曰:「不奉先君遺敎。 公若與先君厚,往日哀頓,當垂書問。親厚之誨,非所敢承。」聞父子大慚,當世壯之。 公府掾,歷中書黃門侍郎、散騎常侍、豫州刺史,遷尙書,出爲雍州刺史、揚烈將軍、西戎校 |系及二弟\|結、||育並清身潔己, 甚得聲譽。 時||荀勖門宗强盛,朝野畏憚之。 勖諸子謂系 後辟

會氐羌叛,與征西將軍趙王倫討之。倫信用佞人孫秀,與孫爭軍事,更相表奏。 朝廷

尉、假節

闔門自守。 水 知系守正不撓,而召倫還。 中見蟹且惡之,況此人兄弟輕我邪!此而可忍,孰不可忍」則苦爭之不得,遂害之,幷戮 及張華、裴頠之被誅也,倫、秀以宿憾收系兄弟。梁王肜救系等,倫怒曰:「我於 系表殺秀以謝氏羌,不從。倫、秀譖之,系坐免官,以白衣還第,

羣官通議。」八坐議以「系等淸公正直,爲姦邪所疾,無罪橫戮,冤痛已甚。 功臣之後,棄賢者子孫,而詩人以爲刺。 孫秀逆亂,滅佐命之國,誅骨鯁之臣,以斵喪王室,肆其虐戾,功臣之後,多見泯滅。 彰明枉直,顯宣當否,使冤魂無愧無恨,爲恩大矣。」永寧二年,追贈光祿大夫,改葬,加弔 張華、裴頠,各以見憚取誅於時,孫、結同以羔羊被害,歐陽建等無罪而死,百姓憐之。 政, 貶惡嘉善, 春秋之美談。是以武王封比干之墓, 表商容之閭, 誠幽明之故有以相通也。 更日月之光照,布惟新之明命,然此等未蒙恩理。昔欒郤降在阜隸,而春秋傳其人,幽王絕 後齊王冏起義時,以襲、解爲冤首。倫、秀旣誅,冏乃奏曰:「臣聞興微繼絕,聖主之高 臣備忝右職,思竭股肱,獻納愚誠。若合聖意,可 如大司馬所啓, 至如

結字叔連,少與系齊名。辟公府掾,累遷黃門侍郎,歷散騎常侍、豫州刺史、魏郡太守、

御史中丞。

氏,明日當嫁,而禍起,裴氏欲認活之,女曰:「家旣若此, 舊制,女不從坐,由賭女始也。 後贈|結光祿大夫,改葬,加弔祭。 時孫秀亂關中,結在都,坐議秀罪應誅, 秀由是致憾。 我何活爲」亦坐死。 及系被害,結亦同戮。 朝廷遂議革 女適

結弟育,字稱連,名亞二兄。 歷公府掾、太子洗馬、尚書郎、衞軍長史、弘農太守,與二

兄俱被害,妻子徙邊。

孫旂

庫 廉,累遷黃門侍郎 火,発官。 孫旂字伯旗,樂安人也。父歷,魏晉際爲幽州刺史、右將軍。 歲餘,出爲兗州 出爲荆州 刺 刺史,名位與二解相亞。 史,遷平南將軍 丁、假節 永熙中,徵拜太子詹事,轉衞尉,坐武 旂潔靜,少自修立。 察孝

從秀開 丞, ,轉爲· 游子弼及弟子髦、輔、**啖四** 神 上將軍,領射 武門下 觀閱器械。 聲校尉。 兄弟旬月相次爲 人,並有吏材,稱於當世,遂與孫秀合族。 **尷爲武衞將軍,領太子詹事。** 公府掾、尚書郎。 **啖為武威** 丽 又爲中堅將軍,領尙 《將軍,領太子左率。 及趙王倫起事 書左

列傳第三十 孫旂

皆賜爵開國郡侯。 推崇|族爲車騎將軍、開府。

之不可,但慟哭而已。及齊王冏起義,四子皆伏誅。 初,旂以弼等受署偽朝,遣小息回責讓弼等,以過差之事,必爲家禍。弼等終不從,旂制 襄陽太守宗岱承冏檄斬旂,引 夷

弟尹、字文旗、歷陳留、陽平太守、早卒。

孟觀

觀受賈后旨宣詔,頗加誣其事。 封上谷郡公。 婦姑之禮,陰欲誅楊駿 孟觀字叔時,渤海東光人也。 而廢太后,因駿專權,數言之於帝,又使人諷觀。 及廢誅,以觀爲黃門侍郎,特給親信四十人。 少好讀書,解天文。 惠帝卽位,稍遷殿中中郎。 會楚王瑋將討駿, 遷積弩將軍, 賈后悖

中士卒,身當矢石,大戰十數,皆破之,生擒萬年,威慴氐羌。 心,難以 在關中,雍容貴戚,進不貪功、退不懼罪,士卒雖衆,不爲之用,周處喪敗,職此之由,上下離 |氐帥齊萬年反於關中,衆數十萬,諸將覆敗相繼。 勝敵。 以觀沈毅,有文武材用,乃啓觀討之。觀所領宿衞兵,皆趫捷勇悍,幷統關 中書令陳準、監張華,以趙、梁諸王 轉東羌校尉,徵拜右將軍。

觀 淮 及帝反正,永饒冶令空桐機斬觀首,〔三〕傳于洛陽,遂夷三族。 南 王允前 義軍 趙 王 |倫篡位,以觀所在著績,署爲安南將軍、監河北諸軍事、

(三)假節,屯宛。 旣起,多勸 鋒將軍 一計倫 觀應齊王冏 戰死。 ,觀以紫宮帝坐無他變, 孫秀以觀杖兵在外,假言严爲尤兵 謂倫應之, 遂不從衆議而爲倫守。 所害,贈積弩將軍 觀子平為 以安

牽秀

辭亢厲,以譏抵外戚。 空張華請爲長史。 相 輕侮,愷諷司隸荀愷奏秀夜在道中載高平國守士田興妻。 爲太保衞瓘、尚書崔洪所知。 奉秀字成叔,武邑觀津人也。 于時朝臣雖多證明其行,而秀盛名美譽由是而損,遂坐発官。 太康中,調補新安令,累遷司空從事中郎。 祖招, 魏雁門太守。 秀博辯有文才,性豪俠, 秀卽表訴被誣, 與帝舅王愷 論愷穢 弱冠 得

故見親: 謂 以秀為冠軍將軍,與陸機、王粹等共為河橋之役。機戰敗,秀證成其罪,又諂事黃門孟玖, 居司 秀任氣,好爲將帥。 `直之任,當能激濁揚淸,處鼓鞞之間,必建將帥之勳。 於穎。 惠帝西幸長安,以秀爲尚書。秀少在京輦,見司隸劉毅奏事而扼腕慷慨 張昌作亂,長沙王乂遣秀討昌,秀出關,因奔成都王穎。 及在常伯納言,亦未曾有規獻 穎伐义,

列

确違之奇也。

將 不 ·敢進。 輔顒以守關中,顧密遣使就東海王越求迎,越遣將麋晃等迎顒。四時秀擁衆在馮翊, 河 間 王 順長史楊騰前不應越軍,懼越討之,欲取秀以自效,與馮翊大姓諸**嚴**詐稱關命,使 顋甚親任之。 關東諸軍奉迎大駕,以秀爲平北將軍,鎭馮翊。 秀與顒將馬瞻等 晃

終播 從弟胤

秀罷兵,秀信之,騰遂殺秀於萬年。

繆播字宣則,蘭陵人也。父悅,光祿大夫。 播才思清辯,有意義。 高密王泰爲司空,以

播爲祭酒,累遷太弟中庶子。

委以 分陝 乃復說順,急斬方以謝,可不勞而安。 播 |胤 「今據形勝之地, 為伯 心膂。 惠帝幸長安, 爲越游說,陰欲殺之。 播、胤素爲顒所敬信,旣相見,虛懷從之。 播從弟右衞率胤,顒前妃之弟也。 河間王顒欲挾天子令諸侯。 國富兵强,奉天子以號令,誰敢不服!順惑方所謀, 播等亦慮方爲難,不敢復言。 **顧從之,於是斬方以謝山東諸侯。** 越遺播、胤詣長安說顒,令奉帝還洛,約 東海王越將起兵奉迎天子,以播父時故吏, 顒將 時越兵鋒甚盛,顒深憂之,播、胤 張方自以罪 重, 顒後悔之,又以兵 獪 懼 豫 爲 不 、誅首, 決。 方惡 謂 與 飅

距 越,屢爲越所敗。 帝反舊都,播亦從太弟還洛,契闊 「艱難、深相親狎。

惋,咸曰:「善人,國之紀也,而加虐焉,其能終乎!」及|越薨,帝贈|播衞尉,祠以少牢。 無之,不自我先,不自我後,哀哉!」起執播等手,涕泗歔欷不能自禁。 國,故委以心膂。 隆,專管詔 及帝崩,太弟卽帝位,是爲懷帝,以播爲給事黃門侍郞。 命。 時越威權自己,帝力不能討, 越懼爲己害,因入朝,以兵入宫,執播等於帝側。 心甚惡之。 以播、胤等有公輔之量,又盡忠於 俄轉侍中, 帝歎曰:「姦臣賊 越遂害之。 徙中書令, 任遇 子 朝野憤 無 世 日

守。 一級、太史令<u>高堂沖並參機密,為東海王</u>越所害。 胤乃還洛。 大駕東還。 及王浚軍逼鄴,石超等大敗,胤奔東海王越於徐州,越使胤與播俱入關, 胤字休祖,安平獻王外孫也、 懷帝卽位,拜胤左衞將軍,轉散騎常侍、太僕卿。 越以胤爲冠軍將軍、南陽太守。 與播名譽略齊。 胤從藍田出武關,之南陽,前守衛展距胤不受, 初爲尚書郎,後遷太弟左衞率,轉魏郡太 旣而與播及帝舅王延、尚書何 而所說得行,

皇甫重

皇甫重字倫叔,安定朝那人也。 性沈果,有才用,爲司空張華所知,稍遷新平太守。 沅

康中,華版爲秦州 刺史。

兵,徵含爲河南尹。含旣就徵,重不奉詔,顯遣金城太守游楷、隴西太守韓稚等四郡兵 去一方之患。可表遷重爲內職,因其經長安,乃執之。」重知其謀,乃露檄上尚書,以顒信任 將李含先與商、重有隙、每銜之、及此、說顯曰:「商爲义所任、重終不爲 李含,將欲爲亂,召集隴上士衆,以討含爲名。义以兵革累興,今始寧息,表請遣使詔重罷 齊王冏輔政,以重弟商爲參軍。 **冏誅,長沙王乂又以爲參軍。** 時河間王顒鎭關 八人用, 宜急除之,以 其

手韶,使游楷盡罷兵,令重進軍討顒。商行過長安,至新平,遇其從甥,從甥素惟商, 、河東太守,領萬餘人於闕門距張方,爲方所破,顯軍遂進。以旣屢敗,乃使商間行齎帝 頃之,成都王穎與顒起兵共攻义,以討后父尚書僕射羊玄之及商爲名。义以商爲左將 得商,殺之。 以告

頥

で、順捕

史宣 在 云:「已爲河間圧所害。」重失色,立殺騶。 爲 地窟 詔 义 喻之令降。 既敗,重猶堅守、閉塞外門,城內莫知,而四郡兵築土山攻城,重輒以連弩射之。所 以防外攻,權變百端,外軍不得近城,將士爲之死戰。 重 知 非朝廷本意,不奉詔。 於是城內知無外救,遂共殺」重。 獲御史騶人問曰:「我弟將兵來,欲至未。」翳 **頥知不可拔,乃上表求遣御**

出兵。 先是,重被圍急,遣養子昌請救於東海王越,越以顒新廢成都王穎,與山東連和,不肯

張

初補

駕。

事起倉卒,百官初皆從之,俄而又共誅昌。

展輔字世偉,南陽西鄂人,漢河間相衡之後也。少有幹局,與從母兄劉喬齊名。 藍田令,不爲豪强所屈。 時强弩將軍龐宗,西州大姓,護軍趙浚、宗婦族也、故僮

僕放縱,爲百姓所 患。 輔繩之,殺其二奴,又奪宗田二百餘頃以給貧戶,一縣稱之。 轉 Щ

令,太尉 陳準家僮亦暴横,輔復擊殺之。累遷尚書郎,封宜昌亭侯

省 義 秀惑之,將 長 石崇等 陽 察輔前 史韓預 王 轉 共 御 誠 弘 强 相 後 史中丞。 繩 恕,不 聘其 行 引 輔以 事 重,及義陽王威有詐冒事,輔並糾劾之。 小是 女爲妻。 以 法 時積弩將軍孟觀與明威將軍郝彦 介意。 國 之愚 鯆 與秀牋曰:「輔 輔爲中正,貶預以淸風俗,論 然輔 臣 |而已。」|秀雖凶狡,知輔雅正,爲威所誣 母 年七十六,常見憂慮, 徒 知希慕古人,當官 不協,而 梁州 者稱之。 恐輔將以 刺史楊欣有姊喪、未經 而 觀因軍事害彥,又賈謐、潘岳 行,不復 及孫秀執 怨 乃 疾 獲罪 自 止 權 知 威 小 爲 願 構 身 明公留神 輔 旬 計。 於秀,

官。 顒德之,乃以 州 水故帳下督富整所殺。 議,未決。 刺 楷聞輔之還,不時迎輔,陰圖之。 史劉沈、秦州刺史皇甫重使討顒。 後 遷馮翊太守。 雅子|| 村有武幹, 斬異議者, 即收兵伐輔。 輔代重爲秦州刺史。 是時長沙王乂以河間王顒專制關中,有不臣之跡,言於惠帝,密詔雍 當赴順之難,金城太守游楷亦皆有功,轉梁州刺史,不之 又殺天水太守封尚,欲揚威西土。召隴西太守韓稚 於是沈等與顒戰於長安,輔遂將兵救顒,沈等敗績。 輔與稚戰於遮多谷口,輔軍敗績,爲天 會

事唯 濟事 史也。」又論魏武帝不及劉備,樂毅減於諸葛亮,詞多不載。 勸,惡足以監誡,人道之常。 傳,逞辭流 臣之道,不如三也。 初 五 之國,三歸反坫,皆鮑不爲。」又論班固、司馬遷云:「遷之著述,辭約而 十萬言,班固敍二百年事乃八十萬言,煩省不同,不 輔嘗著論云:「管仲不若鮑叔,鮑叔知所奉,知所投。 離,亦足以明其大才。 遷旣造創,固又因 中流 故述辯士則辭藻華靡,敍實錄則隱核名檢,此所以遷稱良 小事,亦無取焉,而 循,難易益 不同 班皆書之,不如二也。 矣。 如遷 又遷為蘇秦 管仲奉主而不能濟,所奔又 也。 、張儀、范睢 良史述事,善足 事 毁貶 車, 晁錯,傷忠 敍 、蔡澤作 三千 以 非 獎 年

李含

内寵, 長。 保掾轉秦國 年少,少恃豪族,以含門寒微,欲與結交,含距而不納,商恨焉,遂諷州以短檄召含爲門亭 會州刺史郭奕素聞其賢,下車擢含爲別駕,遂處羣僚之右。 李含字世容,隴西狄道人也。僑居始平。少有才幹,兩郡並舉孝廉。 疾 含不事己, 郎中令。 遂 奏|含不應除喪。本州大中正傳祗以名義 司徒選含領始平中正。 秦王柬薨,含依臺儀,葬訖除喪。 尋舉秀才,薦之公府,自太 、貶含。 中丞傅咸上表 安定皇甫商州 尚書趙浚有 里

|含日:

奪其 也。 卑,非所宜言耳。今天朝告于上,欲令藩國服于下,此爲藩國之義隆,而天朝之禮薄 年,而奕超爲別駕。 能 !協和流俗,然其名行峻厲,不可得掩,二郡並舉孝廉異行。 、中正。 天王之朝,旣葬不除,藩國之喪,旣葬而除。 又云諸王公皆終喪,禮寧盡乃敍,明以喪制宜隆,務在敦重也。 秦王之薨,悲慟感人,百僚會喪,皆所目見。 臣州秦國郎中令始平李含,忠公清正,才經世務,實有史魚秉直之風。 太保衛瓘辟含爲掾,每語臣曰:「李世容當爲晉匪躬之臣 而今以含俯就王制,謂之背戚居榮, 蕃國欲同不除,乃當責引尊準 尚書郭奕臨州,含寒門少 夫寧盡乃敍,明以 雖以此不

哀其病耳。

異於天朝,制使終喪,未見斯文。

國制旣葬而除,旣除而祔。

爱自漢魏迄

于聖晉,文皇升遐,武帝崩殂,世祖過哀,陛下毀頓,銜疚諒闇,以終三年,率土臣妾豈

不可偏耳。 祖之崩,數旬卽吉,引古繩今,闔世有貶,何但李含不應除服。今也無貶,王制故也。 因曰王未有廟,主不應除服。 秦王始封,無所連祔,靈主所居,即便爲廟。 不問國制云 於惡。若謂臺府爲傷敎義,則當據正,不正符敕,唯含是貶,含之困躓尙足惜乎!國制 不聽差代。葬訖,含猶躊躇,司徒屢罰訪問,踧含攝職,而隨擊之,此爲臺敕府符陷含 大制不可而曲邪。且前以含有王喪,上爲差代。尚書敕王葬日在近,葬訖,含應攝職, 聖上諒闇,哀聲不輟,股肱近侍,猶宜心喪,不宜便行婚娶歡樂之事,而莫云者,豈不以 何,而以無廟爲貶。以含今日之所行,移博士使案禮文,必也放爋之殂,遏密三載,世 之臣,獨遂于下,此不可安。復以秦王無後,含應爲喪主,而王喪旣除而祔,則應吉祭。 無攀慕遂服之心,實以國制不可而踰,故於旣葬不敢不除。 天王之喪,釋除於上,藩國

所邀,中正龐騰便割含品。臣雖無祁大夫之德,見含爲騰所侮,謹表以聞,乞朝廷以時 爲州都,至意在欲隆風教,議合已過,不良之人遂相扇動,冀挾名義,法外致案,足有 切,形于文墨。含之固讓,乃在王未薨之前,葬後躊躇,窮於對罰而攝職耳。臣從弟祗 人,不宜爲中正。後爲郎中令,又自以選官引臺府爲比,以讓常山太守蘇韶,辭意懇 又含自以隴西人,雖戶屬始平,非所綜悉。自初見使爲中正,反覆言辭,說非始平

博議,無令騰得妄弄刀尺。

帝不從,含遂被貶,退割爲五品。 爲大臣,雖見割削,不應降爲此職。 歸長安,歲餘,光祿差含爲壽城邸閣督。 **韶停。後爲始平令。** 司徒王戎表含曾

張方 **頥表請含爲征西司馬,甚見信任。頃之,轉爲長史。 頥誅夏侯奭,爰齊王冏使與趙王倫,遣** 率衆赴倫,皆含謀也。 及趙王倫篡位,或謂孫秀曰:「李含有文武大才,無以資人。」秀以爲東武陽令。 後顧聞三王兵盛,至乃加含龍驤將軍,統席遠等鐵騎,迴遣張 河間王

方軍以應義師。

天子反正,含至潼關而還。

冏,拜含爲都督,統張方等率諸軍以向洛陽。含屯陰盤,而長沙王乂誅冏,含等旋師。 齊王越親而專執威權,朝廷側目。今檄長沙王令討齊,使先聞於齊,齊必誅長沙,因傳檄以 馬出奔于願,矯稱受密詔。 被西藩枉害。含心不自安。問右司馬趙驤又與含有隙,問將閱武,含懼驤因兵討之,乃單 l倫之信臣,懼罪至此,不宜數與相見。」

商知而恨之。及

商當還都,

順置酒餞行,

商因與含念 加齊罪,則冏可擒也。旣去齊,立成都,除逼建親,以安社稷,大勳也。」順從之,遂表請討 爭,顒和釋之。後含被徵爲翊軍校尉。時商參齊王冏軍事,而夏侯奭兄在冏府,稱奭立義, 初,梁州刺史皇甫商爲趙王倫所任,倫敗,去職詣顒,顒慰撫之甚厚。含諫顒曰:「商, 順即夜見之,乃說順曰:「成都王至親,有大功,還藩,甚得衆心。

列

與重構隙。 黨顒,請召重還。 藩,志望未允。 初 含之本謀欲幷去以、冏,使權歸於顒,含因得肆其宿志。 **顒自含奔還之後,委以心膂,復慮重襲己,乃使兵圍之,更相表罪。** 問表|含爲河南尹。時商復被以任遇,商兄|重時爲秦州刺史,含疾商滋甚,復 商說义曰:「河間之奏,皆李含所交構也。若不早圖,禍將至矣。且河間 既長沙勝齊,顒、穎猶各守 侍中馮蓀

前舉,由含之謀。」以乃殺含。 中官私奴婢萬餘人,而西還長安。 壘,出其不意,此用兵之奇也。」乃夜潛進逼

洛城七里。

以旣新捷,不以爲意,忽聞方壘成, 騰,人情挫衄,無復固志,多勸|方夜遁。 |方曰:「兵之利鈍是常,貴因敗以爲成耳。 我更前作 城內,方軍望見乘輿,於是小退,方止之不得,衆遂大敗,殺傷滿于衢巷。方退壁于十三里 齊王問,遣方領兵二萬為前鋒。及問被長沙王乂所殺,顒及成都王顯復表討义,遣方率衆 乃出戰,敗績。 自函谷入屯河南。 張方,河間人也。 世貧賤,以材勇得幸於河間王顒,累遷兼振武將軍。 永寧中,顧表討 張方 東海王越等執义,送于金墉城。 惠帝遣左將軍皇甫商距之,方以潛軍破商之衆,遂入城。义奉帝討方于 **甌加方右將軍、馮翊太守。** 方使郅輔取义還營,炙殺之。於是大掠路

爲 及帝自鄴還洛,方遣息羆以三千騎奉迎。將渡河橋,方又以所乘陽燧車、青蓋、素升三百人 小 願出奔,方乃入洛陽。 鹵 **蕩陰之役,** 簿、「引迎帝至芒山下。 順又遣<u>方鎭洛陽,上官已、苗願等距之,大敗而退。</u> 覃於廣陽門迎方而拜,方馳下車扶止之。於是復廢皇后羊氏。 |方自帥萬餘騎奉雲母輿及旌旗之飾,衛帝||而進。初,|方見帝 清河王覃夜襲已、願,

將拜,帝下車自止之。

中,軍人引帝出,方於馬上稽首曰:「胡賊縱逸,宿衞單少,陛下今日幸臣壘,臣當捍禦寇難, 報方,欲廢太弟,方以爲不可。 致死無二。」於是軍人便亂入宮閣,爭割流蘇武帳而爲馬帴。 須 、天子出,因劫移都。乃請帝謁廟,帝不許。 方在洛旣久,兵士暴掠,發哀獻皇女墓。軍人喧喧,無復留意,議欲西遷,尙匿其跡,欲 方遂悉引兵入殿迎帝,帝見兵至,避之於竹林 方奉帝至弘農,願遣司馬周弼

輿迫脅范陽王虓距逆詔命,及東海王越等起兵於山東,乃遣方率步騎十萬往討之。 霸上,而 帝至長安,以方爲中領軍、錄尚書事,領京兆太守。時豫州刺史劉喬檄稱潁川太守劉 劉 喬爲虓等所破。 顧聞 意數,大懼,將罷兵,恐方不從,遲疑 未決 方屯兵

畢垣 初,方從 河 間 Щ 東來,甚微賤,長安富 冠族,爲方所侮,忿而說顧曰:「張方久屯霸上,聞山東賊盛,盤桓不進,宜防 人郅輔厚相供給。 及貴, 以輔 爲帳下 督, 甚昵之。 顒

其未 卿, 越,冀東軍可 入,守閤者不疑,因火下發函,便斬方頭。 人謂卿知之。 但言爾爾。 萌。 遺卿取之可乎。」又曰:「爾。」 其親 罷。 信郅輔具知其謀矣。」而繆播等先亦構之,顯因使召輔,垣迎說輔曰:「張方欲 不然,必不免禍。」輔旣入,顧問之曰:「張方反,卿知之乎。」輔曰:「爾。」顧 及聞方死,更爭入關,願頗恨之,又使人殺輔。 王若問卿,何辭以對。」|輔驚日:「實不聞方反,爲之若何。」|垣日:「王若問 **顒於是使輔送書於方,因令殺之。** 顒以輔爲安定太守。 初,繆播等議斬方,送首與 輔旣昵於方,持刀而

者乎! 參謀 王室。 史臣曰:晉氏之禍難荐臻,實始藩翰。 古人所以危邦不入,亂邦不居,戒懼於此也。 或抗忠盡節,或飾詐懷姦。 雖邪正 解系等以干時之用,處危亂之辰,並託迹府朝, 殊途,而 咸至誅戮,豈非時艱政紊,利深禍速

閻鼎

弟司隸校尉組,及中領軍華恒、河南尹華薈,在密縣建立行臺,以密近賊,南趣許願。 喪,乃於密縣間鳩聚西州流 閻 開字台臣,天水人也。初爲太傅東海王越參軍,轉卷令,行豫州刺史事,屯許昌。遭 人數千,欲還鄉 里。 値京 師失守,秦王 出 奔密 中, 司 空荀藩、 司徒

左長史劉疇在密爲塢主,中書令李暅、尽太傅參軍騶捷劉蔚、鎭軍長史周顗、司馬李述皆 愈以鼎有才用,且手握强兵,勸藩假鼎冠軍將軍、豫州刺史,廚等爲參佐

登壇告天,立社稷宗廟,以鼎爲太子詹事,總攝百揆。 北道近河,懼有抄截,欲南自武關向長安。疇等皆山東人,咸不願西入,荀藩及疇、捷等並 **遂至長安,而與大司馬南陽王保、衞將軍梁芬、京兆尹梁綜等並同心推戴,立王爲皇太子,** 山陵,徑據長安,綏合夷晉,興起義衆,克復宗廟,雪社稷之恥。 鼎得書,便欲詣洛,流 計,謂疇、捷等曰:「山東非霸王處,不如關中。」河陽令傅暢遺鼎書,勸奉寮王過洛陽,謁拜 人,率餘衆西至藍田。時劉聰向長安,爲雍州刺史賈疋所逐,走還平陽。疋遣人奉迎秦王, 鼎少有大志,因西土人思歸,欲立功鄉里,乃與撫軍長史王毗、司馬傳遜懷翼戴秦王之 鼎追藩不及, 随等見殺, 唯閩、 述走得免。 遂奉秦王行,止上洛,爲山賊所襲,殺百餘

夷護軍索綝並害其功,且欲專權,馮翊太守梁緯、北地太守梁肅,並綜母弟,綝之婣也,謀 欲除鼎,乃證其有無君之心,專戮大臣,請討之,遂攻鼎。鼎出奔雍,爲氐竇首所殺,傳首 | 梁綜與鼎爭權,鼎殺綜,以王毗爲京兆尹。 鼎首建大謀,立功天下。 始平太守麴允、撫

索睛子絲

<u></u> 張甝、索診、索永俱詣太學,馳名海內,號稱「敦煌五龍」。 四人並早亡,唯靖該博經史,兼通 索靖字幼安,敦煌人也。累世官族,父湛,北地太守。 **靖少有逸羣之量,與鄉人氾衷、**

閣,不宜遠出邊塞。 拜駙馬都尉,出爲西域戊已校尉長史。太子僕同郡張勃特表,以靖才藝絕人,宜在臺 武帝納之,擢爲尙書郎。 與襄陽羅尚、河南潘岳、吳郡顧榮同官,咸

器服焉。

內緯。

州辟別駕,郡舉賢良方正,對策高第。

傅玄、張華與靖一面,皆厚與之相結。

靖與尙書令衞瓘俱以善草書知名,帝愛之。 瓘筆勝購,然有楷法,遠不能及購。

| 靖有先識遠量,知天下將亂,指洛陽宮門銅駝,歎曰:「會見汝在荆棘中耳!|

歸在臺積年,除雁門太守,遷魯相,又拜酒泉太守。

惠帝即位,賜爵關內侯。

始平內史。 兵,與賊戰,大破之,婦亦被傷而卒,追贈太常,時年六十五。後又贈司空,進封安樂亭侯, 太安末,河間王願舉兵向洛陽,拜靖使持節、監洛城諸軍事、遊擊將軍,領雍、秦、凉義 元康中,西戎反叛,拜靖大將軍梁王肜左司馬,加蕩寇將軍,屯兵栗邑,擊賊,敗之。 及趙王倫篡位,靖應三王義舉,以左衞將軍討孫秀有功,加散騎常侍, 遷後將

靖 著 $ar{\Xi}$ 一行三統正驗論,辯理陰陽氣運。 又撰索子、晉詩各二十卷。 又作草書狀,

辭日:

棣融 及其 若驚鸞。 草 若登高望其類,或若旣往 玄螭狡獸 巧茲生。 扇 樹。 融載 逸遊 聖皇御世,隨時之宜。 i 嬉 其 枝條順) 肸嚮, 其 舒翼未發,若舉復安,蟲蛇虬蟉,或往或還。 損之隸草,以崇簡易。 華。 間, 乍正乍邪。 氣,轉相比附,窈嬈廉苫, 玄熊對踞于山嶽,飛燕相追而差池。 騰緩飛颺相 而 倉頡旣生,書契是爲。 中顧,或若俶儻 騏驥暴怒逼其轡,海水窊隆揚其波。 奔趣。 百官畢修,事業並 凌魚奮尾,蛟龍反據。 隨體散布。 而不羣,或若自檢於常度。 麗。 科斗鳥篆,類物象形。 舉而察之,又似乎和 紛擾 類阿那以羸形,欻奮釁 蓋草書之爲狀也,婉若銀鉤,漂 優以猗靡, 投空自竄,張設牙距。 芝草蒲陶還相 中 持 叡哲變通 風 疑 吹林,偃 而 而 繼 猶 桓 桓。 棠 或

杜度運其指,使伯英迴其腕。 音翰厲, 溢越流漫。 體,靡形 於是多才之英,篤藝之彥,役心精微,耽此文憲。 不判。 去繁存微,大象未亂 忽班 班而成章,信奇妙之煥爛。 著絕勢於紈素,垂百世之殊觀。 上理開元,下周謹案。 體磥落而壯麗,姿光潤以粲粲。命 守道兼權, 騁辭放手,雨行冰散。 觸類 生變。 離析八 高

一六五〇

先時,」購行見姑臧城南石地,曰:「此後當起宮殿。」至張駿,於其地立南城,起宗廟,建

宮殿焉。

|靖有五子: 鯁、 綣、 璆、 津、 綝,皆舉秀才。 | 津,安昌鄕侯,卒。 少子綝最知名。

舉秀才,除郎中。嘗報兄讎,手殺三十七人,時人壯之。俄轉太宰參軍,除好時令,入爲黃 |綝字巨秀,少有逸羣之量,靖每曰:「綝廊廟之才,非簡札之用,州郡吏不足汙吾兒也。」

門侍郎,出參征西軍事,轉長安令,在官有稱。

輿,以功拜鷹揚將軍,轉南陽王模從事中郎。 太守。綝有威恩,華夷嚮服,賊不敢犯。 將呂逸,又破聰黨劉豐,遷新平太守。聰將蘇鐵、劉五斗等劫掠三輔,除綝安西將軍、馮翊 及成都王穎劫遷惠帝幸鄴,穎爲王浚所破,帝遂播越。 劉聰侵掠關東,以綝爲奮威將軍以禦之,斬聰 河間王顒使張方及綝東迎乘

侍中、太僕,以首迎大駕、升壇授璽之功,封弋居伯。又遷前將軍、尚書右僕射、領吏部、京 救|新平,小大百戰,綝手擒賊帥|李羌,與閻鼎立|秦王爲皇太子,及卽尊位,是爲愍帝。|綝遷 刺史賈疋、扶風太守梁綜、安夷護軍麴允等糾合義衆,頻破賊黨,修復舊館,遷定宗廟。進 及懷帝蒙塵,長安又陷,模被害,綝泣曰:「與其俱死,寧爲伍子胥。」乃赴安定,與雍州

幸宗 兆 尹 廟 加平東將軍,進號征東。 寵 靈,百辟宣力,得從藩衞,託乎羣公之上。 社稷之不隕,實公是賴,宜贊百揆,傅琬 尋又詔曰:「朕昔遇厄運,遭家不造,播越宛楚,爰失舊京。

股 躬。 其 授衞 照軍,領太尉,位特進,軍國之事悉以委之。」

綝戰,大敗之, 梁單馬 **芝麥苗,綝又擊破之。** 洛 郡公,食邑萬戶,拜夫人荀氏爲新豐君,子石元爲世子,賜子弟二人鄉亭侯。 及 劉 曜 侵逼王 而走。 自長安伐劉聰, 轉驃騎大將軍、尚書左僕射、錄尚書,承制行事。 聰將趙染杖其累捷,〔亞有自矜之色,帥精騎數百與 呼日逐王呼延莫,以功封 劉 曜 入關

廟,一 官饑乏,採稆自存。[10]時三秦人尹桓、解武 軍集,乃當 斷 陵 隴 物不能減半,于今猶 道,以觀其變。」從事 劉 曜復率 發。 中 衆 物何乃多邪。」綝對曰:「漢天 麴允欲挾天子 充山 入 (馮翊,帝累徵兵於南陽王保, 保左右 陵。 中郞 有 漢武 朽帛委積 裴詵 趣保,綝以保必逞私欲,乃止。 帝饗年 日:「蛇已螫頭, ,珠玉未盡。 久 長,比崩而茂陵不復容物,其樹皆已可拱。 (子即: 等數千家,盜發漢霸、杜二陵,多獲珍寶。 位 此二陵是儉者耳,亦百 頭 年 可 而 截不了保以胡崧行前鋒都督,須諸 議曰:「蝮蛇在手,壯士解其腕。 爲陵,天下 自長安以西,不復奉朝廷。 貢賦三分之,一 世之誠 也 赤眉 供宗 帝 問 取 且 百

後 劉 曜 叉 率衆圍京城,綝與麴允固守長安小城。 胡崧承檄奔命 ,破曜于靈臺。 松慮國

列

州義衆千人守死不移。帝使侍中宋敞送牋降于曜。[1] 綝潛留敞,使其子說曜曰:「今城中 微,亦宜早悟天命。孤恐霜威一震,玉石俱摧。」及帝出降,綝隨帝至平陽,劉聰以其不忠於 |綝所說如是,天下之惡一也,輒相爲戮之。若審兵食未盡者,便可勉强固守。 如其糧竭兵 食猶足支一歲,未易可克也。若許綝以車騎、儀同、萬戶郡公者,請以城降。」曜斬而送之 家威舉,則麴、索功盛,乃案兵潤北,遂還槐里。城中饑窘,人相食,死亡逃奔不可制,唯凉 本朝,戮之於東市。 曰:「帝王之師,以義行也。孤將軍十五年,未嘗以譎詭敗人,必窮兵極勢,然後取之。 今索

賈疋

姓心,乃譖疋于南陽王模,模以軍司謝班伐之。曰三疋奔瀘水,曰三與胡彭蕩仲及民竇首結爲 爲武夫之所瞻仰,願爲致命。 兄弟,聚衆攻班。 **賈疋字彥度,武威人,魏太尉翮之曾孫也。少有志略,器望甚偉,見之者莫不悅附,特 綽奔武都,正復入安定,殺班。** 初辟公府、遂歷顯職、遷安定太守。雍州刺史丁綽、貪橫失百 愍帝以**匹為驃騎將軍**、日巴雍州刺史,封酒

時諸郡百姓饑饉,白骨蔽野,百無一存。疋帥戎晉二萬餘人,將伐長安,西平太守竺恢

退走。 護帥羣胡攻之,自以此敗走,夜墮于澗,爲夫護所害。 亦固守。日三劉粲聞之,使劉曜、劉雅及趙染距疋,先攻恢,不克,疋邀擊,大敗之,曜中流矢, 疋追之,至于甘泉。 旋自渭橋襲蕩仲,殺之。 **| 正勇略有志節,以匡復|| | 国為己任,不** <u>遂迎秦王,奉爲皇太子。</u> 後蕩仲子夫

幸顚墜,時人咸痛惜之。

宗周遭犬戎而東徙,有晉違獷狄而西遷,彼旣靈慶悠長, 攸 將綝尤材謝輔臣,何修短之殊途,而成敗之異數者 配天,校績論功,有足稱矣。 歸,曾無與二。閻鼎等忠存社稷,志在經綸,乃契闊艱難,扶持幼孺,遂得纂曉承緒,祀夏 史臣曰:自永嘉蕩覆,字內橫流,億兆靡依,人神乏主。于時武皇之胤,惟有建興,衆望 然而抗滔天之巨寇,接彫弊之餘基,威略未申,尋至傾覆。 也? 此則禍難遄及,豈愍皇地非奧主,

無聞餘慶。 贊曰:懷惠不競,戚藩力爭。 愍皇纂戎,實賴羣公。 狙詐參謀, 鼎圖福始,綝遂凶終。 憑凶亂政。 爲惡不已,並罹非命。 解繆忠肅

校勘記

1〕宗岱 惠紀、李特載記作「宋岱」。

列傳第

三十

賈疋

校勘

記

- 監河北諸軍事 勞校"「河北」當作「沔北」。按"通鑑八四作「沔北」。
- ヘミン 永饒冶 「治」,各本作「治」,今從殿本。 通鑑八四亦作「治」。據顧祖禹讀史方輿紀要五一,永

饒冶在今河南南陽市南。

越遣將麋晃等迎顒 河間王顒傅「迎」作「伐」,通鑑八六作「擊」,以下文所敍觀之,題傳、 **{通** {鑑

是。此「迎」字疑涉上文「求迎」而誤。

万五 臣從弟祗爲州都 各本「州都」下有「督」字、李校:「州都」下「督」字行、晉人稱本州大中正爲州

都。 按:宋本正無「督」字、今從之。

周校:三王者,齊、成都、河間也。河間所聞當云二王,顯條作「二王」。

てより 素升 周校:「升」未詳,疑「弁」字之誤。 アドリ

後顒聞三王兵盛

中書令李陋 愍紀作「中書郎李昕」, 王浚傳及通鑑八七又作「李絙」。

八九山 趙染 愍紀、劉琨傳作「趙冉」。

採稆自存 「稆」原作「梠」,據通鑑八九、通志一二五改。

宋敞 通鑑八九作「宗敞」。

模以軍 司 謝班伐之 「伐」,各本作「代」,今從殿本。 模伐疋,見南陽王模傳。

二三 瀘水 南陽王模傳作「盧水」。 記

王後立爲愍帝、此時不得先有愍帝。

二吾 西平太守 周校:「新平」誤「西平」、據麴允傳、劉聰載記。

(1次) 夫護 通鑑八八及八七胡注「夫護」皆作「天護」。

晉書卷六十

列傳第三十一

周後 子嵩 謨 從父弟馥

周浚字開林,汝南安成人也。父裴,四少府卿。 **浚性果烈,以才理見知,有人倫鑒識**

鄉人史曜素微賤,衆所未知,浚獨引之爲友,遂以妹妻之,曜竟有名於世

侯。 隨王渾伐吳,攻破江西屯戍,與孫晧中軍大戰,斬偽丞相張悌等首級數千,俘馘萬計, 沒初不應州郡之辟,後仕魏爲尙書郎。 累遷御史中丞,拜折衝將軍、揚州刺史,封射陽

進軍屯于橫江。

見矣。竊謂宜速渡江,直指建鄴,大軍卒至,奪其膽氣,可不戰而擒。」沒善其謀,便使白渾 於此,吳之朝野莫不震懾。今王龍驤旣破武昌,兵威甚盛,順流而下,所向輒克,土崩之勢 時聞龍驤將軍王濬旣破上方,別駕何惲說浚曰:「張悌率精銳之卒,悉吳國之衆,殄滅

列傅

將虧 吳軍,不使輕進。 **惲牋與浚曰:「書貴克讓,易大謙光,斯古文所詠,道家所崇。前破張悌,吳人失氣,龍驤因** 來受節度,未之聞也。且握兵之要,可則奪之,所謂受命不受辭也。今渡江必全克獲,將有 且 惲曰:「渾闇於事機,而欲愼己殆咎,必不我從。」|浚固使白之,渾果曰:「受詔但令江北抗衡 叨 居 何慮?若疑於不濟,不可謂智,知而不行,不可謂忠,實鄙州上下所以恨恨也。」渾執不聽 [無何而濟至,渾召之不來,乃直指三山, [三]孫晧遂降於濟。渾深恨之,而欲與濬爭功。 |詔令龍驤受我節度,但當具君舟楫,一時倶濟耳。」|惲曰:「龍驤克萬里之寇,以旣濟之功 年,移鎭秣陵。 陷其區字。 了雍穆之弘,興矜爭之鄙,斯愚情之所不取也。」

波得牋,即諫止渾,渾不能納,遂相表奏。 論其前後,我實緩師,動則爲傷,事則不及。而今方競其功。彼旣不吞聲, 貴州雖武, 豈能獨平江東! 今者違命, 勝不足多, 若其不勝, 爲罪已重 時與初平,屢有逃亡者,頻討平之。賓禮故老,搜求俊义,甚有威德,吳人

場之上,往往有襲奪互市,甚不可行,弟愼無爲小利而忘大備也。」候者得珪書以呈浚,浚 中,其兄」珪爲將在一秣陵,與戲書曰:「古者兵交,使在其間,軍國固當舉信義以相高。 初, 吳之未平也,沒在弋陽,南北爲互市,而諸將多相襲奪以爲功。吳將蔡敏守于沔 而 聞疆

曰:「君子也。」及渡江,求眭,得之,問其本,曰:「汝南人也。」|浚戲之曰:「吾固疑吳無君子,

而卿果吾鄉人。」

渾爲使持節、都督揚州諸軍事、安東將軍, 卒于位。 稱清臣宗。」帝並召用。 遷侍 武帝問沒…「卿宗後生,稱誰爲可。」答曰:「臣叔父子恢,稱重臣宗,從父子酸, 沒轉少府,以本官領將作大匠。 三子: 躓、 嵩、 謨。 躓嗣爵, 改營宗廟訖,增邑五百戶。 後代王 別有

然後揖讓以謝天下,誰敢不應,誰敢不從!」由是忤旨,出爲新安太守。 明周公之道,先雪社稷大恥,盡忠言嘉謀之助,以時濟弘仁之功,崇謙謙之美,推後己之誠, 澤被六州,功濟蒼生,欲推崇尊號。 天順時,義全而後取,讓成而後得,是以享世長久,重光萬載也。今議者以殿下化流江漢, 嵩上疏曰:「臣聞取天下者,常以無事。 | 嵩字仲智,狷直果俠,每以才氣陵物。 臣謂今梓宮未反,舊京未清,義夫泣血,士女震動;宜深 及其有事,不足以取天下。故古之王者,必應 元帝作相,引爲參軍。 及帝爲晉王,又拜奉朝

入,面責之曰:「卿矜豪傲慢,敢輕忽朝廷,由吾不德故耳。」|嵩跪謝曰:「昔唐虞至聖,四 | 嵩怏怏不悅,臨發,與散騎郎| 張嶷在侍中| 戴邈坐,褒貶朝士,又詆毀邈,邈密表之。 帝

六五九

卷 六十 カカ〇

凶在 棄市論,處以扇和減罪除名。時顗方貴重,帝隱忍。久之,補廬陵太守,不之職,更拜御史 朝。 陛下雖聖明御世,亦安能無碌碌之臣乎」帝怒,收付廷尉。

是時帝以王敦勢盛,漸疏忌王導等。嵩上疏曰:

來,德廢道衰,君懷術以御臣,臣挾利以事君,君臣交利而禍亂相尋,故得失之迹難可 其 **'朝,故無過任之譏,將明其節,故無過寵之謗。是以君臣並隆,功格天地。近代以** 臣聞明君思隆其道,故賢智之士樂在其朝, 忠臣將明其節, 故量時而後仕。 臣請較而明之。

濟其不: 功。 然後乃能行其私謀,以成篡奪之禍耳。豈遇立功之主,爲天人所相,而能運其姦計,以 漢,皆藉封土之强,假累世之寵,因闇弱之主,資母后之權,樹比周之黨,階絕滅之勢, 拱受成,委以權重,終致匡主,未有憂其逼己,還爲國蠹者也。始田氏擅齊,四王莽篡 以權勢,其興廢之事,亦可見矣。 及天下旣定,頗廢黜功臣者,何哉?武力之士不達國體,以立一時之功,不可久假 夫傅說之相高宗,申召之輔宣王,管仲之佐齊桓,憲范之翼晉文,或宗師其道,垂 近者三國鼎峙,並以雄略之才,命世之能,皆委賴俊

廷尉華恒以嵩大不敬

哲,終成功業,貽之後嗣,未有愆失遺方來之恨者也。

者衆、公私匱竭、倉庾未充、梓宮沈淪、妃后不反、正委賢任能推轂之日也。 大業,亦昔之一亮也。雖陛下乘奕世之德,有天人之會,割據江東,奄有南極,龍飛 心而哀歎哉! 志,近招當時之患,遠遺來世之笑。夫安危在號令,存亡在寄任,以古推今,豈可不寒 伍賢,遠虧旣往之明,顧傷伊管之交,傾巍巍之望,喪如山之功,將令賢智杜心,義士喪 晉祚方隆,而一旦聽孤臣之言,惑疑似之說,乃更以危爲安,以疏易親,放逐舊德,以佞 興復舊物,此亦羣才之明,豈獨陛下之力也。今王業雖建,羯寇未梟,天下蕩蕩,不賓 今王導、王廙等,方之前賢,猶有所後。至於忠素竭誠,義以輔上,共隆洪基,翼成 功業垂就, 海嵎,

於陛下也。古之明王,思聞其過,悟逆旋之言,至以明成敗之由,故採納愚言,以考虚 實,上爲宗廟無窮之計,下收億兆元元之命。臣不勝憂憤,竭愚以聞。 臣兄弟受遇,無彼此之嫌,而臣干犯時諱,觸忤龍鱗者何?誠念社稷之憂,欲報之

疏奏,帝感悟,故導等獲全。

列傳

第三十

周浚

失人情,故未加害,用爲從事中郎。嵩,王應嫂父也,以閩橫遇禍,意恒憤憤,嘗衆中云:「應 王敦旣害顗而使人弔嵩,嵩曰:「亡兄天下人,爲天下人所殺,復何所弔」」敦甚銜之,懼

經云。

不宜統兵。」 敦密使妖人|李脫誣嵩及周遊潛相署置, 遂害之。 **嵩精於事佛,臨刑猶於市誦**

謨以顕故,頻居顯**職**。 王敦死後,詔贈戴若思、 進王承等,而未及顕。 時謨爲後軍將

軍,上疏曰:

忘君,守死善道,有隕無二。躓之云亡,誰不痛心,况臣同生,能不哀結! 族結婚帝室,義深任重,庶竭股肱,以報所受。凶逆所忌,惡直醜正。身陷極禍,忠不 后共隆中興,仍典選曹,重蒙寵授,忝位師傅,得與陛下揖讓抗禮,恩結特隆。加以鄙 臣亡兄顗,昔蒙先帝顧眄之施,特垂表啓,以參戎佐,顯居上列,遂管朝政,並與羣

在耳。 撥 爲 閱還襲臣亡父侯爵。時<u>下</u>虛、庾亮並侍御坐, 虛云:「事了當論顯贈。」時未淹久,言猶 雖嵇紹 爲反正,以寧區宇。前軍事之際,聖恩不遺,取顗息閱,得充近侍。臣時面啓,欲令 、朝廷急於時務,不暇論及?此臣所以痛心疾首,重用哀歎者也。不勝辛酸,冒陳愚 王敦無君,由來實久,元惡之甚,古今無二。幸賴陛下聖聰神武,故能摧破凶强, 之不違難,何以過之!至今不聞復封加贈褒顯之言。不知與有餘責,獨負殊恩, 至於譙王承、甘卓,已蒙淸復,王澄久遠,猶在論議。況顗忠以衞主,身死王事,

款。

疏奏,不報。 謨復重表,然後追贈顕官。

謨歷少府、 丹楊尹、 侍中、 中護軍, 封西平侯。 卒贈金紫光祿大夫,諡

轉御史中丞、侍中,拜徐州刺史,加冠軍將軍、假節。 任責成,褒貶允當,請補尚書郞」。許之。 學,累遷司徒左西屬。「松」司徒王渾表「馥理識淸正, |馥字||祖宣,||浚從父弟也。父||蕤,|安平太守。 稍遷司徒左長史、吏部郎, 馥少與友人成公簡齊名,俱起家爲諸王文 棄有才幹,主定九品,檢括精詳。 徴為廷尉 選舉精密,論望益美。 臣委

還宮,出爲平東將軍、都督揚州諸軍事,代劉準爲鎭東將軍,與周玘等討陳敏,滅之,以功封 共除之,謀泄,爲巴所襲,奮被害,馥走得免。及巳爲張方所敗,召馥還攝 錄尙書,馥辭不受。厚令馥與上官已合軍,馥以巳小人縱暴,終爲國賊,乃共司隸滿奮 迎大駕,以馥爲中領軍,未就,遷司隸校尉,加散騎常侍、假節,都督諸軍事於澠 惠帝幸鄴,成都王穎以馥守河南 尹。 陳齡、上官已等奉淸河王覃爲太子,加馥衞將軍、 河南 尹。 **暨東海** 池 等謀

馥自經世故, 列 傳 第 三 十 每欲維正朝廷,忠情懇至。 周 渙 以東海王越不盡臣節,每言論厲然, 越深憚

路。荆、湘、江、揚各先運四年米租十五萬斛,布絹各十四萬匹,以供大駕。 上書曰:「不圖厄運遂至於此!戎狄交侵,畿甸危逼。臣輒與祖納、裴憲、華譚、孫惠等三十 平河朔,臣等勠力以啓南路。遷都弭寇,其計並得。 精卒三萬,奉迎皇駕。 患空乏。 JII |崎函險澀,宛都屢敗,江漢多虞,於今平夷,東南爲愈。|淮揚之地,北阻|塗山,南抗靈嶽,名 人伏思大計,愈以殷人有屢遷之事,周王有岐山之徙,方今王都罄乏,不可久居,河朔蕭條, 知無不爲,古人所務,敢竭忠誠,庶報萬分。朝遂夕隕,猶生之願。」 四帶,有重險之固。是以楚人東遷,遂宅壽春,徐、邳、東海,亦足戍禦。 馥親羣賊 雖聖上神聰,元輔賢明,居儉守約,用保宗廟,未若相土遷宅,以享永祚。 孔熾,洛陽孤危,乃建策迎天子遷都壽春。 輒檄前北中郎將裴憲行使持節、監豫州諸軍事、東中郎將, 皇興來巡,臣宜轉據江州,以恢王略。 永嘉四年,與長史吳思、司馬殷識 令王浚、苟晞共 且運漕 四通 風 臣謹 馳 污無 選 卽

敗。 孫惠 不肯行,而令碩率兵先進。碩貳於馥,乃舉兵稱馥擅命,已奉越密旨圖馥,遂襲之,爲馥所 帥 碩退保東城,求救於元帝。 越與苟晞不協,馥不先白於越,而直上書,越大怒。先是,越召馥及淮南太守裴碩,馥 衆應之,使謝摛爲檄。摛,馥之故將也。馥見檄,流涕曰:「必謝摛之辭。」摛聞之,遂 旬日而馥衆潰,奔于頃,為新蔡王確所拘,憂憤發病卒。 帝遣揚威將軍甘卓、建威將軍郭逸攻馥于壽春。安豐太守

不持,當與天下共受其責。然謂之反,不亦誣乎」。帝意始解。 得爲反!」帝曰:「馥位爲征鎭,握兵方隅,召而不入,危而不持,亦天下之罪人也。」譚曰: **譚對日:「周馥雖死,天下尙有直言之士。** 初,華譚之失廬江也,往壽春依馥,及馥軍敗,歸于元帝。 馥振纓中朝,素有俊彦之稱,出據方嶽,實有偏任之重,而高略不舉,往往失和,危而 **馥見寇賊滋蔓,王威不振,故欲移都以紓國難** 帝問曰:「周祖宣何至於反?」

馥有二子:密、矯。密字泰玄,性虛簡,時人稱爲清士,位至尚書郞。 矯字正玄, 亦有

成公簡

默識過人。張茂先每言:「簡清靜比楊子雲,默識擬張安世。」 成公簡字宗舒,東郡人也。家世二千石。性朴素,不求榮利,潛心味道,罔有干其志

雄 騎常侍。 爲郎,三世不徙,而王莽、董賢位列三司,古今一揆耳。」馥甚慚之。 後爲中書郎。時馥已爲司隸校尉,遷鎭東將軍。簡自以才高而在馥之下,謂馥曰:「楊 永嘉末,奔尚晞,與晞同沒。 官至太子中庶子、散

列傳第三十一 成公節

苟晞

征成 引為 八坐以下皆側目憚之。及冏誅,晞亦坐免。長沙王乂爲驃騎將軍,以晞爲從事中郎。 都王穎,以爲北軍中侯。及帝還洛陽,晞奔范陽王虓,虓承制用晞行兗州刺史。 通事令史,累遷陽平太守。 苟晞字道將 • 河內山陽人也。 齊王冏輔政,晞參冏軍事,拜尚書右丞,轉左丞,廉察諸曹, 少爲司隸部從事,校尉石鑒深器之。 東海王越爲侍 中,

守。 敗石勒於河北,威名甚盛,時人擬之韓白。進位撫軍將軍、假節、都督淸虎諸軍事,封東平 壘,遂定鄴而還。 **晞**將至,頓軍休士,先遣單騎示以禍福。 汲桑之破鄴也, 東海王越出次官渡以討之, 命晞爲前鋒。 桑素憚之, 於城外爲棚以自 西討呂朗等,滅之。後高密王泰討青州賊劉根,破汲桑故將公師藩,印 **桑衆大震,棄栅宵遁,嬰城固守。** 晞陷其九

郡侯,邑萬戶。

法如此。

之,從母 將,晞距之曰:「吾不以王法貸 **晞**練於官事, 叩頭請救、不聽。 文簿盈積,斷決如流, 旣而素服哭之,流涕曰:「殺卿者兗州刺史,哭弟者苟道將。」其杖 人,將無後悔邪。」固欲之,晞乃以爲督護。後犯法,晞杖節斬 人不敢欺。 其從母依之,奉養甚厚。 從母子求為

晞見朝政日亂,懼禍及己,而多所交結,每得珍物,卽貽都下親貴。 兗州去洛五百里,

恐不鮮美,募得千里牛,每遣信,旦發暮還。

史,進爲郡公。晞乃多置參佐,轉易守令,以嚴刻立功,日加斬戮,流血成川,人不堪命,號 越以爲然,乃遷晞征東大將軍、開府儀同三司,加侍中、假節、都督靑州諸軍事,領靑州 其名號,晞必悅。公自牧兗州,經緯諸夏,藩衞本朝,此所謂謀之於未有,爲之於未亂也。」 衝,魏武以之輔相漢室。一苟晞有大志,非純臣,久令處之,則患生心腹矣。若遷于靑州,厚 曰「屠伯」。 初,東海王越以晞復其讎恥,甚德之,引升堂,結爲兄弟。越司馬潘滔等說曰:「兗州」 刺

頓丘太守魏植爲流人所逼,衆五六萬,大掠兗州。 晞出屯無鹽,以弟純領靑州,刑殺更

甚於晞,百姓號「小苟酷於大苟」。 晞尋破植。

不許。 不忍衣食之惠,死於婦人之手。今將誅國賊,尊王室,桓文豈遠哉」乃移告諸州,稱己功 時潘滔及尚書劉望等共誣陷睎,晞怒,表求滔等首,又請越從事中郎劉洽爲軍司,越皆 聯於是昌言曰:「司馬元超爲宰相不平,使天下淆亂, 苟道將豈可以不義使之。 韓信

時懷帝惡

越

伐,陳越罪狀

專權,乃詔晞曰:「朕以不德,戎車屢興,上懼宗廟之累,下愍兆庶之困,當

累卵 非所謂 賴 鎭。 是以 詔命 斷,股用 世。 大戰 地。 鎭 行嶽, 州 凡我 舟 晞 ,結壘近郊,仍震虎豫,害三刺史,殺二都督,郡守官長,堙沒數十,百姓流離,肝腦 郡曰:「天步艱險、禍難殷流、劉元海造逆於汾陰、石世龍階亂於三魏,荐食畿 加 皆見破散。懷城已陷,河內太守裴整爲賊所執。宿衞闕乏,天子蒙難,宗廟之危,甚於 諸 以 與國同憂也。 檝不固,齊桓責楚,襄王逼狄,晉文致討。 承問之日,憂歎累息。 歸以爲先王選建明德,庸以服章,所以藩固王室,無俾城壞。 剋今月二日,當西經濟黎陽,卽日得滎陽太守丁嶷白事,李惲、陳午等救懷諸軍 委成。 爲國 虚薄,負荷國重,是以弭節海隅,援枹曹衞。 方 同 盟 、牧,俱受榮寵,義同畢力,以報國恩。 審翰。 , 宜 加王 同 彌 .赴救。 今復遣詔,便施檄六州,協同大舉,翦除國難,稱朕意 公威震赫然,梟斬藩、桑,走降喬、朗,魏植之徒復以誅除,豈 、石勒爲社稷之憂,故有詔委統六州。 顯立 ||名節,在此行矣。| 夫翼獎皇家,宜力本朝,雖陷湯 **晞雖不武,首啓戎行,秣馬裹糧,以俟方** 猥被中詔,委以關東,督統 而公謙 分小 節,四稽違大命, 焉。」晞復 諸軍,欽承 火,大義所 非高識 甸, 移 與羯 覆喪 諸 塗 明 征

嶷追至東山,部衆皆降嶷。 有懼 會 主 色,與賊連 彌 遣 曹嶷破 戦 琅邪,北攻齊地。 輒破之。 **晞單騎奔高平,收邸閣,募得數千人。** 後簡 精銳,與賊大戰, **苟純城守,嶷衆轉盛,連營數十里。晞還,登城望** 會大風揚塵,晞遂敗績,棄城夜走。

天權 以宗 政,斬送滔等。 殿中中郎劉權齎詔,敕浚與臣共 憤懣,守局東嵎,自奉明詔,三軍奮厲, 抄,茹食居人,交尸塞路,暴骨盈野。 喪州 滔等妄構,陷以重戮。 皇輿,思 ",刑賞 臣遂執 帝 前 又密詔晞討越,晞復上表曰:「殿中校尉李初至,奉被手詔,肝心若裂。 隆 北 由 王室,以盡臣禮 塗圮 朝政,委任邪 中郎將裴憲,並以 己。 伏願陛下寬宥宗臣, 聽越還 隔,方貢 尚書何綏、中書令繆播、太僕繆胤 帶甲臨宮,誅討后弟,翦除宿衞,私樹國人。 、乖絕,宗 佞, 而滔、 寵樹 天朝空曠,權臣 克 廟闕蒸嘗之饗,聖上有約食之匱。 姦黨,至使前長史潘滔、從事中郎畢邈、主簿郭象等操弄 邈等劫越 大學。 逐令方鎭失職,城邑蕭條,淮豫之萌, 卷甲長驅, 輒遣 國。 出 專制,事難之興,慮在旦夕,各率士馬,奉迎 關,矯立行 前鋒征虜將軍 其餘逼迫,宜蒙曠蕩。 次于倉垣。 、黄門侍郎應紹、皆是聖詔親所抽拔,而 臺,逼徙公卿,擅爲詔令,縱兵 王讚 卽 日承司空、博陵公浚書,稱 徑 崇獎魏植,招誘逋亡,覆 鎭東將軍 至項城, 輒寫 陷離塗炭。 韶宣示征 使 周馥、豫州 東海王 越 稽 「鎭,顯 臣 首 越得 歸 寇 雖 刺

狄充斥,所在 親,宜明九伐。 五 年,帝復詔晞曰:「太傅信用姦佞,阻兵專權,內不遵奉皇憲,外不協比方州, 遣揚烈將軍閻弘步騎五千,鎭衞宗廟。」 立犯暴。 韶至之日,其宣告天下,率齊大舉,恒文之績,一以委公。 留軍何倫抄掠宮寺、劫剝 公主, 殺害賢 士, 悖 亂 天下, 不 其思盡諸宜,善 可 忍聞 逐令戎 雖惟

明義舉。

列

武安 伏 陳午等將兵詣頂,襲行天罰。」 軌 建 総 讀 弘 公主,先帝遺體,咸被逼辱。 略。 跪 兵寇掠, 陵踐宮寺。 、歎,五 道澀 情惶怛。 ,故練寫副,手筆示意。」歸表曰:「奉被手詔,委臣征討,喻以桓文,紙 自頃宰臣專制、委杖佞邪、內擅朝威、外殘兆庶、 前司隸校尉劉暾、御史中丞溫畿、右將軍杜育、並見攻劫。 逆節虐亂,莫此之甚。輒祗奉前詔,部分諸軍,遣王讚率 矯詔專征, 練 **逐圖不** 廣平 兼備

使騎收 出 大 都督、督靑徐虎豫荆揚六州諸軍事,增邑二萬戶,加黃鉞,先官如故。 牧豫州以討晞,復下檄說晞罪惡,遣從事中郎楊瑁爲兗州,與徐州刺史裴盾共討晞。 初,越疑晞與帝有謀,使遊騎於成皐間,獲晞使,果得詔令及朝廷書,遂大構疑隲。 河南尹潘滔,滔夜遁,及執尚書劉曾、侍中程延,斬之。 會越薨,盾敗,韶晞爲大將軍

奔晞, 獻 自 1倉垣 穀 千斛以迎帝。 晞 「晞率羣官尊端爲皇太子,置行臺。 徙 以京邑荒饉 屯蒙 城,讚屯 朝臣 日甚,寇難交至, 陽夏。 多有異 同。 表請遷都,遣從事 俄 而京師陷, 端承制以晞領太子太傅、都督中外諸軍、錄尙書, | 瞬與 工讚 ,中郎劉會領船數十艘,宿衞五百人, 屯倉垣。 豫章王端及和郁等東

虐,縱情肆欲。 晞 出 於 孤 微,位至 遼西閻亨以書固諫、晞怒、殺之。 上將,志頗 、盈滿,奴婢將千人,侍妾數十,終日累夜不出戶庭,刑政苛 **飈從事中郞明預有疾居家,聞之,** 乃轝病

罪一 攻陽夏,滅王讚,馳襲蒙城,執晞,署爲司馬,月餘乃殺之。 之言。」晞有慚色。 明公以禮見進,預欲以禮自盡。今明公怒預,其若遠近怒明公何!昔堯舜之在上也,以和 理 諫晞曰:「皇晉遭百六之數,當危難之機,明公親稟廟算,將爲國家除暴。 而 旦殺之」、歸怒曰:「我自殺閻亨,何關人事,而擧病來駡我」」左右爲之戰慄,預曰:「以 興;無料之在上也,以惡逆而滅。 由是衆心稍離,莫爲致用,加以疾疫饑饉,其將溫畿、傅宣皆叛之。 天子且猶如此,況人臣乎!願明公且置其怒而思預 晞無子,弟純亦遇害。 閻亨美士,奈何無

華軼

軍諮祭酒杜夷,棲情玄遠,確然絕俗,才學精博,道行優備, 惠,州之豪士接以友道,得江表之歡心,流亡之士赴之如歸。 府長 助討諸 下教曰:「今大義穨替,禮典無宗,朝廷滯議,莫能攸正,常以慨然,宜特立此官, 聞於當世,汎愛博納,衆論美之。 史。 華軼字彥夏,平原人,魏太尉歆之曾孫也。 賊, 永嘉 | 軼遣 中,歷振威將軍 前 江夏太守陶侃爲揚武將軍 、江州刺 史。 初爲博士,累遷散騎常侍。 雖逢喪亂, ٠, 率兵三千屯夏口, 祖表,太中大夫。 每崇典禮, 其以爲儒 以爲聲援。 東海 置儒林祭酒以弘 **父澹,河南尹。** 林祭酒。」俄被越檄使 王越牧兗州 軟在州甚有威 以弘其 軟少有才 道訓,乃 ,引爲留 事

列

是,與豫章太守周廣爲內應,潛軍襲軼,軼衆潰,奔于安城,追斬之,及其五子,傳首建鄴。 援。 軍王 洛都不守,司空荀藩移檄,而以帝爲盟主。 以 州 尙 都 率衆屯彭澤以備軼,訪過姑熟,著作郎干寶見而問之,訪曰:「大府受分,令屯彭澤,彭澤,江 兵守其門,將成其釁。吾當屯尋陽故縣,旣在江西,可以扞禦北方,又無嫌於相逼也。」尋 西門 .存,不能祗承元帝教命,郡縣多諫之,軼不納,曰:「吾欲見詔書耳。」時帝遣揚烈將軍<u>周</u>訪 道 武 敦 一斷,可輸之琅邪王,以明吾之爲司馬氏也。」軼自以受洛京所遣,而爲壽春所督,時洛京 初,廣陵高悝寓居江州,軼辟爲西曹掾,尋而|軼敗,悝藏匿|軼二子及妻,崎嶇經年。 昌太守馮逸次于湓口,訪擊逸,破之。 都督甘卓、周訪、宋典、趙誘等討之。 也。 ,孤危,四方瓦解,軼有匡天下之志,每遣貢獻入洛,不失臣節。 華彥夏有憂天下之誠,而不欲碌碌受人控御,頃來紛紜,粗有嫌隙。今又無故 旣而帝承制改易長吏,軼又不從命,於是遣左將 **軼遣別駕陳雄屯彭澤以距敦,自爲舟軍以爲外** 前江州刺史衛展不爲軼所禮, 謂使者曰:「若洛 心常怏怏。 旣 至

而 遇赦,悝攜之出首,帝嘉而 宥之。

劉 孫耽 耽子柳

劉喬字仲彦,南陽人也。 其先漢宗室,封安衆侯,傳襲歷三代。祖廙,魏侍中。 父阜,

陳 留 相 還授滎陽 喬 少為秘 令,遷太子 書郎, 建威將軍王戎引爲參軍。 洗馬。 以誅楊駿 功, 賜 **臂關中侯,拜尚書右丞。** 伐吳之役,戎使喬 與參軍羅尚濟江 豫誅賈謐,封安 一,破

衆男,累遷散騎常侍

憚 以 下牀二 卿不足迎者。」紹曰:「正人爲誰 孫 秀,故不 齊王冏 何獨 爲大司馬, ·敢不受財 加敬於紹。」問 物。 初, 嵇紹 乃止。 稲紹 爲冏所重,每下階迎之。 今何所逼忌,故畜뢇家車牛、張家奴婢邪? : []憍曰:「其則不遠。」紹默然 |紹謂||喬曰:「大司馬何故不復迎客。」||喬曰:「似有正人言, 喬言於冏日:「裴、張之誅,朝臣 樂彦 輔 來,公未 畏

與 (荆州刺史劉弘共討昌,進左將軍 頃之,遷御史中丞。 |艾諷 尚書右丞苟晞免喬官,復爲屯騎校尉。 冏腹心董艾勢傾朝廷,百僚莫敢忤旨。 張昌之亂,喬出爲威遠將軍、豫州刺史, 喬二旬之中, 奏劾艾罪釁

尚書 范陽 幾,琨率突騎五千濟河攻喬,喬劫琨父蕃,以檻車載之,據考城以距虓,衆不敵 彭城王釋與喬幷力攻虓於許昌。〔亞與弟琨率衆救虓,未至而虓敗,虓乃與琨俱奔河北。 王虓領 列輿罪惡。 惠帝 西幸長安,喬與諸州郡舉兵迎大駕。 豫州 刺史。 河間王顒得喬所上,乃宣詔使鎭南將軍劉弘、征東大將軍劉準、平南將 喬以虓非天子命,不受代,發兵距之。 東海王越承制轉喬安北將軍、冀州刺史,以 潁川太守劉輿昵於虓,喬上 而

列

宜乖離。 恩,願與使君共戴盟主,雁行下風,掃除凶寇,救蒼生之倒懸,反北辰於太極。此功未立,不 況命世之士哉!今天下紛紜,主上播越,正是忠臣義士同心勠力之時。

弘實闇劣,過蒙國 庶姓,周之宗盟,疏不問親,曲直旣均,責有所在。 廉藺區區戰國之將,猶能升降以利社稷, 至人之道,用行舍藏。跨下之辱,猶宜俯就,況於換代之嫌,繼介之釁哉!范陽國屬,使君 信有罪矣,而奪之牛,罰亦重矣。明使君不忍亮直狷介之忿,甘爲戎首,竊以爲過。何者? 朝,列居方伯,當官而行,同獎王室,橫見遷代,誠爲不允。然古人有言,牽牛以蹊人之田, 劉弘、劉準、彭城王釋等率兵援喬。 願明使君迴旣往之恨,追不二之蹤,解連環之結,修如初之好。|范陽亦將悔前之失,思 **喬復收散卒,屯于平氏。河間王顒進喬鎭東將軍、假節,以其長子酤爲東郡太守,又遣** 備蒙顧遇,情隆於常,披露丹誠,不敢不盡。春秋之時,諸侯相伐,復爲和親者多 弘與喬牋曰:「適承范陽欲代明使君。明使君受命本

國重恩,列位方伯,亦伐鼓即戎,勠力致命之秋也。而范陽代之,吾州將不從,由代之不允, 禍亂之宜。 但矯枉過正,更以爲罪耳。 海王越將討喬,弘又與越書曰:「適聞以吾州將擅舉兵逐范陽,當討之,誠明同異、懲 然吾竊謂不可。何者。今北辰遷居,元首移幸,羣后抗義以謀王室,吾州將荷 昔齊桓赦射鉤之讎而相管仲,晉文忘斬袪之怨而親勃鞮,方之

時

河

有不: 輒討 自欲 交 鬭 之臣 之禍 州刺史喬,喬舉兵逐 外,以康 謬,發赫 崇忠恕,共明分局,連旗推鋒,各致臣節,吾州將必輸寫肝膽,以報所蒙,實不足計一朝之 釋私嫌 於今,當何有哉! 之患,永有 權柄隆於朝廷,逆順效於成敗,今夕爲忠,明旦爲逆,翮其反而,互爲戎首,載籍以來,骨肉 未 被詔書擅興兵馬者,天下共伐之。 不惟國 立功於時,以徇 誠應顯戮以懲不恪。 自效於卞莊者矣。 ,共存公義,含垢匿瑕,忍所難忍,以大逆爲先,奉迎爲急,不可思小怨忘大德也。 有 然之怒,使韓盧東郭相困而爲豺狼之擒也。吾雖庶姓,負乘過分,實願足下率齊內 王室,竊恥同儕自爲蠹害。 如 泰山之固矣。 **「體,職競尋常,自相楚剝,爲害轉深,積毀銷骨。萬一** 今者也。 且君子躬自厚而薄責於人、今姦臣弄權、朝廷困逼,此四海之所危懼,宜 |

虓,司空、東海王越以喬不從命討之。臣以爲喬忝受殊恩,顯居州司, 國難,無他罪闕,而范陽代之,代之爲非。 臣竊悲之,痛心疾首。 臣以爲宜速發明詔,詔越等令兩釋猜嫌,各保 然自頃兵戈紛亂,猜禍鋒生,恐疑隙構於羣王,災難延于宗子, 貪獻所懷,惟足下圖之。」又上表曰:「<u>范陽王</u>虓欲代豫 詩云:『誰能執熱、逝不以濯? 今邊陲無備豫之儲,中華有杼軸之困,而股 然喬亦不得以虓之非,專威 四夷乘虚 』若誠濯之,必無灼爛 分局。 爲變,此亦猛 自今以後,其 熠 肱

間 王 一顧方 距 關東,倚喬爲助,不納其言。 東海王越移檄天下,帥甲士三萬,將入關

迎大駕,軍次于蕭,喬懼,遣子酤距越於蕭縣之靈壁。劉琨分兵向許昌,許昌人納之。 滎陽率兵迎越,遇滿,衆潰見殺。[10]喬衆遂散,與五百騎奔平氏 |琨自

軍、豫州刺史。卒於官,時年六十三。愍帝末,追贈司空。 帝還洛陽,大赦,越復表喬爲太傅軍諮祭酒。 越薨,復以喬爲都督豫州諸軍事、鎮東將 子挺,潁川太守。 挺子耽。

書,加散騎常侍。 加侍中,不拜,改授特進、金紫光祿大夫。 尋卒,追贈左光祿大夫、開府。 耽子脚。 耽字敬道。少有行檢,以義尙流稱,爲宗族所推。 在職公平廉慎、所莅著績。桓玄、耽女壻也。及玄輔政、以耽爲尚書令、 博學,明習詩、禮、三史。歷度支尚

子成,丹楊尹。 言。 出爲徐、殪、江三州刺史。卒,贈右光祿大夫、開府儀同三司。憍弟以,始安太守。以 柳唯讀老子而已, 迪每輕之。 柳云:「卿讀書雖多,而無所解,可謂書簏矣。」 時人重其 柳字叔惠,亦有名譽。 少登淸官,歷尚書左右僕射。 時右丞傅迪好廣讀書而不解其

史臣曰:周浚人倫鑒悟、周馥理識精詳、華軼動顧禮經、劉喬志存諒直、用能歷官內外、

其此之謂也。 之兵, 漕引淮海之粟, 縱未能祈天永命, 猶足以紓難緩亡。 嗟乎!「不用其良, 覆俾我悖」, 顯戮, 豈不哀哉! 咸著勳庸。 而祖宣獻策遷都,乖忤於東海,彥夏係心宸極,獲罪於琅邪,乃被以惡名,加其 · 苟晞擢自庸微,位居上將,釋位之功未立, 貪暴之釁已彰, 假手世龍,以至屠 向若遠左袵於伊川,建右社於淮服,據方城之險,藉全變之資,簡練吳 越

天不祥。 贊曰:開林才理,爰登貴仕,績著折衝,化行江汜。 喬爲戎首,未識行藏。 道將鞠旅,威名克舉,貪虐有聞,忠勤未取。 | 軼旣尊主,馥亦勤王,背時獲戾, 違

戮,斯所謂「殺人多矣,能無及此乎」!

校勘記

父裴 勞校:「裴」當作「斐」。 斐著汝南先賢傅五卷,見隋書經籍志。

三山 原作「三江山」。 |
勢校:「江」字行。 按一勞說是,今據王濬傳删。

[1] 韻嗣爵 「顗」。各本誤作「覬」。今從宋本。事亦見顗傳。

C & D 始田氏擅齊 册府五二八「始」作「如」。

〔氧〕悟逆旅之言 册府五二八「逆旅」作「逆耳」。

C 大] 累遷司徒左西屬 御覽二〇九引作「遷司徒左曹俊」。

傳第三十一 校勘記

列

てもし 後高密王泰至破汲桑故將公師藩 與苟晞同時。 校文:「後」下疑奪「從」字。周校:當作「破汲桑及成都王穎故將公師藩」。 讀書記疑:「後高密王泰」五字疑誤。泰卒於元康九年,不

[八] 謙分小節 册府四一五「分」作「介」。

ハ た □ 彭城王釋 「釋」,各本作「釋」。通鑑考異云,喬傳「釋」作「釋」,帝紀、宗室傳皆作「釋」,盖喬傳

誤。今據改。下同。

遇祐衆潰見殺 周校:當重「祐」字,作「遇祐,酤衆潰見殺」,與下「喬衆遂散」句乃合。

晉書卷八十二

列傳第三十二

劉琨 子羣 琨兄輿 輿子演

賦詩。 <u></u>
崇、歐陽建、陸機、陸雲之徒,並以文才降節事謐, 琨兄弟亦在其間,號曰「二十四友」。太尉 年二十六,爲司隸從事。時征虜將軍石崇河南金谷澗中有別廬,冠絕時輩,引致賓客,日以 散騎常侍。父藩,清高沖儉,位至光祿大夫。、琨少得儒朗之目,與范陽祖納俱以雄豪著名。 高密王泰辟爲掾,頻遷著作郎、太學博士、尙書郎。 劉琨字越石,中山魏昌人,漢中山靖王勝之後也。[1] 祖邁,有經國之才,爲相國參軍、 <u> 現預其間,文詠頗爲當時所許。祕書監賈謐參管朝政,京師人士無不傾心。[三]石</u>

所委任。 趙王倫執政,以琨爲記室督,轉從事中郎。 及篡,垮爲皇太子,琨爲垮詹事。 三王之討倫也,以既爲冠軍、假節,與孫秀子會 倫子통,卽毘姊壻也,故跟父子兄弟並爲倫

列傳

第三十

刻琨

范

陽

王

虓

鎭

許昌,引爲司馬。

率宿 其父兄皆有當世 衞 兵三萬距成都王穎,戰于黃橋,至。現大敗而還,焚河橋以自固。及齊王冏輔政,以 .之望,故特宥之,拜兄輿爲中書郞,,琨爲尙書左丞,轉司徒左長史。 ||冏敗,

突騎 劉 虓 因 統 於 喬 許昌 所 諸 及 百 惠帝 軍 奉 人,與虓濟河,共破 也,現與汝南太守杜育等率兵救之,未至而虓敗,現與虓俱奔河北,跟之父母遂爲 幸長安,東海王越謀迎大駕,以琨父蕃爲淮北護軍、豫州刺史。 迎大駕於長安。 琨乃說冀州刺史溫羨,使讓位于虓。 東平王楙於廩丘,南走劉喬,始得其父母。又斬石超,降呂朗, 以勳封 廣武侯,邑二千戶。 及虓領冀州,造琨詣幽州,乞師於王浚,得 劉喬攻范陽王

之險, 扶 進,頓 乏田器。 和 志 弱 氣 一有限, 永 伏 數 不 羣胡 嘉 艱 絕於路。 人當路, 以臣愚短,當此至難,憂如循環,不遑寢食。 元 因緣 危,辛苦備嘗,卽 数萬 年,回為幷州 際會,逐忝 則 周 及其在 百夫不敢進,公私往 帀 四 Щ 者,鬻賣 過任。 刺 日達 動 史, 足遇掠, 壶 加振 (妻子),生相 九月末得發,道嶮山 П 關 成將軍,領匈奴中郎將。 臣 開目 反,沒喪者多。 自涉州疆 親窓。 ·捐棄,死亡委危,至 白骨横野,哀 唯 ,目覩困乏,流移 有 臣伏思此州雖云邊朔, L峻,胡· 嬰守窮城, 壺關, 寇塞路, 可 現在路 得告糴。 不得薪 四散, 輒 上表曰:「臣以頑蔽, 以 采, 少擊 十不 而 此 實邇皇畿,南 耕 呼 二道, 牛 之聲,感 存二,攜 旣 冒險 九 州 傷 老 而

其命。 通 河內,東連司冀,北捍殊俗,西禦强虜,是勁弓良馬勇士精銳之所出也。 今上尙 書,請此州穀五百萬斛,絹五百萬匹,緜五百萬斤。 願陛下時出臣表,速見聽 當須委輸,乃全

朝

廷許之。

密遣 之中,雖歸者數千,去者亦以相繼。然素奢豪,嗜聲色,雖暫自矯勵,而輒 之音復相接矣。琨父蕃自洛赴之,人士奔迸者多歸於琨。 林,豺狼滿道。 百姓負楯以耕,屬鞬而 離間 **現募得千餘人,轉鬭至晉陽。** 時東嬴公騰自晉陽鎭鄴,幷土饑荒,百姓隨騰南下,餘戶不滿二萬,寇賊縱橫,道路斷 ·其部雜房,降者萬餘落。 **琨翦除荆棘,收葬枯骸,造府朝,建市獄。** 耨。 琨撫循勞徠,甚得物情。 府寺焚毁、僵尸蔽地,其有存者, 元海甚懼,遂城庸子而居之。在官未春,流人稍復,雞犬 劉元海時在離石, 寇盜互來掩襲,恒以城門爲戰場, **跟善於懷撫,而短於控御,** 飢羸 相去三百許里。 無復 復縱 人色,荆棘成 日

曰:「汝不能弘經略,駕豪傑,專欲除勝己以自安,當何以得濟!如是,禍必及我。」不從。 抗,由是聲實稍損。徐潤又譖令狐盛於琨曰:「盛將勸公稱帝矣。」琨不之察,便殺之。 奮威護軍令狐盛性亢直,數以此為諫,并勸琨除潤,琨不納。初,單于猗钜以救東嬴公騰之 琨表其弟猗盧爲代郡公, 與劉希合衆於中山。 河南徐潤者,以音律自通,遊于貴勢,琨甚愛之,署爲晉陽令。 王浚以琨侵己之地, 潤恃寵驕恣,干預琨政。 數來擊琨,琨不能 琨母

血 未可滅,遺琨牛羊車馬而去,留其將箕澹、[t] 段繁等戍晉陽。 琨志在復讎,而屈於力弱,泣 並遇害。 子泥奔于劉聰,具言虛實。聰大喜,以泥爲鄉導。屬上黨太守襲醇降于聰,〔六〕雁門烏丸復 反, 跟親率精兵出禦之。 聰遣子 燦及 今狐泥乘虛襲 晉陽, 太原太守高喬以郡降聰, 跟父母 P立,撫慰傷痍,移居陽邑城,<<<>>以招集亡散。 |現引||浴盧幷力攻燥,大敗之,死者十五六。||現乘勝追之,更不能克。||浴盧以爲聰

|愍帝卽位,拜大將軍、都督||幷|||諸軍事,加散騎常侍、假節。 |現上疏謝日:

陛下略臣大愆,錄臣小善,猥蒙天恩,光授殊寵,顯以蟬冕之榮,崇以上將之位。

伏省詔書,五情飛越。

以功補 於寵榮之施,非言辭所謝。 臣猶 德,戎昭果毅之威,故能振豐功於||荊南,拓洪基於||河北。 鼎,慮在 庶幾。 臣 問晉文以卻殼爲元帥而定霸功,高祖以韓信爲大將而成王業,咸有敦詩閱禮之 過。 一覆餗。 所以冒承寵命者,實欲沒身報國,輒死自效,要以致命寇場,盡其臣 陛下宥過之恩已隆,而臣自新之善不立。 昔曹沫三北,而收功於柯盟,馮異垂翅,而奮翼於澠池,皆能因敗爲成, 又謁者史蘭、殿中中郎王春等繼至,奉詔,臣俯尋聖旨,伏 臣雖不逮,預聞前訓,恭讓之節, 況臣凡陋, 擬蹤前哲, 俯懼折 節。 至

紙飲淚。

列傳第三十二 劉琨

黃墟。[4] 陛下偏恩過隆,曲蒙擢拔,遂授上將,位兼常伯,征討之務,得從事宜。拜命 | **엧,而濟入郢之庸。臣雖頑凶,無覬古人,其於被堅執銳,致身寇讎,所謂天地之施,羣** 驚惶,五情戰悸,懼於隕越,以爲朝羞。 昔申胥不徇伯舉,而成公壻之勳,伍員不從城 萌,復覩典制。伏惟陛下蒙塵于外,越在秦郊,蒸嘗之敬在心,桑梓之思未克。臣備位 存偏師之職,赦其三敗之愆,收其一功之用,得騁志虜場,快意大逆,雖身膏野草,無恨 而有負乘之累,當肆刑書,以明黜陟。是以臣前表上聞,敢緣愚款,乞奉先朝之班,苟 歷年,才質駑下,丘山之釁已彰,豪釐之效未著。頃以時宜,權假位號,竟無殪戎之績, 下龍姿日茂,叡質彌光,升區字於旣穨,崇社稷於已替,四海之內,肇有上下,九服之 國,七廟闕禋祀之饗,百官喪谿倫之序,梓宮淪辱,山陵未兆,率土永慕,思同考妣。 臣聞夷險流行,古今代有,靈厭皇德,曾未悔禍。 蟻狄縱毒於神州,夷裔肆虐於上 陛

及麴允敗,劉曜斬趙冉、日日現又表日,

生莫謝不勝。受恩至深,謹拜表陳聞。

l保,太尉、凉州刺史軌,糾合二州,同恤王室,冠軍將軍允、護軍將軍綝,總齊六軍,勠力 國難,王旅大捷,俘馘千計,旌旗首於晉路,金鼓振於河曲,崤函無虔劉之警,浒隴有安 逆胡 劉聰,敢率犬羊,馮陵輦轂,人神發憤,遐邇奮怒。伏省詔書,相國、南陽王

業之慶,斯誠宗廟社稷陛下神武之所致。含氣之類,莫不引領,况臣之心,能無踊躍。

隙,寇抄相尋,戎士不得解甲,百姓不得在野。 猗盧國內欲生姦謀,幸盧警慮,尋皆誅滅。遂使南北顧慮,用愆成舉,臣所以泣血宵 靈,使微意獲展,然後隕首謝國,沒而無恨。 臣當首啓戎行,身先士卒。臣與二虜,勢不並立,聰、勵不梟,臣無歸志。 慚怖征營,痛心疾首,形留所在,神馳寇庭。 伍。 自東北八州,勸滅其七,先朝所授,存者唯臣。 吟,扼腕長歎者也。|勒據|襄國,與臣隔山,寇騎朝發,夕及臣城,同惡相求,其徒實繁。 司馬、博陵公浚受其僞和,爲勸所虜,勸勢轉盛,欲來襲臣。 城塢駭懼,志在自守。 自守則稽聰之誅,進討則勵襲其後,進退唯谷,首尾狼狽。 臣前 表當與鮮卑猗盧剋今年三月都會平陽,會匈羯石勒以三月三日徑掩薊城,大 秋穀既登,胡馬已肥,前鋒諸軍並有至者, 天網雖張,靈澤未及,唯臣孑然與寇爲 是以勒朝夕謀慮,以圖 徒懷憤踊,力不從願, 臣爲 庶憑陛下威 計, 闚伺間

先質於盧,衆皆附之。及是,遵與箕澹等帥盧衆三萬人,馬牛羊十萬,悉來歸琨,琨由是復 受都督,剋期與猗盧討劉聰。尋猗盧父子相圖,盧及兄子根皆病死,自己部落四散。琨子遵 振,率數百騎自平城撫納之。屬石勸攻樂平,太守韓據請救於琨,而琨自以士衆新合,欲因 三年,帝遣兼大鴻臚趙廉持節拜琨爲司空、都督幷冀幽三州諸軍事。 琨上表讓司空,

其銳 發其 外抄 沒,幷土震駭。 、衆,命澹領步騎二萬為前驅,琨自爲後繼。 ,殘胡之牛羊,且閉關守險,務農息士,旣服化感義,然後用之,則功可立也。」琨不從,悉 以威勒。 琨 由是率衆赴之,從飛狐入薊。匹磾見之,甚相崇重,與琨結婚,約爲兄弟。 箕濱諫曰:「此雖晉人,久在荒裔,未習恩信,難以法御。 幽州 **勒先據險要,設伏以擊膽,大敗之,一軍皆** 刺史鮮卑段匹磾數遣信要琨,欲與同獎 今內收鮮卑之餘穀

萬里之外,心存咫尺。 奕世 位,以答天下,庶以克復聖主,掃蕩讎恥,豈可猥當隆極,此孤之至誠著於遐邇者也。 連名上表,語在元紀。 一之寵,極人臣之位,忠允義誠,精處天地。 是時西都不守,元帝稱制江左,琨乃令長史溫嶠勸進,於是河朔征鎭夷夏一百八十人 令報曰:「豺狼肆毒,荐覆社稷,億兆顒顒, 公其撫寧華戎,致罰醜類。 實賴遠謀,共濟艱難。 動靜 以 聞。」 延首罔繫。 南北迴邈,同契一致, 是以居于王 公受

弱 琨 m 匹磾 退。 建 武 進屯固安,以俟衆軍。 是歲 元年,琨與匹磾期計 元帝轉琨爲侍中、太尉,其餘如故,并贈名刀。 石勒, 匹磾從弟末波 匹磾推琨 納勒厚賂, 為大 、都督,喢血載書,檄諸方守,俱集襄國 獨不 進,乃 琨答曰:「謹當躬自執 沮 其計。 琨、匹磾以勢 "; 馘

匹磾 奔其 兄 要,琨遣世子羣送之,而末波率衆要擊匹磾而敗走之,羣爲末波所得。

列

截二虜。」

所得。 |幷州治中如綏閉門自守。匹禪諭之不得,因縱兵攻之。 跟將龍季猛迫於乏食,遂斬橋、綏 良圖之日,若有奉琨以起,吾族盡矣。」匹磾遂留琨。琨之庶長子遵懼誅,與琨左長史楊橋、 謀,爲匹磾所信,謂匹磾曰:「吾胡夷耳,所以能服晉人者,畏吾衆也。今我骨肉構禍,是其 終不以一子之故負公忘義也。」匹磾雅重限,初無害限志,將聽還屯。其中弟叔軍好學有智 波厚禮之,許以琨爲幽州刺史,共結盟而襲匹磾,密遣使齎羣書請琨爲內應,而爲匹磾邏騎 公,是以白公耳。」琨曰:「與公同盟,志獎王室,仰憑威力, 庶雪國家之恥。 若兒書密達, 亦 而 降。 時琨別屯故征北府小城,不之知也。 因來見匹禪, 匹禪以澤書示琨曰:「意亦不疑

每 死,神色怡 見將佐, 初,琨之去晉陽也,慮及危亡而大恥不雪,亦知夷狄難以義伏,冀輸寫至誠,僥倖萬一。 如也。 發言慷慨,悲其道窮,欲率部曲死於賊壘。 爲五 一言詩贈其 別駕盧諶 日 斯謀未果,竟爲匹磾所拘。 自知必

夜撫 白登 悲獲麟,西狩泣孔丘。 枕 幸曲逆,鴻門賴留侯。 握 数,想 中 有 懸壁,本是荆山 與數 子 遊。 功業未及建,夕陽忽西流。 吾衰久 球。 重耳憑五 惟彼太公望,昔是渭濱叟。 矣夫,何其不夢周?誰云 賢, 小白 相射鉤。 時哉不我與, 能隆 聖達節,知 鄧生何感激,千里來相求。 三伯 去矣如雲浮。 主,安問黨與讎 命 故 無憂。 朱實隕 宣尼 中

勁風,繁英落素秋。 狹路傾華蓋, 駭駟摧雙輈。何意百鍊剛, 化爲繞指柔。

琨詩託意非常,

攄暢幽憤,遠想張陳,

處鴻門、白登之事,用以激諶。 和,殊乖混心,重以詩贈之,乃謂與曰:「前篇帝王大志,非人臣所言矣。」 戡素無奇略,以常詞酬

四人俱被害。自己朝廷以匹禪尙强,當爲國討石勒,不舉琨哀。 己,遂稱有詔收琨。初,琨聞敦使至,謂其子曰:「處仲使來而不我告,是殺 署雁門太守王據、後將軍韓據連謀,密作攻具,欲以襲匹磾。 命,但恨讎恥不雪,無以下見二親耳。」因歔欷不能自勝。 而告之匹磾,於是執王據、辟閭嵩及其徒黨悉誅之。會王敦密使匹磾殺琨, 然琨旣忠於晉室,素有重望,被拘經月,遠近憤歎。匹磾所署代郡太守辟閭嵩,與琨所 匹磾遂縊之,時年四十八。 而韓據女爲匹磾兒妾,聞其謀 我也。 匹磾又懼衆反 死生有 子姪

三年,琨故從事中郎盧諶、崔悅等上表理琨曰:

臣聞經國之體,在於崇明典刑,立政之務,在於固愼關塞。 況方岳之臣, 殺生之

柄,而可不正其枉直,以杜其姦邪哉!

此琨效忠之一驗也。其後幷州刺史、東嬴公騰以晉川荒匱,移鎭臨漳,太原、西河盡徙 躬統華夷,親受矢石,石超授首,呂朗面縛,社稷克寧,鑾輿反駕,奉迎之勳,琨實爲隆, 竊見故司空、廣武侯**珥,**在惠帝擾攘之際,值羣后鼎沸之難,勠力皇家,義誠彌厲,

痍,無 引路。 形,漸彰於外。 然於持土,必不亡身於燕薊也。琨自以備位方嶽,綱維不舉,無緣虛荷大任,坐居三 族黨可以不喪。及猗盧敗亂,晉人歸奔,展於平城納其初附。將軍箕澹又以爲此雖晉 罹屠戮之殃,門族受殲夷之禍。向使琨從州人之心,為自守之計,則聖朝未必加誅,而 辱而不隕身死節,情非所安,遂乃跋履山川,東西征討。 以爲幷州之地四塞爲固,且可閉關守險,畜資養徒,抗辭厲聲,忠亮奮發,以爲天子沈 聞此,私懷顧望,留停樂邵,欲遣前兼鴻臚邊邈奉使詣保,懼澹獨南,言其此事,遂不許 次,令相迎衞。 有征舉之會,則身充一卒,若匹磾縱凶慝,則妻息可免。 具令臣澹密宣此旨,求詔敕路 傳奉還本朝,與匹磾使榮邵期一時俱發。又匹磾以琨王室大臣,懼奪已威重,忌琨之 司,是以陛下登阼,便引您告遜,前後章表,具陳誠款。尋令從事中郎臣續澹以章綬節 人,久在荒裔,難以法整,不可便用。琨又讓之,義形於色。假從澹議,偸於苟存,則晏 和戎狄,數年之間,公私漸振。 丹誠赤心,卒不上達。匹磾兄眷喪亡,嗣子幼弱,欲因奔喪奪取其國。又自以 **跟知其如此,慮不可久,欲遣妻息大小盡詣京城,以其門室一委陛下。** 會王成從平陽逃來,說南陽王保稱號隴右,士衆甚盛,當移關中。 會京都失守,羣逆縱逸,邊萌頓仆,苟懷宴安,咸 屠各乘虛,晉陽沮潰,琨父母

從弟末波等,以取其國。 欺 國陵家,懷邪樂禍,恐父母宗黨不容其罪,是以卷甲櫜弓,陰圖作亂,欲害其從叔驎、 匹磾親信密告麟、波、麟、波乃遣人距之,匹磾僅以身免。

此之後,上下並離,匹磾遂欲盡勒胡晉,徙居上谷。琨深不然之,勸移厭次,南憑朝廷。 姓謂匹磾已沒,皆憑向琨。若琨于時有害匹磾之情,則居然可擒,不復勞於人力。 自 百

等云:「受國厚恩,不能克報,雖才略不及,亦由遇此厄運。 匹磾不能納,反禍害父息四人,從兄二息同時幷命。 **琨未遇害,知匹磾必有禍心,語臣** 人誰不死,死生命也。 唯恨

際,夾肩異類之間,而有如此之心哉!雖臧獲之愚,厮養之智,猶不爲之,況在國士之 謗,言琨欲闚神器,謀圖不軌。 **琨免述囂頑凶之思,又無信布懼誅之情,踦驅亂亡之**

下不能效節於一方,上不得歸誠於陛下。」辭旨慷慨,動於左右。

匹磾旣害琨,橫加誣

列,忠節先著者乎!

大體,則不逞之人襲匹磾之跡,殺生自由,好惡任意,陛下將何以誅之哉!折衝厭難, 命,虐害鼎臣,辱諸夏之望,敗王室之法,是可忍也,孰不可忍!若聖朝猶加隱忍,未明 以興替之根咸在於此,開塞之由不可不閉故也。而匹磾無所顧忌,怙亂專殺,虛假王 殊俗之豎戮台輔之臣,亦已明矣。然則擅詔有罪,雖小必誅,矯制有功,雖大不論,正 匹磾之害琨,稱陛下密詔。 **跟信有罪,陛下加誅,自當肆諸市朝,與衆棄之,不令**

言矣。 唯 不得意,鼓行中州,曾無纖介,此又華夷小大所以長歎者也。 存戰勝之將,除暴討亂,必須知略之臣。故古語云「山有猛獸,藜藿爲之不採」,非虛 自河以北,幽井以南,醜類有所顧憚者,唯琨而已。琨受害之後,羣凶欣欣,莫

聞,仰希聖朝曲賜哀察。 克負荷、播越遐荒、與琨周旋、接事終始、是以仰慕三臣在昔之義、謹陳本末、冒以上 明功罪之分,上足以悟聖主之懷。臣等祖考以來,世受殊遇,入侍翠幄,出簪彤管,弗 已甚,未聞朝廷有以甄論。昔壺關三老訟衞太子之罪,谷永、劉向辨陳湯之功,下足以 伏惟陛下叡聖之隆,中興之緒,方將平章典刑,以經序萬國。而與受害非所,冤痛:

不-幸遭難,志節不遂,朕甚悼之。往以戎事,未加弔祭。其下<u>幽州</u>,便依舊弔祭。」贈侍中、 太子中庶子溫嶠又上疏理之,帝乃下詔曰:「故太尉、廣武侯劉琨忠亮開濟,乃誠王家,

太尉,諡曰

所圍 涕歔欷,有懷土之切。 數 現少負志氣,有縱橫之才,善交勝己,而頗浮誇。與范陽祖逖爲友,聞逖被用,與親故 吾枕戈待旦,志梟逆虜,常恐祖生先吾著鞭。」其意氣相期如此。 重,城中窘迫無計,琨乃乘月登樓淸嘯,賊聞之,皆悽然長歎。 向曉復吹之,賊並棄圍而走。 子羣嗣。 中夜奏胡笳,賊又流 在晉陽,嘗爲胡騎

斷, 少可愍惜。 得士類歡心。 姨弟劉羣,內弟崔悅、盧諶等,皆在末波中,翹首南望。 羣 字公度,少拜廣武侯世子。隨父在晉陽,遭逢寇亂, 如蒙錄召,繼絕興亡,則陛下更生之恩,望古無二。」咸康二年,成帝詔徵羣等, 及跟爲匹磾所害,跟從事中郎盧諶等率餘衆奉羣依末波。 數領偏軍征討。 愚謂此等並有文思, 性 淸 溫 於人之中 嶠 慎,有 前 後表

遇害。 璞气意樂陽 石 時期 季 龍 鄭系,潁川荷綽,北地傅暢及羣、悅、諶等十餘人而已。 及季龍得公卿人士多殺之,其見擢用,終至大官者,唯有河東裴憲,渤海石 滅遼西,羣及諶、悅同沒胡中,季龍皆優禮之,以羣爲中書令。至冉閔敗後,羣

爲末波兄弟愛其才,託以道險不遣。

適倫世子灣,灣與秀不協,復以輿爲散騎侍郎。 奕, 慶孫、越石。」辟宰府尙書郞。 輿字慶孫。 **儁朗有才局,與跟並尚書郭奕之甥,名著當時。** 兄弟素侮孫秀,及趙王倫輔政, 齊王冏 輔政,以輿爲中書侍 孫秀執權,並免 京都爲之語曰:「洛中奕 郞 其官。

:「潁川太守劉輿迫脅范陽王虓,距逆詔命,多樹私黨,擅劫郡縣,合聚兵衆。 東海 王越、范陽王虓之舉兵也, 以輿爲潁川 太守。 及河 間 王 顒 機劉 喬 討虓 於許昌,矯 輿兄弟昔

率步 所領 輒 囚 用尚晞爲兗州,斷截王命。 趙王婚親, 騎十萬, ,徑會許昌,與喬幷力。 同會許昌,以除輿兄弟。 擅弄權勢,凶狡無道,久應誅夷,以遇赦令,得全首領。 今遣右將軍張方爲大都督,督建威將軍呂朗、 鎭南大將軍弘,平南將軍、彭城王釋,日即征東大將軍準,各勒 敢有舉兵距違王命,誅及五族。 小人不忌,為惡 能殺與兄弟送首者, 陽平太守刁默 日滋,

封三千戶縣侯,賜絹五

千匹。」

鎭幷州 知所 兵簿 爲太傅 才。 滿筵,文案盈机,遠近書記日有數千,終日 寒侯,諡曰貞。子演嗣 如流,酬對款備,時人服其能,比之陳遵。時稱越府有三才:潘滔 對。 越誅繆播、王延等,皆輿謀也。 及倉庫、牛馬、器械、水陸之形,皆默識之。是時 虓薨,東海 虓 之敗, 從 為越北 輿旣 事 中郎王儁所爭奪。 輿與之俱 見越,應機辯畫,越傾膝酬接,即以爲 王越將召之,或 面之重。 奔河北。 洛陽未敗,病指疽卒,時年四十七。 日:「輿猶膩 御史中丞傅宣劾奏,越不問輿,而免儁官。 |焼旣鎭||鄴,以||與爲征虜將軍、魏郡太守。 延愛妾荆氏有音伎,延尚未殮, 不倦,或以夜繼之,皆人人歡暢,莫不悅附。 也,近則污人。」及至,越疑而御之。 左長史。 軍國多事, 越旣 追贈驃騎將軍 大才, 總錄, 毎會議, 輿便娉之。 劉輿長 以輿爲上 自潘滔 輿乃說越,遣琨 先有功封定 輿密視天下 未及迎,又 才,裴邈清 以下,莫 賓客 命議

勒所攻,演距戰,勒退。 簿。 以演領勇士千人,行北中郎將、兗州 遷太子中庶子,出爲陽平太守。 演字始仁。 初辟太尉掾,除尚書郎,以父憂去職。 元帝拜爲都督、後將軍,假節。 刺史,鎭廩丘。 自洛奔琨、琨以爲輔國將軍、魏郡太守。 演斬王桑,走趙固,得衆七千人。 服闋,襲爵,太傅、 後爲石季龍所圍,求救於邵續、段 東 海王越引爲主 **琨將討石勒** 爲石

前將軍 隨啓歸國,拜驍騎將軍。 啓弟述,與琨子羣俱在末波中,後並入石季龍。 弟胤爲琨引兵,路逢鳥桓賊,戰沒。胤弟挹初爲太傅、東海王越掾,與琨俱被害。 ·,加給事中。 永和九年,隨中軍將軍殷浩北伐,爲姚襄所敗,啓戰沒。述爲季龍侍中, **啓爲季龍尚書僕射,後歸國,穆帝拜爲** |挹弟

當,
灣騎救之,
季龍走,
隨為屯脈次,
被害。

祖逖兄納

每憂之。 孤,兄弟六人。 祖 逖字士稚,范陽遒 然輕 財好 兄該、納等並開 俠, 慷 人也。世吏二千石,爲北州舊姓。 惬 有 節尚 爽有才幹。 每至田舍, 逖 性 豁蕩,不修儀 輒 稱兄意散穀帛以 父武,晉王掾、上谷太守。 檢, 年十 賙 应 貧乏, 五. 猶未 鄉黨宗族 知 書, 逖少 諸 兄 以

列

傳

同寢。 **宵起坐,相謂曰:「若四海鼎沸,豪傑並起,吾與足下當相避于中原耳。」** 四,陽平辟察孝廉,司隸再辟舉秀才,皆不行。 是重之。 中夜聞荒雞鳴,蹴琨覺曰:「此非惡聲也。」因起舞。逖、琨並有英氣,每語世事,或中 後乃博覽書記,該涉古今,往來京師,見者謂逖有贊世才具。僑居陽平。年二十 與司空劉琨俱爲司州主簿,情好綢繆,共被

從惠帝北伐,王師敗績於蕩陰,遂退還洛。 平昌公模等競召之,皆不就。 辟齊王冏大司馬掾、長沙王乂驃騎祭酒,轉主簿,累遷太子中舍人、豫章王從事中郎。 東海王越以逖爲典兵參軍、濟陰太守、母喪不之官 大駕西幸長安,關東諸侯范陽王虓、高密王略

軍諮祭酒,居丹徒之京口 與衆共之,又多權略,是以少長咸宗之,推逖爲行主。達泗口,元帝逆用爲徐州刺史,尋徵 及京師大亂,逖率親黨數百家避地淮泗,以所乘車馬載同行老疾,躬自徒步,藥物衣糧

道而 此輩多爲盜竊,攻剽富室,逖撫慰問之曰:「比復南塘一出不。」或爲吏所繩,逖輒擁護救解 奮擊之志。 大王誠能發威命將,使若逖等爲之統主,則郡國豪傑必因風向赴,沈溺之士欣 談者以此少逖,然自若也。 下怨叛也。 逖以社稷傾覆,常懷振復之志。 由藩王爭權,自相誅滅,遂使戎狄乘隙,毒流中原。今遺黎旣被殘酷,人有 時帝方拓定江南,未遑北伐,逖進說曰:「晉室之亂,非上 賓客義徒皆暴桀勇士, 逖遇之如子弟。時揚土大饑, 無

原而 匹,不給鎧仗,使自招募。 於來蘇,庶幾國恥可雪,願大王圖之。」帝乃以逖爲奮威將軍、豫州刺史,給千人廪,布三千 復濟者,有如大江」辭色壯烈,衆皆慨歎。 仍將本流徙部曲百餘家渡江,中流擊楫而誓曰:「祖逖不能淸中 屯于江陰,自己起冶鑄兵器,得二千餘人而

逖率衆 救於 夜襲逖,逐入壘,拔戟大呼,直越逖幕 與會,遂斬以獻逖。 譙 郡 太守。 JII 初,北中郎將劉演距于石勒也,流人塢主張平、樊雅等在譙,演署平爲豫州刺史,雅爲 川遺 追討,而張平餘衆助雅攻逖。 又有董瞻、于武、謝浮等十餘部,衆各數百,皆統屬平。逖誘浮使取平,浮譎 將李頭 帝嘉逖勳,使運糧給之,而道遠不至,軍中大饑。進據太丘。 率衆援之,逖遂克譙城 蓬陂塢主陳川, 軍士大亂。 **逖命左右距之,督護董昭與賊戰,走之。** 自號 寧朔將軍、陳留太守。 逖遣使求 樊雅遣衆 平

宣等乃去。 初 一类雅之據譙 石季 龍聞 也,逖以力弱,求助於南中郎將王含,含遣桓宣領兵助逖。 而 引衆圍譙,含又遣宣救逖,季龍聞宣至而退。 宣遂留, 助逖討諸屯 **逖旣克譙**

感逖思遇,每歎 李 頭 之討樊雅 曰:「若得此人爲主,吾死無恨。」川聞而怒,遂殺頤。 也,力戰有勳。逖時獲雅駿馬,頭甚欲之而不敢言,逖知其意,遂與之。頭 頭親黨馮寵率其屬四

塢未附者。

列

子在 桃豹 賊旣 遣 餰 歸, 之。 ||獲 多 土 百 將 所掠者 度 如 ,逖設奇以擊之,季龍大敗,收兵掠豫州 成感逖思德, 馮鐵據 米狀 時 獲米 韓潛 胡 者 趙固 逖 愛 等鎭 皆 謂謂 ,使千餘 韓潛 、上官已、李矩、日的郭默 一臺 人下士,雖疏交賤 聽 逖 東臺。 兩 、馮鐵等追擊於汴水、盡獲之。 士 率鄉 衆豐飽,而胡 人運上臺, 屬,時遣 逖 鎭 里五 同 雍丘 一大城,賊從南門出入放牧,逖軍 造游軍 百家降逖。 , 又令數 隸, 數遣軍 戊機 偽 抄 皆恩 之, 等各以詐力相 **外,益懼,無復膽氣。** 人擔米,偽爲疲極而 要截石勒, 勱 禮遇 明 又遣 以其未 ,徙陳川還襄國 之, 精騎萬 附。 豹宵遁, 由是黄河 勒屯戍 攻擊,巡遣 諸塢主 人 (距)数, 退據東 漸蹙。 :督農桑,克己務施,不畜資 一,留桃 石勒 息于道, 以南盡 開 感戴,胡中有異謀,輒 東門,相守四旬。 復爲逖 使和 將劉 燕城, 候騎常獲濮 豹等守川故城,住 爲晉土。 解之, 賊果逐之, 皆棄擔而 夜堂 所破 逖使潛進屯 以驢 示以 河 陽 千頭 上堡 禍 入, 逖以 密 福 逖厚 一西臺。 固 封 運 以 先有 糧 遂 附 丘 聞 一,子弟 受逖 者甚 待 以饋 以 走。 逖 前 任 遺 逼

耕

負

擔樵薪

`又收葬枯骨,爲之祭醊,

百姓

感

悦。

嘗置

酒大會,

耆老中

坐流涕曰:「吾等

產

玄酒忘勞甘瓠

後

克

獲

亦

由

此

也。

其有微功,賞不

踰

日

躬

自儉約,勸

0

老矣!更得父母,死將何恨!」乃歌曰:「幸哉遺黎免俘虜,三辰旣朗遇慈父。

兄納。

將軍。

先是 來統 叉謂 र्ग 軍。 憤 南 都督,逖 所 祐 收 襲, 而 或 大木山 之,意甚 人日 也 王 石 華譚 ,利十倍,於是公私豐贍,士馬 圖 乃 勒 敦 以若 進取不輟,營繕武 使 下。 俄 不敢窺兵河南, 久 今年 庾闡 從子 懷 卒 快快。 思是吳人,雖有才望,無弘致遠識,且已翦荆 於 時中原士庶 逆 汝南 亂 雍 西 問 丘, 術 北 畏逖不 且聞王敦與劉隗等構隙,慮有內難,大功不遂。 太守濟 人戴洋 大將當 時 年五 使成皋縣修逖母墓, 咸謂逖當進據武牢,而反置家險阨, 牢城,城北臨黃河,西接成皋,四望甚遠。 敢發,至是始得肆意 死。」逖 洋 率汝陽太守張敞、新蔡內史周閎 干 六。 曰:「祖豫州九月當 日滋。 亦見星,曰:「爲 豫州 方當推鋒越河, 士女若喪考妣 因與逖書, 焉。 死。 我 尋以逖弟約代領其 矣! 初 譙梁 棘,收河南地, 掃清冀朔, 求通使交市 有妖 方平 率 白 或諫之,不納。 河 星見於豫 衆築壘。 姓為 北 感激 逖恐南無堅壘,必為 會朝廷將遣戴若思 之立立 o 而 衆。 而若思雍容, 逖不報書, 天 州之分,歷陽 發病,乃致妻孥汝 未 祠 欲 成, 約別有 殺 逖 册 我, 而 雖 贈 逖病甚。 内懷 傳 而 此 車 騎 陳 聽 乃 逖 將 不 訓 日 耳

軍 五羖皮邪」轉尙書三公郎,累遷太子中庶子。歷官多所駁正,有補於時 王敦聞之了日記遺其二婢,辟爲從事中郎。 納 字士言,最有操行,能清言,文義可觀。 有戲之曰:「奴價倍婢。」納曰:「百里奚何必輕 性至孝,少孤貧,常自炊爨以養母。 平北將

納 上疏救焉,並見宥 齊王冏 建義,趙王倫收冏弟北海王寔及前黃門郎弘農董祚弟艾,與冏俱起,皆將害之,

不朽。 也。」帝以問記室參軍鍾雅,雅曰:「納所舉雖有史才,而今未能立也。」事遂停。然史官之 遭逢,則以功達其道,若其不遇,則以言達其道。 酒。 五經羣史多所綜悉,且好學不倦,從善如流。 言之於帝曰:「自古小國猶有史官,況於大府,安可不置。」因舉隱,稱「淸純亮直,學思沈敏, 俱 應仲遠作風俗通,崔子眞作政論,蔡伯喈作勸學篇,史游作急就章,猶皆行於世,便成沒而 下大亂,舊事蕩滅,君少長五都,遊 宦四 方,華裔成敗,皆當聞見,何不記述而 取散愁,此可無濟,何必圍棊然後忘憂也。」納喟然歎曰:「非不悅子之道,力不足耳。」乃 納好弈棊,王隱謂之曰:「禹惜寸陰,不聞數棊。」對曰:「我亦忘憂耳。」隱曰:「蓋聞古人 後爲中護軍、太子詹事,封晉昌公。以洛下將亂,乃避地東南。元帝作相,引爲軍諮祭 僕雖無才,非志不立,故疾沒世而無聞焉,所以自强不息也。 若使修著一代之典,褒貶與奪,誠一時之儁 古必有之, 今亦宜然。 況國史明乎得失之跡**,** 當晉未有 有裁 書,而天 成?

立,自納始也。

以示 歎納有鑒裁焉。 抑而 約,約僧納 使之可也。 初,弟|約與|逖同母,偏相親愛,|納與|約異母,頗有不平,乃密以啓帝,稱「|約懷陵上之性, 如讎,朝廷因此棄納。納旣閑居,但淸談、披閱文史而 溫 今顯侍左右,假其權勢,將爲亂階」。人謂納與|約異母,忌其寵貴,乃露 崎以納州里父黨,敬而拜之。 崎既爲時用,盛言納有名理,除光祿 已。 及約為逆,朝野 其表

法也。 曰:「假有神錐,必有神槌。」雅無以對。卒於家。 幽冀之士,鈍如槌。持我鈍槌,捶君利錐,皆當摧矣。」陶、雅並稱「有神錐,不可得槌」。納 種暮穫,善惡未定矣。」時梅陶及鍾雅數說餘事,納輒困之,因曰:「君汝潁之士,利如錐,我 之勳。累世乃著,豈但一月!若必月旦,則顏回食埃,不免貪汚,盜蹠引少,則爲淸廉。朝 不是官?必須積久,善惡乃著,公私何異!古人有言,貞良而亡,先人之殃,酷烈而存,先人 時王隱在坐,因曰:「尚書稱『三載考績,三考黜陟幽明』,何得一月便行褒貶」。陶曰:「此官 納嘗問梅陶曰:「君郷里立月旦評,何如?」陶曰:「善褒惡貶,則佳法也。」納曰:「未益。」 月旦,私法也。」隱曰:「易稱『積善之家必有餘慶,積不善之家必有餘殃」,稱家者豈

劉琨弱齡,本無異操,飛纓賈謐之館,借箸馬倫之幕,當于是日,實佻巧之徒

列

叶迹中興,克復九州之半,而災星告釁,笠轂徒招,惜矣! 勁,勵其貞操,契寒松而立節,咸能自致三鉉,成名一時。 色,跅弛易情,各運奇才,並騰英氣,遇時屯而感激,因世亂以驅馳,陳力危邦,犯疾風 及金行中毁,乾維失統,三后流亡,遞縈居彘之禍,六戎橫噬,交肆長蛇之毒,於是素絲改 歟 之謂矣。 祖逖散穀周 天不祚晉,方啓戎心,越石區區,獨禦鯨鯢之銳,推心異類,竟終幽圄,痛哉! (貧) 聞雞暗舞,思中原之燎火,幸天步之多艱,原其素懷,抑爲貪亂者矣。 古人有言曰:「世亂識忠良。」蓋斯 而 表

國恥奚雪! 于嗟道窮!祖生烈烈,夙懷奇節。 贊曰:越石才雄,臨危效忠。枕戈長息,投袂徼功。 扣楫中流,誓淸凶孼。 **踦**區汾晉,契闊獯戎。 鄰醜景附,遺萌載悅。 天妖是徵, 見欺段氏,

校勘記

- 中山 「靖王 「靖」,各本皆作「靜」,惟局本作「靖」,盖據史記五宗世家改,今從之。
- [こ]京師人士「士」、各本作「事」、今從殿本。
- 戰于黃橋 成都王穎傳謂此戰于溫,惠紀謂戰于湨水,此云「黃橋」,似誤。
- 24 永嘉元年 通鑑八六載于光熙元年,以懷紀永嘉元年四月琨保晉陽及下文琨表「九月末得發」

推之,琨受任當在永嘉元年之前,通鑑較確。

八五 死亡委危 |朱本、毛本、殿本及御覽三二〇引、册府四二九「危」作「厄」。 然「委危」「委厄」,詞

皆晦澀。

八六山 襲醇 勞校:懷紀作「龐淳」。 按:通鑑考異引劉琨答太傅府書作「龐惇」。

[4] 箕澹 :劉聰、石勒載記、魏書衞操傳、敦煌石室本晉紀均作「姬澹

陽邑城 周校:懷紀、劉聰載記「陽邑」皆作「陽曲」。 按:通鑑八八、八九亦皆作「陽曲」。

在晉陽(今太原市)北四十五里,今日陽曲鎭,陽邑卽今太谷東之陽邑鎭。

[t] 黄墟 册府三七〇引「墟」作「墟」。 黄墟出淮南子覽冥。

[10] 趙冉 斠注:麴允傳、劉聰載記均作「趙染」。

盧及兄子根皆病死 猗盧爲其子六脩所殺,不得云「病死」。根即魏書、北史魏本紀之普根。 }通

鑑八八、八九亦作「普根」。

子姪四人俱被害 亦云「害强父息四人,兄息、從兄息二人」,則此傳「四人」當作「六人」。 據下盧諶、崔悅表云「禍害父息四人,從兄二息同時並命」,敦煌石室本晉紀

[11] 石璞 斠注"石崇傳「璞」作「樸」。

[18] 彭城王釋 見卷六十一校記。

列

第

Ξ

+ =

校

勘記

屯于江陰 逖旣北渡,不得再屯江陰。 建康實錄五、通志一二五及御覽三○七、册府四一三皆

[14] 平北將軍王敦 考異:敦未嘗爲平北將〔1六〕李矩 「矩」,各本誤作「距」,今從宋本。

(1七) 平北將軍王敦 考異:敦未嘗爲平北將軍,世說德行注以爲王乂。,王衍傳,乂爲平北將軍。

晉書卷六十三

列傳第三十三

邵續

權附於勵,勵亦以以爲督護。 |次,以續子<|

以續子

以爲督護。

續綏懷流散,多歸附之。

石勒旣破沒,遣

没還招續,續以孤危無援, 妙解天文。 曰:「今棄勸歸匹磾,任子危矣。」續垂泣曰:「我出身爲國,豈得顧子而爲叛臣哉」」遂絕於 天下之敵,而欲去一手乎?續竊惑之。」穎不納。後爲苟晞參軍,除沁水令。 時天下漸亂,續去縣還家,糾合亡命,得數百人。王浚假續綏集將軍、樂陵太守,屯厭 邵續字嗣祖,魏郡安陽人也。父乘,散騎侍郎。續朴素有志烈,博覽經史,善談理義, 初爲成都王穎參軍,穎將討長沙王义,續諫曰「續聞兄弟如左右手,今明公當 旣而段匹磾在勵,造書要續俱歸元帝,自讀從之。 其下諫

列

一七〇四

勒素畏鮮卑,及聞文鴦至,乃棄攻具東走。 續與文鴦追勵至安陵,不及,房勵所署官,

幷驅三千餘 家,又遣 **一騎入散勵北邊,**〔三掠常山,亦二千家 而 還。

存等敗 季龍 呼其兄子竺等曰:「吾志雪國難,以報所受,不幸至此。 黄巾 勱 遣兄子 歸 續 騎 固 匹 至 一, 因 武邑內史存與文鴦率匹磾衆就食平原,爲石季龍所破。 . 磾 ,乃破續 旣 城下,掠 而 以逼嶷,嶷懼,求和。 帝 殺 以續 劉琨,夷晉多怨叛,遂率其徒依續。 屯田,又抄其戶口。 其居人,續率衆出救,季龍伏騎斷其後, 爲平原樂安太守、右將軍、冀州 俄而 續首尾相救,疲於奔命。 匹磾率衆攻段末杯,石勒知續孤危,遣季龍乘虛圍續 刺史,進平北將軍、假節,封祝 勒南和令趙領等率廣川、渤海千餘家背 汝等努力自勉,便奉匹磾爲主,勿有 遂爲季龍所得,使續降其城。 太興初,續遣存及文鴦屯濟南 續先與曹嶷亟相侵掠,嶷因 阿子。 續 續

家仇。」 不幸陷; 之忠誠 時帝旣聞續沒,下詔曰:「邵續忠烈在公,義誠慷慨,綏集荒餘, 沒,朕用悼恨于懷。 ,著于公私,今立其子,足以安衆,一以**續本位卽授緝,使總率所統,** 所統任 重, 宜時有代。 其部 曲文武, 已共 憂國亡身。 推其息緝 效節 爲營主。 國難, 功勳 未遂, 雪其 續

季龍遣使送續於勵,勵使使徐光讓之曰:每一國家應符撥亂,八表宅心,遺晉怖威,遠

囚乎! 命張賓延之于館,厚撫之,尋以爲從事中郎。 但恨天實爲 甘乎。]續對日:「晉末饑亂,奔控無所,保合鄕宗,庶全老幼。屬大王龍飛之始,委命納質,精 所招,當何常邪!伏惟大王聖武自天,道隆虞夏,凡在含生,孰不延首神化,恥隔皇風,而況 趣者,恐亦不容於明朝矣。 誠無感,不蒙慈恕。言歸遺晉,仍荷寵授,誓盡忠節,實無二心。且受彼厚榮,而復二三其 如續之流 竄揚越。 使囚去真卽偽,不得早叩天門者,大王負囚,囚不負大王也。 釁鼓之刑,囚之恒分, 而續蟻封海阿,跋扈王命,以夷狄不足爲君邪。何無上之甚也!國有常刑,於分 之,謂之何哉!勵曰:「其言慨至,孤愧之多矣。夫忠于其君者,乃吾所求也。」 周文生于東夷,大禹出於西羌,帝王之興,蓋惟天命所屬,德之 令自後諸克敵擒俊,皆送之,不得輒害,冀獲

食。 |勒屢遣察之,歎曰:「此眞高人矣。不如是,安足貴乎」]嘉其淸苦,數賜穀帛。 初,季龍之攻續也,朝廷有王敦之逼,不遑救恤。 續旣爲勵所執,身灌園鬻菜,以供衣 毎臨朝

嗟歎,以勵羣官。

季龍攻之,戰守疲苦,不能自立。 奔,在道爲賊所殺。 續被獲之後,存及竺、緝等與匹磾嬰城距寇,而帝又假存揚武將軍、武邑太守。 續竟亦遇害。 久之, 匹磾及其弟文鴦與竺、 緝等悉見獲, 惟存得潰圍南 勒 屢 遣

李矩

移 人救之,故得免。屬劉元海攻平陽,百姓奔走,矩素爲鄉人所愛,乃推爲塢主,東屯榮陽,後 還爲本郡督護。太守宋冑欲以所親吳畿代之,矩謝病去。畿恐矩復還,陰使人刺矩,會有 長,爲吏,送故縣令於長安,征西將軍梁王肜以爲牙門。 新鄭 李矩字世迴,平陽人也。 童齔時,與羣兒聚戲,便爲其率,計畫指授,有成人之量。及 伐氐齊萬年有殊功,封東明亭侯。

宇,輸穀以給之。 賊 衆修洛陽千金堨,以利運漕。及洛陽不守,太尉荀蕃奔陽城,衞將軍華薈奔成皋。時大饑, 《帥侯都等每略人而食之,藩、薈部曲多爲所啖。 矩討都等滅之,乃營護藩、薈,各爲立屋 矩 勇毅多權略,志在立功,東海王越以爲汝陰太守。永嘉初,使矩與汝南太守袁字率 及潛承制,建行臺,假矩滎陽太守。矩招懷離散,遠近多附之。

羣盜東下,所在多虜掠,矩遣部將擊破之,盡得賊所略婦女千餘人。 諸將以非矩所部,欲**遂** 封陽武縣侯,領河東、平陽太守。 發,齊呼,聲動 石勸親率大衆襲矩,矩遣老弱入山,令所在散牛馬,因設伏以待之。賊爭取牛馬,伏 山谷,遂大破之,斬獲甚衆,勸乃退。膳表元帝,加炬冠軍將軍,軺車幢蓋,進 時饑饉相仍,又多疫癘, 矩垂心撫恤,百姓賴焉。會長安

留之。 矩曰:「俱是國家臣妾,焉有彼此」」乃一時遣之。

聞之, 續。 聲援,肇許之。 級,暢僅 「君昔相鄭、惡 虞,大饗渠 遣使招炬。 大破之。 敢 進。 行至矩營,矩謂肇曰:「默是劉公所授,公家之事,知無不爲。」屠各舊畏鮮卑,遂邀肇爲 時 皆踴 會劉 劉 以 默遂 琨 身発 帥 躍 所 時暢 琨 ,人皆醉飽。 爭進。 假 鳥不 遣參軍張肇,率鮮卑范勝等五百餘騎往長安,屬默被圍,道路不通,將還依 率其屬歸于矩。 賊望見鮮卑,不戰而走。 卒至,短未暇爲備,遣使奉牛酒詐降于暢,潛匿精勇,見其老弱。 河內太守郭默爲劉元海所逼,四乞歸於矩,矩將使其甥郭誦迎致之,而不 鳴。 乃使歸及督護楊璋等選勇敢千人, 凶胡 矩謀夜襲之,兵士以賊衆, 臭羯,何得過庭」」使巫揚言:「東里有敎,當遣神兵相 後劉聰遣從弟暢步騎三萬討矩,屯于韓王故壘, 誦潛遣輕舟濟河,使勇士夜襲懷城,掩賊留營,又 皆有懼色。 夜掩暢營,獲鎧馬甚多,斬首數千 矩令郭誦禱鄭子產祠曰: 相去七里, 助。」將士

百匹,分軍 先是, 爲三道,夜追賊,復大獲 郭默聞矩被攻, 遣弟芝率衆援之。 而 旋 旣而聞破暢,芝復馳來赴矩。 矩乃與芝馬五

書,敕暢平炬訖,過洛陽,收固斬之,便以振代固。 聰使其將趙固鎭 洛陽, 長史周振 與固 不協, 矩送以示固,固即斬振父子,遂率騎一千 密陳固罪。 矩之破 暢也, 帳中得聰

水降.

攻趙 渡 攻之、苦戰二十餘日不能下。矩進救之,使壯士三千泛舟迎皮。賊臨河列陣, 河 固於洛。 殺傷太半,因據其營,獲其器械軍資不可勝數。 **粲侯者告有兵至, 粲恃其衆, 不以爲虞。** 固奔陽城山、遣弟告急、矩遣郭誦屯洛口以救 旣而 誦等奄至, 及旦,桑見皮等人少,更與 之。 十道 誦使 俱 將 攻, 張 皮簡精 **桑衆警** 雅 卒千 作長鉤 擾, 生悉餘 一時 以

燒器械,夜突圍 鉤 船,連戰數日不得渡。矩夜遣部將格增潛濟入皮壘,與皮選精騎千餘,而殺 而出,奔武牢。 聰追之,不及而退。 **聰因憤恚,發病而死。帝嘉其功,除矩** が所 獲牛馬,焚

都督河 南三郡軍 事、安西將軍、滎陽太守,封脩武縣 侯。

陽縣 稱 扶侍梓宮,因請 劉元 矩以 侯, 矩、 及 劉 海 默各遣 將軍 衆 粲 屠各 少不 嗣 如 位,昏虐日甚,其將斬準乃起兵殺粲,幷其宗族,發聰冢,斬其尸,遣使歸矩, 千騎 上聞 小醜,因大晉事故之際,作亂幽幷,矯稱天命,至令二帝幽沒虜庭。 故。 足立 至洛以鎭之。 」。矩馳表于帝,帝遣太常韓胤等奉迎梓宮,未至而準已爲石勒、劉曜 時弘 功,每慷慨 農 太守尹安、振威 憤歎。 安等乃同 及帝踐作,以爲都督司州諸軍事、司 謀告石勒,勒遣石生 將軍宋始等四軍 並屯洛陽,各相 率騎五 石生以四將相謀,不能自 千至洛陽,矩、默軍 州 疑阻, 刺史,改封平 輒率衆 英有固 所

皆退還。

俄而四將復背勵,遣使乞迎,默又遣步卒五百人入洛。

列傳第三十三 , 李矩

誦

設伏破 陽翟 誦率 安,乃虜宋始 勁 令, 勇 之, 阻 Ħ. | 房掠 水築 百追 一軍,渡河 無所 壘, 及生於磐脂故亭,又大破之。 五 耕 得。 而南。 且 生怒,又自率四千餘騎暴掠諸縣,因攻誦壘,接戰須臾,退軍堮坂。 守, 爲滅賊之計。 百姓相率歸矩,於是洛中遂空。公知乃表郭誦爲揚 屬趙固 矩以誦功多,表加赤幢曲蓋,封吉陽亭侯 死,石生遣 局襲誦,誦多計略, 賊至,輒 武將

歸命。 勤,誦 出。 逐從 矩,棄妻子而 利。 曰:「汝識脣亡之談不? 於 劉 默 郭 曜 矩 郭 默後 不 計,遺 所 矩 誦) 遺参軍 默 答。 答。 以示 弟元 統 欲 爲石悤 侵祖 將士 使於 勒將 遁。 誦 復爲賊 鄭雄 誦 有陰欲歸勒者 腳,矩禁之不可,遂爲約所破。 所 曜 石生 誦 敗, **詣矩謀** 擁 日 所執 其餘 屯洛陽 曜遣從弟岳 空自密南 迎接郭默、皆由 衆而 賊遣元 之,矩距 ,大掠河南,矩、默大饑,默 矩知之 歸,矩待其妻子 母 奔建康。 軍于 在 以 而不許。 書說 一賊,猶不改意,弟當 而 於 河陰, 不能討? 矩曰:「去 卿,臨難 短聞 欲與矩 後勵遣其將石良率精兵五 石勒遣其養子悤襲默,默懼後患未已,將降 如 :之大怒,遣其將郭 初。 功 逃走,其必留之。」誦 年 率 謀攻石生。 東 劉岳 ·衆南 何論 因 平曹嶷,西賓猗盧,矩如 復 走,將歸 以外援 說 _! 矩降 勒復遺誦 勒遣將 不至, 誦 曜 朝 等齎書與默,又敕 廷, 追 圍岳, 一千襲矩,矩逆擊 降 矩 麈尾馬鞭,以示殷 及 衆皆道亡, 于 襄 旣 城 石季龍 爲石良所破, 岳閉 默 牛角,何不 門不敢 自 [知負 惟 郭

及參軍 郭方,功曹張景,主簿尚遠,將軍騫韜、江霸、梁志、司馬尚、季弘、李褒、 段秀等百

餘人棄家送矩。 至於魯陽縣,矩墜馬卒,葬襄陽之峴山。

段匹磾

禪爲左賢王,率衆助國征討,假撫軍大將軍。 王浚表爲親晉王,封遼西公,嫁女與務勿塵,以結鄰援。懷帝卽位,以務勿塵爲大單于,匹 段匹磾,東部鮮卑人也。 種類勁健,世爲大人。父務勿塵,遣軍助東海王越征討有功, 務勿塵死,弟涉復辰以務勿塵子疾陸眷襲號。

勒敗還

灣與石季龍同盟,約爲兄弟,遂引騎還。 昌等不能獨守,亦還。 以鎧馬二百五十匹、金銀各一簏贖床杯。 壘,末杯追入壘門,爲勵所獲。 「受命討勸,寧以末杯一人,故縱成擒之寇。旣失凌意,且有後憂,必不可許。」疾陸眷不聽, 劉曜逼洛陽,王浚遣督護王昌等率疾陸眷及弟文鴦、從弟末杯攻石勒於襄國。 。

勒質末杯,遺使求和於疾陸眷。疾陸眷將許之,文鴦諫曰: **勒歸之,又厚以金寶綵絹報疾陸眷。** 疾陸眷令文

收之矣。」涉復辰等以爲然,引軍而還。匹磾亦止。會疾陸眷病死,匹磾自薊奔喪,至於占 外,欲襲奪其國,乃間匹磾於涉復辰、疾陸眷曰:「以父兄而從子弟邪?雖一旦有功,匹磾獨 展、<u>匹</u>暉進屯固安,以候衆軍。 建武初,匹磾推劉琨爲大都督,結盟討勸,幷檄涉復辰、疾陸眷、末杯等三面俱集襄國, 勒懼,遣間使厚賂末杯。然末杯旣思報其舊恩,且因匹磾在

北平。 末杯宣言匹磾將篡,出軍擊敗之。 末杯遂害涉復辰及其子弟黨與二百餘人,自立爲

單于。

乎 文鴦 文鴦 其親 也。」 攻敗之。 實之曰:「卿不 狄, 杯 死。 所敗,士衆離散,懼琨圖己,遂害之,於是晉人離散矣。匹磾不能自固,北依邵續, 逐將壯 長數百 北討 季龍 日: 續曰:「賴公威德,續得效節。 吾兄不 及王浚敗,匹磾領幽州刺史,劉琨自幷州依之,復與匹磾結盟,俱討石勒。 匹 磾 欲 我 末 匹磾被瘡,謂續曰:「吾夷狄慕義,以至破家,君若不忘舊要,與吾進討, 軍 甪 單 土 以勇聞 杯弟於薊 四 人 騎 能遵兄之志,逼吾不得歸朝,亦以甚矣,復欲執天子使者, 吾計,故令汝得至此。 數十騎 力戰破之,始得 面 天不 解馬 歸朝,續弟樂安 ,故百姓杖我。 ·違願, 出 羅披自鄣,前捉 城,及還,去城 取, 今日 殺胡 入城。 相見, 內史泊勒兵不許。 甚多。 見人被略而不 八十里,聞續已沒,衆懼而散,復爲石季龍所遮,文鴦以 今公有難,豈敢不俱!遂幷力追|末杯,斬獲略盡。 文鴦。 季龍復抄城下,文鴦登城臨見,欲出擊之,匹磾不許 吾寧死, 何故復戰? 遇馬乏, 文鴦戰自辰 不 伏不 救,非丈夫也。 爲汝擒。」 請釋杖。」文鴦駡曰:「汝爲寇虐, 泊 能起。 復 欲 至 逐 執 申,力極 臺 下馬苦戰, 季龍呼曰:「大兄與我 使王英送於季龍,匹 令衆失望, 誰復爲我致死 而後被執 槊折, 我雖胡夷, 執刀 匹磾復為 城 内 君之 末杯 所未聞 磾 俱 久 大 力戰不 應 是 叉令 正 惠 色 戎 叉

列

傳

第

Ξ

+

=

段匹

磾

若得假息,未死之日,心不忘本。」遂渡黃河南。匹磾著朝服,持節,賓從出見季龍曰:「 謀推匹磾爲主,事露,被害。文鴦亦遇鴆而死,惟末波存焉。 匹磾結爲兄弟,季龍起而拜之。 匹磾到襄國,又不爲勵禮,常著朝服,持晉節。 也。」因謂英曰:「匹磾世受重恩,不忘忠孝。今日事逼,欲歸罪朝廷,而見逼迫,忠款不遂。 國恩,志在滅汝。不幸吾國自亂,以至於此。 旣不能死,又不能爲汝敬也。」勵及季龍素與 及死, 弟牙立。牙死, 其後從 經年,國中 我受

釋幕,僭卽尊號。 界遼水。然所統胡晉可三萬餘家,控弦可四五萬騎,而與石季龍遞相侵掠,連兵不息,竟爲 租 |末波之子||動鳩集胡羯得萬餘人,保||在人山,自稱趙王,附于慕容儁。 俄爲||冉閔所敗,徙于 季龍所破,徙其遺黎數萬家於同癱之地。其子臟復聚兵,與季龍爲患久之。 就陸眷之孫遼立。 自 **『務勿廛已後,値晉喪亂,自稱位號,據有遼西之地,而臣御晉人。其地西盡幽州,東 儁遣慕容恪擊之,勤懼而降。** 及石氏之亡,

魏浚族子該

軍。 後爲度支校尉,有幹用。 魏浚、東郡 東阿人也,寓居關中。 永嘉末,與流人數百家東保河陰之硤石。時京邑荒儉、浚劫 初爲雍州小吏,河間王顒敗亂之際,日以爲武威將

掠得穀麥,獻之懷帝,帝以爲揚威將軍、平陽太守,度支如故。 以亂不之官。

靈長,行已建立,歸之者甚衆。其有恃遠不從命者,遣將討之,服從而已,不加侵暴。 及洛陽陷,屯于洛北石梁塢,撫養遺衆,漸修軍器。 其附賊者, 皆先解 喻, 說大晉運數 於是

遠近感悅,襁負至者漸衆。[10]

主盡 同會。 劉琨 一歡,沒因與矩相 矩將夜赴之,矩官屬以浚不可信,不宜夜往。 矩曰:「忠臣同心,將何疑乎」」及會,客 承制,假浚河南尹。時太尉荀藩建行臺在密縣,浚詣旛諮謀軍事,藩甚悅,要李矩 結 而去。

該領其 以邀演 劉 、默軍,大破之,盡虜演等騎。 浚夜遁走, 爲曜所得, 遂死之。 追贈平西將軍。 曜忌浚得衆,率衆軍圍之。 劉演、郭默遣軍來救,曜分兵逆于河北,乃伏兵深隱處,

該 一名亥,本僑居京兆陰磐。日日河間王顒之伐趙王倫,以該爲將兵都尉。 城,故得無他。 曜引 去,餘衆依之。 及劉曜攻洛

陽, 隨沒赴難,先領兵守金墉 杜 預子尹爲弘農太守,屯宜陽 界一泉塢, 數爲諸賊所抄掠。尹要該共距之,該遣 其

將馬瞻將三百人赴尹 0 瞻 知其無備, 夜襲尹殺之,迎該據塢。 塢人震懼,並服從之。 乃與

李矩 郭默 相 結 以 距 賊。 荀藩即以該爲武威將軍,統城西羅涼人,使計劉曜 元帝承制,加

冠軍將軍、河東太守,督護河東、河南、平陽三郡。

雍州 刺史。 曜寇日至,欲率衆南徙,衆不從, 曜嘗攻李矩,該破之。 馬瞻率該餘衆降曜。 及矩 米將迎 助周訪討平杜會,韶以該爲順陽 曜徵發旣苦,瞻又驕虐,部曲遣使呼該,該密往 郭默,該遣軍助之, 該遂單騎走至南陽。 又與河南尹任悟相連結。 帝又以爲前鋒都督、 太守。 平 赴之,其衆 北 後漸饑 將軍、

受陶侃節度。 殺瞻 於國。今王公舉兵向天子,非吾所宜與也。」遂距 而納該。 王敦 之反也,梁州刺史甘卓不從,欲觀該去就,試以敦旨動之。 峻未平,該病篤還屯,卒於道,葬于武陵。 該遷於新野,率衆 而 不 應。 從子雄統其衆。 及蘇峻反,率衆救臺,軍次石頭 該日:「我本去 賊,惟忠

郭默

以漁舟抄東歸行旅,積年遂致巨富,流人依附者漸衆。 郭默, 河內懷人。少微賤,以壯勇事太守裴整, 爲督將。 撫循將士,甚得其歡 永嘉之亂, 默率遺衆 ì 自 1為場

以明無私。 婦兄同郡陸嘉取官米數石餉妹,默以爲 遣使謁劉琨、琨加默河內太守。 遠制, 劉元海遣從子曜討默,曜列三屯圍之,欲使 將殺嘉, 嘉懼,奔石勒。 默乃 自 射殺

救于劉 乃遣芝質 餓 琨 默送妻子爲質,幷請糴焉。 於石勒 琨 知默狡猾,留之而緩其救。 動以默 多詐,封默書與劉曜。默使人伺得勒書,便突圍投李矩。 糴畢, 設守。 默更遣人告急。 曜怒, 沈默妻子于河而攻之。 會芝出城浴馬,使强 與俱 默遣弟芝求 後與矩 歸。 綶

卒,以 遺 幷 其 力 李使 將 距 太 一默爲北中郎將、監潍北軍事、假節。 郭 興 劉 誦 初,除潁川太守。 君 、石、事見矩傳。 追默,至襄城,及之。 遇吾甚厚,今遂棄去, 默與石悤戰敗,矩轉蹙弱,默深憂懼,解印授其參軍殷嶠,謂之 默棄家人,單馬馳去。 無顏謝之,三日可白吾去也。」乃奔陽翟。 遐故部曲李龍等謀反, 詔默與右衞將軍趙胤討 默至京都,明帝授征虜將軍。 矩聞之,大怒, 劉遐

懼,分人馬出外, 郗鑒 議 朝 於 廷 曲 [將徵蘇峻,懼其爲亂,召默拜後將軍,領屯騎校尉。 阿 北大業里作壘,以分賊勢,使獸守之。 乃潛從南門盪出 门,留 人堅守。 會峻死,圍 峻遣韓晃等攻默甚急, 解,徵爲右軍 初戰有功,及六軍敗績,南奔。 將軍 壘中頗乏水,默

爲官擇才,若人臣自擇官,安得不亂乎!胤曰:「所論事雖然,非小人所及也。」當發,求資於 默樂為 場有虞,被使出征 邊將,不願宿衞,及赴召, ,方始配給,將卒無素,恩信不著,以此臨敵, 謂平南將軍劉胤 日:「我能禦胡 而 少 不 有 見 用。 不 敗 矣。 右軍 時當 主禁

列

胤。 時胤被詔免官,不卽歸罪,方自申理,而驕侈更甚,遠近怪之。

州 州 幷金寶還船。 默,默呴之曰:「我被詔有所討,動者誅及三族。」遂入至內寢。 除郭侯而後起事。 孔煒女爲妻,煒家求之,張滿等使還其家,肫不與,因與胤 取胤僚佐張滿、荀楷等,誣以大逆。傳胤首于京師,詐作詔書, 不受免,密有異圖,與長史司馬張滿、荀楷等日夜計謀,反逆已形,惟忌郭侯一人,云當先 胤臘日餉獸酒一器,肫一頭,默對信投之水中,忿憤益甚。 默從之。 初 默之被徵距蘇峻也,下次尋陽,見胤,胤參佐張滿等輕默,倮露視之,默常切齒。 您期因逃廬山,桓宣固守不應。 初云下都,俄而還,停胤故府,招桓宣、王愆期。 禍將至矣,宜深備之。」默旣懷恨,便率其徒候旦 滿 有隙。 叉僑 胤尚與妾臥 宣視內外。 愆期懼逼, 勸默爲平南、江 一門開 人蓋肫先略取 至是,脏謂 襲胤。 掠胤 、默牽下 ||默日:「 胤將 女 祖煥 斬 及諸妾, 吏欲距 之。出 劉江 所 殺

侃所殺、三四 惡。 諸 太守 軍 導聞 鄧 大 司 集、圍 嶽 徒王導懼不可制,乃大赦天下,梟胤首于大航,以默爲西中郎將、豫州刺史。曰曰武昌 之,乃收 馳白太尉陶侃,[三]侃聞之,投袂起曰:「此必詐也。」卽日率衆討默,上疏 故致進退,不時得出。 之數 重。 胤首,詔庾亮助侃討默。默欲南據豫章,而侃已至城下,築土山以臨之。 侃惜默驍勇,欲活之,遣郭誦見默,默許降,而默將張丑、宋侯等恐爲 攻之轉急,宋侯遂縛默求降,卽斬于軍門,同黨死者四 陳默罪

以威名, 匹磾之取戮世龍, 亦由衆望: 禍福之應, 何其速哉!詩云: 「無言不酬, 無德不報」, 此 係心朝廷,始則盡忠國難,終乃抗節虜廷,自蘇子卿以來,一人而已。 默既拔迹危亡,参陪朝伍,忿因眦睚,禍及誅夷,非夫狂悖,豈宜至此!段匹磾本自遐方,而 擊衆,戰勝獲多,遂使玄明憤恚,世龍挫衄。惜其寡弱,功虧一簣。方之數子,其最優乎! 制人,乃保據危城,折衝千里,招集義勇,抗禦仇讎,雖艱阻備嘗,皆乃心王室。而矩能以少 之謂也。 史臣曰:邵、李、魏、郭等諸將,契閥喪亂之辰,驅馳戎馬之際,威懷足以容衆,勇略足以 越石之見誅段氏,實

隕身全節。 **贊曰:邵李諸將,實惟忠壯。** 默實凶殘,自貽罪戾。 蒙犯艱危,驅馳亭鄣。 力小任重,功虧身喪。 匹磾勁烈,

校勘記

[1] 遣書要續 周校:「遺」誤「遣」。按:通志一二五作「遺」。

(三) 又遣騎入散勒北邊 通志一二五「入散」作「入抄」。

列傳第三十三 校勘記

- 【1】勒使使徐光讓之 通志一二五不重「使」字。
- 29 郭默 爲劉元海所逼 舉正:此時劉元海已死,當 云劉曜。 按: 通鑑八九正作「曜」。
- (五) 劉雅生 劉聰、劉槃、劉曜載記皆作「劉雅」、無「生」字。
- 乃虜宋始一軍渡河而南至洛中遂空 通鑑九一敍此事云: 「石生房宋始 軍, 北渡河。 於是河

南之民皆相帥歸矩,洛陽遂空。」較明確。

- 〔4〕石悤 石勒載記「悤」作「聰」。下同。
- 劉 岳以外援不至降于石季龍 石勒、石季龍載記及通鑑九三俱謂劉岳爲石季龍 所 擒 非 降。

疑是。

- 八九山 敗亂之際 「際」,各本作「後」,今從宋本。 通志一二五亦作「際」。
- 襁負 至者 漸衆 「漸」,各本作「甚」,今從宋本。 通志一二五亦作「漸」。
- 【二】陰磐 周校:地理志作「陰般」。
- 豫 州 刺 史 舉正「 豫」當爲「江」,時庾亮爲豫州刺史。 按:陶侃傳及通鑑九四並作「江州」
- 武 昌 太 守 鄧 嶽 **₩** 桓宣傳嶽 乃西陽太守, 武昌則劉詡。 按 通鑑九四、 建康實錄七同

這傳。

【11】宋侯 | 勞校:陶侃傳作「宗侯」。

晉書卷六十四

列傳第三十四

瑋、長沙厲王乂。徐才人生城陽殤王憲。匱才人生東海沖王祗。趙才人生始平哀王裕。趙 清河康王遐。 美人生代哀王演。 武帝二十六男:楊元后生毗陵悼王軌、惠帝、秦獻王柬。 餘八子不顯母氏,並早夭,又無封國及追諡,今並略之。其暐、以、穎自有傳。 諸姬生汝陰哀王謨。程才人生成都王穎。王才人生孝懷帝。楊悼后生渤海 李夫人生淮南忠壯王允、吳孝王晏。嚴保林生新都懷王該。陳美人生 審美人生城陽懷王景、楚隱王

毗陵悼王軌字正則,初拜騎都尉,年二歲而夭。太康十年,追加封諡,以楚王暐子義

嗣。[1]

列傳第三十四 武十三王

子同產,故特加之。轉鎭西將軍、西戎校尉、假節,與楚、淮南王俱之國。 訥,無機辯之譽。 太康十年,徙封於秦,邑八萬戶。 于時諸王封中土者皆五萬戶,以 東與太 謬,帝異之,於諸子中尤見寵愛。以左將軍居齊獻王故府,甚貴寵,爲天下所屬目。 軍、領右軍將軍、散騎常侍。」武帝嘗幸宣武場,以三十六軍兵簿令陳料校之,陳一省便擿 秦獻王柬字弘度,沈敏有識量。 泰始六年,封汝南王。 咸寧初, 徙封南陽王, 拜左將 性仁 脫

一般伏誅,東旣痛舅氏覆滅,甚有憂危之慮,屢述|武帝旨,請還藩,而汝南王亮留柬輔政。 及惠帝卽位,來朝,拜驃騎將軍、開府儀同三司,加侍中、錄尚書事,進位大將軍。 時楊 及

亮與楚王瑋被誅,時人謂陳有先識。

子,以淮南王允子郁爲嗣,與尤俱被害。永寧二年,追諡曰悼。 元康元年薨,時年三十,朝野痛惜之。 葬禮如齊獻文王攸故事,曰廟設軒懸之樂。 又以吳王晏子鄴嗣。

無

崩,鄴入纂帝位,三國絕。

城陽懷王景字景度,出繼叔父城陽哀王兆後。 泰始五年受封,六年薨。

東海沖王祗字敬度、泰始九年五月受封。 殤王薨,復以祗繼兆,其年薨,時年三歲。

康十年,改封漢王,爲趙王倫所害。 始平哀王裕字濬度,咸寧三年受封,其年薨,年七歲。 無子,以淮南王允子迪爲嗣。 太

淮南忠壯王允字欽度,咸寧三年,封濮陽王,拜越騎校尉。 太康十年,徙封淮南,仍之

國,都督揚江二州諸軍事、鎭東大將軍、假節。元康九年入朝。

三司、侍中,都督如故,領中護軍。」允性沈毅,宿衞將士皆敬服之。 初,愍懷之廢,議者將立允爲太弟。會趙王倫廢賈后,詔遂以允爲驃騎將軍、開府儀同

|王欲破我家||遼率國兵及帳下七百人直出,大呼曰:「趙王反,我將 攻之,佐淮南王者左 孫秀手書也。大怒,便收御史,將斬之,御史走而獲免,斬其令史二人。厲色謂左右曰:「趙 優崇,實奪其兵也。|允稱疾不拜。|倫遣御史逼|允,收官屬以下,劾以大逆。|允恚,視詔,乃 兵,皆淮南奇才劍客也。 袒。」於是歸之者甚衆。 |倫旣有篡逆志,|允陰知之,稱疾不朝,密養死士,潛謀誅||倫。||倫甚憚之,轉爲太尉,外示 允將赴宮, 尚書左丞王輿閉東掖門, 允不得入, 遂圍相府。 允所將 與戰,頻敗之,倫兵死者千餘人。 太子左率陳徽勒東宮兵鼓譟於

列傳

第三十

四

武

十 三

王

内以 |允三子皆被害,坐||尤夷滅者數千人。 害,時年二十九。初,倫兵敗,皆相傳曰:「已擒倫矣。」百姓大悅。 騎四百從宮中出,舉空版,詐言有詔助淮南王允。允不之覺,開陳納之,下車受詔,爲胤所 騶虞幡以解鬭。 其背而死。 倫官屬皆隱樹而立,每樹輒中數百箭,自辰至未。 應,允結陳於承華門前,弓弩齊發,射倫,飛矢雨下。 **倫子處爲侍中,在門下省,密要壯士,約以富貴。於是遣司馬督護伏胤領** 主書司馬畦祕以身蔽倫,回 徽兄潍時爲中書令,至 旣而聞允死,莫不歎息。 遣麾 箭中

洛京傾覆,爲劉聰所害。 改葬,賜以殊禮,追贈司徒。 率領,衆過萬人,人懷慷愾,愍國統滅絕,發言流涕。 遭天凶運,奄至隕沒,逆黨遘惡,幷害三子,冤魂酷毒,莫不悲酸。 洎興義兵,淮南國人自相 及倫誅,齊王冏上表理允曰:「故淮南王允忠孝篤誠,憂國忘身,討亂奮發, 冏敗,超被幽金墉城。 臣輒以息超繼尤後,以慰存亡。」有詔 後更以吳王晏子畔爲嗣,拜散騎常侍。 幾於克捷。

都王穎子廓爲嗣,改封中都王,後與穎俱死。 代哀王演字宏度,太康十年受封。少有廢疾,不之國,演常止于宮中。 薨, 無子,以成

嗣立。 弱,無所是非。 盡殺選子孫,遐不能禁,爲世所尤。永康元年薨,時年二十八。四子:厚、籥、銓、端。〔六〕厚 十年,增封渤海郡,歷右將軍、散騎常侍、前將軍。一元康初,進撫軍將軍,加侍 清河康王遐字深度,美容儀,有精彩,武帝愛之。旣受封,出繼叔父城陽哀王兆。 性好內,不能接士大夫。及楚王暐之舉兵也,使遐收衞瓘,而瓘故吏榮晦遂 中。 退長 八而儒 太康

|單復爲淸河||王。初,單爲|淸河世子,所佩金鈴歘生隱起如麻栗,祖母陳太妃以爲不祥,毀而 **覃兄弟雖並出紹,可簡令淑還爲國胤,不替其嗣。 輒諮大將軍潁及羣公卿士,咸同大願。請** 賢明,文則承位。 厚外祖恢世載名德,厚宜奉宗廟之重,統無窮之祚,以寧四海顒顒之望。 具禮儀,擇日迎拜。」遂立厚爲皇太子。旣而河間王顒脅遷大駕,表成都王穎爲皇太弟,廢 也。清河王覃神姿岐嶷,慧智早成,康王正妃周氏所生,先帝衆孫之中,於今爲嫡。昔薄姬 兄弟之子猶子,故漢成無嗣,繼由定陶,孝和之絕,安以紹興。此先王之令典,往代之成式 固洪基。今者後宮未有孕育,不可庶幸將來而虛天緒,非祖宗之遺志,社稷之長計也。 及沖太孫薨,齊王冏表曰:「東宮曠然,冢嗣莫繼。 天下大業,帝王神器,必建儲副,以

博

第三十四

武

十三王

一七二

永嘉初,前北軍中候任城呂雍、度支校尉陳顏等謀立厚爲太子,事覺,幽於金墉城。 賣之。 占者以金是晉行大興之祥, 覃爲皇胤, 是其瑞也。 毁而賣之,象覃見廢不終之驗也。

被害,時年十四,葬以庶人禮。

籥初封新蔡王, 覃薨, 還封淸河王。

<u></u>
銓初封上庸王,懷帝卽位,更封豫章王。二年,立爲皇太子。洛京傾覆,沒于劉聰。

江州諸軍事、假節。當之國,會洛陽陷沒,端東奔荷晞於蒙。晞立爲皇太子,七十日,爲石 端初封廣川王, 銓之爲皇太子也, 轉封豫章, 禮秩如皇子, 拜散騎常侍、平南將軍、都督

勒所沒。

汝陰哀王謨字令度,太康七年薨,時年十一。無後,國除。

沙王义、成都王顯之相攻也,义以晏爲前鋒都督,數交戰。 諫,倫乃貶爲賓徒縣王。後徙封代王。倫誅,詔復晏本封,拜上軍大將軍、開府,加侍中。長 與兄淮南王允共攻趙王倫,允敗,收晏付廷尉,欲殺之。傅祗於朝堂正色而爭,於是羣官並 吳敬王晏字平度,行立太康十年受封,食丹楊、吳興幷吳三郡,歷射聲校尉、後軍將軍。 永嘉中、爲太尉、大將軍。

堪朝覲。 與晏同沒。 晏爲人恭愿,才不及中人,於武帝諸子中最劣。又少有風疾,視瞻不端,後轉增劇,不 及洛京傾覆,晏亦遇害,時年三十一。 餘四子:祥、鄴、固、衔。 [c] 祥嗣淮南 王允。 愍帝卽位, 郷即愍帝。 追贈太保。 固初封漢王,改封濟南 五子,長子不 顯名,

渤海殤王恢字思度,太康五年薨,時年二歲,追加封諡

桁初封新都王,改封濟陰,爲散騎常侍。

皆沒于賊。

元四王

元帝六男: 宮人荀氏生明帝及琅邪孝王裒。 鄭夫人生琅邪悼王煥及簡文帝。 石婕妤生東海哀王沖。 王才人生武陵威

位遂定。 從容謂王導曰:「立子以德不以年。」導曰:「世子、宣城俱有朗儁之目,固當以年。」於是太子 後徙封宣城郡公,拜後將軍。及帝爲晉王,有司奏立太子,帝以良有成人之量,過於明帝, 琅邪孝王 哀字道成,母荀氏,以微賤入宮,元帝命虞妃養之。 更封良琅邪,嗣恭王後,改食會稽、宣城邑五萬二千戶,拜散騎常侍、使持節、都督 裒初繼叔父長樂亭侯渾,

列

傳

妃山氏薨,祔葬,穆帝更贈良太保。 **青徐兗三州諸軍事、車騎將軍,徵還京師。** 子哀王安國立,未踰年薨。 建武元年薨,年十八,贈車騎大將軍,加侍中。及

選僚 東海 軍。 散 騎 咸康七 常侍。 佐,以沛國劉耽 世子,以 東海哀王沖字道讓。 |年薨,年三十一,贈侍中、驃騎大將軍 及 毗陵郡增本 東海太妃薨,因發毗 爲司馬,潁川庾懌爲功曹,吳郡 ·封邑萬戶,又改食下邳、蘭陵,以越妃裴氏爲太妃,拜長水 元帝以東海王越世子毗沒于石勒,不知存亡,乃以沖繼毗後,稱 喪。 沖卽 王位 、儀 一,以榮陽 顧 同三司, 和爲主簿。 益 東海國 無子。 永昌初、遷中軍 轉車騎將軍,徙驃騎將 將軍 校尉 · 加

國 年,安帝韶以會稽忠王次子彥璋爲東海王, 無 以 除。 嗣 道 遠, 成帝臨崩,詔曰:「哀王無嗣, 奕後入纂大業, 罷滎陽,更以臨川郡 桓溫 一廢之, 益 東海。 國統將絕, 復爲東海王, 及哀帝以琅邪 7 股所 繼哀王爲曾孫, 旣 哀怛。 而 王卽尊位, 貶爲 其以小晚 海西 公, 改食吳興郡。 徙突爲琅邪王, 生奕繼哀王爲東海王。 東海國 叉闕 爲桓玄所害, 嗣 東海國 隆安三 闕

武陵威王晞字道叔,出繼武陵王喆後, 太興元年受封。 咸和初,拜散騎常侍。 後以湘 梁國

書 東 監 增武陵國,除左將軍,遷鎭軍將軍,加散騎常侍。 穆帝 即位,轉鎭軍大將軍,遷太宰。 太和初,加羽葆鼓吹,入朝不趨,贊拜不名,劍履 康帝即位,加侍中、特進。 建元初,領秘

上

殿。

固

譲。

之。 叛逆, 常侍。」踐以梁王隨晞,晞旣見黜,送馬八十五匹、三百人杖以歸溫。 光 誣 與晞 世 一,不能率由王度,修已愼行,而聚納輕剽,苞藏亡命。 又息綜矜忍,[10]虐加于人。 簡文帝 晞 事相連染。 綜 無學術而有武幹,爲桓溫所忌。及簡文帝卽位,溫乃表晞曰:「晞體自皇極,故寵 及著作 不許,溫於是奏徙新安郡,家屬悉從之,而族誅殷涓等,廢晃徙衡陽郡 郎殷涓、太宰長史庾倩、曰□掾曹秀、舍人劉彊等謀逆,遂收付 頃自猜懼,將成 《亂階。 請免除官,以王歸藩,免其世子綜官,解子賤散騎 溫 又逼新蔡王晃 廷尉, 請 使自 袁眞 誅 靈

遵。 己思 柩 以遵 愆。 ,
弁改移妃應氏 太元六年,縣卒于新安,時年六十六。 嗣。 仰惟先朝仁宥之旨,豈可情禮靡寄! 追贈綜給事中,缝散騎郎。 及故世子梁王諸喪, 家屬悉還。」復下詔曰:「故前武 十二年,追復晞武陵國,綜、踐各復先官,隨還繼 孝武帝三日臨于西堂,詔曰:「感惟摧慟 其追封新寧郡王,邑千戶。」 晞三子: 陵王體自 綜、瑤、 ,便奉迎 皇極,克

誣其罪害之。 陵王令曰:「梁王珍之理悟貞立、蒙險違難, 撫義懷順, 載奔闕庭。 薨,子珍之嗣。桓玄篡位,國人孔樸奉珍之奔于壽陽。[三]桓玄敗,珍之歸朝廷。 且可通直散騎郎。」累遷游擊將軍、左衞、太常。劉裕伐姚泓,請爲諮議參軍。 梁王塳字賢明,出繼梁王翹,官至永安太僕,與父晞俱廢。 薨,子龢嗣。 值壽陽擾亂,在危克固, 裕將弱王室, 太元中復國。 大將軍武

之,況諸恒乎!」由是少稱聰慧。 遵曰:「門何爲通桓氏。」左右曰:「伊與桓溫疏宗,相見無嫌。」遵曰:「我聞人姓木邊,便欲殺 忠敬王遵字茂遠。初襲封新寧,時年十二,受拜流涕,哀感左右。右將軍桓伊嘗詣遵,

立,拜散騎侍郎。薨,子球之立。宋興,國除。 詔賜東園溫明秘器,朝服一具,衣一襲,錢百萬,布千匹,策贈太傅,葬加殊禮。子定王季度 官,稱制書,又敎稱令書。安帝反正,更拜太保,加班劍二十人。義熙四年薨,時年三十五, 光祿大夫。玄篡,貶爲彭澤侯,遣之國。行次石頭,夜濤水入淮,船破,未得發。會義旗興, 復還國第。 及晞追復封武陵王,以遵嗣,歷位散騎常侍、祕書監、太常、中領軍。桓玄用事,拜金紫 朝廷稱受密詔,使遵總攝萬機,加侍中、大將軍,移入東宮,內外畢敬。遷轉百

琅 邪 悼王煥字耀祖。 母有寵,元帝特所鍾愛。 初繼帝弟長樂亭侯渾,後封顯義亭侯。

臨淄 尙 稚子也。 書令刁協奏:「昔魏臨淄侯以邢顒爲家丞、劉楨爲庶子。 萬 戶封,又植 亡弟當應繼嗣,不獲已耳。 少有美才,能同遊田蘇者。今晚生矇弱, 家丞、庶子,足以攝祠祭而已,豈宜屈賢才以受無用 今侯幼弱,宜選明德。」帝令曰: 何論於此! 間封此兒,不以寵

乎」及煥疾篤,帝爲之徹膳,乃下詔封爲琅邪王,嗣恭王後。 俄而薨,年二歲。

帝悼 念無已,將葬,以煥旣封列國,加以成 人之禮,詔立凶門柏歷,備吉凶儀服,營起陵

園,功役甚衆。 琅邪國右常侍會稽孫霄上疏諫曰:

竭之困 殺。 制 猶 敎 所譏;節省 化 欲 不 法 朝 節 臣 可 · 省, 制 1聘嘉會,足以展庠序之儀,殯葬送終,務以 . 聞 廢 故華元厚葬,君子謂之不臣,嬴博至儉,仲尼稱其 法 簡約,聖賢 禮 不可 闕。 度典制 典所無, 不愼 区 門柏歷, 先王所 也。 、之所嘉也。 而 反尚 陛下龍 禮 重,吉凶之禮,事貴 飾, 與所無,天晴可不用,遇雨則無益,此至宜節省者也。 語曰 飛踐阼, 此臣愚 ,上之化 情竊所 興微 下,如 濟弊, 不過。 不 稱哀榮之情。 安也。 風 聖懷 是以世豐不使奢放,凶荒 「靡草。 勞謙,務從簡 棺槨 合禮。 京邑翼翼, 輿服 上無奢泰 明傷財 旒翣 儉, (之屬) 害時 之謬,下 四 憲章 方 所 ,古人之 禮典舊 必務約 一舊制, , 則,明 無匱

現邪一 非表凶哀之宜,如此過飾,宜從粗簡。 輦,凡有喪事,皆當供給材木百數、竹薄千計,凶門兩表,衣以細竹及材,**價直旣貴,**又 國一時所用,不爲大費,臣在機近,義所不言。今天臺所居,王公百僚聚在都

宿於墓上也。聖人非不哀親之在土而無情於丘墓,蓋以墓非安神之所,故修虞於殯 厚惜也。又禮,將葬,遷柩于廟祖而行,及墓卽窆,葬之日卽反哭而虞。 固,無益於送終,而有損於財力。凶荒殺禮,經國常典,旣滅殺而猶過舊,此爲國之所 於壺明矣,槨周於棺,槨不甚大也。語曰,葬者藏也,藏欲其深而固也。 始則營草宮於山陵,遷神柩於墓側,又非典也。非禮之事,不可以訓萬國 又案禮記,國君之葬,棺槨之間容柷,大夫容壺,士容甒。以壺甒爲差,則柷財大 槨大則難爲堅 如此,則柩不

之人,營無益之事,殫已困之財,修無用之費,此固臣之所不敢安也。今琅邪之於天 之規則,此芻蕘之言有補萬一,塵露之微有增山海。 下,國之最大,若割損非禮之事,務遵古典,上以彰聖朝簡易之至化,下以表萬世無窮 乃陛下至仁之所矜愍,可憂之至重也。正是匡矯末俗,改張易調之時,而猶當竭已罷 社稷,遠託江表半州之地,凋殘以甚。加之荒旱,百姓困瘁,非但不足,死亡是懼。此 臣至愚至賤,忽求革前之非,可謂狂瞽不知忌諱。然今天下至弊,自古所希,宗廟

表寢不報。

稽王,更以恭帝爲琅邪王。 國祀。 康帝即位,哀帝爲琅邪王。 永昌元年,立煥母弟昱爲琅邪王,卽簡文帝也。 簡文登作, 國遂無嗣。帝臨崩, 封少子道子爲琅邪王。 恭帝即位,於是琅邪國除。 哀帝卽位, 廢帝爲琅邪王。 咸和二年,徙封會稽,以康帝爲琅邪 廢帝即位,又以簡文帝攝 太元十七年,道子爲會 行琅

簡文三子

略之。 王淑儀生皇子天流。 簡文帝七子:王皇后生會稽思世子道生、皇子兪生。 李夫人生孝武帝、會稽文孝王道子。 胡淑儀生臨川獻王郁、皇子朱生。 俞生、朱生、天流並早天,今並

臨川 之歷吳興太守。 不修行業,多失禮度,竟以幽廢而卒,時年二十四,無後。及孝武帝卽位,嘗晝日見道生及 獻王郁,郁曰:「大郞饑乏辛苦。」言竟不見。 會稽思世子道生字延長。 劉裕之伐關中,以爲諮議參軍。 帝爲會稽王,立道生爲世子,拜散騎侍郎、給事中。 帝傷感,因以西陽王羕玄孫珣之爲後。 時帝道方謝,珣之爲宗室之美,與梁王珍 性疏躁, 珣

列

傳第

三 十

四

簡文

三子

一七三二

之俱被害。

騎常侍,追封郡王,以武陵威王曾孫寶爲嗣,曰司追尊其母胡淑儀爲臨川太妃。 郁爲之流涕,簡文帝深器異之。 臨川獻王郁字深仁,幼而敏慧。 年十七而薨。久之,追諡獻世子。 道生初以無禮失旨,郁數勸以敬愼之道。 寧康初,贈左將軍,加散 道生不納,

降爲西豐侯,食邑千戶。 寶字弘文,歷祕書監、太常、左將軍、散騎常侍、護軍將軍。 **炔興,以爲金紫光祿大夫,**

外。 錄尙書、假節、都督中外諸軍事。衞府文武,一以配驃騎府。」讓不受。數年,領徐州刺史、 將軍,進驃騎將軍。 事,尋加開府,領司徒。 食邑一萬七千六百五十一戶,攝會稽國五萬九千一百四十戶。 司徒、琅邪王道子體道自然,神識穎遠,實當旦奭之重,宜總二南之任,可領揚州刺史、 會稽文孝王道子字道子。 後公卿奏:「道子親賢莫二,宜正位司徒。」固讓不拜。 及謝安薨,詔曰:「新喪哲輔,華戎未一,自非明賢懋德,莫能綏御內 出後琅邪孝王,少以淸澹爲謝安所稱。年十歲,封琅邪王, 。太元初,拜散騎常侍、中軍 使錄尚書六條

太子太傅。公卿又奏:「宜進位丞相、揚州牧、假黃鉞,羽葆鼓吹。」並讓不受。

侈,下不堪命。|太元以後,爲長夜之宴,蓬首昏目,政事多闕。|桓玄嘗候道子,正遇其醉,賓 中書令王國寶性卑佞,特爲道子所寵昵。官以賄遷,政刑謬亂。 接,皆出自小豎。 于時孝武帝不親萬機,但與道子酣歌爲務,妣姆尼僧,尤爲親暱,並竊弄其權。 郡守長吏,多爲道子所樹立。 旣爲揚州總錄, 勢傾天下, 又崇信浮屠之學, 由是朝野奔湊。 用度奢 凡所幸

粗法,尙不能遵,況精妙乎!而流惑之徒,競加敬事,又侵漁百姓,取財爲惠,亦未合布施之 本。昔年下書,敕使盡規,而衆議兼集,無所採用,其違五矣。尼僧成羣,依傍法服。五誡 躬竊人財,江乙母失布,罪由令尹。今禁令不明,劫盗公行,其違四矣。在上化下,必信 聞佛者淸遠玄虛之神,以五誡爲敎,絕酒不淫。而今之奉者,穢慢阿尼,酒色是耽,其違二 中,僧尼乳母,競進親黨,又受貨賂,輒臨官領衆。 母之姓者,本臧獲之徒,無鄉邑品第,皆得命議,用爲郡守縣令,並帶職在內,委事於小吏手 夫致人于死,未必手刃害之。若政教不均,暴濫無罪,必夭天命,其違三矣。盜者未必 于時朝政旣紊,左衞領營將軍會稽許榮上疏曰:「今臺府局吏、直衞武官及僕隸婢兒取 無衞霍之才,而比方古人,爲患一也。臣

酒屬宮,炫乃得起。由是玄益不自安,切齒於道子。

曰:「故宣武公黜昏登聖,功超伊霍,紛紜之議,宜裁之聽覽。」道子領曰:「儂知儂知。」因舉

客滿坐,道子張目謂人曰:「桓溫晚塗欲作賊,云何?」玄伏地流汗不得起。長史謝重舉板答

實甚懼,復譖甯於帝。 道也。」又陳「太子宜出臨東宮、克獎德業」。疏奏、並不省。中書郎范甯亦深陳得失、帝由是 袁悅之因尼妙音致書與太子母陳淑媛,自己說國寶忠謹,宜見親信。 漸 不平於道子,然外每優崇之。國寶即甯之甥,以諂事道子,甯奏請黜之。 帝不獲已,流涕出甯爲豫章太守。 道子由是專恣。 帝因發怒,斬悅之。 國寶懼,使陳郡 國

善也。 水側 諮 道子謂牙 賣官販爵 議參軍。牙爲道子開東第,築山穿池,列樹竹木,功用鉅萬。 了與親昵乘船就之飮宴,以爲笑樂。 嬖人趙牙出自優倡,茹千秋本錢塘捕賊吏,因賂諂進,道子以牙爲魏郡太守,千秋驃騎 然修飾太過,非示天下以儉。」道子無以對,唯唯而已,左右侍臣莫敢有言。 ,聚資貨累億。 曰:「上若知山是板築所作,爾必死矣。」|牙曰:「公在,牙何敢死」」營造彌甚。 帝嘗幸其宅,謂道子曰:「府內有山,因得遊矚,甚 道子使宮人爲酒肆,沾賣於 帝還宫, 干秋

賤,竊 角京邑、主簿戴良夫苦諫被囚,殆至沒命。 又尼妣屬類 太妃之故,加崇禮秩。 又道子旣爲皇太妃所愛,親遇同家人之禮,遂恃寵乘酒,時失禮敬。 弄威權,衒賣天官。 行,傾 動 亂 時。 博平令吳興聞人奭 穀賤 其子壽齡爲樂安令,贓 人饑,流殣不 上疏曰:「驃騎諮議 而恒以醉酒見怒,良夫以執忠廢棄。 絕,由百 私 姓單貧,役調深 狼 藉 ,畏法奔逃, 參軍茹千秋協輔宰 刻。 竟無罪罰, 叉振 帝益不能平,然以 武將軍 傲 相 又權龍之 然還縣。 ,起自微 庾恒鳴

|子復委任||王緒,由是朋黨競扇,友愛道盡。 太妃每和解之,而道子不能改 出 臣,各開 王 恭為兗州 小府,施置吏佐,無益於官,有損於國。」疏奏,帝益不平,而逼於太妃,無所廢黜,乃 ,殷仲堪為荆州 王珣 爲 《僕射,王雅爲太子少傅,以張王室,而潛制 道子也。道

南; 世祖 中書郎徐邈以國之至親,唯道子而已,宜在敦穆,從容言於帝曰:「昔漢文明主,猶悔淮 聰達,負愧齊王。兄弟之際,實宜深愼。」帝納之,復委任道子如初

常 道,執操 國寶 時有人爲雲中詩以指斥朝廷曰:「相王沈醉,輕出敎命。 、馳競。 高 抗, ·何不徵之,以爲朝匠。」荆州,謂王忱也,法護,即王珣,甯,即王恭,仙 荆州大度,散誕難名,盛德之流,法護、王甯 ,仲堪、仙民, 捕賊干秋,干豫朝政。 特有言詠 民 東 王愷 卽 Щ 守 安

邈字,安道,戴逵字

也。

寶付 宜進位太傅、揚州牧、中書監,假黃鉞,備殊禮。」固辭不拜,又解徐州。 廷尉 帝旣冠,道子稽首歸政,王國寶始總 及恭帝 ,

弁其從弟

琅邪內

皮緒悉斬之,以謝於

"从謝於"

"恭即罷兵。 爲琅邪王,道子受封會稽國,幷宣城爲五萬 國權,勢傾朝廷。 九千戶。 王恭 乃舉 道子乞解中外都督、錄尚書 安帝踐阼, 兵討之。 韶内: 外 有司 道子懼,收 衆 事,動 奏:「道子 静諮 國

<u>道子世子元顯,時年十六,爲侍中,心惡</u> 恭,請<u>道子</u>討之。 乃拜元顯爲征虜將軍,其先

以

謝方岳

,詔不許

家 加 衞 慼 由 事 殊 府 中 辭 禮 及徐州文武悉配之。 ·,軌容著外,CIEI有 一依 琅邪穆太妃故事。 陽秋之明義,不以私限違公制,中代之變禮。 :禮無時,賢哲斯順。 屬道子妃薨,帝下詔曰:「會稽王妃尊賢莫二,朕義 元顯夙令光懋,乃心所寄,誠孝性蒸蒸,至痛 須妃葬畢,可居職 故閔子腰経,山 如故。」 王逼 難 同所親。 屈。 奪。 然不 良以至 **今葬** 以

赴山 之等 宰相 信 助 之。 若復從其欲,則太宰之禍至矣。」道子日飮醇酒,而委事於元顯。 負 飲,結帶之言,寧可忘邪 刺 (者。 史庾楷、廣州刺史桓玄並應之。 反,朝廷憂懼 屠 陵,相王 權 若恭得志,以卿爲反覆之人,必不相信,何富貴可保,禍敗亦旋及矣」」楷怒曰:「王恭昔 日夜謀議,以伺四方之隙。 于時王恭威振內外,道子甚懼,復引譙王尚之以爲 滅, 旣不能距恭,反殺國寶。 輕,宜密樹置,以自 當與 一憂懼 ", 於 天下同 無計,我知事急, //是內 舉, 外 ! 戒嚴。 卿今棄舊交, 「藩衞。」道子深以爲然,乃以其 誅鉏姦臣, 自爾已來,誰復敢讓袂於君之事乎! 王恭知之,復舉兵,以討尚之爲名。 元顯攘袂慷慨謂道 即勒兵而 道子使人說楷曰:「本情相與, 何憂府不開,爵不至乎」時楷已應恭傲,正 結新援,忘王恭疇昔陵侮之恥乎,若乃欲委體 至。 去年之事,亦俟 子曰、「去年不討王恭, 司 腹 馬王愉 رن ان 尚之說道子曰:「藩伯强盛, 元顯雖年 少,而聰明多 命而奮。 爲江州刺 可謂斷 荆州刺史殷仲堪 庾楷實不 金。 我事 史以 致有今役。今 往年帳 能 相 備 一徴士 王,無相 恭,與尚 以 豫 白 中之 而 州 臣

涉,志氣果銳,以安危爲己任。 於是以爲 征討 部督、假節,統前將軍王珣、江弘左將軍謝琰及將軍桓之才、毛泰、 尚之爲之羽翼。 時相傅會者,皆謂元顯有明帝神武之風。 高素等伐

恭、二三滅之。

距之。 守桓放之、新蔡內史何嗣、潁川太守溫詳、新安太守孫泰等,發京邑士庶數萬人,據石頭以 散騎常侍、中書令,又領中領軍,持節、都督如故。 敗死,狼狽西走,與桓玄屯于尋陽。 旣 道子將出頓中堂,忽有驚馬蹂藉軍中,因而 而楊佺期、桓玄、殷仲堪等復至石頭,元顯於竹里馳還京師,遣丹楊尹王愷、鄱陽 朝廷嚴兵相距,內外騷然。 擾亂,赴江而死者甚衆。 韶元顯甲杖百人入殿,尋加 仲堪旣 知王 恭 太

堪命,天下苦之矣。旣而孫恩乘釁作亂,加道子黃鉞,元顯爲中軍以討之。又加元顯錄 謀主,交結朋援,多樹親黨,自桓謙以下,諸貴遊皆斂衽請交。元顯性苛刻,生殺自己,法順 屢諫,不納。 不之覺。 而道子酒醒,方知去職,於是大怒,而無如之何。 然道子更爲長夜之飲,政無大小,一委元顯。時謂道子爲東錄,元顯爲西錄。 會道子有疾,加以昏醉,元顯知朝望去之,謀奪其權,諷天子解道子揚州、司徒,而道子 元顯自以少年頓居權重,慮有譏議,於是以琅邪王領司徒,元顯自爲揚州 又發東土諸郡免奴爲客者,號曰「樂屬」,移置京師,以充兵役,東土囂然,人不 廬江太守會稽張法順以刀筆之才,爲元顯 刺 西府車 史。旣

列傳

氏 謂 太皇太后崩,詔道子乘輿入殿。元顯因諷禮官下議,稱己德隆望重,旣錄百揆,內外羣僚皆 騎塡湊,東第門下可設雀羅矣。 已,富過帝室。 應盡敬。 爲 爲會稽王夫人,金章紫綬。會洛陽覆沒,道子以山陵幽辱,上疏送章綬,請歸藩,不許。及 風 流 於是公卿皆拜。于時軍旅荐興,國用虛竭,自司徒已下,日廪七升,而元顯聚斂不 名士,由是自謂無敵天下,故驕侈日增。帝又以元顯有翼亮之功,加其所生母劉 及謝琰爲孫恩所害,元顯求領徐州刺史,加侍中、後將軍、開府儀同三司、都 元顯無良師友,正言弗聞,諂譽日至,或以爲一時英傑,或

豪氣,旣幷殷、楊,專有荆楚。然桓氏世在西藩,人或爲用,而第下之所控引,止三吳耳。孫 之禍矣。 用理之人,然後可以信義相期,求利之徒,豈有所惜而 公也,而謂之非忠。 勝之術。 督十六州諸軍 不致火,食盡故去耳,非力屈也。昔國實卒後,王恭不乘此威入統朝政,足見其心非侮 會孫恩至京口,元顯栅斷石頭,率兵距戰,頻不利。 玄忝 旣 阿衡之重,言何容易,求福則立至,干忤或致禍。 任在遠,是以披寫事實。」元顯覽而 而孫恩遁于北海,桓玄復據上流,致牋於道子曰:「賊造近郊,以風不得進,以雨 事,封其子彥璋爲東海王。 今之貴要腹心,有時流淸望者誰乎**?豈可云無佳勝,直是不能信之耳**。 尋以星變,元顯解錄,復加尙書令。 大懼。 更委信邪。爾來一朝 張法順謂之曰:「桓玄承籍 道子無他謀略,唯日 在朝君子,豈不有懷, 一夕,遂成今日 禱蔣侯廟爲厭 門資,素有 但懼害及 於明

牢之,而牢之有疑色。法順還,說元顯曰:「觀牢之顏色,必貳於我,未若召入殺之。不爾, 恩爲亂,東土塗地,編戶饑饉,公私不贍,玄必乘此縱其姦兇,竊用憂之。」元顯曰:「爲之柰 之爲前鋒,而第下以大軍繼進,桓玄之首必懸於麾下矣。」元顯以爲然,遣法順至京口,謀於 何。」法順曰:「玄始據荆州,人情未輯,方就綏撫,未遑他計。及其如此,發兵誅之,使劉牢

敗人大事。」元顯不從。

爲其所。」元顯曰:「非牢之無以當桓玄。且始事而誅大將,人情必動,二三不可。」于時揚土 事公员儀同三司,加黄鉞,班劍二十人,以伐桓玄,竟以牢之爲前鋒。法順又言於元顯曰: 將軍僚佐文武, 卽配太傅府。 加元顯侍中、驃騎大將軍、開府、征討大都督、十八州諸軍 饑虛,運漕不繼,玄斷江路,商旅遂絕。 於是公私匱乏,士卒唯給粰橡。 「自舉大事,未有威斷,桓謙兄弟每爲上流耳目,斬之,以孤荆楚之望。 且事之濟不,繼在前 道子尋拜侍中、太傅,置左右長史、司馬、從事中郞四人,崇異之儀,備盡盛典。 其驃騎

陣于宣陽門外,元顯佐東多散走。 至西陽,帝戎服餞元顯于西池,始登舟而玄至新亭。元顯棄船退屯國子學堂。明日,列 或言玄已至大桁,劉牢之遂降于玄。元顯迴入宣陽門,

大軍將發,玄從兄驃騎長史石生馳使告玄。玄進次尋陽,傳檄京師,罪狀元顯。

俄而

列傳

郡,使御史杜竹林防衞,竟承玄旨耽殺之,時年三十九。帝三日哭於西堂。 順所誤。」於是送付廷尉,幷其六子皆害之。」玄又奏:「道子酣縱不孝,當棄市 牢之參軍張暢之率衆逐之,衆潰。 玄遣 太傅從事中郎毛泰收元顯送于新亭,縛於舫前而數之。元顯答曰:「爲王誕、張法 元顯奔入相府,唯張法順隨之。 問計於道子,道子對之 韶徙安成

兆。 墳塋 於王 動 無與二。 果散騎 元顯 便 미 區 妃 於 翳 追 宇,痛貫人鬼,感惟永往,心情崩隕。今皇祚反正,幽顯式敍,宜崇明國體,以述 子秀熙避 及玄敗,大將軍、武陵王遵承旨下令曰:「故太傅公阿衡二世,契闊皇家,親賢之重,地 是遺 陵。 然, 郎滕羨奴勺藥也, 崇太傅爲丞 驃騎大將軍內總朝維,外宣威略,志蕩世難,以寧國祚。 飄薄非所,須南道淸通,便奉迎神柩。 追諡 通直常侍司馬珣之迎道子柩于安成。 難 蠻 元 中 顯 一相,加殊禮,一依安平獻王故事。 曰忠。 而 至者,太妃請 竟坐棄市。 以臨 川王 以爲嗣,於是脩之歸于別第。 太妃不悟,哭之甚慟。 **|寶子脩之爲道子嗣,尊妃王氏爲太妃。** 時寇賊未平,喪不時達。義熙元年,合葬 太尉宜便遷改。可下太史詳吉日,定宅 追贈驃騎爲太尉,加羽葆鼓吹。 脩之復爲嗣。 天未靜亂,禍酷備鍾,悲 劉裕意其詐而案驗之, 薨,諡悼王,無 義熙中,有稱 養典。

國除。

宗子維城。 奮庸瑣之常材,抗姦凶之巨寇,喪師殄國,不亦宜乎!斯則元顯爲安帝之孫强,道子實晉朝 籍,未或前聞。 茫茫禹跡,咸窟穴於豺狼,慄慄周餘,竟沈淪於塗炭。 之宰嚭者也。 國命,始則彝倫攸斁,終則宗社淪亡。 九服 無謀,郭欽識危亡之有兆。 於魯、衞、應、韓,磐石犬牙,連衡於吳、楚、齊、代。 沸騰,戎羯交馳,乘輿幽逼,瑤枝瓊萼,隨鋒鏑而消亡,朱芾綠車,與波塵而殄瘁。 贊曰:帝子分封,嬰此鞠凶。 史臣曰:泰始之受終也,乃憲章往昔,稽古前王,廣誓山河,大開藩屏,文昭武穆,方駕 無俾城壞,無獨斯畏。」城旣壞矣,畏也宜哉!典午之喪亂弘多,實此之由 列代之崇建維城,用藩王室,有晉之分封子弟,實樹亂階。 道子地則親賢,任惟元輔,耽荒麴櫱,信惑讒諛。 及宫車晏駕,墳土未乾,國難荐臻,朝章弛廢。 札蹇繼及,禍難仍鍾。 元顯以童丱之年,受棟梁之寄,專制朝廷,陵蔑君親, 然而作法於亂,付託非才,何曾歎經國之 嗚呼! 秦獻聰悟,清河內顧。 運極數窮,一至于此!詳觀載 遂使尼媼竊朝權,姦邪制 詩云:「懷德惟寧, 重以八王繼亂 淮南忠勇, 遂使

宣城識度。 道子昏凶,遂傾國祚。

校勘記

以楚王瑋子義嗣 列 傳 第 Ξ 十 四 校 武紀「義」作「儀」。 勘 記 義,與扶風王義同名,武紀作「儀」,蓋是

- (三) 葬禮如齊獻文王攸故事 周校:「文」衍文。
- [1] 鄴入纂帝位 「纂」,各本作「篹」,今從殿本。
- , . M W 畦秘 料注 ...王應麟姓氏急就篇注曰晉眭秘, 是宋本作「眭」,不作「畦」。 按 通鑑八三、姓觹

「畦」並作「眭」。

- CHJ 徽兄淮 勞校·「淮」當作「準」,卽廣陵公陳準也。
- ハベン 覃籥銓端 考異:懷紀,「立豫章王詮爲皇太子」,卽銓。按:元紀、王彌傳均作「詮」。
- フャン 吳敬王晏 勞校"上文「李夫人生吳孝王晏」、愍紀亦作「孝王」、傳云「敬王」、疑誤。
- /\ 元 U 彦璋爲東海王 何無忌傳、魏書司馬叡傳「璋」並作「章」。
- 息綜 簡文紀「綜」作「總」。 世說點免注引司馬晞傳作「琮」。
- 太宰長史庾倩 「倩」,各本均作「藉」。 周校:「藉」當作「倩」,照庾冰傳。 按:"世說雅量、賢媛注
- 引中興書、賞譽注引徐廣晉紀、世說人名譜、通鑑一〇三並作「倩」、「藉」誤,今據改。
- 國人孔樸 梁王彤傳「國人」作「國臣」、「孔樸」作「孔璞」、世說豪爽注引中興書亦作「孔璞」。
- 以武陵威王曾孫寶爲嗣 簡文子。 按:周校是。 疑「曾」字衍文。 周校:孝武紀作「武陵王孫寶」。 簡文、武陵兄弟,不當以武陵曾孫嗣

記

王國寶傳作「支妙音」。

三 軌容著外 「著」,各本作「者」,今從殿本。册府八六二亦作「著」。

二公 前將軍王珣 「珣」,各本作「恂」,今從宋本。安紀、珣傳、王恭傅與宋本同。

張森楷云:桓伊傳有弟不才,討孫恩有功,疑卽此人。「之」疑「不」之譌。 按: 桓不才

亦見朱序傳及通鑑一一一。

桓之才

十八州諸軍事 「十」上當有「督」字。

晉書卷八十五

列傳第三十五

干儿 道子子悦 恬 洽 協 劭 薈 洽子珣 珉 劭子諡

謂之曰:「琅邪王仁德雖厚,而名論猶輕。兄威風已振,宜有以匡濟者。」會三月上已,帝親 觀禊,乘肩轝,具威儀,敦、導及諸名勝皆騎從。吳人紀瞻、顧榮,皆江南之望,竊覘之,見其 謀密策,知無不爲。及徙鎭建康,吳人不附,居月餘,士庶莫有至者,導患之。會敦來朝,導 雅相器重,契同友執。帝之在洛陽也,導每勸令之國。會帝出鎭下邳,請導爲安東司馬,軍 陳留高士張公見而奇之,謂其從兄敦曰:「此兒容貌志氣,將相之器也。」初襲祖爵即丘子。 司空劉寔尋引爲東閤祭酒,遷祕書郎、太子舍人、尚書郎,並不行。後參東海王越軍事 時元帝爲琅邪王,與導素相親善。導知天下已亂,遂傾心推奉,潛有興復之志。帝亦 王導字茂弘,光祿大夫覽之孫也。父裁,鎭軍司馬。導少有風鑒,識量清遠。年十四,

傅

吳會風靡,百姓歸心焉。自此之後,漸相崇奉,君臣之禮始定。 未若引之以結人心。二子旣至,則無不來矣。」帝乃使導躬造循、爍,二人皆應命而至,由是 傾 如此,咸驚懼,乃相率拜於道左。 導因進計曰:「古之王者,莫不賓禮故老,存問風俗,虛己 心,以招俊乂。况天下喪亂,九州分裂,大業草創,急於得人者乎!顧榮、賀循,此土之望,

豪侈相高,政敎陵遲,不遵法度,羣公卿士,皆饜於安息,遂使姦人乘釁,有虧至道。然否終 厭亂, 巨猾陵暴, 人懷漢德, 革命反正, 易以爲功。 自魏氏以來, 迄于太康之際, 公卿世族, 隆,朝野傾心,號爲「仲父」。帝嘗從容謂導曰:「卿,吾之蕭何也。」對曰:「昔秦爲無道,百姓 揚晏安,戶口殷實,導爲政務在淸靜,每勸帝克己勵節,匡主寧邦。於是尤見委杖,情好日 斯泰,天道之常。大王方立命世之勳,一匡九合,管仲、樂毅,於是乎在,豈區區國臣所可擬 矣。」帝納焉。 ! 願深弘神慮,廣擇良能。 顧榮、賀循、紀贍、周玘,皆南土之秀,願盡優禮,則天下安 俄而洛京傾覆,中州士女避亂江左者十六七,導勸帝收其賢人君子,與之圖事。時開

臨郡,不問賢愚豪賤,皆加重號,輒有鼓蓋,動見相準。時有不得者,或爲恥辱。天官混雜, 最也,封不過亭侯。倉舒,愛子之寵,贈不過別部司馬。以此格萬物,得不局跡乎!今者 永嘉末、遷丹楊太守、加輔國將軍。以上牋曰:「昔魏武、達政之主也,荀文若、功臣之 第三十五 王導

列

傳

之物,請從導始。 朝望穨毁。 而更約己沖心,進思盡誠,以身率衆,宜順其雅志,式允開塞之機。」拜寧遠將軍 導忝荷重任,不能崇浚山海,而開導亂源,饕竊名位,取紊彝典,謹送鼓蓋加崇 庶令雅俗區別,羣望無惑。」帝下令曰:「導德重勳高,孤所深倚,誠宜 下, 尋 一表彰

楚囚相 故, 騎常侍、都督中外諸軍、領中書監、錄尙書事、假節,刺史如故。 殊,舉目有江河之異。」皆相視流涕。惟導愀然變色曰:「當共勠力王室,克復神州,何至作 見管夷吾,無復憂矣。」過江人士,每至暇日,相要出新亭飲宴。 加 振威將軍。愍帝卽位,徵吏部郎,不拜。 來此欲求全活,而寡弱如此,將何以濟」憂懼不樂。往見導,極談世事,還,謂閩曰:「向 後 晉國旣建,以導爲丞相軍諮祭酒。 坐事 對泣邪!衆收淚而謝之。俄拜右將軍、揚州刺史、監江南諸軍事,遷驃騎將軍,加散 除 桓鄰初過江,見朝廷微弱,謂周顗曰:「我以中州多 導以敦統六州,固辭中外都 周顗中坐而歎曰:「風景不

了時軍旅不息,學校未修,導上書日:

定」者也。 攸 殺,而 夫 風 有 化之本在於正人 恥 故 聖王 且格,父子兄弟夫婦長幼之序順,而君臣之義固矣。 一蒙以養正,少而敎之,使化霑肌骨,習以成性,遷善遠罪而 倫,人倫之正存乎設庠序。庠序設,五教明,德禮洽通,彝倫 易所謂「正家而 不自知,行

本之於學。故周禮,卿大夫獻賢能之書于王,行己王拜而受之,所以尊道而貴士也。人 所謂「未有仁而遺其親,義而後其君者也」。 求諸己,敦樸之業著,淨僞之競息,敎使然也。 知士之貴由道存,則退而修其身以及家,正其家以及鄉,學於鄉以登朝,反本復始,各 成德立,然後裁之以位。雖王之世子,猶與國子齒,使知道而後貴。其取才用士,咸先 故以之事君則忠,用之莅下則仁。 孟軻

前典, 設,先王之道彌遠,華僞之俗遂滋,非所以端本靖末之謂也。殿下以命世之資,屬陽九 樂,樂必崩」,而況如此之久乎!先進忘揖讓之容,後生惟金鼓是聞,干戈日尋,俎豆不 **苟禮儀膠固,淳風漸著,則化之所感者深而德之所被者大。 使帝典闕而復補,皇綱弛** 道墜而復興,俎豆之儀幽而更彰。方今戎虜扇熾,國恥未雪,忠臣義夫所以扼腕拊心。 之運,禮樂征伐,翼成中興。誠宜經綸稽古,建明學業,以訓後生,漸之敎義,使文武之 故有虞舞干戚而化三苗,魯僖作泮宮而服淮夷。桓文之霸,皆先敎而後戰。今若聿遵 而 更張,獸心革面,饕餮檢情,揖讓而服四夷,緩帶而天下從。得乎其道,豈難也哉! 自頃皇綱失統,頌聲不興,于今將二紀矣。傳曰「三年不爲禮,禮必壞,三年不爲 興復道教,擇朝之子弟並入于學,選明博修禮之士而爲之師,化成俗定,莫尙

帝甚納之。

蒼生何由仰照!帝乃止。進驃騎大將軍、儀同三司。以討華軼功,封武岡侯。 遠,任眞推分,澹如也。有識咸稱導善處興廢焉。 而已。導以爲皇太子副貳宸極,普天有情,宜同三朝之哀。從之。及劉隗用事,導漸見疏 導始啓立,於是典籍頗具。時孝懷太子爲胡所害,始奉諱,有司奏天子三朝舉哀,羣臣一哭 之責也。乞自貶黜,以穆朝倫。」詔不許。尋代質循領太子太傅。時中興草創,未置史官, 懦覆師,有司極法。聖恩降天地之施,全其首領。然臣受重任,總錄機衡,使三軍挫衄,臣 率羊鑒。旣而鑒敗,抵罪。導上疏曰:「徐龕叛戾,久稽天誅,臣創議征討,調舉羊鑒。 司空、假節、錄尚書,領中書監。會太山太守徐龕反,帝訪可以鎭撫河南者,導舉太子左衞 及帝登尊號,百官陪列,命導升御牀共坐。 導固辭,至于三四,曰:「若太陽下同萬物, 進位侍中、 鑒闇

及四方並勸進於帝。時王氏强盛,有專天下之心,敦憚帝賢明,欲更議所立,導固爭乃止。 滅親,可以吾爲安東時節假之。」及敦得志,加導守尙書令。初,西都覆沒,海內思主,羣臣 今者近出臣族!」帝跣而執之曰:「茂弘,方託百里之命於卿,是何言邪 」乃詔曰:「導以大義 詣臺待罪。帝以<u>導</u>忠節有素,特還朝服,召見之。<u>導稽首謝曰:「逆臣賊子,何世無之,豈意</u> 王敦之反也,劉隗勸帝悉誅王氏,論者爲之危心。導率羣從昆弟子姪二十餘人,每旦

傳

及此役也,敦謂導曰:「不從吾言,幾致覆族。」導猶執正議,敦無以能 奪

爵必諡,卿校常伯無爵不諡,甚失制度之本意也」。從之。自後公卿無爵而諡,導所 初, 自漢魏已來,賜諡多由封爵,雖位通德重,先無爵者,例不加諡。 導乃上疏,稱「武官有 帝愛琅邪王良,將有奪嫡之議,以問導。 **導曰:「夫立子以長,且紹又賢,不宜改** 議 也。

革。」帝猶疑之。導日夕陳諫,故太子卒定。

鼓吹、班劍二十人。及石勒侵阜陵、詔加導大司馬、假黃鉞、出討之。軍次江寧、帝親餞于 揚州刺史。敦平,進封始興郡公,邑三千戶,賜絹九千匹,進位太保,司徒如故,劍履上殿, 時敦始寢疾,導便率子弟發哀,衆聞,謂敦死,咸有奮志。及帝伐敦,假導節,都督諸軍,領 郊。俄而賊退,解大司馬 入朝不趨,讚拜不名。固讓。帝崩,導復與庾亮等同受遺詔,共輔幼主,是爲成帝。加羽葆 及明帝卽位,導受遺詔輔政,解揚州,遷司徒,一依陳羣輔魏故事。王敦又舉兵內向。

l永、匡術、賈寧並說峻,令殺導,盡誅大臣,更樹腹心。 峻敬導,不納,故永等貳於峻。 庾亮將徵蘇峻,訪之於導。導曰:「峻猜險,必不奉詔。且山藪藏疾,宜包容之。」固爭 **亮遂召峻。旣而難作,六軍敗績,導入宮侍帝。峻以導德望,不敢加害,猶以本官居** |峻又逼乘輿幸||石頭,導爭之不得。||峻日來帝前肆醜言,||導深懼有不測之禍。 導使

參軍袁耽潛諷誘泳等,謀奉帝出奔義軍。 而峻衞御甚嚴,事遂不果。 導乃攜二子隨永奔于

等謀並不行。 我之隙,一旦示弱,竄於蠻越,求之望實,懼非良計。今特宜鎭之以靜,羣情自安。」由是嶠 豐儉移都,苟弘衞文大帛之冠,則無往不可。若不績其麻,則樂土爲虛矣。且北寇游魂,伺 導曰:「建康,古之金陵,舊爲帝里,又孫仲謀、劉玄德俱言王者之宅。 古之帝王不必以 及賊平,宗廟宮室並爲灰燼,溫嶠議遷都豫章,三吳之豪請都會稽,二論紛紜,未有所

售,而國用不給。」導患之,乃與朝賢俱制練布單衣,於是士人翕然競服之,練遂踴貴。 主者出賣、端至一金。其爲時所慕如此。 導善於因事,雖無日用之益,而歲計有餘。 時帑藏空竭,庫中惟有練數千端,鬻之不 乃令

與導書手詔,則云「惶恐言」,中書作詔,則曰「敬問」,於是以爲定制。自後元正,導入,帝猶 六年冬,蒸,詔歸胙於導,曰:「無下拜。」導辭疾不敢當。初,帝幼沖,見導,每拜。 叉嘗

爲之興焉。

時大旱,導上疏遜位。 詔曰:「夫聖王御世,動合至道,運無不周,故能人倫攸敍,萬物

第三十

五.

遵

公宜遺履謙之近節,遵經國之遠略。 門下 速 遣 侍中以下敦喻。」 導固讓。 詔累逼之,然後 不臧,惟予一人。公體道明哲,弘猶深遠,勳格四海,翼亮三世,國典之不墜,實仲山甫補 而猥崇謙光,引咎克讓,元首之愆,寄責宰輔,祇增其闕。 博綜萬機,不可一日有曠

會,帝幸其府,縱酒作樂,後令輿車入殿,其見敬如此。 導簡素寡欲,倉無儲穀,衣不重帛。 帝知之,給布萬匹,以供私費。 導有羸疾,不堪朝

敷道訓,以亮天工。不亦休哉!公其戒之! 外緝四海,內齊八政,天地以平,人神以和,業同伊尹,道隆姬旦。 官以幷之。册曰:「朕夙罹不造,肆陟帝位,未堪多難,禍亂旁興。公文貫九功,武經七德, 命羣官,允釐庶績。 朕思憑高謨,弘濟遠猷,維稽古建爾于上公,永爲晉輔。 往踐厥職,敬 馬,給布萬匹。俄而賊退,解大司馬,復轉中外大都督,進位太傅,又拜丞相,依漢制罷司徒 |石季龍掠騎至||歷陽,|導請出討之。加大司馬、假黃鉞、中外諸軍事, [三] 置左右長史、司 仰思唐虞,登庸雋乂,申

戲導曰:「朝廷欲加公九錫。」導弗之覺,但謙退而已。 謨曰:「不聞餘物,惟有短轅犢車,長 知,將往焉。。導恐妾被辱,遽令命駕,猶恐遲之,以所執麈尾柄驅牛而進。司徒|蔡謨聞之, 是歲,妻曹氏卒,贈金章紫綬。初,曹氏性妬,導甚憚之,乃密營別館,以處衆妾。

柄麈尾。」導大怒,謂人曰:「吾往與羣賢共游洛中,何會聞有蔡克兒也。」

鎭,而 防。 還第,復 導曰:「吾與元規休感是同,悠悠之談,宜絕智者之口。 于時 執 朝廷之權,旣據上流,擁强兵,趣向者多歸之。 導內不能平,常遇西風塵起,舉扇自 |何懼哉!|又與稱書,以爲庾公帝之元舅,宜善事之。 庾亮以望重 地逼,出鎮於 外。 南蠻校尉陶稱間 說亮當舉兵內向,或勸導密爲之 則如君言,元規若來,吾便角巾 於是讒問遂息。 時亮雖居外

自漢魏以來,羣臣不拜山陵。 導以元帝睠同布衣,匪惟君臣而已,每一崇進,皆就拜,

不勝哀戚。由是詔百官拜陵,自導始也。

蔽,徐曰:「元規塵汚人。」

尙號 定江左,拱己宅心而庶績咸熙。 班劍百人,中興名臣莫與爲比。 和,通彝倫之紀,遼隴承風,丹穴景附。 遲務外,則名雋中夏,應期濯纓,則潛算獨運。 一依漢博陸侯及安平獻王故事。 證,風流百代,於是乎在。 咸康 五年薨,三時年六十四。 惟公邁達沖虛,玄鑒劭邈,夷淡以約其 故能威之所振,寇虐 册曰:「蓋高位以酬明德、厚爵以答懋勳,至乎闔 帝舉哀於朝堂三日,遣大鴻臚持節監護喪事,赗襚之 及葬,給九游輼輬車、黃屋左纛、前後羽 隆高世之功,復宣武之績,舊物不失,公協其猷。 昔我中宗、肅祖之基中興 改心,化之所鼓, 心,體仁以流其惠,棲 檮杌易質 也,下帷委誠而策 葆鼓吹、武賁 棺標 調 陰陽之 、跡,莫

列

經緯三 乃荷負顧命,保股沖人,遭遇艱圮,夷險委順,拯其淪墜而濟之以道,扶其顚傾而弘之以仁, 之殞保衡,有周之喪二南,曷諭茲懷!今遣使持節、謁者僕射任瞻錫諡曰文獻,祠以太牢。 朝而蘊道彌曠。 方賴高謨,以穆四海,昊天不弔,奄忽薨殂,朕用震慟于心。 雖有殷

有靈,嘉茲榮寵」 二弟:穎、敞,少與導俱知名,時人以顯方溫太眞,以敞比鄧伯道,並早卒。 導六子:悅、

恬、恰、協、劭、薈。

瓜葛,郫得爲爾邪!導性儉節,帳下甘果爛敗,令棄之,云:「勿使大郞知。」 悦字長豫,弱冠有高名,事親色養,導甚愛之。導嘗共悅弈棊,爭道,導笑曰:「相與有

積日。 潛爲祈禱者備矣。 言訖不見,悅亦殞絕。悅與導語,恒以愼密爲端。 爲請命,故來耳。 爲母曹氏襞斂箱篋中物。悦亡後,導還臺,自悅常所送處哭至臺門,其母長封作篋,不忍 悦少侍講東宮,歷吳王友、中書侍郎,先導卒,諡貞世子。先是,導夢人以百萬錢買悅, 忽見一人形狀甚偉,被甲持刀,導問:「君是何人?」曰:「僕是蔣侯也。公兒不佳,欲 。公勿復憂。」因求食,遂噉數升。 專掘地,得錢百萬,意甚惡之,一皆藏閉。 食畢,勃然謂導曰:「中書患,非可救者。」 導還臺,及行,悅未嘗不送至車後,又恒 及悅疾篤,導憂念特至,不食

復開。

悅 無子,以弟恬子琨爲嗣,襲導爵丹楊尹, 卒,贈太常。 子嘏嗣,尚鄱陽公主, 歷中領

軍、尙書。卒、子恢嗣、義熙末、爲游擊將軍。

恬字敬豫。 少好武,不爲公門所重。 導見悅輒喜,見恬便有怒色。 州辟別駕,不行,襲

爵 即丘子

恬久之乃沐頭散髮而出,據胡牀於庭中曬髮,神氣慠邁,竟無賓主之禮。 性傲誕,不拘禮法。 謝萬嘗造恬,旣坐,少頃,恬便入內。 萬以爲必厚待己,殊有喜色。 萬悵然而歸。

節更好士,多技藝,善弈棊,爲中興第一

石頭。 遷中書郎。 導薨,去官。 帝欲以爲中書令,導固讓,從之。 俄起爲後將軍,復鎭石頭。 轉吳國、會稽內史,加散騎常侍。卒,贈中 除後將軍、魏郡太守, 加給事· 中, 領兵鎭

軍將軍、諡曰憲。

左長史、建武將軍、吳郡內史。 治字敬和,導諸子中最知名,與荀羨俱有美稱。 徵拜領軍, [B] 尋加中書令, 固讓, 表疏十上。 弱冠、歷散騎、中書郎、中軍長史、司徒 穆帝詔曰:「敬

時時 受。 和 淸 相見, :裁貴令,昔爲中書郞,吾時尙小,數呼見,意甚親之。 今所以用爲令,旣機任須才,且欲 |升平二年卒於官,年三十六。 二子:珣、珉。 共講文章,待以友臣之義。而累表固讓, 甚違本懷。 其催洽令拜。」苦讓,遂不

並 旄 杖節。 委珣焉。 史、給事黃門侍郎 珣 字元琳。 王掾當作黑頭公。 文武數萬 弱冠與陳郡謝玄爲桓溫掾,俱爲溫所敬重,嘗謂之曰:「謝掾年四十, 人,悉識其面。 皆未易才也。」珣轉主簿。 從討袁眞、封東亭侯、轉大司馬參軍、琅邪王友、中軍 時溫經略中夏,竟無寧歲,軍中機務 必擁

長

孝武深杖之。 射,加征虜將軍,復領太子詹事 時希安旨,乃出珣爲豫章太守,不之官。 珣 兄弟皆謝氏壻,以猜嫌致隙。 轉輔 國將軍 、吳國內史,在郡爲士庶所悅。 太傅安旣與珣絕婚,又離珉妻,由是二族遂成仇釁。 除散騎常侍,不拜。 徵爲尚書右僕射,領吏部,轉左僕 遷祕書監。 安卒後,遷侍中,

珣夢人以大筆如椽與之,旣覺,語人云:「此當有大手筆事。」 俄而帝崩,哀册諡議, 媚於會稽 時帝雅好典籍,珣與殷仲堪、徐邈、王恭、郗恢等並以才學文章見昵於帝。 王道子,而 與珣等不協, 帝慮晏駕後怨隙必生, 故出恭、恢爲方伯, 而委 及王 珣 端右 皆珣 寶自

雖終爲禍亂,要罪逆未彰,今便先事而發,必大失朝野之望。況擁强兵,竊發於京輦,誰謂 殺珣等,僅而得免,語在國寶傳。 「比來視君,一似胡廣。」珣曰:「王陵廷爭,陳平愼默,但問歲終何如耳。」恭尋起兵,國寶將 隆安初,國寶用事,謀黜舊臣,遷珣尚書令。 國寶若遂不改,惡布天下,然後順時望除之,亦無憂不濟也。」恭迺止。旣而謂珣曰: 二年,恭復舉兵,假珣節,進衞將軍、都督琅邪水陸軍事。 王恭赴山陵,欲殺國寶, 珣止之曰:「國寶

事平,上所假節,加散騎常侍。

|稽王道子書曰:「珣神情朗悟,經史明徹,風流之美,公私所寄。 霜備經,雖賴明公神鑒,亦識會居之故也。卒以壽終,殆無所哀。 子在朝,弘益自多。時事艱難,忽爾喪失,歎懼之深,豈但風流相悼而已!其崎嶇九折,風 四年,以疾解職。 歲餘,卒,時年五十二。追贈車騎將軍、開府,諡曰獻穆。 雖逼嫌謗,才用不盡;然君 但情發去來,置之未易 桓玄與會

耳。」玄輔政,改贈司徒。

曰:「所望於法護。」於是直前哭之甚慟。 初,珣旣與謝安有隙,在東聞安薨,便出京師,詣族弟獻之,曰:「吾欲哭謝公。」獻之驚 法護、珣小字也。 珣五子:弘、虞、柳、邑 孺、曇首,

並有高名。

列 傳

耳。 追贈太常。二子:朗、練。義熙中,並歷侍中。 長兼中書令。二人素齊名,世謂獻之爲「大令」,珉爲「小令」。 太元十三年卒,時年三十八, 講未半,便云已解,卽於別室與沙門法綱等數人自講。法綱歎曰:「大義皆是,但小未精 兄。」僧彌,珉小字也。時有外國沙門,名提婆,妙解法理,爲珣兄弟講毗曇經。 辟州主簿,舉秀才,不行。後歷著作、散騎郎、國子博士、黃門侍郎、侍中,代王獻之爲 珉字季琰。少有才藝,善行書,名出<u>珣右。時人爲之語曰:「法護非不佳,僧彌難爲</u> 珉時 尚幼,

協字敬祖,元帝撫軍參軍,CKJ襲爵武岡侯,早卒,無子,以弟劭子謐爲嗣。

篡,以謐棄太保,奉璽册詣玄。 史,未至郡,玄以 中軍長史、黃門郎、侍中。 初,劉裕爲布衣,衆未之識也,惟謐獨奇貴之,嘗謂裕曰:「卿當爲一代英雄。」及裕破 謐字稚遠。 少有美譽,與譙國桓胤、太原王綏齊名。拜祕書郎,襲父爵,遷秘書丞,歷 爲中書令、領軍將軍、吏部尙書,遷中書監,加散騎常侍,領司徒。及玄將 及桓玄舉兵、詔證銜命詣玄、玄深敬昵焉。拜建威將軍、吳國內 玄篡,封武昌縣開國公,加班劍二十人。

追躡。 嘗問謐曰:「璽綬何在?」 謐益懼。 桓玄,謐以本官加侍中,領揚州刺史、錄尚書事。 兄少立名譽,加位地如此,欲不危,得乎」。謐懼而出奔。 ,少驍果輕俠,欲誘謐還吳,起兵爲亂,乃說謐曰:「王綏無罪, 證旣還,委任如先,加證班劍二十人。
義熙三年卒,時年四十八。 會王綏以桓氏甥自疑,謀反,父子兄弟皆伏誅。 **謐旣受寵桓氏,常不自安。** 劉裕牋詣大將軍、武陵王遵,遣人 而義旗誅之,是除時望也。 追贈侍中、司徒, 護軍將軍劉毅 謐從弟

諡曰文恭。三子:瓘、球、琇。入宋、皆至大官。

吳國內史。卒,贈車騎將軍,諡曰簡。三子:穆、默、恢。穆、臨海太守。 習,未嘗見其墮替之容。桓溫甚器之。遷吏部尚書、尚書僕射,領中領軍, 千石。恢,右衞將軍。穆三子:簡、智、超。默二子:鑒、惠。義熙中,並歷顯職 劭字敬倫,歷東陽太守、吏部郎、司徒左長史、丹陽尹。 劭美姿容,有風操,雖家人近 默,吳國內史,加一 出爲 建威將軍

書,領中護軍,復爲征虜將軍、吳國內史。頃之,桓沖表請薈爲江州刺史,固辭不拜。 年饑粟貴,人多餓死,薈以私米作饘粥,以飴餓者,所濟活甚衆。 薈字敬文。 恬虛守靖,不競榮利,少歷淸官,除吏部郎、侍中、建威將軍、吳國 徵補中領軍,不拜。 內史。時 轉督 徙尙

浙江東五郡、左將軍、會稽內史,進號鎭軍將軍,加散騎常侍。卒於官,贈衞將軍

賜死,恭罷兵、符廢去職。麼大怒,迴衆討恭。恭遣司馬劉牢之距戰于曲阿,廢衆潰奔走, 興聚兵,輕俠赴者萬計。 麼自謂義兵一動,勢必未寧,可乘間而取富貴。 而曾不旬日,國寶 內史,令起軍,助爲聲援。 遂不知所在。 子麼、歷太子中庶子、司徒左長史。以母喪、居于吳。王恭舉兵,假廢建武將軍、吳國 長子緣爲恭所殺,少子瞱以不知麼存亡,憂毀布衣蔬食。後從兄諡言其死 <u></u>
厥卽墨絰合衆,誅殺異已,仍遣前吳國內史<u>虞嘯</u>父等入吳興、義

所,華始發喪,入仕。 初,導渡潍,使郭璞筮之,卦成,璞曰:「吉,無不利。淮水絕, 圧氏滅。」 其後子孫繁衍,

竟如璞言。

撫運, 授圖 情交好,負其才智,恃彼江湖,思建克復之功,用成翌宣之道。於是王敦內侮,憑天邑而狼 圖,乖少康之配夏,時無思晉之士,異文叔之興劉,輔佐中宗,艱哉甚矣!茂弘策名枝屛,叶 一,商湯,哲后也,託負鼎而成業。 史臣曰:飛龍御天,故資雲雨之勢,帝王興運,必俟股肱之力。軒轅,聖人也,杖師臣而 無德在時。 。九土未宅其心,四夷已承其弊。旣而中原蕩覆,江左嗣興,兆著玄石之 自斯已降,罔不由之。原夫典午發蹤,本于陵寡,金行

斯之類也。 在乎櫛風之際,雖則世道多故,而規模弘遠矣。 貫日,主 顧,蘇峻連兵,指宸居而隼擊。實賴元宰,固懷匪石之心,潛運忠謨,竟翦吞沙之寇。 同 軌,功未半古,不足爲儔。 |垂餌以終全,貞志陵霜,國綴旒而不滅。 觀其開設學校,存乎沸鼎之中,爰立章程, 提挈三世,終始一心,稱爲「仲父」,蓋其宜矣。恬珣踵德,副呂虔之贈刀,謐乃 至若夷吾體仁,能相小國,孔明踐義,善翊新邦,撫事論情,抑 比夫蕭曹弼漢,六合爲家;奭望匡周,萬方

隤聲,慚劉毅之徵璽。 贊曰 語曰:「深山大澤,有龍有蛇。」實斯之謂也。 武岡矯矯 赫矣門族,重光斯盛。 匡時緝政。 懿績克宣,忠規靡競。

契叶三主,

校勘記

榮逾九命。

貽刀表祥,筮水流慶。

卿大夫獻賢能之書于王 周校"「鄉」誤「卿」。 按:此用周禮地官文,周說是。

中外諸軍 事 據成紀、通鑑九五、「中外諸軍事」上當脫「都督」二字。

咸康五年薨 「咸康」原作「咸和」。 勞校:「咸和」當作「咸康」。 按:勞說是,今據成紀、 通鑑九

六、建康實錄七改。

列

傳

第 Ξ

+

五

校 勘

記

徴拜領軍 世說賞譽注引中興書作「中領軍」。恰以吳郡太守轉,資淺,似有「中」字是。

七六一

フェン 柳 斠注:宋書王弘傳「柳」作「抑」。

C 六 〕 元帝撫軍參軍 校:元帝未嘗爲撫軍,疑是簡文之誤。 姚鼐惜抱軒筆記:協安能上接元帝,蓋簡文爲撫軍將軍,協爲其參軍耳。勞

一七六二

晉書卷六十六

列傳第三十六

劉弘

寇盜屛迹,爲幽朔所稱。 太宰長史。張華甚重之。由是爲寧朔將軍、假節、監幽州諸軍事,領烏丸校尉,甚有威惠, 少家洛陽,與武帝同居永安里,又同年,共研席。以舊恩起家太子門大夫,累遷率更令,轉 劉弘字和季,沛國相人也。 以勳德兼茂,封宣城公。 祖馥,魏揚州刺史。父靖,鎮北將軍。弘有幹略政事之才,

張昌幷軍圍宛,敗趙驤軍,弘退屯梁。侃、初等累戰破昌,前後斬首數萬級。 弘遣南蠻長史陶侃爲大都護,參軍蒯恒爲義軍督護,〔〕牙門將皮初爲都戰帥,進據襄陽。 宛、新野,所向皆平。及新野王歆之敗也,以弘代爲鎭南將軍、都督荆州諸軍事,餘官如故。 太安中,張昌作亂,轉使持節、南蠻校尉、荆州刺史,率前將軍趙驤等討昌,自方城至 及到官,昌懼

列傳

第三

十六

劉

弘

而逃,其衆悉降,荆土平。

悉降其 之義。 遣諸軍,克滅羣寇,張奕貪禍,距違詔命。將軍致討,傳首闕庭,雖有不請之嫌,古人有專之 退於宛,分受顯戮。猥蒙含宥,被遣之職,卽進達所鎭。而范陽王虓先遣前長水校尉張奕 覆餗之刑,甘受專輒之罪。」詔曰:「將軍文武兼資,前委方夏,宛城不守,咎由趙驤。 將軍所 軍討奕,卽梟其首。|奕雖貪亂,欲爲荼毒,由臣劣弱,不勝其任,令|奕肆心,以勞資斧,敢引 賴之徒易相扇動,飆風駭蕩,則滄海橫波,苟患失之,無所不至。 比須表上,慮失事機,輒遣 **領荆州,臣至,不受節度,擅舉兵距臣。今張昌姦黨初平,昌未梟擒,益梁流人蕭條猥集,無** 討爽,斬之,表曰:「臣以凡才,謬荷國恩,作司方州,奉辭伐罪,不能奮揚雷霆,折衝萬里,軍 初,弘之退也,范陽王虓遣長水校尉張奕領荆州。 其恢宏奧略,鎭綏南海,以副推轂之望焉。」張昌簋于下雋山,日弘遣軍討昌,斬之, 弘至, 爽不受代, 舉兵距弘。 弘遣軍

濟屯,故太上立德,其次立功也。頃者多難,淳朴彌凋,臣輒以徵士伍朝補零陵太守,庶以 曰:「被中詔,敕臣隨資品選,補諸缺吏。夫慶賞刑威,非臣所專,且知 臣誾蔽所能斟酌。 時開部守宰多闕,弘請補選,帝從之。弘迺敍功銓德,隨才補授,甚爲論者所稱。乃表 然萬事有機,豪氂宜愼,謹奉詔書,差所應用。蓋崇化莫若貴德,則所以 人則哲,聖帝所難,非

以初 狀,公文具上。」朝 母 馬法『賞不踰時』,欲 侯陟爲襄陽 以訓獎臣子,長益 朝議,遁逃不出,昌質其妻子,避之彌遠。 **令虞潭** 國者,宜與 老疾困,賊至守衞不移,以致拷掠,幾至隕命。 蕩滅 う舊制 補襄陽 **蕩之弊,養退讓之操。** 忠誠烈正,首唱義舉,舉善以敎,不能者勸,臣輒特轉潭補醴陵令。 姦凶,侃 不 太守,餘並從 太守,侃 國 柏 爲 風敎。 監。 任。 廷 恒 以初 爲府行司馬,使典論 人知爲善之速福也。 各以始終軍事 若必姻親然後可用 皮初之勳宜 臣輒以勃爲歸鄉令,貞爲信陵令。 之。 雖有功,襄陽又是名郡,名器宜愼,不可授初,乃以 臣以不武,前退於宛,長史陶侃、參軍蒯恒、牙門皮初, 陟,弘之壻也。 ,初爲都戰帥, 見酬 報 功事,恒爲山都令。 勃孝篤著於臨危,貞忠厲於强暴,雖各四品, 若不超報,〔三〕無以勸徇功之士,慰熊羆之志。 則 荆州 弘下教曰:「夫統天下者,宜與天下一心,化一 聽之。 尚書令史郭貞, 忠勇冠軍,漢沔淸肅 十郡,安得十女壻然後爲政哉」,乃表「陟 皆功行相參,循名校實,條 韶惟令臣 張昌以爲尚書郞, 以散補空缺,然际 ,實初等之勳 南郡 前 東平太守夏 廉 東仇勃 欲訪以 也。 勠力 皆可 列行 致 鄕 司

舊制, 苦,遂呼省之。 弘 幌方二山澤中不聽百姓捕魚,弘下教曰:「禮,名山大澤不封,與共其利。 於 是勸 課農桑, 兵年過六十, 寬刑 省賦, 羸疾 無襦。 歲用 有年, 弘愍之,乃讁罰主者, 百姓 愛悅。 弘嘗夜起, 逐給 韋袍複帽, 聞城上 持 更者歎聲甚 轉以相付 **今公私**弁

烟親

得

詔

列

不宜 樂 敗, 者。 弘 五千 遂 乃給其 以 人縣侯,弘 而 而 百 斛 弘曰 零陵米三萬斛給之。 一聽,況御樂哉 庭作之,恐非將軍本意。』吾常爲之歎息。 姓 優 與尚。 遣 無復厝手 劣三品。 田 使告急 [種糧 上疏固讓,許之。 弘曰:「諸君未之思耳。天下一家,彼此無異,吾今給之,則無西顧之憂矣。」 食,擢其賢才,隨資敍用。 ,請糧。 」乃下郡縣,使安慰之, 投醪當與三軍同 地,當何謂邪!速改此法。」又「酒室中云齊中酒、聽事酒、猥酒, 弘移書贈給,而 尚賴以自固。 進拜侍中、鎭南大將軍、開府儀同三司 其 【薄厚,自今不得分別」。 于時流人在荆州十餘萬戶,羈旅貧乏, 州府綱紀以運道懸遠,文武匱乏,欲以零陵 須朝廷旋返,送還本署。 時總章太樂伶人,避亂多至荆州,或勸可作樂 今主上蒙塵,吾未能 時益州刺史羅尚爲 展效臣節,雖有家伎,猶 論平張昌功,應封次子 變曰:『爲天子合 多爲盜賊。 李特 同用 一運米 所

弘 海 大怒,斬之。 王 越節 惠帝 度。 <u>張光,太宰腹心,宜斬光以明向背。」弘曰:「宰輔得失,豈張光之罪!危人自安,君</u> 幸長安,河間王顒挾天子,韶弘 時天下大亂,弘專督江漢,威行 河間 王顒 使張光爲順陽太守, 爲劉喬繼援。 :南服。 南陽 太守衞展說弘曰:「彭城王 前廣漢 弘以張方 太守辛冉說弘以從橫 · 殘暴,知顧必敗,遣使受東 一前東 之事 奔, **等** 有不

子弗爲也。」展深恨之。

叔 侃 太守苗光,以大衆屯于夏口。 征 者 行, 弘 又加 陳 敏寇揚州 不疑之。 君祖 南平太守應詹寧遠將軍,督三郡水 母年高,便 ,引兵欲西上。 乃以侃 爲前鋒督護,委以討敏之任。 可 歸 也。 又遣治中何松領建平、宜都、襄陽三郡兵,屯巴東,爲羅尚後 弘乃解南蠻,以授前北軍中候蔣超,統江夏太守陶侃 匹夫之交尙不負心,何況大丈夫乎!」陳敏竟不敢闚境。 軍,繼蔣超。 侃遣 侃與敏 子及兄子爲質, 同郡,又同歲舉吏,或有 弘遣之曰:「賢 武 間

十部 疾,將解 從 弘 事 毎 州 有 及校尉 及東 興廢. 海王 ,手書守相,丁寧款密,所以人皆感悅,爭赴之,咸曰:「得劉公一 適 分授所部,未及表上,卒于襄陽。 越奉迎大駕,弘遣 參軍劉盤 爲督護,率諸軍 士女嗟痛,若喪 ·會之。 所親 盤旣旋, 矣。 紙書,賢於 弘 自以老

永興

三年,詔進號車騎

將

軍,開府及餘官如故。

公,諡 雖 弘 下 志 節度,心 於 初,成 日元 是 墨 都 未 經 王 能 率 穎 安。 南奔, 府兵討勵,戰於濁水,斬之,襄 及贴 欲之本 距穎,蹯又斬勵,朝廷嘉之。 國,弘距之。 及弘卒、 沔 肅清。 ·, 弘 越手 司馬 初, ,書與燔贊美之,表贈弘新 東海 郭勱 欲 王 越 推 疑 穎 弘 爲 與劉 主, 弘 喬貮于己, 子蹯追遵 城郡

簡至, 以 高 密王 知 璠 略 得 代鎭,寇盜不禁,詔起璠爲順陽 衆心,恐百姓逼以爲主,表陳之,由是徵蹯爲越騎校 內史,江漢之間 歸 尉。 心 蹯亦深.慮逼迫, 及 、略薨, Щ 簡代

一七六八

被書, 亂 父老追思弘,雖甘棠之詠召伯,無以過也。 便輕至 一洛陽 然後遣迎家累。 僑人侯脱、 路難等相率衞送至都,然後辭去。 南夏逐

陶 侃 子洪 瞻 夏 琦 旗 斌 稱 範 岱 兄子臻 臻弟輿

不以 耳 之郡 義。 獨 雖 僕 吏。 日:「資於事父以事君。 禮 |逵過||廬江太守||張夔,稱美之。 從 ,欲有所按,侃閉門部勒諸吏,謂從事曰:「若鄙郡有違, 長沙太守萬嗣過廬江,見侃,虛心敬悅,曰:「君終當有大名。」 陶侃字士行,本鄱陽人也。 心亦過所 , 吾能禦之。」從事 鄱 陽 孝廉 望。 范逵嘗過侃,時倉卒無以待賓,其母乃截髮得雙髲,以易酒肴,樂飲 及達去, 即退。 小君,猶母也, 侃追送百餘里。 變妻有疾,將迎醫於數百里。 吳平,徙家<u>廬</u>江之尋陽。 父丹,吳揚武將軍。 變召爲督郵,領樅陽令。 安有父母之疾而不盡心乎!」 逵曰:「卿欲仕郡乎。」侃曰:「欲之, 自當 有能名, 時正寒雪,諸綱紀皆難之,侃 明憲直繩,不宜相 命其子與之結友而 遷主簿。 乃 請 行。 侃早孤貧,爲 會州 衆咸服其 困於無津 部從事 逼。 極歡,

與語 官,召爲舍人。 異 察侃 之。 爲孝廉,至洛陽,數詣 除郎 時豫章國郎中令楊晫,侃州里也,爲鄕論所歸。 中。 伏波將軍孫秀以亡國支庶,府望不 張華。 華初以遠人,不甚接遇。 顯,中華人士恥 侃詣之, 晫曰:「易稱『 貞固 侃 毎往,神無忤色。 爲掾屬,以 侃寒 華後

足以 嫌,棄官歸,爲郡小中正 非之,慶曰:「此子終當遠到,復何疑也」」慶後爲吏部令史, 小人共載?」晫曰:「此人非凡器也。」尚書樂廣欲會開揚士 幹事』,陶士行是也。」與同乘見中書郞顧榮,榮甚奇之。 人, 舉侃補武岡令。 武庫令黃慶進侃 吏部郎溫雅謂晫曰:「奈何與 與太守呂岳 於 廣 人或

候,邑千戶。 謂侃曰:「吾昔爲羊公參軍,謂吾其後當居身處。 會劉弘 為荆州 刺 史,將之官,辟侃爲南蠻長史,遣先向襄陽討賊張昌,破之。 今相觀察,必繼老夫矣。」後以軍 功封東鄉 弘旣至,

撃恢 弟恢 來弔,不哭而退,化爲雙鶴,沖天而去,時人異之。 力距恢。 之,遽遣子洪及兄子臻詣弘以 統强兵,脫有異志, ,所向必破。 來寇武昌,侃出兵禦之。 陳敏之亂,弘以侃爲江夏太守,加鷹揚將軍。 侃乃以運船爲戰艦, 侃戎政齊肅,凡有虜獲,皆分士卒,身無私焉。 則荆州無東門矣。」弘曰:「侃之忠能,吾得之已久,豈有是乎」」侃潛聞 隨郡 自固。 或言不可,侃曰:「用官物討官賊,但須列上有本末耳。」於是 內史扈褒問侃於弘 弘引爲參軍,資而遣之。又加侃爲督護,使與諸 侃備威儀,迎母官舍,鄉里榮之。 日:[於]「侃與敏有鄉里之舊,居大 後以母憂去職。 嘗有二客 敏遣其 軍 并

服闋, 參東海王越軍事。 江州刺史華軼表侃爲揚武將軍,使屯夏口,又以臻爲參軍

威將軍 不平 與元帝素不平,臻懼難作,託疾而歸,白侃曰:「華彦夏有憂天下之志,而才不足,且與琅 一,假 ·,難將作矣。」侃怒,遺臻還**軼**。 於赤幢曲蓋軺車、鼓吹。 侃乃與華軼告絕。 臻遂東歸於帝。 帝見之,大悦,命臻爲參軍,加侃

將軍 知那 後繼。 衆。 以 三日 侃 立 誘 賊,殺之。 一夷市 相 之。 令二將爲 遣參 濟。 侃 行 得 頃 南蠻校尉 使 於郡 刺 可 劫果至,生獲數人,是西陽王漾之左右。侃卽遣兵逼漾,令出 之,遷龍驤將軍、武昌太守。時天下饑荒,山夷多斷江劫掠。 蒙縛送帳下二十人, 侃斬之。 史。」貢 侃 軍王貢告捷于王敦 至。 部 賊王沖自稱荆州刺史,據江陵。 將朱伺 百:「 前鋒,兄子輿爲左 東,大收其利。 卿等誰能 開州刺 對曰:「鄙州方有 卿健將也。」賊果增兵來攻,侃使朱同等逆擊,大破之, 救之,賊退保冷口。 史,領西陽 忍饑鬭邪。〕部將吳寄曰:「要欲十日忍饑,晝當擊賊,夜分捕魚,足 而帝使侃擊杜弢, ,敦曰:「若無陶侯,便失荆州 甄,擊賊,破之。 事 、江夏、武昌, 難,非陶龍驤莫可。」敦然之,卽表拜侃爲使持節、寧遠 自是水陸肅清,流亡者歸之盈路,侃竭資振 侃謂諸將曰:「此賊必更步 王貢還,至意陵,矯侃命,以杜曾為前鋒大督護, 令振威將軍周訪、廣武將軍趙誘受侃節度。 時周顗為荆州 鎭于沌口, 矣。 又移入沔江 伯仁方入境,便爲賊所破,不 刺 史,先鎭潯水城 \向武昌,吾宜還城,晝夜 向跋,侃整陣於釣臺爲 侃令諸將詐作商船以 0 獲其輜重, 遣朱何等討江夏 ,賊掠其良 公給焉。 殺傷甚

列傳第三十六 陶侃

戰,僅而獲免。 可。」侃惑之而 破之,又敗朱伺 斬沖、悉降其衆。侃召曾不到,貢又恐矯命獲罪,遂與曾舉兵反,擊侃督護鄭攀於沌陽, 不進。 張奕竟奔于賊。侃坐発官。 於沔口。 無何,賊至,果爲所敗。 侃欲退入溳中,部將張奕將貳於侃,詭說 王敦表以侃白衣領 賊鉤侃所乘艦, 侃窘急, 走入小船。 職 曰:「賊至而動, 衆必不

卽迴 斷。 南,前遇張昌,後屬陳敏,侃以偏旅,獨當大寇,無征不克,羣醜破滅。 跨南,二征奔走,一州星馳,其餘郡縣,所在土崩。 辭詣王敦曰:「州將陶使君孤根特立,從微至著,忠允之功,所在有效。 可 使侃: ·用命。 單 賊 軍 徒以軍少糧懸,不果獻捷。然杜弢熠懼,來還夏口,未經信宿,建平流人迎賊俱叛。 侃 軍 ·遡流,芟夷醜類,至使西門不鍵,華圻無虞者,侃之功也。明將軍愍此荆楚,救命塗 復率周訪等進軍入湘,使都尉楊舉爲先驅,擊杜弢,大破之,屯兵于城西。侃之佐史 奉承指授,獨守危阨,人往不動,人離不散。往年董督,徑造湘城,志陵雲霄,神機 尋 統領窮殘之餘,寒者衣之,饑者食之,比屋相慶,有若挾纊。江濱孤危,地非重險, 犬 獨能保固,故移就高莋,以避其衝。 賊輕易先至,大衆在後,侃距戰經 羊 當 相結,幷力來 時 死 者 不可勝數。 攻,侃以忠臣之節,義無退顧,被堅執銳,身當戎行,將 賊衆參伍,更息更戰。 侃招攜以禮,懷遠以德,子來之衆,前後 侃以孤軍一隊,力不 出佐南夏,輔翼劉 近者王如亂北、杜弢 獨禦,量宜取 日,殺其名 侃 獨

某等區區,實恐理失於內,事敗於外,豪氂之差,將致千里,使荆蠻乖離,西嵎不守,脣亡齒 以俟後舉。 而主者責侃,重加點削。 侃性謙沖,功成身退,今奉還所受,唯恐稽遲。然

寒,侵逼無限也。」敦於是奏復侃官。

侃言訖,貢斂容下腳,辭色甚順。侃知其可動,復令諭之,截髮爲信,貢遂來降。而弢敗走。 吏, 盜用庫錢, 父死不奔喪。卿本佳人, 何爲隨之也。天下寧有白頭賊乎!] 貢初橫腳馬上, 伏波將軍陶延夜趣巴陵,潛師掩其不備,大破之,斬千餘級,降萬餘口。」頁遁還湘城。 賊中 進克長沙,獲其將毛寶、高寶、梁堪而還。 離阻,杜弢遂疑張奕而殺之,衆情益懼,降者滋多。王貢復挑戰,侃遙謂之曰:「杜弢爲益州 弢將王貢精卒三千,[H] 出武陵江,誘五谿夷,以舟師斷官運,徑向武昌。 侃使鄭攀及

手不應者乎」」敦意遂解,於是設盛饌以餞之。侃便夜發。 甲持矛,將殺侃,出而 如 怒,不許。侃將鄭攀、蘇溫、馬儁等不欲南行,云。遂西迎杜曾以距廙。敦意攀承侃風旨,被 果留侃 廁。 王 |敦深忌侃功。將還江陵,欲詣敦別,皇甫方回及朱侗等諫,以爲不可。 侃不從。敦 不遣,左轉廣州刺史、平越中郎將,以王廙爲荆州。侃之佐吏將士詣敦請留侃。敦 諮議參軍 梅陶、長史陳頒言於敦曰:「周訪與侃親姻, 復迴者數四。 侃正色曰:「使君之雄斷,當裁天下,何此 敦引其子瞻爲參軍。 如左右手,安有斷人左 不決乎!因起 侃旣達豫 手而 右

章,見周訪,流涕曰:「非卿外援,我殆不免」」侃因進至始興。

將許高 謀反。 口起發石車。 之,而機未發。 函紙 先是、廣州人背刺史郭訥、迎長沙人王機爲刺 侃在州無事,輒朝運百甓於齋外,暮運於齋內。 或勸侃且住始興,觀察形勢。 自足耳。」於是下書諭之。 討機、斬之、傳首京都。 俄而 會杜弘據臨賀,因機乞降,勸弘取廣州,云弘遂與溫邵及交州秀才劉 弘率輕兵而至,知侃有備,乃退。 諸將皆請乘勝擊溫邵,侃笑曰:「吾威名已著, 邵懼而 侃不聽,直至廣州。 走,追獲於始興。 史。 人問其故,答曰:「吾方致力中原,過爾 侃追擊破之,執劉沈於 機復遣使詣王敦,乞爲交州。 弘遣使爲降。 以功封柴桑侯,食邑四千戶。 侃知其詐, 小桂 何事遣兵, 先於 叉遭 沈 敦從 但 部 對 俱

優 逸,恐不堪 事。」其勵志勤 力、皆此類 也

荆州刺 軍、開府儀同三司。 **尋轉都督、湘州刺史。** 侃遣將高寶進擊平之。 太興初,進 史,餘如故。 一號平南將軍,尋加都督交州 及王敦平、遷都督荆、雍、益、梁州諸軍事、領護南蠻校尉、征西大將軍、 楚郢士女莫不相 敦得志,上侃復本職,加散騎常侍。 以侃領交州 刺史。 慶。 軍事。 錄前後功,封次子夏爲都亭侯,進號征南 及王敦舉兵反,詔侃以本官領江州 時交州刺史王諒 爲賊 梁碩 所陷, 刺 大將

侃性聰敏 列 傅 第 Ξ ,勤於吏職,恭而近禮,愛好人倫。終日斂膝危坐,閩外多事,千緒萬端,罔有 十 六 陶 侃

遺漏 儀,何 於農 也。 此 事 樗蒱者, 類 前 云:「行道所見,聊取之耳。」侃大怒曰:「汝旣不田,而戲賊人稻」,執而 |諸參佐或以談戲廢事者,乃命取其酒器、蒱博之具,悉投之于江,更將則加鞭扑,曰: (殖,家給人足。 餘 也 非理得之,則切厲訶辱,還其所饋。嘗出遊,見人持一把未熟稻,侃問:「用此 乃惜寸陰, 有 遠近 雪猶溼,於是以屑布地。 亂頭養望自謂宏達邪!有奉饋者,皆問其所由。 牧賭 書疏,莫不 奴 至於衆人,當情 戲耳! 時造船、木屑及竹頭悉令舉掌之、咸不解所以。後正會,積 ·手答,筆翰如流,未嘗壅滯。 送莊浮華,非先王之法言,不可行也。君子當正其 及桓溫伐蜀,又以侃所貯竹頭作丁裝船。其綜理微密,皆 !分陰,豈可逸遊荒醉, 引接疏遠,門無停客。 生無益於時, 死無聞於後, 是自棄 若力作所致,雖微必喜,慰賜參 鞭之。 常語人曰:「大禹 、衣冠,攝其威 是以百姓 雪始晴,聽 何爲? 勤

行。 乃遣 侃 決戰,侃以賊盛,不可爭鋒,當以歲月智計擒之。 不 督 在 於是 曁 護 蘇 顧 便 龔 命 峻 戎 登 之列,深 作逆,京都不守,侃子瞻爲賊所害,平南將軍溫嶠要侃同赴朝廷。 率 服登舟,星言兼邁,瞻喪至 一衆赴 以爲 順,而 恨、答 又追迴。 嶠 曰:「吾疆 **崎以峻殺** 不臨。 埸 《外將,不敢越局。」」嶠固請之,因推 其子,重遣書以激怒之。 五月,與溫嶠、庾亮等俱 累戰無功,諸將請於查浦築壘。 會 侃 妻襲氏 石 頭。 初, 爲 亦固 ء 諸 盟主。侃 明帝崩, 軍部將 軍 勸 卽 自

唯白石 李根 謀,夜修 |峻, 石 頭 則 建議,請立白石壘。 大 峻 諸 曉訖。 事去 極 軍 險固,行的可容數千人,賊來攻不便,滅賊之術也。」侃笑曰:「卿良將也。」乃從根 與 矣。 峻 賊 戰陳陵東、二二侃督護 見壘大驚。 但當急攻石頭,峻必救之,而 侃不從, 賊攻 曰:「若壘不成,卿當坐之。」根曰:「查浦地下,又 大業壘,侃將 竟陵太守李陽部將彭世斬峻於陣, 大業自解。」侃又從羨言。 救之,長史殷羨曰:「若遣救大業,步戰 賊 峻果棄大業 衆 大 潰。 在水南 峻弟 不 rhi

侃 取 故節 致討, 亮用 初 庾亮 ,侃笑曰:「蘇武節似 溫 少有高 嶠謀, 詣侃拜謝。 名,以 明穆皇后之兄受顧命之重,蘇峻之禍, 不如是」導有 侃遽止之, 慚色,使人屏之。 日:「庾元規乃拜陶士行邪 職亮是由。 」王導入石頭城,令 及石頭

逸復聚衆。

侃與諸

軍

斬逸於石頭

都督交、廣、寧七州 侃 旋江 陵,尋以爲侍 軍事。 中、太尉,加羽葆 以江 陵偏遠,移鎭 鼓吹,改封長沙郡公, (巴陵。 遣諮議參軍 ·張誕討五谿夷,降之。 邑三千戶,賜絹 八千匹, 加

朝廷所禮,雖方任非才,何緣猥加極刑!郭默虓勇,所在暴掠,以大難新除,威網寬簡,欲因 不被詔,豈敢爲 陳脩 屬 後 率兵據湓 將 軍 郭默 口,侃以大軍繼 此 矯詔襲殺平南將軍 事。 若進軍 ,宜待詔報。」侃厲色日 進。 劉胤 默遣 使送妓婢絹 輒領江州。 「國家年 百 侃聞之曰:「此必詐也。」遣 匹, 寫 小不 中韶呈侃。 出 胸懷 參佐多諫日: 且 將軍宋 劉胤

列

傳

第

戍將。 戰,賊畏其勇,聞侃討之,兵不血刃而擒也,益畏侃。蘇峻將馮鐵殺侃子奔于石勒,勸以爲 既至,默將宗侯縛默父子五人及默將張丑詣侃降了三侃斬默等。默在中原,數與石勒等 宰相乎。〕導答曰:「默居上流之勢,加有船艦成資,故苞含隱忍,使其有地。一月潛嚴,足下 **隙會騁其從橫耳。」發使上表討默。** 四人,掾屬十二人。侃旋于巴陵,因移鎭武昌。 軍到,是以得風發相赴,豈非遵養時晦以定大事者邪!侃省書笑曰:「是乃遵養時賊也。」侃 侃告勵以故,勵召而殺之。詔侃都督江州,領刺史,增置左右長史、司馬、從事中郎 與王導書曰:「郭默殺方州,即用爲方州, 害宰相,便爲

侃命張夔子隱爲參軍,范逵子跳爲湘東太守,辟劉弘曾孫安爲掾屬,表論梅陶,凡微時

所荷,一**餐**咸報。

昔,而虛讓於今日。 野,遂平襄陽。 臣 常 欲除諸浮長之事,遣諸虛假之用,非獨臣身而已。 遣子斌與南中郎將桓宣西伐樊城,走石勒將郭敬。使兄子臻、竟陵太守李陽等共破新 拜大將軍,劍履上殿,入朝不趨,讚拜不名。上表固讓,曰:「臣非貪榮於疇 事有合於時宜,臣豈敢與陛下有違,理有益於聖世,臣豈 若臣杖國威靈,梟雄斬勵,則又何 與朝廷作異。

咸和七年六月疾篇、二三又上表遜位日。

列傳第三十六 陶侃

遣 結,情不自勝。臣間者猶爲犬馬之齒尚可小延,欲爲陛下西平李雄,北吞石季龍,是以 遷改之事,刻以來秋,奉迎窀穸,葬事訖,乃告老下藩。不圖所患,遂爾綿篤,伏 沙,隕越之日,當歸骨國土。臣父母舊葬,今在尋陽,緣存處亡,無心分違,已勒國 誅,山陵未反,所以憤愾兼懷,不能已已。 速 選 冊 臣 丘 臣 一代使,必得良才,奉宣王猷,遵成臣志,則臣死之日猶生之年。 |奧於巴東,授||桓宣於襄陽。 良圖未敍,於此長乖! 此方之任,內外之要,願陛下 少長孤寒,始願有限。 臣年垂八十,位極人臣,啓手啓足,當復何恨!但以陛下春秋尙富,餘寇不 過蒙聖朝歷世殊恩、陛下睿鑒、寵靈彌泰。 臣雖不知命,年時已邁,國恩殊特, 有始必終,自 賜封長 枕咸 臣修

貂 疇 司 諮,敷 空鑒簡素貞正,內外惟允,平西將軍亮雅量詳明,器用周時,卽陛下之周召也。 蟬、太尉 陛 下雖聖姿天縱,英奇日新,方事之殷,當賴羣儁。 融 章 政 一、荆 道, 江 地平天成, 州刺 史印 四海 傳棨戟。 幸賴。 仰戀 **謹遣左長史殷羨奉送所假節麾、幢曲蓋、侍中** 天思,悲酸感結。 司 `徒導鑒識經遠,光輔三世; 獻替

以後事付右司馬王愆期,加督護,統領文武。

尉、都督荆江 侃 興車 出 雍梁交廣 臨 津 就 船, 益 寧八州諸軍事、荆江二州刺史、長沙郡公經德蘊哲,謀猷弘遠。 明日 薨于 樊谿,時年七十六。 成帝下詔曰:「故使持節 、侍中、太

藩于外,八州肅清,勤王于內,皇家以寧。 鴻臚 令葬國南二十里,CIED故吏刊石立碑畫像於武昌西。 人。前進位大司馬,禮秩策命,未及加崇。昊天不弔,奄忽薨殂,朕用震悼于厥心。 追贈大司馬,假蜜章,祠以太牢。魂而有靈,嘉茲寵榮。」又策諡曰桓,祠以太牢。 乃者桓文之勳,伯舅是憑。 方賴大猷, 俾屛予一 今遣兼 侃遺

吳時 無所 者不 少會 翼等皆爲佐吏。 駐車 後庾亮成之,果大敗。季年懷止足之分,不與朝權。 人。」侃性纖密好問,頗類趙廣漢。嘗課諸營種柳,都尉夏施盜官柳植之於已門。侃後見, 峻之役,庾亮輕進失利。 亮司馬殷融詣侃謝曰:「將軍爲此,非融等所裁。」將軍王章至,曰: 「章自爲之,將軍不知也。」侃曰:「昔殷融爲君子,王章爲小人,今王章爲君子,殷融爲小 問 此 已,侃迺渡水獵,引將佐語之曰:「我所以設險而禦寇,正以長江耳。 邾城隔在江北,內 倚,外接羣夷。 有 侃 酒失,亡親見約,故不敢踰。」議者以武昌北岸有邾城,宜分兵鎭之。侃每不答,而言 |日:「此是武昌西門前柳,何因盜來此種。|施惶怖謝罪。時武昌號爲多士,殷浩、庾 城乃三萬兵守,今縱有兵守之,亦無益於江南。若羯虜有可乘之會,此又非所資也。」 在軍四十一載,雄毅有權,明悟善決斷。自南陵迄于白帝數千里中,路不拾遺。蘇 侃每飲酒有定限,常歡有餘而限已竭,浩等勸更少進,侃悽懷良久曰:「年 夷中利深,晉人貪利,夷不堪命,必引寇虜,迺致禍之由,非禦寇也。且 未亡一年,欲遜位歸國,佐吏等苦留

强兵,潛 位至八州都督。」有善相者師主謂侃曰:「君左手中指有豎理, 言。」侃以針決之見血,灑壁而爲「公」字,以紙裛手,「公」字愈明。 寤,左腋猶痛。 或云「侃 公雖用法,而 人曹識 追贈大鴻臚、諡愍悼世子。 洪辟 上天,見天門九重,已登其 瞻字道眞,少有才器,歷廣 侃有子十七人,唯洪、瞻、夏、琦、旗、斌、稱、範、岱見舊史,餘者並不顯。 書曰:「陶公機神明鑒似魏武,忠順勤勞似孔明,陸抗諸人不能及也。」謝安每言「陶 少 有窺窬之志,每思折翼之祥,自抑而 丞相 時漁於雷澤,網得一 恒得法外意」。其爲世所重如此。 掾,早卒 又嘗如廁,見一人朱衣介幘,斂板曰:「以君長者,故來 織梭,以挂于壁。 陵相、廬江、建昌二郡太守、遷散騎常侍、都亭侯。 八,唯一 以夏爲世子。及送侃喪還長沙,夏與斌及稱各擁兵數千以 門不得入。 此 然媵妾數十,家僮千餘,珍奇寶貨富於天府。 有頃雷雨,自化爲龍而去」。 **閽者以杖擊之,因墜地,** 當 爲 及都督八州,據上流,握 公。 相報。 若 七七九 | 徹於 折其左翼。 又夢生八翼, 君後當爲公, 上; 爲蘇

貴不可

列

傅

第

Ξ

+ 六

陶

侃

峻所

後登舟,朝野以爲美談。

及疾篤,將歸長沙,軍資器仗牛馬舟船皆有定簿,封印倉庫,自加管鑰,以付王愆期,然

將出府門,顧謂愆期曰:「老子婆娑,正坐諸君輩。」尚書梅陶與親

相 圖。 旣而 解散,斌先往長沙,悉取國中器仗財物。 夏至,殺斌。 庾亮上疏曰:「斌雖醜惡,

罪在 以懲暴虐。」亮表未至都,而夏病卒。 難 忍,然王憲有制,骨肉至親,親運刀鋸以刑同體,傷父母之恩,無惻隱之心, 韶復以瞻息弘襲侃爵,仕至光祿勳。 卒,子綽之 應加放

琦司空掾。

<u></u>
緯之卒,子延壽嗣。 宋受禪,降爲吳昌侯,五百戶。

旗歷位散騎常侍、郴縣開國伯。 咸和末,為散騎侍郎。 性甚凶暴。 卒,子定嗣。

襲之嗣。卒,子謙之嗣。宋受禪,國除。

斌尙書郎。

赴喪,稱疑開附其兄弟,乃反縛懸頭於帆檣,仰而彈之, 鼓棹渡江二十餘里,觀者數千,莫不 韶,並以言色有忤,稱放聲當殺,安、恭懼,自赴水而死,韶於獄自盡。將軍郭開從稱往長沙 攝五郡,自謂監軍,輒召王官,聚之軍府。故車騎將軍劉弘會孫安寓居江夏,及將楊恭、趙 外收之,棄市。一亮上疏曰:「案稱,大司馬侃之孼子,父亡不居喪位,荒耽于酒,昧利偸榮,擅 到夏口,輕將二百人下見亮。日思亮大會更佐,責稱前後罪惡,稱拜謝,因罷出。亮使人於閤 咸康五年,庾亮以稱爲監江夏隨義陽三郡軍事、南中郎將、江夏相,以本所領二千人自隨。 稱東中郎將、南平太守、南蠻校尉、假節。性虓勇不倫,與諸弟不協。後加建威將軍。

官軍船艦, 官,追贈平南將軍,諡 違容掩,故表爲南中郞將,與臣相近,思欲有以匡救之。 結諸將,欲阻兵構難。 「此本官兵,數經戰陣,可赦之以爲用。」侃赦之,以配輿。 孝,莫此之甚。 擊破之。 下亂,遂留蜀。 岱散騎侍郎。 臻弟輿"果烈善戰" 臻字彥遐,有勇略智謀,賜爵當陽亭侯。 範 最知名,太元 又多藏匿府兵,收坐應死。 自是每戰輒克, 軍中失色。 至是,率三百餘家欲就杜弢,爲侃所 **尚利社稷,義有專斷,輒收稱伏法。」** 初,爲光祿勳 日肅。 諸將惶懼,莫敢酬答,由是姦謀未卽發露。 輿率輕舸出其上流以擊之,所向輒 以功累遷武威將軍。 賊望見興軍,相謂曰:「避陶武威。」無敢當者。 臣猶未忍直上,且免其司馬。 咸和中,爲南郡太守、領南蠻校尉、假節。 初, 賊張奕本中州人,元康中被差西征,遇天 獲。 諸將請殺其丁壯,取其妻息 而稱豺狼愈甚,發言激切,不忠不 克。 及侃與杜弢 賊 稱肆縱醜言,無所顧忌,要 臣以侃勳勞王室,是以依 又率衆將焚侃輜 戰敗,賊 後與杜弢戰,輿被 以桔槹打沒 重,輿又 , 輿日:

列

傅

第三

十六

隃

侃

七八一

重創,卒。侃哭之慟,曰:「喪吾家寶」三軍皆爲之垂泣。詔贈長沙太守。

毛。 申盧綰之契,居方牧之地,振吳起之風。自幽徂荆,亟斂豺狼之迹;舉賢登善,窮掇孔翠之 「人無求備」,斯言之信,於是有徵。 分陝,理則宜然。 主,則淪鼎再寧。 華,拔萃陬落之間,比肩髦儁之列,超居外相,宏總上流。 據非其德,讎餉以是興嗟。中朝叔世,要荒多阻,分符建節,並紊天綱。和季以同里之情, 政,俯寄宣風。 備連率之儀,威騰閬外,總頒條之務,禮縟區中。 委稱其才,甘棠以之流詠, 猶獨稱善政,何其寡歟! 易云「貞固足以幹事」,於征南見之矣。CIKD 士行望非世族,俗異諸 由是吏民畢力,華夷順命,一州淸晏,恬波於沸海之中,百城安堵,靜祲於稽天之際。 史臣曰:古者明王之建國也,下料疆宇,列爲九州,輔相玄功,咨于四岳。 所以仰希齊 至於時屬雲屯,富逾天府,潛有包藏之志,顧思折翼之祥,悖矣!夫子曰 元規以戚里之崇,挹其膺而下拜,茂弘以保衡之貴,服其言而動色。 布澤懷邊,則嚴城靜析,釋位匡 望隆

和季承恩,建旟南服。 威靜荆塞,化揚江渙。 勠力天朝,匪忘忠肅。 長沙勤王,

- 蒯 恒 張昌傳作「蒯桓」。下同
- 下雋山 雋」原作「儁」,今據地理志下改。
- 若不超報 册府六七一「超報」作「超拔」。
- 時益州刺史羅尚爲李特所敗 舉正:此時特已死,尚為雄所敗耳。
- . 王 前 廣漢太守辛冉 「辛冉」原作「羊冉」。 **(料)**注: 魏志劉馥傳注引晉陽秋作「辛冉」。 按 辛冉事
- . 六 山 扈瓌 斠注:元和姓纂作「扈懷」。 按:通鑑八六亦作「扈懷」。

詳華陽國志八。

通鑑八六亦作「辛冉」。

辛冉又見張華傳。

「辛」「羊」形近易誤,今據改。

- -覽一三七、三七二引王隱晉書亦作「王眞」。 弢將王貢 周校: 細檢愍紀及杜弢傳, 此皆王眞事、非王貢也。「貢」「眞」形近相亂。 按: 御覽七六八引王隱晉書同作「王眞」。 周說是。 斠注:御
- 馬儁 「儁」、王廙傳作「俊」、通鑑八九、九一作「雋」。
- 勒弘取廣州 |勢校:「廣州」、機傳作「交州」、是也。
- 峻極 險固 「險」,各本作「顯」,今從吳本。 册府四二一亦作「險」。
- · 下靈傳謂「峻至東陵口」,桓玄傳云「何澹之屯東陵」。 陳陵 東 蘇峻傳、 通鑑九四作「白木陂」。 通鑑胡注云「白木陂在東陵東」,則東陵東即白木陂。 疑此「陳陵」爲「東陵」之誤。

- 宗侯 周校:郭默傳兩見皆作「宋侯」。
- 咸和七年六月疾篤 「七年」,成紀、通鑑九五作「九年」。
- [12] 葬國南二十里 「二」,各本作「一」。局本注云「元作二」。|宋本作「二」,通志一二六亦作「二」。

二 吾 輕將二百人下見亮 册府四〇一「輕」作「徑」。

元和郡縣圖志云,陶侃墓在長沙縣南二十三里。今從宋本。

二 於征南見之矣 周校:「征南」當作「鎭南」。

晉書卷六十七

列傳第三十七

溫嶠

命爲都官從事。 以孝悌稱於邦族。 司徒辟東閤祭酒,補上黨潞令。 溫嶠字太眞,司徒羨弟之子也。父憺,河東太守。 散騎常侍庾敳有重名,而頗聚斂,嶠舉奏之,京都振肅。後舉秀才、灼然。 風儀秀整,美於談論,見者皆愛悅之。年十七,州郡辟召,皆不就。 嶠性聰敏,有識量,博學能屬文,少 司隸

上黨太守, 加建威將軍、督護前鋒軍事。 將兵討石勒, 屢有戰功。 于時,片土荒殘,寇盜羣起,石勒、劉聰跨帶疆場,嶠爲之謀主,琨所憑恃焉 平北大將軍劉琨妻,嶠之從母也。 **現深禮之,請爲參軍。 琨遷大將軍,嶠爲從事中郞、 琨遷司空,以嶠爲右司**

屬二都傾覆, 社稷絕祀,元帝初鎭江左,琨誠繫王室,謂嶠曰「昔班彪識劉氏之復興,

列傳第

三 十

七

溫嬌

華夷,奉表勸進。 馬援知漢光之可輔。今晉祚雖衰,天命未改,吾欲立功河朔,使卿延譽江南,子其行乎。」對 命,不許。 綱維未舉,嶠殊以爲憂。及見王導共談,歡然曰:「江左自有管夷吾,吾復何慮」」 舉朝屬目,帝器而嘉焉。 **崎雖無管脹之才,而明公有恒文之志,欲建匡合之功,豈敢辭命。」乃以爲左長史,檄告** 帝然之。 會跟爲段匹磾所害,嶠表琨忠誠,雖勳業不遂,然家破身亡,宜在褒崇,以慰海內 嶠旣至,引見,具陳琨忠誠,志在效節,因說社稷無主,天人係望,辭旨慷 王導、周顗、謝鯤、〇一庾亮、桓彝等並與親善。 于時江左草 | 屢求反

憑皇 葬,由 東奔闔 一靈,使逆寇冰消,反哀墓次,豈 除散騎侍郎。 是 固 讓不拜,苦請北歸。 閭,位爲 上將,然後鞭荆王之尸。 初、嶠欲將命,其母崔氏固止之,嶠絕裾而去。其後母亡,嶠阻亂不獲歸 韶三司、八坐議其事,皆曰:「昔伍 可稍以乖嫌廢其遠圖 若嶠以母 未葬沒在胡 哉 』。「嶠 不得已, 員 志復私 乃受命 乃應竭 讎,先假諸侯之 其智謀,仰

未滅, 鞚諫曰:「臣聞善戰者不怒,善勝者不武,如何萬乘儲副而以身輕天下!」太子乃止**。** 規 諷,又獻侍臣箴,甚有 後 宜 歷驃騎王導長 應儉以率下,務農 (史) 遷太子中庶子。 弘益。 重兵,太子 時太子起西池樓觀, '納焉。 及在 王敦 東宮,深見寵遇, 舉兵內向,六軍敗績,太子將自出 頗爲勞費,嶠上疏以爲朝 太子與爲布衣之交。 廷草 戰、齲執 創,互寇

萬祀。 出閣 | 橋 聲譽,每日:「錢世儀精神滿腹。」嶠素有知人之稱,鳳聞而悅之,深結好於嶠。 敦不納。 庭,文王雖盛,臣節不諐。 墜,作色曰:「錢鳳何人,溫太眞行酒而敢不飲」」敦以爲醉,兩釋之。 之,問嶠誰可作者。 崎說敦曰:「京尹辇轂喉舌,宜得文武兼能,公宜自選其才。 輔朝 可信。」敦曰:「太眞昨醉,小加聲色,豈得以此便相讒貳。」由是鳳謀不行,而嶠得還都,乃 懼 《政,闕拜覲之禮,簡人臣之儀,不達聖心者莫不於邑。 復入,如是再三,然後卽路。 錢鳳爲之姦謀,因敦餞別,嶠起行酒,至鳳前,鳳未及飲,嶠因僞醉,以手版擊鳳幘 至聖遺軌,所不宜忽。 **崎知其終不悟,於是謬爲設敬,綜其府事,干說密謀,以附其欲。** 嶠曰:「愚謂錢鳳可用。」 鳳亦推嶠,嶠僞辭之。 故有庇人之大德,必有事君之小心, 願思舜、禹、文王服事之勤,惟公旦吐握之事,則天下幸甚。」 及發後,鳳入說敦曰:「嶠於朝廷甚密,而與庾亮深交,未 若朝廷用人,或不盡 昔帝舜服事唐堯,伯禹 俾芳烈奮乎百 敦不從,表補丹楊尹 臨去言別,涕泗 公自還輦轂,入 深結錢鳳,爲之 世、休風 會丹楊 理。」 [竭身虞 曰:「昔 横流, 敦然 流乎

具奏敦之逆謀, 請先

爲之備

平,封建寧縣開國公,賜絹五千四百匹,進號前將軍。 嶠燒朱雀桁以挫其鋒,帝怒之,嶠曰:「今宿衞寡弱,徵兵未至,若賊豕突,危及社稷,陛下何 日, 一橋。」賊果不得渡。 作如此 及 敦 構 事」表誅姦臣,以嶠爲首。募生得嶠者,當自拔其舌。及王含、錢鳳奄至都下, 逆,加嶠中壘將軍、持節、都督東安北部諸軍事。敦與王導書曰:「太眞別來幾 嶠自率衆與賊夾水戰,擊王含,敗之,復督劉遐追錢鳳於江寧。

弘,思求允中,臣階緣博納、干非其事,誠在愛才,不忘忠益。」帝從之。 枉入姦黨,宜施之以寬。加以玩等之誠,聞於聖聽,當受同賊之責,實負其心。 晏處,如陸玩、羊曼、劉胤、蔡謨、郭璞常與臣言,備知之矣。 必其凶悖,自可罪 君子道窮數盡,遵養時晦之辰也。且|敦爲大逆之日,拘錄人士,自発無路,原其私心,豈遑 君子,朝廷所不能抑,骨肉所不能間。處其朝者恒懼危亡,故人士結舌,道路以目,誠賢人 時制王敦綱紀除名,參佐禁固,嶠上疏曰:「王敦剛愎不仁,忍行殺戮,親任小人,疏遠 人斯得"如其 陛下仁聖含

名重之士,配征兵五千人,又擇一偏將,將二千兵,以益壽陽,可以保固 日「祖約退舍壽陽, 二曰:「一夫不耕,必有受其饑者。 今不耕之夫,動有萬計。 是時天下 凋弊, 國用不 有將來之難。 足, 詔 公卿以下詣都坐論時政之所先,嶠因奏軍國要務。其一 今二方守禦, 爲功尙易。 春廢勸課之制,冬峻出租之令, 淮 泗都督,宜竭 徐豫,援助同 力以資 土。」其 之。 選

之令典,宜如先朝除三族之制。」議奏,多納之。 嘗之旨。宜如舊制,立此二官。」其六曰:「使命愈遠,益宜得才,宣揚王化,延譽四方。人情 以供粢盛,舊置藉田、廩犧之官。今臨時市求,旣上黷至敬,下費生靈,非所以虔奉宗廟蒸 合之。如此選旣可精,祿俸可優,令足代耕,然後可責以清公耳。」其五曰:「古者親耕藉田 九府寺署可有幷相領者,可有省半者,粗計閑劇,隨事減之。 荒殘之縣,或同在一城,可幷 事有煩簡耳。然今江南六州之土,尙又荒殘,方之平日,數十分之一耳。三省軍校無兵者, 如此則官寡而材精。周制六卿莅事,春秋之時,入作卿輔,出將三軍。後代建官漸多,誠由 易。且軍人累重者在外,有樵採蔬食之人,於事爲便。」其四曰:「建官以理世,不以私人也。 者,及護軍所統外軍,可分遣二軍出,幷屯要處。緣江上下,皆有良田,開荒須一年之後卽 桑,察吏能否,今宜依舊置之。 必得清恪奉公,足以宣示惠化者,則所益實弘矣。」其三曰: 下未見施,惟賦是聞。賦不可以已,當思令百姓有以殷實。司徒置田曹掾,州一人,勸課農 不樂,遂取卑品之人,虧辱國命,生長患害。故宜重其選,不可減二千石見居二品者。」其七 「諸外州郡將兵者及都督府非臨敵之軍,且田且守。又先朝使五校出田,今四軍五校有兵 曰:「罪不相及,古之制也。近者大逆,誠由凶戾。凶戾之甚,一時權用。今遂施行,非聖朝

帝疾篤,嶠 與王導、郗鑒、庾亮、陸曄、卞壼等同受顧命。 時歷陽太守蘇峻藏匿亡命,朝

列傳第三

+

溫

詹為 在鎭 古鎮將多不領州,皆以文武形勢不同故也。 廷疑之。 陳「豫章十 見王敦 江 州 刺史、持節、都督 征 那之要,宜以刺史居之。 畫像,曰:「敦大逆,宜加斲棺之戮,受崔杼之刑。 西將軍 ·陶侃有威名於荆楚,又以西夏爲虞,故使嶠爲上流形援。 、平南將軍、鎭武昌、甚有惠政、甄異行能、親祭徐孺子之墓。 尋陽濱江,都督應鎭其地。今以州帖府,進退不便。 宜選單車刺 史別撫豫章,專理黎庶。詔不許。 古人闔棺而定諡,春秋大居 咸和初,代應 叉

,

崇王父之命,

未有受戮於天子

而

圖形於羣下。」命削去之。

於嶠 督護 從之,後用其部將毛寶說, 雖奔敗,嶠每推崇之,分兵給亮。 「今日之急,殄寇爲先,未效勳庸 人有 嶠 :候之者,悲哭相對。 王 曰:「征 橋開蘇峻之徵 一愆期、 嶠於! 一西位重兵强,宜共推 西陽 是列 太守鄧嶽 上尚 也、慮必有變、求還朝以備不虞、不聽。 書,陳峻罪狀,有衆七千,灑泣登舟,移告四 俄而 復固請侃行,語在寶傳。 庾亮來奔,宣太后詔, 鄱陽內史紀瞻等率舟師赴難。日 之。」嶠於是遺王您期奉 而逆受榮寵, 遣王愆期等要 非所聞 陶侃 進嶠驃騎將軍、開府儀 初,嶠與庾亮 同 也,何以示天下乎」固辭不受。 , 赴國難,侃恨不受顧命,不 侃爲盟主。 未幾而蘇峻果反。 及京師傾覆, 相推 方征 侃 許之,遣 爲 鎭 盟主,嶠從弟

完言 同 三司 **崎聞之號** 嶠屯尋陽,造 督護龔登率 嶠 時亮 嶠 慟。 初

賊臣<u>祖</u>約、蘇峻同惡相濟,用生邪心。

天奪其魄,死期將至。

譴負天地,

自絕人

旅撓敗,出告藩臣,謀寧社稷。 繼,宣城內史桓彝已勒所屬屯濱江之要,江夏相周撫乃心求征,軍已向路。 今躬率所統,爲士卒先,催進諸軍,一時電擊。 闇弱不武,不能徇難,哀恨自咎,五情摧隕,慚負先帝託寄之重,義在畢力,死而後已。 宮掖、矢流太極、二御幽逼、宰相困迫、殘虐朝士、劫辱子女。承問悲惶、精魂飛散。 愆期、西陽太守鄧嶽、鄱陽內史紀瞻,率其所領,相尋而至。 倫 寇不可縱,宜增軍討撲,輒屯次湓口。 後將軍郭默、冠軍將軍趙胤、奮武將軍襲保與嶠督護王 即日護軍庾亮至,宣太后詔,寇逼宮城,王 西陽太守鄧嶽、尋陽太守褚誕等連旗相 逆賊肆凶,陵蹈宗廟,火延

庭。 邦,受國恩者哉!不期而會,不謀而同,不亦宜乎! 郡之小吏耳,登壇喢血,涕淚橫流,慷慨之節,實厲羣后。 況今居台鼎,據方州,列名 皇漢之季,董卓作亂,劫遷獻帝,虐害忠良,關東州郡相 昔包胥楚國之微臣,重趼致誠,義感諸侯。 藺相如趙邦之陪隸,恥君之辱,按劍秦 ·率同盟。 廣陵功曹臧洪,

漕隔絕,資食空懸,內乏外孤,勢何得久! 賊今雖殘破都邑,其宿衞兵人卽時出散,不爲賊用。且祖約情性褊阨,忌克不仁,蘇峻 小子,惟利是視,殘酷驕猜,權相假合。江表興義,以抗其前,强胡外寇,以躡其後,運 二賊合衆,不盈五千,且外畏胡寇,城內饑乏,後將軍郭默卽於戰陣俘殺賊千人。

列傅

第

約峻者、 私僕, 悲且慶,若朝廷之不泯也。 規,文武之助,君子竭誠,小人盡力,高操之士被褐而從戎,負薪之徒匍匐而赴命,率其 齊斷金, 且護軍庾公,帝之元舅,德望隆重,率郭後軍、趙、襲三將,與嶠勠力,得有資憑,且 致其私杖,人士之誠,竹帛不能載也。 ,封五等侯,賞布萬匹。 同稟規略,以雪國恥,苟利社稷,死生以之。嶠雖怯劣,忝據一方,賴忠賢之 「鎭,職在禦侮。 其各明率所統,無後事機。賞募之信,明如日月。 征西陶公,國之耆德,忠肅義正,勳庸弘著。 夫忠爲令德,爲仁由己,萬里一契,義不在言也**。** 豈<u></u>嶠無德而致之哉? 士稟義風,人感皇 諸方鎭州郡咸 有能斬

康、建安、晉安三郡軍並在路次,同赴此會,惟須仁公所統至,便齊進耳。 時陶侃雖許自下而未發,復追其督護龔登。 **僕謂軍** 有進而無退,宜增而 不可減。 近已移檄遠近,言於盟府,剋後月半大舉,南 **崎重與侃書日**

仁公今召軍

還,疑惑遠近,成敗之由,將在於此

追。 常山之蛇,首尾相衞, 重,著於人士之口,一旦有急,亦望仁公悉衆見救,況社稷之難! 僕與仁公並受方嶽之任, 安危休感, 理旣同之。 僕才輕任重,實憑仁公篤愛,遠稟成規。 叉脣齒之喻也。 恐惑者不達高旨, 將謂仁公緩於討賊, 至於首啓戎行,不敢有辭,僕與仁公當如 且自頃之顧, 綢繆往來,情深義 此聲 難

稷顚覆,主辱臣死。公進當爲大晉之忠臣,參恒文之義,開國承家,銘之天府,退當以 逼强胡,東接逆賊,因之以饑饉,將來之危乃當甚於此州之今日也。 惟僕偏當一州,州之文武莫不翹企。假令此州不守,約峻樹置官長於此,荆楚西 以大義言之,則社

慈父雪愛子之痛。

地,人心齊一,咸皆切齒。今之進討,若以石投卵耳、今出軍旣緩,復召兵還,人心乖 離,是爲敗於幾成也。願深察所陳,以副三軍之望。 約峻凶逆無道,囚制人士,裸其五形。近日來者,不可忍見。 骨肉生離, 痛威天

峻時殺侃子膽,由是侃激勵,遂率所統與嶠、亮同赴京師,戎卒六萬,旌旗七百餘里,鉦鼓之 聲震於百里,直指石頭,次于蔡洲。侃屯查浦,嶠屯沙門浦。時祖約據歷陽,與峻爲首尾, 見嶠等軍盛,謂其黨曰:「吾本知嶠能爲四公子之事,今果然矣。」

荆州接胡蜀二虜,倉廩當備不虞,若復無食,僕便欲西歸,更思良算。但今歲計,殄賊不爲 四望磯築壘以逼賊,曰:「賊必爭之,設伏以逸待勞,是制賊之一奇也。」是時義軍屢戰失利, 計,據白石築壘以自固,使庾亮守之。 **嶠軍食盡,陶侃怒曰:「使君前云不憂無將士,惟得老僕爲主耳。** |峻聞嶠將至,逼大駕幸石頭。 時||峻軍多馬,南軍杖舟楫,不敢輕與交鋒。 用將軍||李根 賊步騎萬餘來攻,不下而退,追斬二百餘級。 嶠又於 今數戰皆北,良將安在?

列

故也。 雖灰滅,不足以謝責於先帝。今之事勢,義無旋踵,騎猛獸,安可中下哉!公若違衆獨反, 海臣子,肝腦塗地,嶠等與公並受國恩,是致命之日。事若克濟,則臣主同祚;如其不捷,身 晚 前,今挑之戰,可一鼓而擒也。 也。」嶠曰:「不然。 峻、約小豎,爲海內所患, 自古成監,師克在和。 奈何拾垂立之功,設進退之計!且天子幽逼, 社稷危殆, 四 今日之舉,決在一戰。峻勇而無謀,藉驕勝之勢,自謂無 光武之濟昆陽,曹公之拔官渡,以寡敵衆,杖義

旨,並讓不受。賊將匡術以臺城來降,爲逸所擊,求救於嶠。 軍莫能仰視。其日侃督水軍向石頭,亮、嶠等率精勇一萬從白石以挑戰。時峻勞其將士, 救之不便,不如攻榻杭。榻杭軍若敗,術圍自解。」 嶠從之,遂破賊石頭軍。 千石、臺郞御史以下,皆令赴臺。於是至者雲集。 因醉,突陣馬躓,爲侃將所斬。峻弟逸及子碩嬰城自固。 抱天子奔于嶠船。時陶侃雖爲盟主,而處分規略一出於嶠,及賊滅,拜驃騎將軍、開府儀同 人心必沮。 三司,加散騎常侍,封始安郡公,邑三千戶。 嶠於是創建行廟,廣設壇場,告皇天后土祖宗之靈,親讀祝文,聲氣激揚,流涕覆面,三 沮衆敗事,義旗將迴指於公矣。」侃無以對,遂留不去。 司徒王導因奏嶠、侃錄尙書,遣間 崎乃立行臺,布告天下,凡故吏二 江州別駕羅洞 曰:「今水暴長, 奮威長史滕含 使宣

初,峻黨路永、匡術、賈寧中塗悉以衆歸順,王導將褒顯之,嶠曰:「術輩首亂,罪莫大

晚雖改悟,未足以補前失。全其首領,爲幸已過,何可復寵授哉」導無以奪。

器用, 后,五州響應,首啓戎行,元惡授馘。 使亡而有知,抱恨結草,豈樂今日勞費之事。願陛下慈恩,停其移葬,使嶠棺柩無風波之 笥,時時省視,每一思述,未嘗不中夜撫膺,臨飯酸噎。『人之云亡』,嶠實當之。 追贈公侍中、大將軍、持節、都督、刺史,公如故,賜錢百萬,布千匹,諡曰忠武,祠以太牢。」 方賴大猷以拯區夏,天不愁遺,早世薨殂,朕用痛悼于厥心。夫褒德銘勳,先王之明典,今 乃狂狡滔天,社稷危逼。 臾,見水族覆火,奇形異狀,或乘馬車著赤衣者。嶠其夜夢人謂己曰:「與君幽明道別,何意 上呈,伏惟陛下旣垂御省,傷其情旨,死不忘忠,身沒黃泉,追恨國恥,將臣勠力,救濟艱難, 庶聞之,莫不相顧而 相 ·嶠忠誠著于聖世,勳義處于人神,非臣筆墨所能稱陳。 照也?」意甚惡之。嶠先有齒疾,至是拔之,因中風,至鎭未旬而卒,時年四十二。江州士 朝 初葬于豫章,後朝廷追嶠勳德,將爲造大墓於元明二帝陵之北,陶侃上表曰:「故大將 而後旋于武昌。 議 將留輔政,嶠以導先帝所任,固辭還藩。復以京邑荒殘,資用不給,嶠借資蓄,具 泣。 至牛渚磯,水深不可測,世云其下多怪物,嶠遂燬犀角而 帝下册書曰:「朕以眇身、纂承洪緒、不能光闡大道,化洽時雍,至 惟公明鑒特達,識心經遠,懼皇綱之不維,忿凶寇之縱暴,唱率羣 王室危而復安,三光幽而復明,功格宇宙,勳著八表。 臨卒之際,與臣書別,臣藏之篋 謹寫嶠書 照之。須

魂靈安於后土。」詔從之。其後嶠後妻何氏卒,子放之便載喪還都。 詔葬建平陵北,并

贈嶠前妻王氏及何氏始安夫人印綬。

牋 放之以其沮衆,誅之,勒兵而進,遂破林邑而還。卒于官。 惟允。」時竟不納。放之旣至南海,甚有威惠。將征林邑,交阯太守杜寶、別駕阮朗並不從, 曰:「放之溫嶠之子,宜見優異,而投之嶺外,竊用愕然。 願遠存周禮, 近參人情,則望實 放之嗣爵,少歷淸官,累至給事黃門侍郎。以貧,求爲交州,朝廷許之。王述與會稽王

弟式之,新建縣侯,位至散騎常侍。

希塞 子愔 愔子超 愔弟曇 曇子恢 鑒叔父隆

師不守,寇難鋒起,鏖遂陷於陳午賊中。 爭,鑒不應其召。 郎。 詠不倦。 黨皆至大官,而鑒閉門自守,不染逆節。 東海王越辟爲主簿, 都鑒字道徽,高平金鄉人,漢御史大夫慮之玄孫也。少孤貧,博覽經籍,躬耕隴畝,吟 以儒雅著名,不應州命。 從兄旭,晞之別駕,恐禍及己,勸之赴召,鑒終不迴,晞亦不之逼也。及京 舉賢良,不行。征東大將軍尚晞檄爲從事中郎。晞與越方以力 趙王倫辟爲掾,知倫有不臣之迹,稱疾去職。及倫篡,其 邑人張寔先求交於慶,鑒不許。 惠帝反正,參司空軍事,累遷太子中舍人、中書侍 至是,寔於午營來

以鑒 省鑒疾,旣 素有感其恩義者,相 曰:「今天子播越,中原無伯,當歸依仁德,可以後亡。」 遂共推鑒爲主,舉千餘家俱避難 有名於世,將逼爲主,鑒逃而 而卿鑒。 與資贈。 鑒謂寔曰:「相 鑒復分所得,以賉宗族及鄉曲孤老,賴 獲免。 與邦壤, 午尋潰散, 鑒得歸鄉里。 義不 及通,何可怙亂至此邪!廛大慚 于 時所 而 全濟者甚多 在饑荒, 州 而退。 一,咸 中之士 於魯 相

國將軍、都督兗州諸軍事 戈,外無救援,百姓饑饉,或掘野鼠蟄燕而食之,終無叛者。 `並爲兗州,各屯一郡,以力相傾, 闔州編戶, 莫知所適。 元帝初鎭江左,承制假鑒龍驤將軍、兗州刺史,鎭鄒山。 。又徐龕、石勒左右交侵,日 三年間,衆至數萬。 時荀藩用李述, 劉琨 帝就 用兄子 加輔

之峄山

曰:「愍懷廢徙之際, 朝,不可 檢,考之以實,豈勝滿武秋邪。」鑒曰:「擬人必于其倫。 謀杖鑒爲外援,由是拜安西將軍、兗州刺史、都督揚州江西諸軍、假節,鎭合肥。 表為 永昌初,徵拜領軍將軍,旣至,轉尙書,以疾不拜。時明帝初卽位,王敦專制,內 得 尚 而 書令,徵還。道經姑孰,與敦相見,敦謂曰:「樂彥輔短才耳。後生流宕,言違名 親 疏 及愍懷太子之廢,可謂柔而有正。 交有危機之急, 人何能以死守之乎!以此相方, 其不減明矣。」 鑒曰: 彦輔道韵平淡,體識沖粹,處**傾**危之 武秋失節之士,何可同日而言」」敦 外危 忌

列

僔

第

耳。」敦素懷無君之心,聞鑒言,大忿之,遂不復相見,拘留不遣。 止自若,初無懼心。|敦謂錢鳳曰:「郗道徽儒雅之士,名位旣重,何得害之」乃放還臺。 「丈夫旣潔身北面,義同在三,豈可偸生屈節,靦顏天壤邪!苟道數終極, 敦之黨與譖毁日至,鑒舉 固當存亡以之

暴,皆人自爲守。 遂與帝謀滅敦。 號。 之徒,義存投袂,何補於旣往哉」一帝從之。 啓義士之心,令謀猷得展。 「羣逆縱逸,其勢不可當,可以算屈,難以力競。且含等號令不一,抄盜相尋,百姓懲往年之 時議者以王含、錢鳳衆力百倍,苑城小而不固,宜及軍勢未成,大駕自出距戰。 旣 而錢鳳攻逼京都,假鑒節,加衞將軍、都督從駕諸軍事。 鑒以無益事實,固辭不受軍 乘逆順之勢,何往不克!且賊無經略遠圖,惟恃豕突一戰,曠日持久,必 今以此弱力敵彼强寇,決勝負於一朝,定成敗於呼吸,雖有|申胥 鑒以尙書令領諸屯營。 鑒 日:

動靜 奏錢鳳母年八十,宜蒙全宥。 故開待放之門。 輒問之,乃詔鑒特草上表疏,以從簡易。 及鳳等平,溫嶠上議,請宥敦佐吏,鑒以爲先王崇君臣之敎,故貴伏死之節,昏亡之主, 鏖於是駁之曰:「敦之逆謀,履霜日久,緣札開門,令王師不振。 若敦前者之舉,義 王敦佐吏雖多逼迫,然居逆亂之朝,無出關之操,準之前訓,宜加義責。又 乃從之。封高平侯,賜絹四千八百匹。帝以其有器望,萬機 王導議欲贈周札官,鑒以爲不合,語在札傳。

州 同 桓文, 軍事 で、兗州 則先 刺 帝 史、 可爲幽厲邪ご朝 假節,鎭 廣 陵。 臣雖無以難,而不能從。 尋而帝崩,鑒 與王導、 十 虚、 俄而 溫嶠、 遷車騎將軍、都督徐虎青三 庾亮、 陸曄等並受遺

一輔少主,進位車 騎大將 軍 一、開府 儀同 三司,加散騎常侍

古今一 鑒爲 是遣 遣 泣 旣 以救社稷。若二寇不梟,義無偸安。 遂制脅幽主,拔本塞原,殘害忠良, 要害,旣 將 軍 斷,糧 血,咸願 日:「賊臣祖約、蘇峻不恭天命、不 軍 司 司 咸 也。今主上幽危,百姓倒 ·夏侯長等間行,謂平南將軍溫嶠曰:「今賊謀欲挾天子 馬劉矩領三千人宿 和 防其越逸,又斷賊糧運,然後靜鎭京口,清壁以待賊。 運 初,領徐 奉辭罰罪,以除元惡。 自絕,不過百日,必自潰矣。」嶠深以 鑒去賊密邇,城孤糧 州 刺 史。 衞京 及祖約 都。 懸。忠 絕, 昔戎 禍 蘇峻 有渝 尋而 人情業業,莫有固 虐黎庶, | 狄泯周,齊桓 ·畏王誅,凶戾肆 臣 此盟,明神 王 正士志存報國。 反, 師 鑒聞難,便欲率所領東赴。 敗績,矩遂退還。 爲然 使天 糾 地 極之」鑒 神祇 盟 逆,干國之紀, 志,奉詔 董卓陵漢, 凡我 靡所依 登壇 東入會稽, 同盟, 流涕,設壇場, 賊攻城不 中書令庾亮宣太后口詔,進 歸。 慷 奉后 陵汨 **慨**,三軍爭爲 旣盟之後, 是以率土 拔,野 韶以北寇不許。 宜先立 致計。 近五常, 刑白馬,大誓 無所掠,東道 營壘, 侮弄 一怨酷,兆庶 勠 義 用 存 力一心, が神器、 屯 乃

及 陶侃 爲 盟主, 進鑒都督揚州八郡軍事。 時撫軍將軍王舒、 輔 軍將軍虞潭皆受鑒節

列

第

三

拜司 今强寇· 突圍 久 以俟後 默還丹徒,立大業、曲阿、庱亭三壘以距賊。 而 乃釋。 室,加侍中,解八郡都督,更封南昌縣公,以先爵封其子曇。 . 而 率衆 在郊,衆心危迫,君腹心之佐,而生長異端,當何以率先義衆,鎮一三軍邪」將斬之, 舉。 出 ,三軍失色。 渡江, 會峻死, 鑒乃大會僚佐,責納曰:「吾蒙先帝厚顧,荷託付之重,正復捐驅九泉不足以報。 與侃會于茄子浦。 大業圍解。及蘇逸等走吳興,鑒遣參軍李閎追斬之,降男女萬餘口。 。參軍曹納以爲大業京口之扞,一旦不守,賊方軌而前,勸鑒退還廣陵 鑒築白石壘而據之。會舒、 而賊將張健來攻大業,城中乏水,郭默窘迫,遂 潭戰不利,鑒與後將軍郭

賊 帥 劉徵 聚衆數千, 浮海抄東南諸縣。 鑒遂城京口, 加都督揚州之晉陵吳郡諸軍

事,率衆討平之。進位太尉。

之分。 能,事 遷徙,或是新附,百姓懷土,皆有歸本之心。 命朝 臣疾篤,衆情駭動,若當北渡,必啓寇心。 夕,輒以府事付長史劉遐, 後 、從簡易,使康哉之歌復興於今,則臣 以寢 但忝 位過才,曾無以 疾,上疏 遜位曰:「臣疾彌留,遂至沈篤,自忖氣力,差理難冀。 報,上慚先帝,下愧日月。 乞骸骨歸 丘園。 雖 太常臣謨,平簡貞正,素望所歸,謂可以爲都督、 臣宣 死, **猶生之日耳。** 惟願 一國恩,示以好惡,處與 陛下崇山海之量,弘濟 伏枕哀歎, 臣所統錯雜,率 抱恨黃泉。 田宅,漸得少安。 有生有死, 大猷,任賢使 臣今虚乏,救 多北 自然

魂而 心。夫爵以顯德,諡以表行,所以崇明軌迹,丕揚徽劭。今贈太宰,諡曰文成,祠以太牢。 弘遠,忠亮雅正,行爲世表,歷位內外,勳庸彌著。乃者的峻狂狡,毒流朝廷,社稷之危,賴 徐州刺史。 公以寧。 公家之事,知無不爲,是以敢希祁奚之舉。」疏奏,以蔡謨爲鑒軍司。鑒尋薨,時年七十 有靈,嘉茲寵榮。」 帝朝晡哭于朝堂,遣御史持節護喪事,贈一依溫嶠故事。册曰:「惟公道德沖邃,體識 功侔古烈,勳邁桓文。方倚大猷,藩翼時難,昊天不弔,奄忽薨殂, 股用震悼于厥 臣亡兄息晉陵內史邁,謙愛養士,甚爲流亡所宗,又是臣門戶子弟,堪任兗州刺

薨也, 小, 往,食訖,以飯著兩頰邊,還吐與二兒,後並得存,同過江。 初,鑒值永嘉喪亂,在鄕里甚窮餒,鄕人以鑒名德,傳共飴之。時兄子邁、外甥周翼並 **翼追撫育之恩,解職而歸,席苫心喪三年。** 之就食。 鄉人曰:「各自饑困,以君賢,欲共相濟耳,恐不能兼有所存。」鑒於是獨 二子:僧、曇。 邁位至護軍,翼爲剡縣令。 鑒之

襲爵 黄門侍郎。 南昌公,徵 悟字方回。 時吳郡守闋,欲以愔爲太守。 拜中 少不交競,弱冠,除散騎侍郎,不拜。 書侍郎。 驃騎何充 輔 悟自以資望少,不宜超莅大郡,朝議嘉之。 政,征北將軍褚哀 性至孝,居父母憂,殆將滅 鎭京口 ,皆以惛 爲 長史。 性。 服闋, 轉爲 再遷

人事頓絕。

臨海太守。 世之風,四俱棲心絕穀,修黃老之術。後以疾去職,乃築宅章安,有終焉之志。十許年間, 會弟曇卒,益無處世意,在郡優游,頗稱簡默,與姊夫王羲之、高士許詢並有邁

桓溫 雖居藩鎮,非其好也。 旣到,更除太常,固讓不拜。深抱沖退,樂補遠郡,從之,出爲輔國將軍、會稽內史。大司馬 之操,成務須才,豈得遂其獨善,宜見徵引,以參政術。於是徵爲光祿大夫,加散騎常侍。 以悟與徐克有故義,乃遷愔都督徐克靑幽揚州之晉陵諸軍事、領徐克二州刺史、假節 簡文帝輔政,與尙書僕射江虨等薦悟,以爲執德存正,識懷沈敏,而辭職遺榮,有不拔

職 ,勸溫幷領已所統。轉冠軍將軍、會稽內史。 俄屬桓溫北伐,悟請督所部出河上,用其子超計,以己非將帥才,不堪軍旅,又固辭解

詔書優美,敦獎殷勤,固辭不起。 三子:超、融、沖。 及帝踐阼,就加鎭軍、都督浙江東五郡軍事。 久之,以年老乞骸骨,因居會稽。 超最知名。 太元九年卒,時年七十二。追贈侍中、司空,諡曰文 徴拜司

超字景興,一字嘉賓。 少卓犖不羈,有曠世之度,交游士林,每存勝拔,善談論,義理精

微。 悟事天師道,而超奉佛。 悟又好聚斂,積錢數千萬,嘗開庫,任超所取。 超性好施,一

日中散與親故都盡。其任心獨詣、皆此類也。

獎王室,修復園陵。超取視,寸寸毀裂,乃更作牋,自陳老病,甚不堪人間,乞閑地自養。 常謂不能測,遂傾意禮待。 得牋大喜,卽轉愔爲會稽太守。溫懷不軌,欲立霸王之基,超爲之謀。 參軍,短主簿,能令公喜,能令公怒。」超髯,珣短故也。 溫論事,溫令超帳中臥聽之,風動帳開,安笑曰:「郗生可謂入幕之賓矣。」 人多勁悍,溫恒云「京口酒可飲,兵可用」,深不欲憎居之。而憎暗於事機,遣牋詣溫,欲共 桓溫辟爲征西大將軍掾。 超亦深自結納。 溫遷大司馬,又轉爲參軍。 時王珣爲溫主簿,亦爲溫所重。 尋除散騎侍郎。 溫英氣高邁,罕有所推,與超言, 謝安與王坦之嘗詣 時悟在北府、徐州 府中語曰:「髯

定。 慮也。 濟 遲,終亦濟克。 公必務其持重耳。 |入河,超又進策於溫日:「淸水入河,無通運理。若寇不戰,運道又難,因資無所,實爲深 設欲城鄴,難爲功力。百姓布野,盡爲官有。易水以南,必交臂請命。但恐此計輕決, 太和中,溫將伐慕容氏於臨漳,超諫以道遠,汴水又淺,運道不通。 今盛夏,悉力徑造||新城,彼伏公威略,必望陣而走,退還||幽||朔矣。 若舍此二策而連軍西進,進不速決,退必愆乏。賊因此勢,日月相引,僶俛 若此計不從,便當頓兵河濟,控引糧運,令資儲充備,足及來夏,雖如賒 若能決戰,呼吸可 溫不從,遂引軍自

溫不 足鎭 邪ご超日 日『未厭 秋冬,船道澀滯,且北土早寒,三軍裘褐者少,恐不可以涉冬。此大限閡,非惟 從,果有材頭之敗,溫深慚之。尋而有壽陽之捷,問超曰:「此足以雪材頭之恥乎。」超 壓四海,震服宇內,豈可不深思哉!」溫旣素有此計,深納其言,遂定廢立,超始謀也。 : 「明公旣居重任,天下之責將歸於公矣。若不能行廢立大事、爲伊霍之舉者,不 有識之情也。」旣而超就溫宿,中夜謂溫曰:「明公都有慮不。」溫曰:「卿欲有所言 無食而已。」

服闋,除散騎常侍,不起。以爲臨海太守,加宣威將軍,不拜。 安右,而安入掌機權,悟優游而已,恒懷憤憤,發言慷慨,由是與謝氏不穆。 忍俄頃邪 遷中書侍郞。 」其權重當時如此。 謝安嘗與王文度共詣超,日旰未得前,文度便欲去,安曰:「不能爲性命 轉司徒左長史,母喪去職。 常謂其父名公之子,位遇應在謝 年四十二,先悟卒。 安亦深恨之。

其爲 所交友,皆一時秀美,雖寒門後進,亦拔而友之。及死之日,貴賤操筆而爲誄者四十餘人, 疾,門生依旨呈之,則悉與溫往反密計。層於是大怒曰:「小子死恨晚矣」,更不復哭。 見悟慢怠,展而候之,命席便遷延辭避。悟每慨然曰:「使嘉賓不死,鼠子敢爾邪!」性好聞 恐公年尊,必以傷愍爲弊。我亡後,若大損眠食,可呈此箱。不爾,便燒之。」憎後果哀悼成 衆所宗貴如 初,超雖實黨桓氏,以愔忠於王室,不令知之。將亡,出一箱書,付門生曰:「本欲焚之, 此。 王獻之兄弟,自超未亡,見悟,常躡履問訊,甚修舅甥之禮。 及超死, 凡超

清談著名于時,風流勝貴,莫不崇敬,以爲造徼之功, 之儁,甚相知賞。 人棲遁,有能辭榮拂衣者,超爲之起屋宇,作器服,畜僕豎, 超無子,從弟儉之以子僧施嗣 足參諸正始。 費百金而不吝。 而遁常重超,以爲一時 又沙門支遁以

尹 劉毅鎭江陵,請爲南蠻校尉、假節。與毅俱誅,國除。 僧施字惠脫,襲爵南昌公。弱冠,與王綏、桓胤齊名,累居淸顯,領宣城內史,入補丹楊

制, 除北中郎將、都督徐克青幽揚州之晉陵諸軍事、領徐克二州刺史、假節,鎭下邳。後與賊 傳末波等戰失利,降號建威將軍。 尋卒,年四十二。 追贈北中郎,諡曰簡。 年三十,始拜通直散騎侍郎,遷中書侍郎。 曇字重熙,少賜爵東安縣開國伯。 司徒王導辟祕書郎。朝論以曇名臣之子,每逼以憲 簡文帝爲撫軍,引爲司馬。尋除尚書吏部 子恢嗣。

軍事 恢 建威 字道胤,少襲父爵,散騎侍郎,累遷給事黃門侍郎,領太子右衞率。 武 將軍 帝深器之,以爲有藩伯之望。 雍 孙 刺史、假節,鎭襄陽。 會朱序自表去職,擢恢爲梁秦雍 恢甚得關隴之和,降附者動有千計。 司 恢身長八尺,美 荆揚并等州諸

荀靜戍皇天塢以距之。衝數來攻,恢遣將軍趙睦守<u>金墉城,而</u>佺期率衆次湖城,討衝,走之。 、皆背度,據 初, 姚萇 慕容垂圍慕容永於潞川, 將竇衝來降,拜東羌校尉。 弘農以結苻登。而登署衝爲左丞相,徙屯華陰。河南太守楊佺期遣上黨太守 冰窮蹙,遣其子弘求救於恢,幷獻玉璽一紐。 衝後舉兵反, 入漢 川, 襲梁州。 時關 中有巴蜀之 恢獻璽於

楊佺 能為 又陳「垂若弁永 期 患。 以 然後 疾 去 乘機 職 (雙斃,則河北可平」。孝武帝以爲然,詔王恭、庾楷救之,未及發而 ,其勢難測。 今於國計,謂宜救永。 **泳垂並存,自爲仇讎,連雞不 ***人概 泳沒。

而

楊佛 援。 略懼 嵩 恢 圍 以 洛陽 隨 而 退。 郡 太守夏侯宗之爲河南太守,戍洛陽。 恢以 恢遺建武 功 進征 將軍 辛恭靖救洛陽,至 軍,又領秦州 刺 史,加 梁州 姚萇遣其子略攻湖城及上洛,又使其將 督隴 刺史王 上 軍 正胤率衆出子午谷, 以

時 魏氏 强盛, Щ :陵危逼,恢遣江夏相鄧啟方等以萬 人距之,與魏主拓跋珪戰於滎陽,大

敗 而 還。

仲堪陰使人於道殺之,及其四子,託以羣蠻所殺。 府 司 馬 及 郭 王 恭 毗 討王國 並 以 爲 寶、桓玄、殷仲堪 不可,恢皆殺之。 皆舉兵應恭,恢與朝廷掎角玄等。 旣而玄等退 守尋陽。 喪還京師,贈鎭軍將軍。 以恢 爲 尙 書 襄陽 ,將家還都,至楊口 子循嗣 太守夏侯宗之、

隆字弘始,蹇亮有匪躬之節。 初爲尚書郎,轉左丞,在朝爲百僚所憚,坐漏洩事免。 頃

之,爲吏部郎,復免。補康郡太守。

隆軍人西赴遯甚衆。隆遣從事於牛渚禁之,不得止。將士憤怒,夜扶邃爲主而攻之,隆父 州而已。」承曰:「天下者,世祖皇帝之天下也。 太上承代已積十年,今上取四海不平,齊王 |承聞||彥言,[云] 請見,曰:「不審明使君當今何施。」||隆曰:「我俱受二帝恩,無所偏助,惟欲守 遺兵將助,而稱背倫。」

隨素敬別駕顧彦,密與謀之。

彥曰:「趙誘下計,乃上策也。」

西曹留 今上計,明使君自將精兵徑赴齊王,中計,明使君可留督攝,速遣猛將率精兵疾赴,下計,示 輒依臺閣峻制繩之,遠近咸怨。尋加寧東將軍,未拜,而齊王冏檄至,中州人在軍者皆欲赴 子皆死,顧彥亦被害,誣隆聚合遠近,圖爲不軌。隆之死也,時議莫不痛惜焉。 惑,此州豈可得保也!隆無所言,而停檄六日。時寧遠將軍陳留王邃領東海都尉,鎭石頭, 應天順時,成敗之事可見。使君若顧二帝,自可不行,宜急下檄文,速遣精兵猛將。 義,隆以兄子鑒爲趙王掾,諸子悉在京洛,故猶豫未決。主簿趙誘、前秀才虞潭白隆曰:「當 隆少爲趙王倫所善,及倫專擅,召爲散騎常侍。 倫之篡也,以爲揚州刺史。僚屬有犯, 若其疑

風矣。 動於天地,祗赴國屯,信誓明於日月。枕戈雨泣,若雪分天之仇,皇輿旋軫,卒復夷庚之躅。 猰窳千羣,探穴而忘死。竟能宜力王室,揚名本朝,負荷受遺,繼之全節。言念主辱,義聲 族,始則承顏候色,老萊弗之加也,旣而辭親蹈義,申胥何以尙焉!封狐萬里,投驅而弗顧, 世登台。 微夫人之誠懇,大盜幾移國乎!道徽儒雅,柔而有正,協德始安,頗均連壁。方回踵武,奕 史臣曰:忠臣本乎孝子、奉上資乎愛親、自家刑國、於斯極矣。 露冕爲飾,援高人以同志,抑惟大隱者歟!愛子云亡,省遺文而輟泣,殊有大義之 太真性履純深、譽流邦

贊曰:太眞懷貞,勤宣乃誠。 謀敦翦峻,奮節摛名。 道徽忠勁,高芬遠映。悟克負荷,

校勘記

超慚雅正。

- (1) 謝鯤 「鯤」原作「琨」,據鯤媽及通志一二六改。
- 鄱陽內史紀瞻 勞校"成紀、鄧嶽傳「紀瞻」作「紀睦」。 紀瞻卒於明帝時,距威和三年已四年

矣,且瞻亦未嘗爲鄱陽內史。

C II] 輔軍將軍虞潭 潭傳及通志一二六「輔軍」作「輔國」。

「詢」,今據改。

許詢

辛恭靖 「恭靖」原作「恭靜」,今依恭靖傳及通鑑一一一改。

《 〕 西曹留承 校文:趙誘傳作「治中留寶」。

晉書卷六十八

列傳第三十八

顧樂

悟,弱冠仕吳,爲黃門侍郎、太子輔義都尉。吳平,與陸機兄弟同入洛,時人號爲「三俊」。 例拜爲郎中,歷尚書郎、太子中舍人、廷尉正。 恒縱酒酣暢,謂友人]張翰曰:「惟酒可以忘 顧榮字彥先,吳國吳人也,爲南土著姓。祖雍,吳丞相。父穆,宜都太守。 榮機神朗

憂,但無如作病何耳。」

割炙啗之。坐者問其故,榮曰:「豈有終日執之而不知其味」及倫敗,榮被執,將誅,而執炙 位,倫子虔爲大將軍,以榮爲長史。初,樂與同僚宴飲,見執炙者貌狀不凡,有欲炙之色,榮 者爲督率,遂救之,得免。 會趙王倫誅淮南王允,收允僚屬付廷尉,皆欲誅之,榮平心處當,多所全宥。及倫篡

樂馮 封嘉 曰:「吾爲齊王主簿,恒慮禍及,見刀與繩,每欲自殺,但人不知耳。」及冏誅,際以討葛旟功, 郎。在職不復飲酒。 易之。」熊曰:「可轉爲中書侍郎,檪不失淸顯,而府更收實才。」旟然之, 欲平海內之心也。 熊 興伯 齊王 熊謂 冏 ,轉太子中庶子。 召爲大司馬主簿。問擅權驕恣,榮懼及禍,終日昏酣,不綜府事,以情告友人長 |問長史||葛旟曰:「以||顧樂爲主簿,所以甄拔才望,委以事機,不復計南北親疏, 今府大事殷,非酒客之政。」與曰:「樂江南望士, 且居職日淺, 人或問之曰:「何前醉而後醒邪。」樂懼罪,乃復更飲。 白冏,以爲中書侍 與州里楊彦明書 不宜 輕代

榮兼: 世 亂 侍中 不 長 沙 應,遂還吳。 一,遣行 |王义爲驃騎,復以榮爲長史。|义敗,轉成都王||類丞相從事中郎。 園陵。 東海王越聚兵於徐州,以際為軍諮祭酒。 會張方據洛,不得進,避之陳留。 及帝 西遷長安, 徵為散騎常侍,以 惠帝幸臨漳,以

復遺 列郡 將軍懷神武之略,有孫吳之能,功勳效於已著,勇略冠於當世,帶甲數萬,舳艫山積,上方雖 勉。 火收禮 會飽 種 屬 廣 欲 陵相陳敏 江 豪桀,有孫氏鼎峙之計。 南 誅諸士 雖 有石冰之寇,人物尚 人,樂說之日:「中 反,南渡江,逐揚州刺史劉機 假樂右將軍 全。 ·國喪亂,胡夷內侮,觀太傅今日不能復振 樂常憂無竇氏、孫、 、丹楊內史。 、丹楊內史王曠, [] 榮數踐危亡之際,恒以 劉之策,三有以存之耳。 阻兵據州,分置子弟 華夏,百 恭 姓 遜自 無

列傳第三十八 顧榮

還,語在紀瞻傳。 **壓以羽扇,其衆潰散。** 年,周玘與榮及甘卓、紀瞻潛謀起兵攻敏。 軍函首送洛,題曰逆賊顧榮、甘卓之首,豈惟一身顚覆,辱及萬世,可不圖之!」卓從之。 覆,計無所定,然其子弟各已驕矜,其敗必矣。 曰:「若江東之事可濟,當共成之。 圖 有數州,亦可傳檄而定也。 也。」敏納其言,悉引諸豪族委任之。敏仍遣甘卓出横江,堅甲利器,盡以委之。 榮私 事平,還吳。 若能委信君子,各得盡懷,散帶芥之恨,塞讒諂之口,則大事可 然卿觀事勢當有濟理不。敏旣常才,本無大略,政令反 永嘉初,徵拜侍中,行至彭城, 樂廢橋斂舟於南岸,敏率萬餘人出,不獲濟,樂 而吾等安然受其官祿,事敗之日,使江西諸 見禍難方作,遂輕舟而 於卓 明

去就紛紜。 弟乃有三聖,可謂窮理者也。 禱 公宜露營野次,星言夙駕,伏軾怒蛙以募勇士,懸膽於庭以表辛苦。 不可不理,一 職,朝野甚推敬之。 祀 之事 |元帝鎭||江東,以||榮爲軍司,加散騎常侍,凡所謀畫,皆以諮焉。 ,誠復 願沖虛納下,廣延儁彥,思畫今日之要,塞鬼道淫祀,弘九合之勤,雪天下之恥, 言蹉跌,患必及之故也。 可修,豈有便塞參佐白事,斷賓客問訊。今强賊臨境,流言滿國,人心萬端, 時帝所幸鄭貴嬪有疾,以祈禱頗廢萬機,榮上牋諫曰:「昔文王父子兄 而文王日昃不暇食,周公一沐三握髮,何哉?誠以一 當今衰季之末,屬亂離之運,而天子 **| 榮旣南州望士,躬處右** 貴嬪未安,藥石 流播,豺 日萬機, 狼 寒路, 實急,

則羣生有賴,開泰有期矣。」

皆服膺儒教,足爲公望,賀生沈潛,青雲之士,陶恭兄弟才幹雖少,實事極佳。凡此諸人,皆 快,殷慶元質略有明規,文武可施用,榮族兄公讓明亮守節,困不易操,會稽楊彥明、謝行言 時南土之士未盡才用,榮又言:「陸士光貞正清貴,金玉其質,甘季思忠款盡誠,膽幹殊

六年,卒官。帝臨喪盡哀,欲表贈燦,依齊王功臣格。吳郡內史殷祐牋曰:

南金也。」書奏,皆納之。

賢愚計無所出。故散騎常侍、安東軍司、嘉興伯顧樂經德體道,謀猷弘遠,忠貞之節, 衆率先,忠義奮發,忘家爲國,歷年逋寇,一朝土崩,兵不血刃,蕩平六州,勳茂上代,義 討。信著羣士,名冠東夏,德聲所振,莫不響應,荷戈駿奔,其會如林。際躬當矢石,爲 在困彌厲。崎嶇艱險之中,逼迫姦逆之下,每惟社稷,發憤慷愾。密結腹心,同謀致 「昔賊臣陳敏憑寵藉權,滔天作亂,兄弟姻婭盤固州郡,威逼士庶以爲臣僕,于時

近畿,外有五國之援,內有宗室之助,稱兵彌時,役連天下,元功雖建,所喪亦多。際衆 進爵拓土,賜拜子弟,遐邇同歎,江表失望。齊王親則近屬,位爲方嶽,杖節握兵,都督 伏聞論功依故大司馬齊王格,不在帷幕密謀參議之例,下附州征野戰之比,不得 彰天下。

佐、上虧經國紀功之班、下孤忠義授命之士。 强,非創謀之主,皆錫珪受瑞,或公或侯。、榮首建密謀,爲方面盟主,功高元帥,賞卑下 事舉,未必不由此而隆也。方之於齊,强弱不同,優劣亦異。至於齊府參佐,扶義助 朝之勞。元惡旣殄,高尙成功,封閉倉廩,以俟大軍,故國安物阜,以義成俗,今日匡霸 無一旅,任非藩翰,孤絕江外,王命不通,臨危獨斷,以身徇國,官無一金之費,人無終

夫考績幽明,王教所崇,況若際者,濟難寧國,應天先事,歷觀古今,未有立功若

彼,酬報如此者也。」

由是贈樂侍中、驃騎將軍、開府儀同三司、諡曰元。及帝爲晉王、追封爲公、開國、食邑。 曰:「顧彥先復能賞此不?」因又慟哭,不弔喪主而去。子毗嗣,官至散騎侍郎。 **| 樂素好琴,及卒,家人常置琴於靈座。 吳郡張翰哭之慟,旣而上牀鼓琴數曲,撫琴而歎**

紀瞻

紀瞻字思遠,丹楊秣陵人也。祖亮,吳尚書令。父陟,光祿大夫。瞻少以方直知名。吳

平,徙家<u>歷</u>陽郡。察孝廉,不行。

後舉秀才,尚書郎陸機策之曰:「昔三代明王,啓建洪業,文質殊制,而令名一致。

朴,無爲 誠,款誠之薄,則又反之於忠。 三代相循,如水濟火,所謂隨時之義, 焉,文之弊也薄,救薄則又反之於忠。 文存朴,以反其本,則兆庶漸化,太和可致也。」 **隮,承天順時,九有一貫,荒服之君,莫不來同。** 者,皆欲邁化隆政,以康庶績,垂歌億載,永傳于後。 救其弊,明風以蕩其穢,<u>三</u>代之制將何所從。太古之化有何異道。」瞻對曰:「瞻聞有國有家 各異也? 自無聖王,人散久矣。三代之損益,百姓之變遷,其故可得而聞邪? 今將反古以 人尙忠,忠之弊也朴,救朴莫若敬。殷人革而修焉,敬之弊也鬼,救鬼莫若文。 無以易也。 而化;後聖因承,所務或異。 非賢聖之不同,世變使之然耳。 故忠弊質野,敬失多儀。 周鑒二王之弊,崇文以辯等差,而流遁者歸薄而 然則王道之反覆其無一定邪,亦所祖之不 然而大道旣往,人變由久,謂當今之政宜去 然而俗變事弊,得不隨時,雖經聖哲, 救弊之術也。 今大晉闡元, 周 同 人矯而 聖功 而 羲皇簡 無款 功業 變 H

所 爲主。又其正中,皆云太廟,以順天時,施行法令,宗祀養老,訓學講肄,朝諸侯而選造士, 配上帝,敬恭明祀,永光孝道也。其大數有六。古者聖帝明王南面而聽政,其六則以明堂 漢氏遺作,居爲異事,而蔡邕月令謂之一物。 將何所從。」對曰:「周制明堂,所以宗其祖以 以講藝文,此蓋有國之盛典,爲邦之大司。 又問:「在昔哲王象事備物,明堂所以崇上帝,清廟所以寧祖考,辟雍所以班禮敎,太學 亡秦廢學,制度荒闕。 諸儒之論,損益異物。

則 備 日太室,取其堂,則日明堂,取其四門之學,則日太學,取其周水圓如璧,則日璧雍。 禮辯物,一教化之由也。 故取其宗祀之類,則日淸廟,取其正室之貌,則日太廟,取其室, 異名

同

事,其實一也。是以蔡邕謂之一物。」

美。 泉吐液,朱草自生,萬物滋茂,日月重光,和氣四塞,大道以成,序君臣之義,敦父子之親,明 徒,周文攜渭濱之士,居之上司,委之國政,故能龍奮天衢,垂勳百代。先王身下白屋,搜揚 協濟康哉,符契往代,明良來應,金蘭復存也。」 士,宣五教以明令德,考績殿最,審其優劣,厝之百僚,置之羣司,使調物度宜,節宣國典,必 **貢賢之塗已闓,而敎學之務未廣,是以進競之志恒銳,而務學之心不修。 若闢四門以延造** 夫婦之道,別長幼之宜,自九州,被八荒,海外移心,重譯入貢,頌聲穆穆,南面垂拱也。今 仄陋,使山無扶蘇之才,野無<u>伐檀</u>之詠。 是以化厚物**處,神祇來應,翔鳳飄飆,甘露豐墜,**醴 在得賢,清平之化急於拔才,故二八登庸,則百揆序,有亂十人,而天下泰。」武丁擢傅巖之 不對,而事千載恒背。古之興王何道而如彼?後之衰世何闕而如此。」對曰:「興隆之政務 此長世所以廢興,有邦所以崇替。夫成功之君勤於求才,立名之士急於招世,理 又問:「庶明亮采,故時雍穆唐,有命旣集,而多士隆周。故書稱明良之歌,易貴金蘭之 無世

又問一一一十一一人 五刑之教,周公明四罪之制,故世歎清問而時歌緝熙。 姦宄旣殷,法

列

叉加 賢黜 水制 亦由 因 暴,法令滋章,盗賊多有。,善曰:『惟敬五刑,以成三德。』叔世道衰,旣興三辟,而文公之弊, 惟象刑緝熙而已也。 時,化道德之敎,賤勇力而貴仁義。 物滋有。 加 險 否,則 未 族 [與不?]對曰:「二儀分則兆庶生,兆庶生則利害作。 泰 革,將以俗變由久,權時之宜也。今四海一統,人思反本,漸尙簡樸,則貪夫不競,尊 談,淫刑淪胥,感傷和氣,化染後代,不能變改。故漢祖指麾而六合響應,魏承漢末, 叔世崇三辟之文,暴秦加族誅之律,淫刑淪胥,虐濫已甚。 不同,而救世異術,不得已而用之故也。寬克之中,將何立而可。族誅之法足爲 不仁者遠。 且太古知法, 所以遠獄。及其末, 不失有罪, 是以獄用彌繁, 而人彌 爾則斟參夷之刑,除族誅之律,品物各順其生,緝熙異世而偕也。」 仁義貴則强不陵弱,衆不暴寡。 利害之作, 有由而然也。太古之 漢魏遵承,因 三皇結繩而天下泰,非 而 沸革

之理。」 動 水潤 成。 地 剛直,以外接爲用。 成 形 此 下,火炎上,剛柔燥溼,自然之性,故陽 叉 對 應 É 問 日 同 形象之作,相須之道也。若陰陽不調,則大數不得不否,一氣偏廢,則萬物不得獨 曰:「夫五行迭代,陰陽相須,二儀所以陶育,四時所以化生。 易稱『在天成象,在 之至驗,不偏之明證也。 :「蓋聞陰陽 是以金水之明內鑒,火日之光外輝,剛施柔受,陽勝陰伏。 升降,山澤通氣,初九純卦,潛龍 今有溫泉而無寒火, 其故何也? 動而 外,陰靜而 勿用,泉源所託,其溫宜 内。 內性 柔弱,以含容爲質,外 思聞辯之,以釋 也。 水之受 若夫 不同

溫,含容之性也。」

帝者之法,皆廢興有由,輕重以節,此窮神之道,知化之術,隨時之宜,非有降殺也。」 淳德往而莫返。豈太樸一離,理不可振,將聖人之道稍有降殺邪。」對曰:「政因時以興,機 繩爲信,人知所守。大道旣離,智惠擾物,夷險不同,否泰異數,故唐虞密皇人之網,夏殷繁 隨物而動,故聖王究窮通之源,審始終之理,適時之宜,期於濟世。皇代質朴,禍難不作,結 以之革亂,則玄古之風可紹。然而唐虞密皇人之闊網,夏殷繁帝者之約法,機心起而 永康初,州又舉寒素,大司馬辟東閤祭酒。其年,除鄢陵公國相,不之官。明年,左降 又問曰:「夫窮神知化,才之盡稱,備物致用,功之極目。以之爲政,則橫巖之規可踵, 日進,

松滋侯相。太安中,棄官歸家,與顧榮等共誅陳敏,語在榮傳。

『太極天地』,愚謂未當。夫兩儀之謂,以體爲稱,則是天地,以氣爲名,則名陰陽。今若謂 生,故能長久』,『一生二,二生三,三生萬物』,以資始沖氣以爲和。原元氣之本,求天地之 太極爲天地,則是天地自生,無生天地者也。。老子又云『天地所以能長且久者,以其不自 陰陽交泰,萬物始萌,六合闓拓。 送子云『有物混成,先天地生』,誠易之太極也。 而王氏云 日月含其輝,八卦隱其神,天地混其體,聖人藏其身。然後廓然旣變,清濁乃陳,二儀著象, 召拜尚書郎,與榮同赴洛,在塗共論易太極。榮曰:「太極者,蓋謂混沌之時曚昧未分,

其孰在 指向 根, 軍禮發遣,乃與榮及陸玩等各解船棄車牛,一日一夜行三百里,得還揚州。 解,所不應疑。 能藏其身於未分之內!老氏先天之言,此蓋虛誕之說,非易者之意也。 然之數,雖經諸聖,孰知其始。吾子云『曚昧未分』,豈其然乎!聖人,人也,安得混沌之初 承,共同 恐宜以 可謂近之。古人舉至極以爲驗,謂二儀生於此,非復謂有父母。若必有父母,非天地 一致,稱易準天,無復其餘也。 此 爲準也。」瞻曰:「昔庖犧畫八卦,陰陽之理盡矣。 意者直謂太極極盡之稱,言其理極,無復外形,外形旣極,而生兩儀。 。夫天清地平,兩儀交泰,四時推移,日月輝其間 會刺 ,史裴盾得東海王越書,若榮等顧望,以 文王、仲尼係其遺業,三聖相 亦謂吾子 神通 王氏 门自

馥、華軼功、封都 退,除會稽內史。 使者,果伏詐妄。 元帝 爲安東將軍,引爲軍諮祭酒,轉鎭東長史。 鄉侯。 時有詐作大將軍府符收諸暨令,令已受拘,瞻覺其詐,便破檻 尋遷丞相軍諮祭酒。 石勒入寇,加揚威將軍、都督京口 論討陳敏功,封臨湘縣侯。 帝親幸瞻宅,與之同乘而歸。 以南至蕪湖諸軍 西臺除侍中,不 一事,以距勒。 出之,訊問 就 以計周 勒

觀古 宮未殯,人神失御。陛下膺籙受圖,特天所授。使六合革面,遐荒來庭,宗廟旣建,神主復 人之成敗,今世事舉目可知,不爲難見。二帝失御,宗廟虛廢,神器去晉,于今二載,梓 及長安不守, 與王導俱 入勸 進。 帝不許。 瞻曰:「陛下性與天道, **猶復役機** 神於史籍, 之改容。 哉 去,雖 謂 宙 晉 安, 也。 廟 _ i 」, 大業 祚 揖 隆 億 陛 屯 帝 讓 兆 復 中 否,理 猶 下身當 而 興 向風、殊俗畢至、若列宿之綰北極、百川之歸巨海、而猶欲守匹夫之謙、非所 如 傾 救 不 也 此。 匡 許,使殿中將軍 火 l 於 將 盡於今。 也。 厄運,纂承帝緒,顧望宗室,誰復與讓 今五 但 . 國 來,豈得救祖宗之危急哉 臣等區區 都燔爇,宗廟無 , 賊宜誅, 當以此屈己謝天下耳。 促之則得,可以隆中興之祚,縱之則失,所以資姦寇之權:此所謂 韓績徹去御 , 尙所不 主,劉 許 坐。 一, 況 載 1 瞻叱績 竊弄 大 適時之宜萬端,其可綱維大業者,惟理 人 與 神器於西北, 天 1 曰:「帝坐上應星宿,敢 而 當承 地 欲逆天時,違人事,失地 合德, 大位,此所謂當也。 日月 陛下方欲 並 明, 高讓 有動 而 可 於 者斬 以失 が東南、 四 利, 祖 门帝爲 以闡七 三者一 機 廓 與當。 後 此 開 時 字 理 所

及 帝 踐位,拜侍中,轉尙書,上疏諫諍,多所匡 益,帝甚嘉其忠烈。 會久疾, 不堪朝請,

上疏曰:

र्ता 求 知 樂 垂 誠欲 利 沒 臣 疾 之餘當 及時效其忠規, 疢 臣 以 不痊,曠廢 凡 所投厝。 庸,邂逅遭遇,勞無負鼎,口不商歌,橫逢大運, 轉 臣聞易失者時 名傳 久, 比陳誠款 不朽也。 六不 未見 然失之 再 *者年, 哀 者億 察。 故古之志 萬, 重 一以尸素,抱罪枕席,憂 得 之者 士 義 頻煩變竊。 兩 J 負 耳。 鼎 常 趣 走, 責 人之情 雖 之重,不 商歌 思慕古 貪 於

列

傳

衾,日頓一日。如復天假之年,蒙陛下行葦之惠,適可薄存性命,枕息陋巷,亦無由復廁 八坐,升降臺閣也。臣目冥齒墮,胸腹冰冷,創旣不差,足復偏跛,爲病受困,旣以茶 人自效之志,竟無豪氂報塞之效,而犬馬齒衰,衆疾廢頓,僵臥救命,百有餘日,叩棺曳 七十之年,禮典所遺,衰老之徵,皎然露見。臣雖欲勤自藏護,隱伏何地!

衰退。 厚幸 跡,而當虛停好爵,不以縻賢,以臣穢病之餘,妨官固職,誠非古今黜進之急。 惟陛下 發卒轉運,皆須人力。 以臣平强,兼以晨夜,尚不及事,今俟命漏刻,而當久停機職,使 割不已之仁,賜以敝帷,隕仆之日,得以藉尸,時銓俊义,使官修事舉,臣免罪戮,死生 王事有廢。若朝廷以之廣恩,則憂責日重,以之序官,則官廢事弊,須臣差,則臣日月 臣之職掌,戶口租稅,國之所重。方今六合波盪,人未安居,始被大化,百度草創, 今以天慈,使官曠事滯,臣受偏私之宥,於大望亦有虧損。今萬國革面,賢俊比

因以疾免。 尋除尚書右僕射,屢辭不聽,遂稱病篤,還第,不許。

之,曰:「臣聞皇代之興,必有爪牙之佐,扞城之用,帝王之利器也。 垂拱。伏見前輔國將軍郗鑒,少立高操,體淸望峻,文武之略,時之良幹。昔與戴若思同 時都鑒據鄒山,屢爲石勒等所侵逼。瞻以鑒有將相之材,恐朝廷棄而不恤,上疏請徵 故虞舜舉十六相而南面

所儀同三司,諡曰穆,遣御史持節監護喪事。論討 正司,諡曰穆,遣御史持節監護喪事。論討 問臣導,冀有豪氂萬分之一。」 清重,一代名器。 將軍,復加常侍,劉隗鎭北,陳彫 辟,推放荒地,所在孤特,衆無一旅,救援不至。 直之規,補袞職之闕。自先朝以來,諸所授用,已有成比。戴若思以尚書爲六州 但士衆單寡,無以立功,既統名州,又爲常伯。 聖朝以至公臨天下,惟平是與,是以臣寢頓陋巷,思盡聞見,惟開聖懷,垂 鎭 東。 以鑒年時,則與若思同,以資,則俱八坐。 然能綏集殘餘,據險歷載,遂使凶寇不敢南 若使鑒從容臺闥, 出內王命, 都督、征 況鑒雅望 必能 盡抗

常侍 匹。 加散騎常侍。及王敦之逆,帝使謂瞻曰:「卿雖病,但爲朕臥護六軍,所益多矣。」乃賜布千 雅正。俄轉領軍將軍,當時服其嚴毅。雖恒疾病,六軍敬憚之。瞻以久病,請去官,不聽,復 君便其一。」瞻辭讓。帝曰:「方欲與君善語,復云何崇謙讓邪」。瞻才兼文武,朝廷稱其忠亮 如故。服物制度,一按舊典。」遣使就拜,止家爲府。尋卒,時年七十二。册贈本官、開 瞻不以歸家,分賞將士。 賊平,復自表還家,帝不許,固辭不起。 詔曰:「瞻忠亮雅正, 明帝嘗獨引瞻於廣室,慨然憂天下,曰:「社稷之臣,欲無復十人,如何。」〔三因屈指曰 論討王含功,追封譁容子,降先爵二等,封次

其妙。 尉。 尚書閔鴻、太常薛兼、廣川太守河南褚沈、給事中宣城章遼、歷陽太守沛國武嘏,並與瞻素 善,及機被誅,贍卹其家周至,及嫁機女,資送同於所生。長子景早卒。景子友嗣,官至廷 疏,咸藉其高義,臨終託後於瞻。瞻悉營護其家,爲起居宅,同於骨肉焉。少與陸機兄弟親 景弟鑒,太子庶子、大將軍從事中郎,先瞻卒。 膽 厚自奉養,立宅於烏衣巷,館宇崇麗,園池竹木,有足賞翫焉。 愼行愛士,老而 性 |靜默,少交遊,好讀書,或手自抄寫,凡所著述,詩賦牋表數十篇。 兼解音樂,殆盡 彌篤

賀循 楊方

邵,中書令,爲孫晧所殺,徙家屬邊郡。 重名,漢安帝時爲侍中,避安帝父諱,改爲賀氏。曾祖齊,仕吳爲名將。祖景,滅賊校尉。父 賀循字彦先,會稽山陰人也。其先慶普,漢世傳禮,世所謂慶氏學。 族高祖純,博學有

朝,久不進序。 國 多厚葬, 相丁乂請 循少嬰家難,流放海隅,吳平,乃還本郡。 及有 爲五官掾。 著作郎陸機上疏薦循曰:「伏見武康令賀循德量邃茂,才鑒淸遠,服膺道素, 治,拘忌迴避歲月,停喪不葬者,循皆禁焉。 刺史嵇喜舉秀才,除陽羨令,以寬惠爲本,不求課最。 操尙高厲,童齔不羣,言行進止,必以禮讓。 政敎大行,鄰城宗之。 後爲武康令, 然無援於

列傳第三十八 賀循

營,年時倏忽,而邈無階緒,實州黨愚智所爲 充方選也。 以均分顯路,惠及外州而已。 風 州,戶各數十萬,今揚州無郞,而荆州江南乃無一人爲京城職者,誠 操 至於才望資品,循可尚書郎,訥可太子洗馬、舍人。此乃衆望所積,非但企及淸塗,苟 循守 凝峻,歷試二城,刑政肅穆。 下縣 謹條資品,乞蒙簡察。」久之,召補太子舍人。 ,編名凡悴,訥歸家巷,棲遲 誠以庶士殊風,四方異俗, 前蒸陽令郭訥 有 恨恨。 年。 皆出自新 風度簡曠,器識朗拔, 臣等伏思臺郞所 壅隔之害,遠國 邦,朝 無知己,居在遐外,志 以使州 非聖朝待四方之本 通濟敏悟, 益甚。 州有人, 至于荆、揚 才足幹 非徒 自

走,超、與皆降,一郡悉平。隨迎景還郡,卽謝遣兵士,杜門不出,論功報賞,一無豫焉 **討之,循亦合衆應之。冰大將抗寵有衆數千,屯郡講堂。** 其長史宰與領山陰令。 鎭 不能討,皆望塵奔走。辰別帥石冰略有揚州,逐會稽相張景,以前寧遠護軍程超代之,以 趙王倫篡位,轉侍御史,辭疾去職。後除南中郞長史,不就。 前南平內史王矩、吳興內史顧祕、前秀才周玘等唱義,傳檄州郡以 循移檄於龐,為陳逆順,龐遂遁 會逆賊李辰起兵江夏,征

朱誕不豫其事。 袒 身,示不可用,敏竟不敢逼。是時州內豪傑皆見維繫,或有老疾,就加秩命,惟循與吳郡 及陳敏之亂,詐稱詔書,以循爲丹楊內史。循辭以腳疾,手不制筆,又服寒食散,露髮 及敏破,征東將軍周馥上循領會稽相,尋除吳國內史,公車徵賢良,皆

一八二六

不就。

頭,是誰邪?」循未及言,帝悟曰:「是賀邵也。」循流涕曰:「先父遭遇無道,循創巨痛深,無以 元帝爲安東將軍,復上循爲吳國內史,與循言及吳時事,因問曰:「孫晧嘗燒鋸截一賀

上答。」帝甚愧之,三日不出。東海王越命爲參軍,徵拜博士,並不起。

其然。 所遇,動默在己。 及帝遷鎮東大將軍,以軍司顧樂卒,引循代之。循稱疾篤,牋疏十餘上。帝遺之書曰: 夫百行不同,故出處道殊,因性而用,各任其眞耳。當宇宙淸泰,彝倫饮序,隨運 若乃時運屯弊,主危國急,義士救時,驅馳拯世,燭之武乘縋以入秦,園綺彈冠 或有遐棲高蹈,輕舉絕俗,逍遙養和,恬神自足,斯蓋道隆人逸,勢使

而匡漢,豈非大雅君子卷舒合道乎!

御,黎元茶毒,是以日夜憂懷,慷慨發憤,志在竭節耳。 軌,策柴篳而造門,徒有其懷,而無從賢之實者何。良以寇逆殷擾,諸夏分崩,皇居失 虛薄寡德,忝備近親,謬荷寵位,受任方鎭,餐服玄風,景羨高矩,常願棄結駟之軒

稟徽猷,以弘遠規。今上尚書,屈德爲軍司,謹遣參軍沈禛銜命奉授,望必屈臨,以副 殄悴,羣望顒顒,實在君侯。 前者顧公臨朝,深賴高算。元凱旣登,巢許獲逸。 **苟義之所在,豈得讓勞居逸!想達者亦一以貫之也。**庶 至於今日,所謂道之云亡,邦國

循猶不起。

道。 循羸疾不堪拜謁,乃就加朝服,賜第一區,車馬牀帳衣褥等物。 及帝承制,復以爲軍諮祭酒。循稱疾,敦逼不得已,乃轝疾至。 帝親幸其舟,因諮以政 循辭讓,一無所受。

州府,皆不見省。會循出,至破岡,連名詣循質之。循曰:「見張廷尉,當爲言及之。」 闔聞而 廷尉張闓住在小市,將奪左右近宅以廣其居,乃私作都門,早閉晏開,人多患之,訟於

遽毁其門,詣循致謝。其爲世所敬服如此。

奥,亡逃所聚。 特宜以重兵備戍,隨勢討除,絕其根蔕。 沿江諸縣各有分界,分界之內,官 難備,發憚役之人,而御之不肅,恐未必爲用。以循所聞,江中劇地惟有闔廬一處,地勢險 **貢商旅之所來往也。今議者欲出宣城以鎭江渚,或欲使諸縣領兵。愚謂令長威弱,而兼才** 制十里一亭,亦以防禁切密故也。當今縱不能爾,回要宜籌量,使力足相周。 之報,墮則有一身之罪,謂於大理不得不肅。所給人以時番休,役不至困,代易有期。 多,不能獨制者,可指其蹤跡,言所在都督尋當致討。 長所任,自可度土分力,多置亭候,恒使徼行,峻其綱目,嚴其刑賞,使越常科,勤則有殊榮 時江東草創,盜賊多有,帝思所以防之,以問於循。 今不明部分,使所在百姓與軍家雜其 循答曰:「江道萬里,通涉五 若寇劫强 山州,朝 案漢

徼備,兩情俱墮,莫適任負,故所以徒有備名而不能爲益者也。」 帝從之。

高者 猷, 以 康 萬 機。 1循自以臥疾私門,固讓不受。 建武初,爲中書令,加散騎常侍,又以老疾固辭。 帝下令曰: 處 「孤以寡德,忝當大位,若涉巨川,罔知所憑。猶言行以禮,乃時之望,俗之表也。實賴其謀 | 此職,惟拜太常而已。 也。 及愍帝卽位,徵爲宗正。一一帝在鎮,又表爲侍中,道險不行。以討華軼功,將封鄉侯, 今從其所執。」於是改拜太常,常侍如故。循以九卿舊不加官,今又疾患,不宜兼 疾患有素,猶望臥相規輔,而固守撝謙,自陳懇至,此賢履信思順,苟以讓爲

時宗廟始建,舊儀多闕,或以惠懷二帝應各爲世,則潁川世數過七,宜在迭毀。事下

A常。循議以為:

改舊。 兄,則 世而上毀二世者也。 立 由 惠帝 廟 寢,使臣下祭之,此前代之明典,而承繼之著義也。 禮,兄弟不相爲後,不得以承代爲世。殷之盤庚不序陽甲,漢之光武不繼成帝,別 懷帝自上繼世祖,不繼惠帝,當同殷之陽甲,漢之成帝。 不 諸 出 如 此 ,非上祖宜遷也。 禮,通所未論。 惠懷二帝俱繼世祖,兄弟旁親,同爲一世,而上毀二爲一世。今 下世旣升,上世乃遷,遷毀對代, 是以惠帝尚在太廟,而懷帝復入,數則 惠帝無後,懷帝承統,弟不後 不得 議者 相 以聖德沖遠,未便 盈八。 通, 未有下升一 盈八之理,

列傳第三十八 賀循

爲廟 安一 見此例。 神之數居然自八,此盡有由而然, 以惠帝之崩已毀豫章,懷帝之入復毀潁川,如此則一世再遷,祖位橫折,求之古義,未 元年,告世祖諡於太廟八室,此是苟有八神,不拘於七之舊例也 位也。 中恒有八室也。 惠帝宜出,尚未輕論,況可輕毀一祖而無義例乎? 至尊於惠懷俱是兄弟,自上後世祖,不繼二帝,則二帝之神行 又武帝初成太廟時,正神止七,而楊元后之神亦權立一室。 非謂數之常也。 旣有八神,則不得不於七室之外權 潁川旣無可毀之理,則 應別出,不 見

以上二世之祖,於王氏之義,三昭三穆廢闕其二,甚非宗廟之本所據承,又違世祖祭征 俱不應毀。今旣云豫章先毀,又當重毀潁川,此爲廟中之親惟從高祖已下,無復 世不毁,故所以特在本廟,且亦世代尙近,數得相容,安神而已,無逼上祖,如王氏昭穆 無服之祖,故爲三昭三穆幷太祖而七也。 兄弟旁滿,輒毁上 旣滿,終應別 今七廟之義,出於王氏。 世,征西六世,以應此義。今至尊繼統,亦宜有五六世之祖,豫章六世,潁川 又議者以景帝俱已在廟,則惠懷 廟也。 一祖,則祖位空懸,世數不足,何取於三昭三穆與太祖之廟然後成七 以今方之、旣輕重義異、又七廟七世之親, 從禰以上至於高祖,親廟四世,高 一例。 故世祖郊定廟禮,京兆、潁川曾、 景帝盛德元功,王基之本,義著祖宗, 昭穆,父子位 祖 以 上復 高之親,豫 有五世六世 也。 五世, 高祖 若當 百

西、豫章之意,於一王定禮所闕不少。

輒依

經禮

而對,爲當世儒宗。

時尚書僕射己協與循異議,循答義深備,辭多不載,竟從循議焉。 朝廷疑滯皆諮之於循,循

叉議日 孤意焉。」循又讓,不許,不得已留之,初不服用。 已,屋室財庇風雨。 其後帝以循淸貧,下令曰:「循冰淸玉潔,行爲俗表,位處上卿,而居身服物蓋周形而 「案禮,子不敢以己爵加父。」帝納之。 孤近造其廬,以爲慨然。 其賜六尺牀薦席縟幷錢二十萬,以表至德,暢 俄以循行太子太傅,太常如故。 及帝踐位,有司奏琅邪恭王宜稱皇考,循

而恭 執 儀 讓。 太子追送近塗,望船流涕。 哀,哭之甚 同 手流涕。 一三司。 帝以循體德率物,有不言之益,敦厲備至,期於不許,命皇太子親往拜焉。 於接對,詔斷賓客,其崇遇如此。 **循自以枕疾廢頓,臣節不修,上隆降尊之義,下替交敍之敬,懼非垂典之教也,累表固** 働。 帝臨軒,遣使持節,加印綬。 太子親臨者三焉,往還皆拜,儒者以爲榮。 贈司空、諡曰穆。 將葬,帝又出臨其柩,哭之盡哀,遣兼侍御史持節監護。皇 疾漸篤,表乞骸骨,上還印綬,改授左光祿大夫、開府 循雖口不能言, 指麾左右, 推去章服。 太興二年卒,時年六十。 循 車駕親幸, 帝素服舉 有 羸疾,

循少玩篇籍,善屬文,博覽衆書,尤精禮傳。雅有知人之鑒,拔同郡楊方於卑陋,卒成

昔許子將拔樊仲昭於賈豎,郭林宗成魏德公於**畎畝。足下志隆此業,二賢之功不爲難及** 也。」循邃稱方於京師。司徒王導辟爲掾,轉東安太守,遷司徒參軍事。 良,但沾染未足耳,移植豐壤,必成嘉穀。足下才爲世英,位爲朝右,道隆化立,然後爲貴。 物凋弊,每聞一介之徒有向道之志,冀之願之。如方者乃荒萊之特苗,鹵田之善秀,姿質已 推,豈但牧豎中逸羣邪!聞處舊黨之中,好有謙沖之行,此亦立身之一隅。然世衰道喪,人 子開拔有志,意只言異於凡猥耳,不圖偉才如此。其文甚有奇分,若出其胸臆,乃是一國所 愛方,爲之延譽。 恢嘗遣方爲文,薦郡功曹主簿。 虞預稱美之,送以示循。 循報書曰:「此 內史諸葛恢見而奇之,待以門人之禮,由是始得周旋貴人間。時虞喜兄弟以儒學立名,雅 楊方字公回。少好學,有異才。初爲郡鈴下威儀,公事之暇,輒讀五經,鄕邑未之知。

從之,上補高梁太守。在郡積年,著五經鉤沈,更撰吳越春秋,幷雜文筆,皆行於世。以年 老,棄郡歸。 導將進之臺閣,固辭還鄉里,終于家。 方在都邑,搢紳之士咸厚遇之,自以地寒,不願久留京華,求補遠郡,欲閑居著述。導

列

八三二

薛兼

無清素有器字,少與同郡紀瞻、廣陵閔鴻、吳郡顧榮、會稽賀循齊名,號爲「五儁」。 薛兼字令長,丹楊人也。祖綜,仕吳爲尙書僕射。父瑩,有名吳朝。吳平,爲散騎常

<u>綜至</u>廉,三世傅東宮,談者美之。 |帝爲安東將軍,以爲軍諮祭酒,稍遷丞相長史。 能名。歷太子洗馬、散騎常侍、懷令。司空、東海王越引爲參軍、轉祭酒,賜爵安陽亭侯。元 已。進爵安陽鄉侯,拜丹楊太守。 初入洛,司空張華見而奇之,曰:「皆南金也。」察河南孝廉,辟公府,除比陽相,莅任有 中興建,轉尹,加秩中二千石,遷尙書,領太子少傅。 甚勤王事,以上佐祿優,每自約損,取周而

秩尊望重,在貴思降。丞相武昌公、司空卽丘子體道高邈,勳德兼備,先帝執友,朕之師傅。 宫故事。」是歲,卒。 韶曰:「太常、安陽鄉侯兼履德沖素,盡忠恪己。 方賴德訓,弘濟政道, 太常安陽鄉侯訓保朕躬,忠肅篤誠。夫崇親尊賢,先帝所重,朕見四君及書疏儀體,一如東 如臨于谷。孔子有云:『故雖天子,必有尊也。』朕將祗奉先師之禮,以諮有德。太宰西陽王 韶曰:「朕以不德,夙遭閔凶。 猥以眇身,託于王公之上。 哀熒在疚,靡所諮仰,憂懷惴惴, 永昌初,王敦表兼爲太常。明帝卽位,加散騎常侍。帝以東宮時師傅,猶宜盡敬,乃下

籠。」及葬,屬三敦作逆,朝廷多故,不得議諡,直遣使者祭以太牢。子順,先康卒,無後。 不幸殂殞,痛于厥心!今遣持節侍御史贈左光祿大夫、開府儀同三司。魂而有靈,嘉茲榮

世冑高門,委質霸朝,豫聞邦政,典憲資其刊輯,帷幄佇其謀猷,望重搢紳,任惟元凱,官成 名立,光國榮家。非惟感會所鍾,抑亦材能斯至。而循位登保傅,朝望特隆,遂使鑾蹕降 臨,承明下拜。雖西漢之恩崇張禹,東都之禮重桓榮,弗是過也。 史臣曰:元帝樹基潍海,百度權輿,夢想羣材,共康庶績。顧、紀、賀、薜等並南金東箭,

贊曰: 彦先通識,思遠方直。 薜旣清貞,賀惟學植。

逢時遇主,摶風矯翼。

校勘記

(1) 王曠 陳敏傳作「王廣」。

榮常憂無竇氏孫劉之策 通鑑八六作「榮常憂無孫劉之主」,較合上下文意。

[1] 欲無復十人如何 册府一四八作「殆無復十人如何」。

18】當今縱不能爾 「爾」,各本作「耳」,今從殿本。

Ž

列

傅 第

Ξ

十八八

晉書卷六十九

列傳第三十九

劉旭孫波

遷冠 軍將軍、彭城內史。避亂渡江,元帝以爲從事中郎。 劉隗字大連,彭城人,楚元王交之後也。父砥,東光令。隗少有文翰,起家秘書郎,稍

喪,旣除而宴,春秋猶譏,況龕匹夫,暮宴朝祥,慢服之愆,宜肅喪紀之禮。 奏伎,丞相長史周顗等三十餘人同會, 爲其防。」東閤祭酒顏含在叔父喪嫁女,隗又奏之。廬江太守梁龕明日當除婦服,今日請客 下令曰:「詩稱『殺禮多婚,以會男女之無夫家』,正今日之謂也,可一解禁止。 自今以後,宜 而爲府將篡取之,隗奏免護軍將軍戴若思官。世子文學王籍之居叔母喪而婚,隗奏之,帝 隗雅習文史,善求人主意,帝深器遇之。 院奏曰:「夫嫡妻長子皆杖居廬,故周景王有三年之 遷丞相司直,委以刑憲。時建康尉收護軍士, 請免龕官,削侯

列

傳第

官,下獄理罪。」奏可,而挺病死。隗又奏:「符旨:挺已喪亡,不復追貶。 傷人倫之序,當投之四裔以禦魑魅。 刺史劉陶門人,陶亡後,挺娶陶愛妾以爲小妻。 也。 時,亦將作法垂於來世,當朝亡夕沒便無善惡也。 義。 市,遇赦免。 惡人,班下遠近。」從之。 爲長史。 多取非其才。 昔鄭人斲子家之棺,漢明追討史遷,經傳褒貶,皆追書先世數百年間,非徒區區 顕等知龕有喪,吉會非禮,宜各奪俸一月,以肅其違。」從之。 丞相行參軍宋挺,本揚州 抗緯文經武,剖符東藩,當庸勳忠良,昵近仁賢,而褒求贓汚, 旣而奮武將軍阮抗請爲長史。隗劾奏曰:「挺蔑其死主而專其室,悖在三之義, 隗劾奏文致甚苦,事雖被寢,王氏深忌疾之。而隗之彈奏不畏强禦,皆此類 南中郎將王含以族强顯貴、驕傲自恋,一請參佐及守長二十許人, 請除挺名,禁錮終身。 建與中,挺又割盜官布六百餘匹,正刑棄 請曹如前追除挺名爲民,錄妾還本,顯證 而奮武將軍、太山太守阮抗請 舉頑用嚚。 愚蠢意闇, 未達斯 請免抗 欲釐當

曹參去齊,以市獄 |伯刑血著柱,遂逆上終極柱末二丈三尺,旋復下流四尺五寸。 百姓諠譁,士女縱觀,咸曰其 棘 以 求民情。 建 |興中,丞相府斬督運令史淳于伯而血逆流,隗又奏曰:「古之爲獄必察五聽,三槐九 雖明 為寄。 庶政,不敢折獄。 自頃蒸荒,殺戮無度,罪同 死者不得復生,刑者不可復續,是以明王哀矜用刑 斷異,刑罰 失宜。 **謹按行督運令史淳于**

長。 生爲 都,訴 登列 曹,國 是戍 排抑豪强 寃。 隗劾嵩兄 以 右將軍 而 乃縱 補 深",刑 (曹)當 其 伯息忠訴辭稱枉,云伯督運訖去二月,事畢代還,無有稽乏。 旣 軍,非爲征軍,以乏軍興論,於理爲枉。 太 晉 [之典刑,而使忠等稱冤明時。謹按從事中郎周莚、法曹參軍劉胤、屬李匡幸荷殊寵,並 靈 而 興 無大臣 肆 國 闕。 王導等上疏引咎,請解 不 恨 | 顗曰:「 顗幸荷殊寵,列位上僚, 既建,拜御史中丞。 小 初,長兼侍 於黃泉,嗟嘆甚於把梁,血妖過於崩城,故有隕霜之人,夜哭之鬼。 思敦奉政道,詳法慎殺,使兆庶無枉,人不稱訴。而令伯枉同周青,寃魂哭於幽 以軍興論,至於伯也,何獨明之? 殺失中,妖眚並見,以古況今,其揆一也。皆由遊等不勝其任,請皆発官。」於是 諸 人,羣爲兇害,公于廣都之中 而引過求退,豈所望也!」由是導等一無所問 .檢御之節,不可對揚 刻碎之政,皆云隗、協所建。 中, 賜爵都 職。 周嵩 鄉侯, 休命。 嫁 帝曰:「政刑失中、皆吾闍塞所由。尋示愧懼、思聞忠告, 女,門生斷道解廬,斫傷二人,建康左尉赴變,又被斫。 尋代薛兼 白日刃尉,遠近訩嚇,百姓諠譁,虧損 宜加 當崇明憲典,協和上下,刑于左右,以御于家邦。 隗雖在外,萬機祕密皆豫聞之。 四年之中,供給運漕,凡諸徵發租調百役,皆有 捶楚之下,無求不得,囚人畏痛,飾辭應之。 **貶黜**,以肅 爲丹楊 尹 ,與尚書令刁協並 其違。」顗坐発官。 受賕使役,罪不及死。 拜鎭北 爲元帝所寵,欲 伯有畫見,彭 風望,漸不可 將軍、都

理

列

督青徐幽平四州軍事、假節,加散騎常侍,率萬人鎭泗口

中郎、太子太傅。卒年六十一。 及入見,與刁協奏請誅王氏,不從,有懼色,率衆屯金城。及敦克石頭,隗攻之不拔,入宮告 矣。」隗答曰:「魚相忘於江湖,人相忘於道術。竭股肱之力,效之以忠貞,吾之志也。」憞得 書甚怒。 足下周生之徒勠力王室,共靜海內。若其泰也,則帝祚於是乎隆,若其否也,則天下永無望 及戴若思 初 雪涕與之別。 陳以王敦威權太盛,終不可制,勸帝出腹心以鎭方隅,故以

譙王承爲湘州,續用隗 及敦作亂,以討隗爲名,詔徵隗還京師,百官迎之於道,隗岸幘大言,意氣自若。 爲都督。 敦甚惡之,與隗書曰:「頃承聖上顧眄足下,今大賊未滅,中原鼎沸,欲與 隗至淮陰,爲劉遐所襲,攜妻子及親信二百餘人奔于石勒,勒以爲從事 子一般,初舉秀才,除駙馬都尉、奉朝請。隨隗奔勸,卒。孫

圍雍州刺史朱序於襄陽,与波率衆八千救之,以敵强不敢進,序竟陷沒。 南內史,領五千人鎭石頭。 太守,累遷桓沖中軍諮議參軍。 波字道則。 初爲石季龍冠軍將軍王洽參軍,及季龍死,治與波俱降。 壽陽平,除尚書左丞,不拜, 大司馬桓溫 西征 袁眞, 轉冠軍將軍、南郡 []朝廷空虚, 以波爲建威將軍、淮 相。 穆帝以波爲襄城 波以畏懦発官。 時苻堅弟融

波嗣

後復以波爲冠軍將軍,累遷散騎常侍。

苻堅敗,朝廷欲鎭靖北方,出波督淮北諸軍、冀州刺史,以疾未行。 上疏曰:

先徵,竊惟今事,是以敢肆狂瞽,直言無諱。 君臣 年已來,天文違錯,妖怪屢生。會稽先帝本封,而地動經年。昔周之文武有魚鳥之瑞, 横海之鯨,僭位滔天之寇,望雲旗而宵潰,覩太陽而霧散,巍巍蕩蕩,人無名焉。 失之於朝,黎庶暴骸於外也。賴元皇帝神武應期,祚隆淮海,振乾綱於已墜,紐絕維而 懷,委政內任,遂使神器幽淪,三光翳曜,園陵懷九泉之感,宮廟集胡馬之跡,所謂肉食 側席,卑己崇物。然後知積累之功重,勤王之業艱,先君之德弘,貽厥之賜厚。惠皇不 更張。陛下承宣帝開始之宏基,受元帝克終之成烈,保大定功,戢兵靜亂。故使負鱗 用能惠被蒼生、勳流後葉。宣帝開拓洪圖、始基成命、爰及文武、曆數在躬、而猶虛心 | 猶懷震悚,況今災變衆集,曾莫之疑。| 公旦有勿休之誡,賈誼有積薪之喩。臣鑒 臣聞天地以弘濟爲仁,君道以惠下爲德,是以禹陽有身勤之績,唐虞有在予之誥, 而頃

聞,景毫之命未布。 今禮樂征伐自 往者先帝以 玄風 天子出,相王賢儁,協和百揆,六合承風,天下響振,而鈞臺之詠弗 將羣臣之不稱,陛下用之不盡乎。 **、御世,責成羣后,坐運天綱,隨化委順,故忘日計之功,收歲成之**

因疲倦 無虞。 伏願遠觀漢魏衰滅之由,近覽西朝傾覆之際,超然易慮, 爲於未有, 則靈根永固,社稷 相讚白者以爲忠節。 交興,鑽求苟進,人希分外。 公貞修者,雖微雖賤,必親而近之。今則不然。此風旣替,利競滋甚,朋黨比周,毀譽 凡 以誤 臣豈誣一朝之人皆無忠節,但任非其才,求之不至耳。 聖王之化,莫不敦崇忠信,存正棄邪。傷化毁俗者,雖親雖貴,必疏而遠之,淸 視 聽。 且苻堅滅亡,於今五年,舊京殘毀,山陵無衞,百姓塗炭,未蒙拯接。 舉世見之,誰敢正言。陛下不明必行之法以絕穿鑿之源者,恐脫 。見賢而居其上,受祿每過其量,希旨承意者以爲奉公,共

劣。 咸安已來,十分去三。百姓懷浮游之歎,下泉興周京之思。 姓立君,使之司牧,今者以百姓恤君,使之蠶食,至乃貪汙者謂之淸勤,愼法者謂之怯 人悅於下。 下者,其惟良二千石乎!」是以臨下有方者就加璽贈,法苛政亂者恤刑不赦,事簡於上, 何反古道一至於此! 今政煩役殷,所在凋弊,倉廩空虛,國用傾竭,下民侵削,流亡相屬。略計戶口,但 今則不然。 告時乞職者以家弊爲辭,振窮恤滯者以公爵爲施。 昔漢宣有云:「與我共治天 古者爲百

者覩人事以歎息,觀妖眚而大懼。昔宋景退熒惑之災,殷宗消鼎雉之異。伏願陛下仰 陛 下雖躬自節儉,哀矜於上,而羣僚肆欲,縱心於下,六司垂翼,三事拱默,故有識

長史,尋爲閻鼎所殺。司空蔡謨每數曰:「若使劉王喬得南渡,司徒公之美選也。」又王導初 吹之,爲出塞、入塞之聲,以動其游客之思。於是羣胡皆垂泣而去之。永嘉中,位至 所敬,張茂先我所不解,周弘武巧於用短,杜方叔拙於用長。」終於司隸校尉。 疏奏而卒。追贈前將軍。子淡嗣。 元熙初,爲廬江太守。 拜司徒,謂人曰:「劉王喬若過江,我不獨拜公也。」其爲名流之所推服如 疇兄子劭,有才幹,辟琅邪王丞相掾。 隗伯父訥,字令言,有人倫鑒識。初入洛,見諸名士而歎曰:「王夷甫太鮮明,樂彦輔我 恐命在奄忽,貧及視息,望達愚情。 審識羣才,助鼎和味。 聖恩,大詢羣后,延納衆賢,訪以得失,令百僚率職,人言損益。 觀大禹過門之志,俯察商辛沈湎之失,遠思國風恭公之刺,深惟定姜小臣之喻。 子疇,字王喬,少有美譽,善談名理。 復蒙罔極之眷,恩隆累世,實非糜身傾宗所能上報。 臣亡祖先臣隗,昔荷殊寵,匪躬之操,猶存舊史,有志無時,懷恨黃泉。 克念作聖,以答天休。 氣力惙然,不能 會避亂塢壁,賈胡百數欲害之,疇無懼色,援笳而 咸康世,歷御史中丞、侍中、尚書、豫章太守,秩 則四海宅心,天下幸甚。 自宣。 前作此表,未及得通。 察其所由,觀其所以, 此 暴嬰篤疾, 及臣凡劣,

暫迴

一司徒左

傅

Ξ

十九

劉 隗

一八四

劭族子黃老,太元中,為尚書郎,有義學,注愼子、老子,並傳於世。

刁協子彝 彝子達

永嘉 章未立,朝臣無習舊儀者。 史中丞,例不行。 籍,博聞强記,釋褐濮陽王文學,累轉太常博士、本郡大中正。成都王穎請爲平北司馬,後 歷趙王倫相國參軍,長沙王乂驃騎司馬。 及東嬴公騰鎭臨漳,以協爲長史,轉潁川太守。 太興初,遷尙書令,在職數年,加金紫光祿大夫,令如故。 初,爲河南尹,未拜,避難渡江。元帝以爲鎭東軍諮祭酒,轉長史。愍帝卽位,徵爲御 **刁協宇玄亮,渤海饒安人也。祖恭,魏齊郡太守。父攸,武帝時御史中丞。** 元帝爲丞相,以協爲左長史。 協久在中朝、諳練舊事,凡所制度,皆稟於協焉、深爲當時所稱 中興建,拜尚書左僕射。 于時朝廷草創、憲 協少好經

側 目。 協性剛悍,與物多忤,每崇上抑下,故爲王氏所疾。 然悉力盡心,志在匡救,帝甚信任之。 以奴爲兵,取將吏客使轉運,皆協所建也,衆 又使酒放肆,侵毁公卿,見者莫不

除,帝執協、隗手,流涕嗚咽,勸令避禍。 協曰:「臣當守死,不敢有貳。」帝曰:「今事逼矣,安 及王敦構逆, 上疏罪協,帝使協出督六軍。旣而王師敗績,協與劉隗俱侍帝於太極東 庶怨望之。

列傳第三十九 刁協

至江乘,爲人所殺,送首於敦,敦聽刁氏收葬之。 可不行!乃令給協、隗人馬,使自爲計。協年老,不堪騎乘,素無恩紀,募從者,皆委之行。 帝痛協不免,密捕送協首者而 誅之。

左光 爵也。 之時,慶賞威刑專自己出,是以一一一意深崇本,以協爲比,事由國計,蓋不爲私。 行父從君於昏,楚復其位者,君之黨故也。況協之比君,在於義順。 失算,以此 在位者多以明帝之世褒貶已定,非所得更議,且協不能抗節隕身,乃出奔遇害,不可復其官 禄大夫蔡謨與冰書曰: 于時事窮計屈,奉命違寇,非爲逃刑。謂宜顯贈,以明忠義。」時庾冰輔政,疑不能決。 敦平後,周顗、戴若思等皆被顯贈,惟協以出奔不在其例。 爲責者,蓋在於譏議之間耳。即凶殘之誅以爲國刑,將何以沮勸乎! 尹殷融議曰:「王敦惡逆,罪不容誅,則協之善亦不容賞。若以忠非良圖,謀事 咸康中,協子彝上疏 且中興四佐,位爲朝 昔孔寧、儀 當敦專逼 訟之。

難 ラや中興 贖罪者 讎 之臣。 也。 夫爵人者,宜顯其功,罰人者,宜彰其罪,此古今之所愼也。凡小之人猶尚如此, 無黜。 內 春秋之義,以功補 沮 上佐,有死難之名,天下不聞其罪,而見其貶,致令刁氏稱寃,此乃爲王敦復 忠臣之節,論者惑之。 雖先有邪佞之罪,而臨難之日黨於其君者,不絕之也。孔寧、儀行父親 過。 過輕功重者,得以加封,功輕過重者,不免誅絕;功足 若實有大罪,宜顯其事,令天下知之,明聖朝不貶死

與靈 也。 若一一令有罪,重于孔儀,絕之可也。若無此罪,宜見追 公 淫 亂於朝,君殺國滅,由此二臣,而楚尙納之。傳稱有禮不絕其位者,君之黨 論

葬也。 耳。 贈,豈以改前爲嫌乎!凡處事者,當上合古義,下準今例,然後談者不惑,受罪者無怨 贈,況一一令位亞三司。若先自壽終,不失員外散騎之例也。就不蒙贈,不失以本官殯 行也。又一一令但是明帝所不贈耳,非誅之也。王平子、第五猗皆元帝所誅,而今日所 侯,武昭二帝不封而宣帝封之。近去元年,車駕釋奠,拜孔子之坐,此亦元明二帝所不 非,何必前世所廢便不宜改乎。漢蕭何之後坐法失侯,文帝不封而景帝封之,後復失 萬機之事,或異或同,同不相善,異不相譏。 宜 |顯評其事,以解天下疑惑之論。 案周僕射、戴征西本非王敦唱檄所讎也,事定後乃見害耳,周莚、郭璞等並亦非爲 或謂明帝之世已見寢廢,今不宜復改,吾又以爲不然。 此爲一人之身,壽終則蒙贈,死難則見絕,豈所以明事君之道,厲爲臣之節乎! 故善抑元凱而舜舉之,善不爲失,舜不爲 夫大道宰世,殊塗一致。

怨 ;若以貴也,刁氏今賤;若以富也,刁氏今貧。 人士何故反助寒門而此言之? 足下宜 又聞談者亦多謂宜贈。 凡事不允當,而得衆助者,若以善柔得衆,而己令粗剛多

察此意。

冰然之。事奏,成帝詔曰:「協情在忠主,而失爲臣之道,故令王敦得託名公義,而實肆私 介必顯,雖於貶裁未盡,然或足有勸矣。」於是追贈本官,祭以太牢。 之動有可書,敦之逆命不可長,故議其事耳。 忌,遂令社稷受屈,元皇衡恥,致禍之原,豈不有由一若極明國典,則曩刑非重。 。今可復協本位,加之册祭,以明有忠於君者纖 今正當以協

之,由是知名。 彝字大倫。少遭家難。 歷尚書吏部郎、吳國內史,累遷北中郎將、徐虎二州刺史、假節,鎭廣陵,卒 王敦誅後,彝斬讎人黨,以首祭父墓,詣廷尉請罪,朝廷特宥

於官。

平越中郎將、假節,暢爲始興相,弘爲冀州刺史。 兄弟子姪並不拘名行,以貨殖爲務,有田 萬頃,奴婢數千人,餘資稱是。 子達,字伯道,達弟暢,字仲遠,次子弘,字叔仁,並歷顯職。隆安中,達爲廣州 刺史,領

起義,斬桓脩,時暢、弘謀起兵襲裕,裕遣劉毅討之,暢伏誅,弘亡,不知所在。逵在歷陽執劉 桓玄篡位,以逵爲西中郎將、豫州刺史,鎭歷陽,暢右衞將軍,弘撫軍桓脩司馬。 劉裕

八四五

一八四六

走,爲下人所執,斬於石頭。子姪無少長皆死,惟小弟騁被宥,爲給事中,尋謀反伏誅,刁氏 俗參軍諸葛長民,檻車送于桓玄,至當利而玄敗,送人共破檻出長民,遂趣歷陽。 **遂滅。刁氏素殷富,奴客縱橫,固吝山澤,爲京口之蠹。** 裕散其資蓄,令百姓稱力而取之, 逵棄城而

戴若思弟邀

彌日不盡。時天下饑弊,編戶賴之以濟焉。

指麾同旅,皆得其宜。機察見之,知非常人,在舫屋上遙謂之曰:「卿才器如此,乃復作劫 性閑爽,少好遊俠,不拘操行。遇陸機赴洛,船裝甚盛,遂與其徒掠之。 若思登岸,據胡牀, ·」若思感悟,因流涕,投劍就之。機與言,深加賞異,遂與定交焉。 戴若思,廣陵人也,名犯高祖廟諱。祖烈,吳左將軍。父昌,會稽太守。若思有風儀,

騄;曜質廊廟,必能垂光璵璠矣。惟明公垂神採察,不使忠允之言以人而廢。」 倫乃辟之,除 之慕,砥節立行,有井渫之潔;誠東南之遺寶,宰朝之奇璞也。若得託迹康衢,則能結軌驥 肆,然後降神之曲成。是以高世之主必假遠邇之器,蘊匵之才思託太音之和。伏見處士廣 **陵戴若思,年三十,清沖履道,德量允塞,思理足以研幽,才鑒足以辯物,安窮樂志,無風塵** |若思後舉孝廉, 入洛, 機薦之於趙王倫曰: 「蓋聞繁弱登御, 然後高墉之功顯; 孤竹在

沁 而 稱 水令,不就,逐往武陵省父。 若思有公輔之才。累轉東海王越 時同郡人潘京素有理鑒,名知人,其父遣若思就京與語,旣 軍諮祭酒,出補豫章 太守,加振威將軍,領義軍都督。

以討賊有功,賜爵秣陵侯,遷治書侍御史、驃騎司馬,拜散騎侍

郞

賦詩。 以散騎常侍王遐爲軍司,鎭壽陽,至與劉隗同出。帝親幸其營,勞勉將士,臨發祖餞,置酒 六州諸軍事、假節,加散騎常侍。 中興建,爲中護軍,轉護軍將軍、 元帝召爲鎭東右司馬。 將征杜弢,加若思前將軍,未發而弢滅。 尚書僕射, 發投刺王官千人為軍吏,調揚州百姓家奴萬人為 皆辭不拜。 出爲 征 西將 軍、都督克豫幽冀雍幷 帝爲晉王,以爲尙書。 兵配之,

愧色。 有餘, 於大桁之北。尋而石頭失守,若思與諸軍攻石頭,王師敗績。 其爲人,猗亦深憾焉。 之忠。」敦笑曰:「卿可謂能言。」敦參軍呂猗昔爲臺郎,有刀筆才,性尤姦諂,若思爲尙書,惡 詔,與公卿百官於石頭見敦。 敦問若思曰:「前日之戰有餘力乎。」若思不謝而答曰:「豈敢 若思 但力不足耳。」又曰:「吾此舉動,天下以爲如何。」若思曰:「見形者謂之逆,體誠者謂 公若 至合肥,而王敦舉兵,韶追若思還鎮京都,進驃騎將軍,與右衞將軍郭逸夾道築壘 不除,恐有再舉之患,爲將來之憂耳。」敦以爲然,又素忌之,俄而遣鄧嶽、繆坦 至是,乃說敦曰:「周顗、戴若思皆有高名,足以惑衆,近者之言曾無 若思率麾下百餘人赴宮受

列傳

三 十

收若思而害之。 若思素有重望,四海之士莫不痛惜焉。 賊平、 册贈右 光祿大夫、 儀同三司,

邈字望之。少好學,尤精史漢,四才不逮若思,儒博過之。弱冠舉秀才,尋遷太子洗

草創,學校未立,邈上疏曰: 馬,出補西陽內史。永嘉中,元帝版行邵陵內史、丞相軍諮祭酒,出爲征南軍司。于時凡百

故也。 身達者七十餘人。自茲以來,千載絕塵。豈天下小於魯衞,賢哲乏於曩時。勵與不勵 子大養正之功也。昔仲尼列國之大夫耳,興禮修學於洙泗之間,四方髦俊斐然向風, 辟雍之制,鄉有庠序黌校之儀,皆所以抽導幽滯,啓廣才思。蓋以六四有困蒙之吝,君 臣聞天道之所大,莫大於陰陽,帝王之至務,莫重於禮學。是以古之建國,有明堂

州蕭條,鞠爲茂草,四海之內,人跡不交。霸主有旰食之憂,黎元懷荼毒之苦,戎首交 紀如此之久邪!今末進後生目不覩揖讓升降之儀,耳不聞鐘鼓管絃之音,文章散滅, 拜于中原,何邃籩豆之事哉!然三年不爲禮,禮必壞,三年不爲樂,樂必崩,況曠載累 自頃國遭無妄之禍,社稷有綴旒之危,寇羯飲馬於長江,兇狡鴟張於萬里,遂使神

圖讖無遺,此蓋聖達之所深悼,有識之所嗟歎也。 夫平世尚文,遭亂尚武,**文**武遞用,

長久之道,譬之天地昏明之迭,自古以來未有不由之者也。

哉?又貴遊之子未必有斬將搴旗之才,亦未有從軍征戍之役,不及盛年講肄道義,使 明珠加磨瑩之功,荆璞發採琢之榮,不亦良可惜乎! 成。古之俊义必三年而通一經,比天下平泰然後修之,則功成事定,誰與制禮作樂者 今或以天下未一,非興禮學之時,此言似之而不其然。 夫儒道深奥,不可**倉卒而**

草,實在感之而已。臣以闇淺,不能遠識格言,奉誦明令,慷慨下風,謂宜以三時之隙 是故雙劍之節崇,而飛白之俗成;挾琴之容飾,而赴曲之和作,君子之德風,小人之德 **篤道崇儒,創立大業。明主唱之於上,宰輔督之於下。夫上之所好,下必有過之者焉,** 今天地告始,萬物權輿,聖朝以神武之德,值革命之運,蕩近世之流弊,繼千載之絕軌, 漸就修建。 臣愚以世喪道久,人情玩於所習,純風日去,華競日彰,猶火之消膏而奠之覺也。

疏奏,納焉,於是始修禮學。

拜尚書僕射。 代劉 |隗爲丹楊尹。|王敦作逆,加左將軍。及||敦得志,而||若思遇害,邈坐発官。 卒官,贈衞將軍,諡曰穆。 子艦嗣,歷義興太守、大司農。 敦誅後,

列傅

第

三十

ル

戴若

一八五〇

周 鎖 子 閥

據同郡賁嵩有淸操,見躓,嘆曰:「汝願固多奇士!自頃雅道陵遲,今復見<u>周伯仁,將振起舊</u> 以顗爲長史。 命皆不就。 顯其才辯。 風,清我邦族矣。」廣陵戴若思東南之美,舉秀才,入洛,素聞躓名,往候之,終坐而出,不敢 周顗字伯仁,安東將軍浚之子也。少有重名,神彩秀徹,雖時輩親狎,莫能媒也。 聞從弟

隱亦有美譽,欲陵折顗,

顗陶然弗與之校,於是人士益宗附之。

州郡辟 弱冠,襲父爵武城侯,拜祕書郎,累遷尙書吏部郎。 東海王越子毗爲鎭軍將軍, 司徒

官,止足良難,未能守分,遂忝顯任,名位過量。不悟天鑒忘臣頑弊,乃欲使臣內管銓衡,外 |敦不從。帝召爲揚威將軍、兗州刺史。| 顗還|建康,帝留]顗不遣,復以爲軍諮祭酒,尋轉右長 奔王敦於豫章。 州,而建平流人傳密等叛迎蜀賊杜弢,顗狼狽失據。 中興建,補東部尙書。頃之,以醉酒爲有司所糾,白衣領職。復坐門生斫傷人,発官。 太興初,更拜太子少傅,尚書如故。 顗上疏讓曰:「臣退自循省,學不通一經,智不效一 元帝初鎭江左,請爲軍諮祭酒,出爲寧遠將軍、荆州刺史、領護南蠻校尉、假節。 敦留之。軍司戴邈曰:「顗雖退敗,未有莅衆之咎,德望素重,宜還復之。」 陶侃遣將吳寄以兵救之,故顗得免,因 始到

忝 之恥,俯仰愧懼,不知所圖。」詔曰:「紹幼沖便居儲副之貴,當賴軌匠以袪蒙蔽。 斯不言之益,何學之習邪,所謂與田蘇遊忘其鄙心者。便當副往意,不宜沖讓。」轉尙書左 傳訓,質輕蟬翼,事重千鈞,此之不可,不待識而明矣。若臣受負乘之責,必貽聖朝惟塵 望之儼然,

僕射,領吏部

如故

復爲 之罪 所 復比聖世 于西堂,酒酣,從容曰:「今日名臣共集,何如堯舜時邪。」」與因醉厲聲曰:「今雖同人主,何得 繩。 有 固 庾亮嘗謂顗曰:「諸人咸以君方樂廣。」顗曰:「何乃刻畫無鹽,唐突西施也。」帝讌羣公 司 知不 吾亮其極歡 所奏。 . '] 帝大怒而起,手詔付廷尉,將加戮,累日方赦之。 及出,諸公就省, 顗曰:「近日 至于死。」尋代戴若思爲護軍將軍。 詔曰:「躓參副朝右,職掌銓衡,當敬愼德音,式是百辟。 之情,然亦是濡首之誠也。 **顗必能克己復禮者**,今不 尚書紀瞻置酒請閩及王導等,閩荒醉失儀, 加黜責。 屢以酒 過,爲有司

亮 偶 有 百三 舊 初,顗 對從 周侯 以雅望 末 北 來,顗 年 一,所謂 一獲海 遇之欣然,乃出酒 鳳德之衰也。」顗在 內盛名,後頗以酒失,爲僕 二石共飲,各大醉。 中 朝時,能飲酒 射, 略無醒 一石,及過江,雖 及顗 日,時 醒,使視 人號 客,已腐 爲「三日僕射」。 日 醉 每 脅 稱 而 無對。 死 庾

蠟燭投之。 顗 性 寬 顗 裕 神 而 色無件, 友愛過人,弟嵩嘗因酒瞋目謂顗 徐曰:「阿奴火攻,固出下策耳。」王導甚重之,嘗枕顗膝而指其腹 [日] 君才 亦 及弟,何乃横 得重· 名 以所燃

列

然 此中何所有也。」答曰:「此中空洞無物,然足容卿輩數百人。」導亦不以爲忤。 嘯詠,導云:「卿欲希嵇、阮邪。」顗曰:「何敢近捨明公,遠希嵇、阮。」

仁,卿負 其辭正,不知所答。帝召與於廣室,謂之曰:「近日大事,二宮無恙,諸人平安,大將軍故副 非亂 縱毒,以傾王室。」語未終,收人以戟傷其口,血流至踵,顏色不變,容止自若,觀者皆爲流 位大臣,朝廷喪敗,寧可復草間求活,外投胡越邪!俄而與戴若思俱被收,路經太廟,顗大 所望邪。]]饋曰:「二宮自如明詔,於臣等故未可知。」護軍長史|郝嘏等勸閱避敦,]顗曰:「吾備 言曰:「天地先帝之靈:賊臣王敦傾覆社稷,枉殺忠臣,陵虐天下,神祇有靈,當速殺敦,無令 人主 |自非堯舜,何能無失,人臣豈可得舉兵以脅主! 共相推戴,未能數年,一旦如此,豈云 遂於石頭南門外石上害之,時年五十四。 及王敦構逆,溫嶠謂顗曰:「大將軍此舉似有所在,當無濫邪。」顗曰:「君少年未 ,!處仲剛愎强忍,狼抗無上,其意寧有限邪!旣而王師敗績,顗奉詔詣敦,敦曰:「伯 (我一」)題曰:「公戎車犯順、下官親率六軍、不能其事、使王旅奔敗、以此負公。」|敦憚 更事

事,何圖不幸自貽王法。」敦素憚顗,每見顗輒面熱,雖復冬月,扇面手不得休。敦使繆坦籍 公,及伯仁將登而墜,有似下官此馬。」敦曰:「伯仁總角於東宮相遇,一面披襟,便許之三 顗之死也,敦坐有一參軍摴蒱,馬於博頭被殺,因謂敦曰:「周家奕世令望,而位不至

) 題家,收得素簏數枚,盛故絮而已,酒五甕,米數石,在位者服其清約。 敦卒後,追贈左光祿

大夫、儀同三司、諡曰康、祀以少牢。

涕,悲不自勝, 旣出,又上表明導,言甚切至。 南北之望,當登三司,無所疑也。」導不答。又曰:「若不三司,便應令僕邪。」又不答。 醉而出。 子:閔、恬、頤。 「若不爾, 「伯仁,以百口累卿!」顗直入不顧。 初,敦之舉兵也,劉隗勸帝盡除諸王,司空導率羣從詣闕請罪,值顗將入,導呼顗謂曰: 導猶在門,又呼顗。 正當誅爾。」 告其諸子曰:「吾雖不殺伯仁,伯仁由我而死。 導又無言。 **顗不與言,顧左右曰:「今年殺諸賊奴,取金印如斗大繫肘。」** 導不知救己,而甚銜之。 導後料檢中書故事, 旣見帝,言導忠誠,申救甚至,帝納其言。 見顗表救己,殷勤 敦旣得志, 幽冥之中, 問導 曰:「周顗、戴若思 款至。 負此良友」」
顕三 **閩喜飲酒**,致 導執表流 |敦 日 :

射,加中軍將軍,轉護軍,領秘書監。 **閔字子騫,方直有父風。** 琳仕至東陽太守。 恬、頤並歷卿守。 歷衡陽、建安、臨川太守,侍中,中領軍, 卒,追贈金紫光祿大夫,諡 琳少子文,驃騎諮議參軍 日 烈。 吏部尚 無子,以弟頤長子琳 書,尙 書左僕

器乖容衆,非先王之道也。 流亡,非不幸 體;權臣發怒,借其名以誓師。 物多違,雖有崇上之心,專行刻下之化,同薄相濟,並運天機。 及京室淪胥, 瑕不掩瑜」,未足韜其美 史臣曰 也。 夫太剛則折,至察無徒,以之爲政,則害于而國,用之行己,則凶于乃家。 抗言無撓, 若思閑 也 甘赴鼎而 爽,照理 大連司憲,陰候主情,當約法之秋,獻斵棺之議。 旣 研 而謀人之國,國危而苟免,見昵於主,主辱而 全操,蓋事君而盡節者歟 幽 伯仁 一凝正, 處腴能約。 1 **顗招時論,尤其酒德,禮經** 是使賢宰見疏,致物情於解 咸以高才雅道, 玄亮剛愎,與 圖 參豫疇咨。 生。 誠以 自 取

贊曰: 劉刁亮直,志奉興王。 姦回醜正, 終致奔亡。 周戴英爽,忠謨允塞。 道屬屯蒙,

校勘記

禍

罹兇慝。

- 桓溫西征袁眞 據海西公紀及桓溫傳,桓溫所征伐者乃袁真之子袁瑾。 此時袁眞 已死
- 時苻堅弟融圍雍州刺史朱序於襄陽 據堅載記及朱序傳 圍襄陽乃苻丕,非融。 周校

「梁州」誤「雍州」。

出為征西將軍都督竟豫幽冀雍幷六州諸軍事至鎮壽陽 | 勞校 元紀云「司克豫幷冀雍六州諸

肥」者是。 通鑑九一亦可證。

(四) 尤精史漢 「史漢」,各本作「漢史」,今從宋本。通志一二六亦作「史漢」。

晉書卷七十

列傳第四十

應詹

終,居喪毀頓,杖而後起,遂以孝聞。家富於財,年又稚弱,乃請族人共居,委以資產,情若 至親,世以此異焉。 應詹宇思遠,汝南南頓人,魏侍中璩之孫也。詹幼孤,爲祖母所養。年十餘歲,祖母又 弱冠知名,性質素弘雅,物雖犯而弗之校,以學藝文章稱。司徒何劭見

之曰:「君子哉若人」」

僧之祖舅也,請爲長史,謂之曰:「君器識弘深,後當代老子於荆南矣。」仍委以軍政。 弘著 與政有舊,歎曰:「諸葛仁林何與樂毅之相詭乎」」卒不見之。 騎從事中郎諸葛玫委長沙王乂奔鄴,盛稱乂之非。 初辟公府,爲太子舍人。 趙王倫以爲征東長史。倫誅、坐免。成都王穎辟爲掾。時驃 政浮躁有才辯,臨漳人士無不詣之。 **攻閉甚愧。** 鎭南大將軍劉弘

列傳

績 漢南 一詹之力也。 遷南平太守

降之。 詹 怨。 郡 潁 不 其 澄 後 使詹 凋 陽 軍 其得 無所 饿 鄉 事 天下大亂,詹境獨全。百姓歌之曰:「亂離旣普,殆爲灰朽。僥倖之運,賴茲應后。 王 無覬覦之心。 孤 拜 澄 侯 時政令不一,諸蠻怨望,並謀背叛。 爲檄、詹下筆便成、辭義壯烈、見者慷慨、然竟不能從也。天門、武陵谿蠻並 境獨守。 後軍 人情 取 會獨賊杜疇作亂,來攻詹郡,力戰摧之。 爲 陳 荆州,假詹督南平、天門、武陵三郡軍事。 ,唯收圖 ·將軍 人王沖擁衆荆州 如 此。 拯我塗炭,惠隆 o .書,莫不歎之。 下至亡秦,罷 詹 遷盆州刺 上疏陳 便宜 史,領巴東監軍。 素服詹名, 侯置守,本替末陵,綱紀廢絕。 丘阜。 元帝假詹建武將軍 ,日:「先王 潤同 詹召蠻酋,破銅券與盟, 迎爲刺史。 江海,恩猶父母。」鎮南將軍山簡復假詹督五 一設官,使君 詹之出 尋與陶侃破杜弢於長沙,賊中 及洛陽傾覆,詹攘袂流涕,勸澄赴援。 一、王敦 ..郡也,士庶攀車號泣,若戀 僧以沖等無賴,棄還南平,沖亦 有常尊, 又上詹監 漢興、雖未能 臣 由是懷詹,數郡無虞。 有定卑, 巴東五郡 興復 上無苟且 金 軍事,賜爵 所生 寶溢 舊典,猶 反,詹討 歲寒 之 尔

魏正始之間, 蔚爲文林。

|元康以來,賤經尙道,以玄虛宏放爲夷達,以儒術淸儉爲鄙俗。

德

元

功

以

爲封首,

則

聖

世

之化

比隆唐虞矣。」又曰:「性相

志

-, 下

雜

建侯

守,故能享年

享世,殆參古迹。

今大荒之後,制度

改創,宜因

斯會,釐

正 憲

則

,
先舉盛

近,習相遠,

訓導之風

宜

愼

所

永

雍,崇明教義,先令國子受訓,然後皇儲親臨釋奠,則普天尚德,率土知方矣。」 | 元帝雅 嘉之弊, 未必不由此也。今雖有儒官,敎養未備,非所以長育人材,納之軌物也。 宜修辟

才,深納之。

詹與 當 所守。」不許。 然,王室必危。」帝以詹爲都督前鋒軍事、護軍將軍、假節,都督朱雀橋南。 厲 百戶,賜 然慷慨曰:「陛下宜奮赫斯之威,臣等當得負戈前驅, 庶憑宗廟之靈, 有征無戰。 如其不 禄 (建威 勳。 隊,策無微略,勞不汗馬。 頃之,出補吳國內史,以公事免。 絹 詹以王敦專制自樹,故優游諷詠,無所標明。 將軍趙胤等擊敗之,斬賊率杜發,梟首數千級。 五千匹。 上疏讓曰:「臣聞開國承家,光啓土宇,唯令德元功乃宜封錫。臣雖忝 猥以疏賤,倫亞親密,暫廁被練,列勤司勳。 鎮北將軍劉隗出鎮,以**詹**為軍 及敦作逆,明帝問詹計將安出。 賊平,封觀陽縣侯,食邑一千六 司。 加散騎常侍,累遷 賊從竹格渡江, 乞迴謬恩,聽其

遷 使持節 、都督江州諸軍事、平南將軍、江州刺史。 詹將行,上疏

經荒 弊,綱紀 夫 欲用天下之智力者,莫若使天下信之也。 · 穨陵,清直之風旣澆,糟秕之俗猶在,誠宜濯以滄浪之流,漉以吞舟之網, 商鞅移木、豈禮也哉。有由 而然。 自

則幽顯明別,於變時雍矣。

伎,道無游人,不過一熟,豐穰可必。然後重居職之俸,使祿足以代耕。 皆取文武吏醫卜,不得撓亂百姓。三臺九府,中外諸軍,有可減損,皆令附農。市息末 得而易失,必人愼其職,朝無惰官矣。都督可課佃二十頃,州十頃,郡五頃,縣三頃。 千石免官,三年乃得敍用,長史六年,戶口折半,道里倍之。此法必明,使天下知官難 校游談爲多少,不以實事爲先後。以此責成,臣未見其兆也。今宜峻左降舊制,可二 懼。或有進而失意,退而得分。莅官雖美,當以素論降替;在職實劣,直以舊望登敍。 彈違,斷截苟且,則人不敢爲非矣。漢宣帝時,二千石有居職修明者,則入爲公卿,其 繡衣直指。今之艱弊,過於往昔,宜分遣黃、散若中書郞等循行天下,觀採得失,舉善 之,今亦宜然。漢朝使刺史行部,乘傳奏事,猶恐不足以辨彰幽明,弘宣政道,故復有 官無廢職之吝。昔冀缺有功,胥臣蒙先茅之賞,子玉敗軍,子文受薦賈之責。古旣有 不稱職免官者,皆還爲平人。懲勸必行,故歷世長久。中間以來,遷不足競,発不足 未精,職理所以多闕。今凡有所用,宜隨其能否而與舉主同乎褒貶,則人有愼舉之恭, 弘濟茲務,在乎官人。今南北雜錯,屬託者無保負之累,而輕舉所知,此博采所以

時王敦新平,人情未安,詹撫而懷之,莫不得其歡心,百姓賴之。 頃 、大事之後,遐邇皆想宏略,而寂然未副,宜早振綱領,肅起羣望。 列傳第四十 應詹

悵 卒,[] 時年五十三。 節本朝,報恩幼主,退以申尋平生,纏綿舊好。豈悟時不我與,長卽幽冥,永言莫從,能不慨 其 至謙 間 玄弟誕,有器榦,歷六郡太守、龍驤將軍,追贈冀州刺 至順,卽自天祐之,吉無不利。人之將死,其言也善,足下察吾此誠。」以咸和六年 今神州未夷,四方多難,足下年德並隆,功名俱盛,宜務建洪範,雖休勿休,至公至平, 事故,何所不有。足下建功嶠南,旋鎭舊楚。吾承乏幸會,來忝此州,圖與足下進共竭 疾篤,與陶侃書曰:「每憶密計,自沔入湘,頡頏繾綣,齊好斷金。子南我東,忽然一紀, 册贈鎭南大將軍、儀同三司、諡曰烈、祠以太牢。 子」玄嗣,位至散騎侍 史。

褐不 躬耕 至乃任 既受詹生成之惠,詹卒,遂製朋友之服,哭止宿草,追趙氏祀程嬰、杵臼之義,祭詹終身。 共苦,情若弟兄。 室,恢維宇宙, 岩蒙 掩形 隴 初,京兆 畝 運固窮,耿介守節者尟矣。伏見議郎韋泓,年三十八,字元量,執心淸沖,才識備濟, 一、鈴石, · 菜蔬 一不煩 章泓喪亂之際,親屬遇饑疫並盡,客遊洛陽,素聞詹名,遂依託之。詹與分甘 四門開 不充 人役,靜默居常,不豫政事。 付以列 遂隨從積年,爲營伉儷,置居宅,并薦之於<u>元帝曰:「自遭喪亂,人士易操,</u> **、朝,而抗志彌厲,不遊非類。** [關,英彥鳧藻,收春華於京輦,採 曹, 必能協隆鼎味, 昔年流移,來在詹境,經寇喪資,一 緝熙庶績者也。」帝卽辟之。 顏回稱不改其樂,泓有其分。 秋實於巖藪。 而 泓 自 抱璞荆 後 位 明公輔亮皇 身特立,短 至 Щ 少府卿 剖和

一八六二

甘卓 潛騫

服榮,且以昶死懷懼,良久乃從之。遂詐疾迎女,斷橋,收船南岸,共滅餓,傳首于京都。 與陳敏 廣攻敏弟昶,敏遣卓討廣,頓朱雀橋南。 以功賜爵都亭侯。東海王越引爲參軍,出補離狐令。卓見天下大亂,棄官東歸,前至歷陽, 太子太傅。吳平,卓退居自守。 甘卓字季思,丹楊人,秦丞相茂之後也。會祖寧,爲吳將。 相遇。 敏甚悅,共圖縱橫之計,遂爲其子景娶卓女,共相結託。會周玘唱義,密使錢 郡命主簿、功曹,察孝廉,州舉秀才,爲吳王常侍。討石冰, 祖述,仕吳爲尚書。父昌,

問損 所擒獲。 、士流播,不得比之餘州。 益,當須博通古今,明達政體,必求諸墳索,乃堪其舉。臣所忝州往遭寇亂,學校久替, 中興初,以邊寇未靜,學校陵遲,特聽不試孝廉,而秀才猶依舊策試。 元帝初渡江,授卓前鋒都督、揚威將軍、歷陽內史。 以前後功,進爵南鄉侯,拜豫章太守。 策試之由,當藉學功,謂宜同孝廉例, 尋遷湘州刺史,將軍如故。 其後討周馥,征杜弢,屢經苦戰,多 申與期限。」疏奏,朝議不 卓上疏以爲「答 復進爵于湖侯。

考試,皆憚不行,惟儉一人到臺,遂不復策試。儉恥其州少士,乃表求試,以高第除中郎。

卓於是精加隱括,備禮舉桂陽谷儉爲秀才。

儉辭不獲命,州厚禮遣之。

諸州秀才聞當

儉少有志行,寒苦自立,博涉經史。于時南土凋荒,經籍道息, 儉不能遠求師友,

殺撫,估稅悉除,市無二價。 州境所有魚池, 先恒責稅, 卓不收其利,皆給貧民, 西土稱爲 家研精。雖所得實深,未有名譽,又恥衒耀取達,遂歸,終身不仕,卒于家 卓尋遷安南將軍、梁州刺史、假節、督沔北諸軍,鎭襄陽。 卓外柔內剛,爲政簡惠,善於

卓日:「昔隗朙 也。」卓笑曰:「桓文之事,豈吾所能。 爾,而 待敦至都而討之。卓曰:「昔陳敏之亂,吾亦先從後圖,而論者謂懼逼而謀之。雖吾情本不 今若因天人之心,唱桓|文之舉,杖大順以掃逆節,擁義兵以勤王室,斯千載之運,不可失 之望,此忠臣義士匡救之時也。 下唯除姦凶耳。卿還言之,事濟當以甘侯作公。」雙還報卓,卓不能決。或說卓且偽許敦, 劉大連 止敦。敦聞雙言,大鱉曰:「甘侯前與吾語云何,而更有異!正當慮吾危朝廷邪?吾今 王敦稱兵,遣使告卓。卓乃偽許,而心不同之。及敦升舟,而卓不赴,使參軍孫雙詣武 事實有似,心恒愧之。今若復爾,誰能明我一時湘州刺史譙王承遣主簿鄧騫說卓日, 雖乘權寵,非有害於天下也。大將軍以其私憾稱兵象魏,雖託討亂之名,實失天下 亂魔右, <u>竇</u>融保河西以歸光武, 今日之事, 有似於此。 昔魯連匹夫,猶懷蹈海之志,況受任方伯,位同體國者乎! 至於盡力國難,乃其心也。當共詳思之。」參軍李梁說 將軍有重名於天下,但

列

傳

喻也。 强衆,藉威名,杖節而行,豈王含所能御哉!遡流之衆,勢不自救,將軍之舉武昌,若摧枯拉 也。如是,大將軍可不戰而自潰。今釋必勝之策,安坐以待危亡,不可言知計矣。願將軍 朽,何所顧慮乎!」武昌旣定,據其軍實,鎭撫二州,施惠士卒,使還者如歸,此呂蒙所以克敵 留者不能五千,而將軍見衆旣倍之矣。將軍威名天下所聞也,此府精銳,戰勝之兵也。 禍,愚智所見也。 處廟勝,未之聞也。」卓尚持疑未決,騰又謂卓曰:「今旣不義舉,又不承大將軍檄,此必至之 邪!使大將軍平劉隗,還武昌,增石城之守,絕荆湘之栗,將軍安歸乎?勢在人手,而曰我 位,終於隴右傾覆,河西入朝。 斷隴右,竇融兼河西,各據一方,鼎足之勢,故得文服天子,從容顧望。 何憂不富貴,而釋此廟勝,決存亡於一戰邪!騫謂梁曰:「光武創業,中國未平,故 亡固存, 襄陽之於大府,非河西之固也。且人臣之義,安忍國難而不陳力,何以北面於天子 詩之。 且議者之所難,以彼强我弱,是不量虛實者也。今大將軍兵不過萬餘,其 使大將軍勝,方當崇將軍以方面之重,如其不勝,朝廷必以將軍代 何則?向之文服,義所不容也。今將軍之於本朝,非竇融之 及海內已定一君 隗蹦 臣正

語在融傳。 時敦以卓不至,慮在後爲變,遺參軍樂道融苦要卓俱下。道融本欲背敦,因說卓襲之, 卓旣素不欲從敦,得道融說,遂決曰:「吾本意也。」乃與巴東監軍柳純、南平太

不悟

忽有

蕭

牆

之禍。

且

使

聖上元

敦勢逼,

必劫天子以

絕

四

海

敦

不

難,

但

斷彭

周顗

、戴若思遇害,

流涕謂

中日:

吾家計

急,不得不

爾。

想便

敦大懼,遣卓

西將

軍戴若思在江西,先得卓書,表上之,臺內皆稱萬歲。」武昌大驚,傳卓軍至,人皆奔散。

,與陶侃剋期,參軍鄧騫、虞沖至長沙,令譙王承堅守。

陳敦肆逆,

率所統致討。

遣參軍

司馬讚、

征

守夏侯承

、宜都太守譚該等十餘人,俱露檄遠近,

雙奉

表

詣臺,參軍羅英至廣州

H

夜勸卓速下。

卓性

先寬

和,忽便

中

道而

廢,更爲

敗

軍

將

、恐將

庭樹

加

頭

在

樹

上,

心

甚

惡

之。

其

T

周慮等密承敦意,知卓無備,詐言湖中多魚,勸卓遣左右皆捕魚,乃襲害卓于寢,傳首于敦。 四子散騎郎蕃等皆被害。 卓轉更很愎,聞諫輒怒。方散兵使大佃,而不爲備。功曹榮建固諫,不納。 太寧中,追贈驃騎將軍,諡曰敬。 襄陽太守

刺史譙王承命爲主簿,便說甘卓。「卓留爲參軍,欲與同行,以母老辭」卓而反 鄧騫字長眞,長沙人。 少有志氣,爲鄕鄰所重。常推誠行已,能以正直全於多難之時。

所謂古之解揚也。」以爲別駕。 「欲用我耳。 承爲魏乂所敗,以虞悝兄弟爲承黨,乂盡誅之,而求騰甚急。 彼新得州,多殺忠良,是其求賢之時,豈以行人爲罪」乃往詣义。 鄉人皆爲之懼,騰笑曰: 火喜曰:「君

|酸、始興太守,遷大司農,卒於官。 **騰有節操忠信,兼識量弘遠,善與人交,久而益敬。** 太尉庾亮稱之,以爲長者。 歷武

十 童 從父兄敦

宰府,世稱「卞氏六龍,玄仁無雙」。玄仁,粹字也。弟良,嘗忤其郡將。郡將怒訐其門內之 **卞壼字望之,濟陰冤句人也。** 祖統,琅邪內史。父粹,以清辯鑒察稱。兄弟六人並登

河。 政,爲侍中、中書令,進爵爲公。 私,粹遂以不訓見譏議,陵遲積年。 及廢誅,超拜右丞,封成陽子,稍遷至右軍將軍。 及長沙王乂專權、粹立朝正色,乂忌而害之。 惠帝初,爲尙書郎。 張華之誅,粹以華壻発官。 楊駿執政,人多附會, 初,粹 而粹正直不 齊王冏輔 如廁,

父爵。 壼 弱 征 東 冠 將 有名譽,同院二州、齊王冏辟,皆不就。 軍 周馥請爲從事中郎,不就。 遭本州傾覆,東依妻兄徐州刺史裴盾。 遇家禍,還鄉里。 永嘉中,除著作郎,襲 盾以壼

見物若兩眼,俄而難作

旣葬,起復舊職,累辭不就。 元帝鎭建鄴,召爲從事中郎,委以選舉,甚見親杖。 元帝遣中使敦 逼、虛牋自陳日 出爲明帝東中郎長史。 遭繼母憂, 行廣

陵

相

充元佐 自陳。 **蓴蒙見召,爲從事中郎,豈曰貪榮,直欲** 難,流寄蘭陵,爲苟晞所召,恐見逼迫, 望門見辟,信其所執,得不祗就。 **遠天性狷狹,不能和俗,退以情事,欲畢志家門。 軼旣梟懸,**壹 榮則榮矣,實非素懷。 亦嬰病,具自歸聞,未蒙恕遣。 顧以命重人輕,不敢辭憚。 門戶 遇禍,迸竄易名, 依下邳裴盾,又見假授, 自致,規暫恭命,行當乞退。 世子 亡父往爲中書令, 得存視息, 北 征,選寵 聞 西臺召壼爲尙書郎, 思暫之郡, 私志 顯望,復 屬華軼 有素。 時虚蒙大例, 以 規得託身。 之難,不敢 無施,忝 加嬰極 實

列

欲因此以避賢路,未及陳誠,奄丁窮罰。

恕哉 績以隆者,誠不得私其身。 私情艱苦如此,實無情顏昧冒榮進。若廢虛一人,江北便有傾危之慮,虛居事之日功 力王事,虛之去留,曾無損益。 親,家產屢空,養道多闕,存無歡娛,終不備禮,拊心永恨,五內抽割。 **盧年九歲,爲先母弟表所見孤背。十二,蒙亡母張所見覆育。 盧以陋賤,不能榮** 今東中郎岐嶷自然,神明日茂,軍司馬、諸參佐並以明德宣 賀循、謝端、顧景、丁琛、傅晞等皆荷恩命,高枕家門。 於公無效如彼,

帝以其辭苦,不奪其志。

庶子,轉散騎常侍,侍講東宮。 服闋,爲世子 師。 **| 壺前後居師佐之任,盡匡輔之節,一府貴而憚焉。 中興建,補太子中** 遷太子詹事,以公事免。尋復職,轉御史中丞。 忠於事上,

權貴屛跡。

有繼子,奉養至終,遂合葬於前夫。」式自云:「父臨終,母求去,父許諾。」於是制出母齊衰 時 淮南 小中正王式繼母,前夫終,更適式父。」武父終,喪服訖,議還前夫家。 前夫家亦

議,廢棄終身。 王含之難,加中軍將軍。 含滅,以功封建興縣公,尋遷領軍

矣。 之節。御史中丞鍾雅阿撓王典,不加準繩,並請觅官。 世,臣所未悟也。宜一切班下,不得以私廢公。 謨、怡之得稱父命乎!此爲謨以名父子可以虧法,怡是親戚可以自專。 羣心,則戰戍者之父母皆當以命子,不以處也。 樂廣以平夷稱,庾珉以忠篤顯,受寵聖世,身非己有,況及後嗣而可專哉!所居之職若順夫 無人,職不軌物,官不立政。 中,共參機要。 崩,成帝卽位,羣臣進璽,司徒王導以疾不至。 不得已,各居所職。是時王導稱疾不朝,而私送車騎將軍郗鑒,壹奏以導虧法從 曰:「人無非父而生,職無非事而立。 在殯,嗣皇未立,寧是人臣辭疾之時!」導聞之,乃輿疾而至。 明帝 順怡父之意,人皆不爲獄官,則刑辟息矣。 不豫,領尙書令,與王導等俱受顧命輔幼主。 時召南陽樂謨爲郡中正,潁川庾怡爲廷尉評。 如此則先聖之言廢,五教之訓塞,君臣之道散,上下之化替矣。 有父必有命,居職必有悔。 若順謨父之意,則人皆不爲郡中正,人倫 **盧正色於朝日:「王公豈社稷之臣邪!大行** 絕其表疏,以爲永制。」朝議 凡如是者,其可聽歟? 復拜右將軍,加給事中、尚書令。 帝 雖事寢不行,舉朝震肅。 皇太后臨朝,壼與庾亮對直省 謨、怡各稱父命不 有家各私其子, 若不可聽, 以此二塗服人示 以爲 私,無大臣 就。 此爲王者 **虚斷裁切** 何以許 謨、怡 **虚奏** 廢

直,不畏强禦,皆此類也。

非遗 婚 政, 若下望之之嚴嚴,刁玄亮之察察,戴若思之峰岠,當敢爾邪 不 傾 曰:卿恒 覆,實由 副意,故爲諸名士所 成帝每幸其宅,嘗拜導婦曹氏。 而誰 特賜錢五十萬,固辭不受。 榦實當官,以褒貶爲己任,勤於吏事,欲軌正督世,不肯苟同時好。 於此。」欲奏推之。王導、庾亮不從,乃止,然而聞者莫不折節。 少,而無卓爾優譽。 後 患 侍中孔坦密表不宜拜。[三] 導聞之曰:「王茂弘駑痾耳, 面創,累乞解 明帝深器之,於諸大臣而最任職。阮字每謂之 職 」」」「宣廉潔儉素,居甚貧約。 相尙,執鄙吝者, 時王導以勳德輔 然性不弘裕,才 息當 中朝

朝,一 出 書曰:「元規召峻意定,懷 日 或 .狂意,而召之更速,必縱其羣惡以向朝廷。 事 徵之,縱不 也。」當時議者 拜 旦有變,易爲蹉 光祿大夫,加散騎常侍。 順 命 爲 無 跌。 禍 以易之。 猶淺。 此於邑。 宜深思 虚固 若復經年,爲惡滋蔓,不可復制。 時庾亮將徵蘇峻,言於朝曰:「峻狼子野心,終必爲亂。 遠慮,恐未 溫生 爭,謂亮 足下, 可倉卒。」亮不納。 日:「峻擁强兵,多藏無賴,且逼近京邑,路不終 朝廷威力誠桓桓,交須接鋒履刃,尚不知便可 **奈此事** 何! 吾今所慮, | 壼知 此是朝錯勸漢景帝早削七 必敗,與平南將 是國 之大 事 且. 軍 峻已 溫

列傅

第

萬 無傷,如何。」「虛司馬任台勸」虛宜畜良馬,以備不虞。 卽 滴不? 在外。 一不然,豈須馬哉 若卿在內 一亦同 此情。 '俱諫,必當相從。 今內外戒嚴,四方有備,峻凶狂 」。峻果稱兵。 吾與之爭甚懇切,不能如之何。 | 虚復爲尚書令、右將軍、領右衞將軍,餘官 本出足下爲外藩任,而今恨出足 必無所至耳,恐不能使 1如故。

罪。 胤 **町見**父沒, 等與峻大戰於西陵,爲峻所破。 力疾而 峻進攻靑溪,壺與諸軍距擊,不能禁。 峻 至 東陵口,詔以壼都督大桁東諸軍事、假節,復加領軍將軍、給事中。 **、戰,率厲散衆及左右吏數百人,攻賊麾下,苦戰,遂死之,時年四十八。 二子駗、** 相隨赴 一賊,同時 見害。 **虛與鍾雅皆退還,死傷者以千數。 虛、雅並還節** 賊放火燒宮寺,六軍敗績。 **虚時發背創,猶未 壹率郭默、趙** 言語闕 謝

朝, 故能 | 令忠貞之節,當書于竹帛。 規翼亮,遭世 王導見議,進贈驃騎將軍,加侍中。 則有匪躬之節。 盡 峻 一敬竭 平,朝議 誠 **險難,存亡以** ,唯忠也,故能 贈壼 賊峻造逆、勠力致討、身當矢旝、再對賊鋒、父子幷命,可謂破家爲國 左光祿大夫,加散騎常侍。 之。 今之追 見危授命。 受顧 贈,實未副衆望,謂宜加鼎司之號,以旌忠烈之勳」。司徒 託 訥 之重,居端右之任,擁衞至尊,則有保傅之恩 重 |議曰:「夫事親莫大於孝,事君莫尙於忠。 此在三之大節,臣子之極行 尚書郎弘訥議以爲「死事之臣古今所重,下 也。 案虚 委質 唯孝也, "正色在 三朝,盡

守死勤事。昔許男疾終,猶蒙二等之贈,況虛伏節國難者乎!夫賞疑從重,況 司,諡曰忠貞,祠以太牢。贈世子彫散騎侍郎,彫弟盱奉車都尉。 可上準許穆,下同 「父爲忠 臣,汝爲孝子,夫何恨乎」徵士翟湯聞之歎曰:「父死於君,子死於父,忠孝之道,萃 ·嵇紹,則允合典謨,克厭衆望。」於是改贈·盧侍中、驃騎將軍 畛母裴氏撫二子尸哭曰: 開府 在 示 疑 儀 同三

手背。 贈,以爲慨然! 咸康六年,成帝追思虚,下詔曰:「虚立朝忠恪,喪身兇寇,所封懸遠,租秩薄少,妻息不 安帝詔給錢十萬,以修塋兆 可給實口 廪。」其後盜發|靈墓,尸僵,鬢髮蒼白,面如生,兩手悉拳,爪甲穿達

于一門。」診

子

誕

嗣

第三子瞻,位至廣州刺史。瞻弟眈,尚書郎。

門盛輕詵,相視 正之,詵卒以免,而猶 敦 字仲仁。父俊,清眞有檢識,以名理著稱。 如讎。 不悛。 詵以楊駿故吏被繫、俊時爲尚書郎、案其獄、

詵懼 後爲 左丞,復奏陷卞氏。 其鄉人郤詵恃才陵傲俊兄弟,俊等亦以 俊歷位汝南 相、廷尉卿。 不免,俊平心斷決

|敦弱冠仕州郡,辟司空府,稍遷太子舍人、尚書郎,朝士: 王彌逼洛,敦及胡毋輔之勸越擊王彌,而王衍、潘滔共執不聽, 多稱之。 敦 東海 庭爭苦至,衆咸壯 主 越聞,召以爲

中皆 王如 出補 平。 杜 曾相 旣而杜弢寇湘中,加敦征討大都督。 汝 南 繼 內史。 爲亂,簡乃使敦監沔北七郡軍事、振威將軍、 元帝之爲鎭東,請爲軍諮祭酒, 伐陂有功,賜爵安陵亭侯。 不就。 領江夏 征南將軍 相, 山簡 戍 夏 鎭東大將軍 以 口 爲 司 敦 馬。 攻討沔 王敦 尋 而

請

爲

軍

虜將 勢遂 益陽 征 虜 侯。 張 將 軍 中 |淮 軍 興 都督 、徐州 徙光 建,拜太子左衞 北諸郡 石頭 禄勳 刺 多為 軍 史,鎭泗口。及勸寇彭城,敦自度力不能支,與征北將軍王邃退保盱眙 ,出爲都督安南 事。 所陷, 明帝之討王敦也,以爲鎭南將軍、假節。 率。 竟以畏懦貶秩三等,爲鷹揚將軍。 時石勸侵逼淮泗,帝備求良將可以式遏邊境者,公卿舉敦,除 將軍、湘州 刺史、假節。 尋進征南將軍,固辭不拜。 徵拜大司農。 事平,更拜尙書,以 王敦 表爲征 功封 賊

史。 憂卒,追贈本官,加散騎常侍,諡 國 百 難 人 無 隨大軍 病不之職 蘇 峻 大臣之節,請檻 反, 而 溫嶠 已。 徵 庾亮 時朝 爲 光 移 禄 野莫不 車 收付 檄征 大 夫, 怪 鎭 廷 日敬。 領少 副。 一歎,獨 同 赴京 府。 丞 陶侃 子滔嗣。 師。 相王導以喪亂之後宜加寬宥,轉安南將軍、廣州 敦 既不討蘇峻, 亦切齒忿之。四峻平,侃奏敦阻軍顧望,不 敦擁兵不下,又不給軍糧,唯遣督護荀璲領數 常懷愧恥,名論自此虧矣。 尋以 赴 刺

沐,閉門不通賓客,由是漸得親密。以左右勤勞,賜爵原鄉亭侯,食邑七百戶,轉行 時天下擾亂,伐叛討貳,超自以職在近密,而書跡與帝手筆相類,乃絕不與人交書。時出休 **愼爲元帝所拔,恒親侍左右,遂從渡江,轉安東府舍人,專掌文檄。** 劉 父和,為琅邪國上軍將軍。超少有志尚,為縣小吏,稍遷琅邪國記室掾。以忠謹**清** 超字世瑜,琅邪臨沂人,漢城陽景王章之後也。 章七世孫封臨沂縣慈鄉侯,子孫因 相府建,又爲舍人。于

官。旣葬,屬王敦稱兵,詔超復職,又領安東上將軍。尋六軍敗散,唯超案兵直衞,帝感之, 不贍,帝手詔褒之,賜以魚米,超辭不受。超後須純色牛,市不可得,啓買官外廏牛,詔便以 產,投函中訖,送還縣。百姓依實投上,課輸所入,有踰常年。入爲中書通事郞。以父憂去 所懷。常年賦稅,主者常自四出結評百姓家貲。至超,但作大函,邨別付之,使各自書家 臣,横竊賞賜,無德而祿,殃咎足懼。」帝嘉之,不奪其志。尋出補句容令,推誠於物,爲百姓 靜密,彌見親待。加以處身淸苦,衣不重帛,家無儋石之儲。每帝所賜,皆固辭曰:「凡陋小 |歸終喪禮。及錢鳳構禍,超招合義士,從明帝征鳳。事平,以功封零陵伯。超家貧,妻子 中興建,爲中書舍人,拜騎都尉、奉朝請。時臺閣初建,庶績未康,超職典文翰,而畏愼

傅

第

賜之。 朝,遷射聲校尉。 初,遭母憂去官,衰服不離身,朝夕號泣,朔望輒步至墓所,哀感路人。 出爲義興太守。 時軍校無兵,義興人多義隨超,因統其衆以宿衞, 未幾,徵拜中書侍郎。 拜受往還,朝廷莫有知者。 號爲 「君子營」。 會帝崩,穆后臨 咸和

與侍 顯近 侍中、右衞!任讓不奉詔,因害之。及峻平,任讓與陶侃有舊,侃欲特不誅之,乃請於帝。 謀,將欲奉 猜忌朝士,而 所受,繾綣朝夕,臣節愈恭。 帝時年八歲,雖幽厄之中,超猶啓授孝經、論語。 屬 欲迎超家,而超不聽,盡以妻孥入處宮內。及王師敗績,王導以超爲右衞將軍, 帝曰:「 所親信 太后崩,軍衞禮章損闕,超躬率將士奉營山陵。峻遷車駕石頭,時天大雨,道路沈陷,超 :中鍾雅步侍左右,賊給馬不肯騎,而悲哀慷慨。|峻聞之,甚不平,然未敢加害,而以其 地葬之,使出 及蘇峻謀逆、超代趙胤爲左衞將軍。 許方等補司馬督、殿中監,外託宿衞,內實防禦超等。時饑饉米貴,峻等問遺,一無 讓是殺我侍中、右衞者,不可宥。」由是遂誅讓。 帝而出。 超爲帝所親遇,疑之尤甚。後王導出奔,超與懷德令匡術、建康令管旆等密 入得瞻望其墓。 未及期,事泄,峻使任讓將兵入收超及鍾雅。[三]帝抱持悲泣曰:「還我 追贈衞尉,諡 時京邑大亂,朝士多遣家人入東避難。 曰 忠。 及超將改葬,帝痛念之不已,詔遷高 溫嶠等至,峻 親侍成帝。 義興故吏

超天性謙慎,歷事三帝,恒在機密,並蒙親遇,而不敢因寵驕諂,故士人皆安而敬之。

鍾雅

陽令,入爲佐著作郎。 鍾雅字彥胄,潁川長社人也。 母憂去官,服闋復職。 父墨,公府掾,早終。雅少孤,好學有才志,舉四行,除汝 東海王越請爲參軍,遷尚書郎

兵攻雅,雅退據涇縣,收合士庶,討玘,斬之。鳳平,徵拜尚書左丞。 爲從事中郎,補宣城內史。 取於重孫,可歷世共其名,無所改也。稱伯祖不安,如所奏。」轉北軍中候。 尚書右丞。時有事於太廟、雅奏曰:·「陛下繼承世數、於京兆府君爲玄孫、而今祝文稱曾孫, 恐此因循之失,宜見改正。 而登廟,亦宜除伯祖之文。」詔曰:「禮,事宗廟,自會孫已下皆稱會孫,此非因循之失也。 避亂東渡,元帝以爲丞相記室參軍,遷臨淮內史、振威將軍。頃之,徵拜散騎侍郎, 又禮,祖之昆弟,從祖父也。景皇帝自以功德爲世宗,不以伯祖 錢鳳作逆,加廣武將軍,率衆屯青弋。時廣德縣人周玘爲鳳起 大將軍王敦請 轉 義

聖主縞素,泣血臨朝,百僚慘愴,動無歡容。 八音遏密,雖在凡庶,猶能三載。自茲以來,歷代所同。肅祖明皇帝崩背萬國,當朞來月。 明帝崩,遷御史中丞。 時國喪未朞,而尚書梅陶私奏女妓,雅劾奏曰:「臣聞放勛之殂, 陶無大臣忠慕之節,家庭侈靡,聲妓紛葩,絲竹

之音,流聞衢路,宜加放黜,以整王憲。 請下司徒,論正淸議。」穆后臨朝,特原不問。

法繩達,百僚皆憚之。

北中郎將劉遐卒,遐部曲作亂,詔郭默討之,以雅監征討軍事、假節。事平,拜驍騎

將軍。

後以家貧、詔賜布帛百匹。子誕、位至中軍參軍、早卒。 **蚁耳。」及峻逼遷車駕幸石頭,雅、超流涕步從。明年,並爲賊所害。賊平,追贈光祿勳。** 崩,誰之責也。」亮曰:「今日之事,不容復言,卿當期剋復之效耳。」雅曰:「想足下不愧荷林 遜遁以求免,吾懼董狐執簡而至矣。」庾亮臨去,顧謂雅曰:「後事深以相委。」雅曰:「棟折榱 侍中。尋王師敗績,雅與劉超並侍衞天子。或謂雅曰:「見可而進,知難而退,古之道也。 君性亮直,必不容於寇讎,何不隨時之宜而坐待其斃。」雅曰:「國亂不能匡,君危不能濟,各 蘇峻之難,詔雅爲前鋒監軍、假節,領精勇千人以距峻。雅以兵少,不敢擊,退還。 拜

卓伐暴寧亂,庸績克宣,作鎭扞城,威略具舉。及兇渠犯順,志在勤王。旣而人撓其謀,天 奪其鑒,疑留不斷,自取誅夷。卜壹束帶立朝,以匡正爲己任,褰裳衞主,蹈忠義以成名。 史臣曰:應詹行業聿修,文史足用,入居列位,則嘉謀屢陳,出撫藩條,則惠政斯洽。 甘

上,鍾雅正直當官。屬巨猾滔天,幼君危逼,乃崎嶇寇難,契鶋艱虞,匪石爲心,寒松比操, 遂使臣死於君,子死於父,惟忠與孝,萃其一門。古稱社稷之臣,忠貞之謂矣。 劉超勤肅奉

貞軌皆沒,亮迹雙升。雖高赫在難彌恭,荀息繼之以死,方之二子,曾何足云!

義,處死爲易。 贊曰: 卓臨南服, 詹莅西州。[K] 政刑克舉, 威惠兼修。 應嗟運促, 甘斃疑留。 惟子惟臣,名節斯寄。鍾劉入仕,忠貞攸履。竭其股肱,繼之以死。 望之徇

校勘記

- 以咸和六年卒 成紀、通鑑九三俱云其卒在元年、「六」疑「元」字之形近誤。
- 平望亭侯曄 「曄」原作「舞」。 周校 此陸曄也,宜照本傳作「曄」。 按:通典九四亦作「陸曄」

今據改。 下同。

- C川] 孔坦 原作「孔恒」,今據孔坦傳改。
- . . 29 U 獨陶侃亦切齒忿之 校文:「獨」字衍文。按:通志一二六無「獨」字。
- 二五山 峻使任讓將兵入收超及鍾雅 舉正"時峻已死,當云蘇逸。 按:通鑑九四作「逸」。
- 卓臨南服詹莅西州 周校"應詹爲江州刺史、在南"甘卓爲梁州刺史、在西。又本傳詹前卓後。

「卓」「詹」二字宜互易上下。

晉書卷七十

列傳第四十一

孫惠

切至。 州辟不就,寓居瀟沛之間。 讓都督於王粹。 軍、白沙督。 曹掾,轉東曹屬。 孫惠字德施,吳國富陽人,吳豫章太守賁曾孫也。 冏不納。 是時,顯將征長沙王义,以陸機爲前鋒都督。 及機兄弟被戮,惠甚傷恨之。 惠懼罪,辭疾去。頃之, 問果敗。 冏驕矜僭侈,天下失望。 永寧初、赴齊王冏義、討趙王倫,以功封晉興縣侯,辟大司馬戶 惠獻言於冏,諷以五難、四不可,勸令歸藩,辭甚 時惠又擅 成都王穎薦惠爲大將軍參軍、領奮威 父祖並仕吳。 一殺顯牙門將梁儁,懼罪,因改姓名 惠與機同鄉里,憂其致禍, 惠口訥,好學有才識, 勸 機

後東海王越舉 兵下邳,惠乃詭稱南嶽逸士秦秘之,以書干越曰: 以遁。

白横流,兵家攸杖,歲鎭所去,天厭其德。玄象著明,讁譴彰見。違天不祥,奉時必克。 退,終於致果,句踐喪衆,期於擒吳。今明公名著天下,聲振九域,公族歸美,萬國宗賢。 以振貧乏,將有濟世之才,潤濱之士,含奇謨於朱脣,握神策於玉掌,逍遙川嶽之上,以 明公思安危人神之應,慮禍敗前後之徵,弘勞謙日昃之德,躬吐握求賢之義,傾府竭庫 幽幷率義之旅,宣喻靑徐,啓示羣王,旁收雄俊,廣延秀傑,糾合攜貳,明其賞信。仰惟 之功,武視東夏之藩,龍躍海嵎之野。西諮河間,南結征鎭,東命勁吳銳卒之富,北有 德是輔,惡盈福謙,鬼神所讚。以明公達存亡之符,察成敗之變,審所履之運,思天人 加以四王齊聖,仁明篤友,急難之感,同獎王室,股肱爪牙,足相維持。皇穹無親,惟 集,大命有在。夫以漢祖之賢,猶有彭城之恥,曰題武之能,亦有濮陽之失。孟明三 哲之才,〔1〕應神武之略,承衰亂之餘,當傾險之運,側身昏讒之俗,跼蹐凶諂之間。 天子蒙塵|鄴宮,外矯詔命,擅誅無辜,豺狼篡噬,其事無遠。夫心火傾移,喪亂可必,太 以感激於世,發憤忘身。抗辭金門,則謇諤之言顯,扶翼皇家,則匡主之功著。 夷正立,則取疾姦佞,抱忠懷直,則見害賊臣。餔糟非聖性所堪,苟免非英雄之節,是 禍晉國,遘茲厄運。歷觀危亡,其萌有漸,枝葉先零,根株乃斃。伏惟明公資叡 事雖未

俟眞人之求。目想不世之佐,耳聽非常之輔,舉而任之,則元勳建矣。

禍難。 祕之不天,值此衰運,竊慕墨翟、申包之誠,跋涉荆棘,重繭而至,櫛風沐雨,來承 思以管穴毗佐大猷,道險時吝,未敢自顯。伏在川泥,繫情宸極,謹先白箋,以

啓天慮。 若猶沈吟際會,徘徊二端,徼倖在險,請從恕宥之例。

今時至運集,天與神助,復不能鵲起於慶命之會,拔劍於時哉之機,恐流濫之禍不在一 喁,四海注目。 社稷危而復安,宗廟替而復紹,惟明公兄弟能弘濟皇猷。 國之存亡,在 順討逆,執正伐邪,是烏獲摧冰,賁育拉朽,猛獸吞狐,泰山壓卵,因風燎原,未足方也。 斯舉矣。 頸之報, 朝廷之內, 而無死命之臣。非獨祕之所恥, 惜乎晉世之無人久矣。今天下喁 人。自先帝公王,海內名士,近者死亡,皆如蟲獸,尸元曳於糞壤,形骸捐於溝澗,非其 口無忠貞之辭,心無義正之節,皆希目下之小生而惑終焉之大死。凡人知友,猶有刎 明公今旋軫臣子之邦,宛轉名義之國,指麾則五嶽可傾,呼噏則江湖可竭。

右握滅逆之矢,控馬鵠立,計日俟命。時難獲而易失,機速變而成禍,介如石焉,實無 |融之以不才之姿,而值危亂之運,竭其狗馬之節,加之忠貞之心,左屬平亂之難,

終日,自求多福,惟君裁之!

越省書,榜道以求之,惠乃出見。越卽以爲記室參軍,專職文疏,豫參謀議。除散騎

傳

四

相,遷廣武將軍、安豐內史。以迎大駕之功,封臨湘縣 失。每造書檄,越或驛馬催之,應命立成,皆有文采。 郎、太子中庶子,復請補司空從事中郎。越誅周穆等,夜召參軍王廙造表,廙戰懼,壞數紙 時惠不在,越歎曰:「孫中郎在,表久就矣。」越遷太傅,以惠爲軍諮祭酒,數諮訪得 除秘書監,不拜。 轉彭城內史、廣陵

尋病卒,時年四十七。 餓以他事收惠下人推之, 惠旣非南朝所授,常慮讒問,因此大懼,遂攻殺餓,奔入蠻中。 元帝遣甘卓討周馥於壽陽,惠乃率衆應卓,馥敗走。 喪還鄉里,朝廷明其本心,追加弔賻。 廬江何銳爲安豐太守,惠權留郡

熊遠

氏羌,遠遂不行,送至隴 薦於郡, 州辟主簿、別駕,舉秀才,除監軍華軼司馬、領武昌太守、寧遠護軍 而 稱異,勸崇免之,乃還鄉里。 熊遠字孝文,豫章南昌人也。 由是辟爲文學掾。 右而還。 遠曰:「辭大不辭小也。」固請留縣。 遠有志尚,縣召爲功曹,不起,强與衣幘,扶之使謁。 後太守會稽夏靜辟爲功曹。 祖翹,嘗爲石崇蒼頭,而性廉直,有士 及靜去職,遠送至會稽以歸 太守察遠孝廉。 風。 黄門郎潘岳見 屬太守討 十餘日

|元帝作相,引爲主簿。 時傳北陵被發,帝將舉哀,遠上疏曰:「園陵旣不親行,承傳言之

矣。」屬有杜弢之難,不能從。 之士,鳴檄前驅,大軍後至,威風赫然,聲振朔野,則上副西土義士之情,下允海內延頸之望 矣。昔項羽殺義帝以爲罪,漢祖哭之以爲義,劉項存亡,在此一舉。羣賊豺狼,弱於往日, 也,討逆叛,至順也,救社稷,至義也;卹遺黎,至仁也。若修此四道,則天下響應,無思不服 案行,得審問,然後可發哀。卽宜命將至洛,修復園陵,討除逆類。昔宋殺無畏,莊王奮袂 者未可爲定。且園陵非一,而直言侵犯,遠近弔問,答之宜當有主。謂應更遣使攝河南尹 惡逆之甚,重於丘山。大晉受命,未改於上,兆庶謳吟,思德於下。今順天下之心,命貔貅 而起,衣冠相追於道,軍成|宋城之下。況此酷辱之大恥,臣子奔馳之日! 夫修園陵,至孝

農桑不修,遊食者多,皆由去本逐末故也。」時議美之。 三公、九卿、諸侯、大夫,躬耕帝藉,以勸農功。、詩云:『弗躬弗親,庶人不信。』自喪亂以來, 時江東草創,農桑弛廢,遠建議曰:「立春之日,天子祈穀于上帝,乃擇元辰,載耒耜,帥

川,比 減膳。 有識之士於是觀禮。 **建興初,正旦將作樂,遠諫曰:「謹案尚書, 堯崩,四海遏密八音。 禮云,凶年,天子徹樂** 歲 孝懷皇帝梓宮未反,豺狼當塗,人神同忿。公明德茂親,社稷是賴。今杜弢蟻聚湘 征行,百姓疲弊,故使義衆奉迎未舉。 公與國同體,憂容未歇。 昔齊桓貫澤之會,有憂中國之心,不召而至 履端元日,正始之初,貢士鱗萃,南北雲集,

列

觀,崇戲弄之好,懼違雲、韶、雅、頌之美,非納軌物,有塵大敎。 表道德之軌,闡忠孝之儀,明仁義之統,弘禮樂之本,使四方之士退懷嘉則。 及葵丘自矜,叛者九國。人心所歸,惟道與義。 將紹皇綱於旣往,恢霸業於來今, 謂宜設饌以賜羣下而已。」 今榮耳目之

元帝納之。

刜。 室,伏讀聖教,人懷慷慨。 故,聖主肇祚,遠奉西都。 吾所欣賴,卿其勉之! 散騎常侍。 乃克,用兵之難,非獨在今。伏以古今之霸王遭時艱難,亦有親征以隆大勳,亦有遣將以平 五千人,徑與水軍進征,旣可得速,必不後時。昔齊用穰苴,燕晉退軍;秦用王翦,克平南 必使督護得才,卽賊不足慮也。」會弢已平,轉從事中郎,累遷太子中庶子、尙書左丞、 轉丞相參軍。 今公親征,文武將吏、度支籌量、舟輿器械所出若足用者,然後 帝每嘆其忠公,謂曰:「卿在朝正色,不茹柔吐剛,忠亮至到,曰可謂王臣也。 是時琅邪國侍郎王鑒勸帝親征杜弢,遠又上疏曰:「皇綱失統,中夏多 梓宮外次,未反園陵,逆寇遊魂,國賊未夷。明公憂勞,乃心王 杜弢小豎,寇抄湘川,比年征討,經載不夷。 可征。 昔高宗伐鬼方,三年 愚謂宜 如 が前遣

以爲「寮漢因赦賜爵,非長制也。今案投刺者不獨近者情重,遠者情輕,可依漢法例,賜天 中 興建,帝欲賜諸吏投刺勸進者加位一等,百姓投刺者賜司徒吏,凡二十餘萬。

下爵,於恩爲普,無偏頗之失。可以息檢覈之煩,塞巧僞之端」。帝不從。

協醉,使綝避之,綝不迴。 協令威儀牽捽綝墮馬,至協車前而後釋。 遠奏兎協官 轉御史中丞。 時尚書刁協用事,衆皆憚之。尚書郎盧綝將入直,遇協于大司馬門外。

時冬雷電,且大雨,帝下書責躬引過,遠復上疏曰:

道,竊以人事論之。陛下節儉敦朴,愷悌流惠,而王化未興者,皆羣公卿士不能夙夜在 公,以益大化,素餐負乘,秕穢明時之責也。 被庚午詔書,以雷電震,暴雨非時,深自克責。雖禹湯罪己,未足以喻。臣閣於天

枉不理。今當官者以理事爲俗吏,奉法爲苛刻,盡禮爲諂諛,從容爲高妙,放蕩爲達 助者進,稱職以違俗見譏,虛資以從容見貴。是故公正道虧,私塗日開,强弱相陵,冤 下憂勞於上,而羣官未同戚容於下,每有會同,務在調戲酒食而已,此二失也。選官用 宜在枕戈爲王前驅。若此志未果者,當上下克儉,恤人養士,徹樂減膳,惟修戎事。陛 北討、讎賊未報、此一失也。昔齊侯旣敗,七年不飮酒食肉、況此恥尤大。臣子之責, 士、驕蹇爲簡雅,此三失也。 人,不料實德,惟在白望,不求才幹,鄉舉道廢,請託交行。有德而無力者退,修望而有 今逆賊猾夏,暴虐滋甚,二帝幽殯,梓宮未反,四海延頸,莫不東望。而未能遣軍

此之由。不明其黜陟,以審能否,此則俗未可得而變也。 爲圓,撓直爲曲,豈待顧道德之淸塗,踐仁義之區域乎!是以萬機未整,風俗爲薄,皆 王法所不加;清論美其賢,漸相登進,仕不輟官,攀龍附鳳,翱翔雲霄。 世 · |所謂三失者,公法加其身,私議貶其非,轉見排退,陸沈泥滓。 時所謂三善者, 遂使世人削方

色孔壬!此官得其人之益也。 奏而不足以懲物,官人選才而不足以濟事。宜招賢良於屠釣,聘耿介於丘園。若此道 巖穴,姬公不曲繩於天倫,叔向不虧法於孔懷。今朝廷法吏多出於寒賤,是以章書日 也。求才急於疏賤,用刑先於親貴,然後令行禁止,野無遺滯。善與舜於仄陋,舜拔賢於 官,所以容受直言,誘進將來,故人得自盡,言無隱諱。任官然後爵之,位定然後祿之。 不改,雖幷官省職,無救弊亂也。 敷奏以言,明試以功,車服以庸。 不見用,是以朝少辯爭之臣,士有祿仕之志焉。 今朝廷羣司以從順爲善,相違見貶,不復論才之曲直,言之得失也。時有言者,或 舜猶歷試諸難,而今先祿不試,甚違古義,亂之所由 能哲而惠,何憂乎驩兜,何遷乎有苗,何畏乎巧言令 郭翼上書,武帝擢爲屯留令,又置諫

資於完,保境安衆爲務。,敦至石頭,諷朝廷徵遠,乃拜太常卿,加散騎常侍。,敦深憚其正而 累遷侍中,出補會稽內史。時王敦作逆,沈充舉兵應之,加遠將軍,距而不受,不輸軍

有謀、引爲長史、數月病卒。

遠弟縉,名亞於遠,爲王敦主簿,終於鄱陽太守。 縉子鳴鵠,位至武昌太守。

王鑒

時杜弢作逆,江湘流弊,王敦不能制,朝廷深以爲憂。鑒上疏勸帝征之,曰: 王鑒字茂高,堂邑人也。父濬,御史中丞。鑒少以文筆著稱,初爲元帝琅邪國侍郎。

命,三江受敵,彭蠡振搖,是賊踰我垣牆之內,闚我室家之好。 黷武之衆易動,驚弓之 鳥難安,鑒之所甚懼也。去年已來,累喪偏將,軍師屢失,送死之寇,兵厭奔命,賊量 介胄生蟣蝨,而可不深慮者哉!江揚本六郡之地,一州封域耳。 若兵不時戢,人不堪 舉。鑒懼雲旗反旆,元戎凱入,未在旦夕也。昔齊旅未朞而申侯懼其老,況暴甲三年, 絕乏之色。賦斂搜奪,周而復始,卒散人流,相望於道。殘弱之源日深,全勝之勢未 蕭條,白骨塗地,豫章一郡,十殘其八。繼以荒年,公私虛匱,倉庫無旬月之儲,三軍有 江南之地,蓋九州之隅角,垂盡之餘人耳。而百越鴟視於五嶺,蠻蜀狼顧於湘漢,江州 負伊周之重,朝廷延匡合之望。方將振長轡而御八荒,掃河漢而淸天塗。所藉之資, 天禍晉室,四海顚覆,喪亂之極,開闢未有。明公遭曆運之厄,當陽九之會,聖躬

卓之壘。 六軍旣贈,戰士思奮,爾乃乘隊騁奇,擾其窟穴,顯示大信,開以生塗,杜弢之頸固已鎖 得而宣,熊羆之士,其銳可得而奮。進左軍於武昌,爲陶侃之重,建名將於安成,連甘 我力矣。 南望交廣,西撫蠻夷。要害之地,勒勁卒以保之,深溝堅壁,按精甲而守之。 雖繼遣偏裨,懼未足成功也。愚謂尊駕宜親幸江州,然後方召之臣,其力可

者,人之所甚愛,苟宜伐病,則削肌刮骨矣。然守不可虛,鑒謂王導可委以蕭何之任。 當時烽燧之虞,蓋一日縱敵,終己之患,雖戎輅蒙嶮,不以爲勞,況急於此者乎!劉玄 其變,卒令溫懷不守,三河傾覆,致有今日之弊,此已然之明驗也。 蔓草猶不可長,況 或以小賊方斃,不足動千乘之重。鏖見王彌之初,亦小寇也,官軍不重其威,狡逆得肆 |邵陵,|晉文擐甲於城濮。 昔漢高、光武二帝,征無遠近,敵無大小,必手振金鼓,身當矢 狼兕之寇乎!當<u>五</u>霸之世,將非不良,士非不勇,征伐之役,君必親之,故<u>齊</u>桓免胄於 坐就,鹽未見其易也。魏武旣定中國,親征柳城,揚旍盧龍之嶺,頓轡重塞之表,非有 極,劇於曩代,崇替之命,繫我而已。欲使鑾旂無野次之役,聖躬遠風塵之勞,而大功 石,櫛風沐雨,壺漿不贍,馳騖四方,匪遑寧處,然後皇基克構,元勳以融。今大弊之 議者將以大舉役 重,人不可擾。 鑒謂暫擾以制敵,愈 於放敵而常擾也。 夫四體

德躬登漢山,而夏侯之鋒摧,吳爲祖親泝長江,而關羽之首懸,袁紹猶豫後機,挫衄三 分之勢;劉表臥守其衆,卒亡全煙之地。 歷觀古今撥亂之主,雖聖賢,未有高拱閑居不

勞而濟者也。前鑒不遠,可謂蓍龜。

憂也。 濟,桓文之功不難懋也。今惜一舉之勞,而緩垂死之寇,誠國家之大恥,臣子之深 旣掃清湘野,滌蕩煙郢,然後班爵序功,酬將士之勞,卷甲韜旗,廣農桑之務,播愷悌之 惠,除煩苛之賦。比及數年,國富兵强,龍驤虎步,以威天下,何思而不服,何往而不 舉,曾不十日,可到豫章。豫章去賊尙有千里之限,但臨之以威靈,則百勝之理濟矣。 議者或以當今暑夏,非出軍之時。 鑒謂今宜嚴戒,須秋而動。高風啓塗,龍舟電

鑒以凡瑣,謬蒙獎育,思竭愚忠以補萬一。 芻蕘之言,聖王不棄,戍卒之謀,先后

採之。乞留神鑒,思其所陳。

疏奏、帝深納之、即命中外戒嚴、將自征己。會問已平、故止。

中興建、拜駙馬都尉、奉朝請、出補永興令。大將軍王敦請爲記室參軍、未就而卒,時

年四十一。文集傳于世。

鑒弟濤及弟子戭,並有才筆。 濤字茂略,歷著作郎、無錫令。

| 歲字庭堅,亦爲著作。 並

列傳

一八九一

早卒。

陳類

笑而從之。仕爲郡督郵,檢獲隱匿者三千人,爲一州尤最。 陳題字延思,陳國苦人也。 少好學,有文義。 父\ 立宅起門,願曰:「當使容馬車。」 | 斷 太守劉享拔爲主簿,州辟部從

事,乘馬車還家,宗黨榮之。

尚書,

結恨不得盡其才用。 祖起於沛譙,準之衆州,莫之與比。」結甚異之,曰:「豫州人士常半天下,此言非虛。」會結遷 蓬蒿裁高三尺,不足成林故也。」結曰:「張彥眞以爲汝願巧辯,恐不及靑徐儒雅也。」題曰: 品為中正。」答曰:「詩稱『維嶽降神,生浦及申』。夫英偉大賢多出於山澤,河北土平氣均, 曰:「衆人之言不可妄聽,宜依法窮竟。」又問僚佐曰:「河北白壤膏粱,何故少人士,每以三 其非所部而在境者,刺史幷糾。事徵文墨,前後列上,七被詔書。如州所劾,無有違謬。」結 鳳曰:「沛王貴藩,州據何法而擅拘邪。」時顒在坐,對曰:「甲午詔書,刺史銜命,國之外臺, 「彥眞與元禮不協,故設過言。 劾案沛王韜獄,未竟,會解結代楊準爲刺史,韜因河間王顒屬結。 老子、莊周生陳梁,伏羲、傅說、師曠、大項出陽夏,漢魏二 結至大會,問主簿史

命,必能光贊大猷,允淸朝望,使黃憲之徒不乏於豫土,令顋庶免臧文之責。」州乃辟保 元康 中,舉孝廉,而州將留之。 題薦同縣焦保曰:「保出自寒素, 稟質清沖, 若得參嘉·

賞信罰,拔卓茂於密縣,顯朱邑於桐鄉,然後大業可舉,中興可冀耳。」 先顯,言輕者後敍,遂相波扇,乃至陵遲。加有<u>莊</u>老之俗傾惑朝廷,養望者爲弘雅,政事者 軍。 所以傾弊,四海所以土崩者,正以取才失所,先白望而後實事,浮競驅馳,互相貢薦,言重者 爲俗人,王職不恤,法物墜喪。夫欲制遠,先由近始,故出其言善,千里應之。今宜改張,明 鎭東從事中郎袁琇薦題於元帝,遷鎭東行參軍事,典法兵二曹。 齊王冏起義,州遣題將兵赴之,拜駙馬都尉。遭賊避難于江西。 類與王導書曰:「 歷陽內史朱彦引爲參 中華

自今臨使稱疾,須催乃行者,皆免官。」 以至傾國。故百尋之屋突直而燎焚,千里之隄蟻垤而穿敗,古人防小以全大,愼微以杜萌。 望餘弊,小心恭肅,更以爲俗,偃蹇倨慢,以爲優雅。至今朝士縱誕,臨事遊行,漸弊不革, 建興初制,版補錄事參軍。參佐掾屬多設解故以避事任。 頗議:「諸僚屬乘昔西臺養

謂之致寇,寵厚戒 式,駁之曰:「聖王懸爵賞功,制罰糾違,斯道苟明,人赴水火。 且名器之實,不可妄假,非才 初,趙王倫篡位,三王起義,制己亥格,其後論功雖小,亦皆依用。 在斯亡。 **昔孫秀口唱篡逆,手弄天機,惠皇失御,** 九服無戴。 題意謂不宜以爲常

倫之格 **顧以孤寒,數有奏議,朝士多惡之,出除

譙郡太守。** 委庸隸之門,使天官降辱,王爵黷賤,非所以正皇綱重名器之謂也。請自今以後宜停之。」 議,[2] 席卷四海,合起義之衆,結天下之心,故設己亥義格以權濟難。 也。 其起義以來,依格雜猥,遭人爲侯,或加兵伍,或出阜僕,金紫佩士卒之身,符策 此自一切之法,非常

不試。 齒於奔競之流乎!宜引幽滯之雋,抑華校實,則天淸地平,人神感應」。 猶勝不舉,況或十得二三。日磾降虜,七世內侍,由余戎狄,入爲秦相。豈藉華宗之族,見 戎事,鮮能以濟。 宜開舉武略任將率者,言問核試,盡其所能,然後隨才授任。舉十得一, 太興初,以疾徵。久之,白衣兼尚書,因陳時務,以爲「昔江外初平,中州荒亂,故貢舉 宜漸循舊,搜揚隱逸,試以經策。又馬隆、孟觀雖出貧賤,勳濟甚大,以所不習,而統

大姓互相嫉妬,說顧年老耳聾。侃召顒還,以西陽太守蔣巽代之。年六十九卒。 陶侃征還,題先至巴陵上禮。侃以爲能,表爲梁州刺史。綏懷荒弊,甚有威惠。 後拜天門太守,殊俗安之。選腹心之吏爲荆州參軍,若有調發,動靜馳白,故恒得宿

高崧

高崧字茂琰,廣陵人也。父悝,少孤,事母以孝聞。年十三,值歲饑,悝荣蔬不饜,每致

欽重

列

傅

後

圖其

吾與

稷

之事

少聞

今疆理西藩,何以爲政。」 萬粗陳其意。 崧便爲敍刑政之要數百言。 食也」。後以公事免,卒於家。子濬,官至散騎常侍。 曰:「阿酃!故有才具邪」」哀帝雅好服食,崧諫以爲「非萬乘所宜。 崧累遷侍中。 是時謝萬爲豫州都督,疲於親賓相送,方臥在室。 陛下此事,實日月之一 萬遂起坐,呼崧小字 崧徑造之,謂曰:「卿

之謀,解結欽王朗之跡。 溫,願之距結,挫其勞役之策,申其汝顯之論,採郭嘉之風旨,挹朱育之餘波,故桓溫輟許攸 修之慮,本旣顚矣,何以能終!熊遠、王鑒有毗濟之道,比之大廈,其榱桷之佐乎!崧之詆 運載昌,稱狩之師金行不競。豈遭時之會斯蹇,將謀國之道未通?迷於委質之貞,闇於所 史臣曰:昔張良拙說項氏,巧謀於沛公,孫惠沮計齊王,耀奇於東海,終而誓甘之旅炎 緝之時典,用此道歟

彫章尤善。 贊曰:臨湘游藝,才識英發。 侯爵崧傳,高門頗顯 跪名違潁,陳書干越。 孝文忠謇,嘉言斯踐。 茂高器鑒,

校勘記

資叡哲之才 「資」,各本皆作「咨」,唯宋本作「資」,今從宋本。

ヘニン 猶有彭城之恥 册府九○○「彭城」作「平城」,當從之。

忠亮至到 料注: 初學記一二引王隱晉書「至到」作「至勁」。按:御覽二 二六引晉書亦作「至

勁」。

三王建議 通志一二七及册府七一七「議」作「義」,與上「三王起義」句合。

ハガリ 如其不爾 「爾」,各本作「耳」,今從殿本。

頃所以深用惟疑 「頃」,各本作「須」,今從宋本。

册府七二○亦作「頃」。

晉書卷七十二

列傳第四十二

郭璞

卷與之,由是遂洞五行、天文、卜筮之術,攘災轉禍,通致無方,雖京房、管輅不能過也。 古文奇字,妙於陰陽算曆。有郭公者,客居河東,精於卜筮,璞從之受業。公以靑囊中書九 以公方著稱。終於建平太守。璞好經術,博學有高才,而訥於言論,詞賦爲中興之冠。好 郭璞字景純,河東聞喜人也。父瑗,尚書都令史。時尚書杜預有所增損,暖多駁正之,

門人趙載嘗竊靑囊書,未及讀,而爲火所焚。 惠懷之際,河東先擾。蹼筮之,投策而嘆曰:「嗟乎!黔黎將湮於異類,桑梓其翦爲龍

不接賓客。璞至,門東不爲通。璞曰:「吾能活馬。」東驚入白固。固趨出,曰:「君能活吾馬 荒乎] 於是潛結姻昵及交遊數十家,欲避地東南。 抵將軍趙固,會固所乘良馬死,固惜之,

列傳

乎。]璞曰:「得健夫二三十人,皆持長竿,東行三十里,有丘林社廟者,便以竿打拍,當得一 物,宜急持歸。 頃之馬起,奮迅嘶鳴,食如常,不復見向物。固奇之,厚加資給。 得此,馬活矣。」固如其言,果得一物似猴,持歸。此物見死馬,〔1〕便噓吸其

投於井中,數千赤衣人皆反縛,一一自投於井,主人大悅。」璞攜婢去。後數旬而廬江陷。 爲占曰「敗」。康不之信。」璞將促裝去之,愛主人婢,無由而得,乃取小豆三斗,繞主人宅散 可於東南二十里賣之,愼勿爭價,則此妖可除也。」主人從之。」璞陰令人賤買此婢。復爲符 主人晨見赤衣人數千圍其家,就視則滅,甚惡之,請璞爲卦。璞曰:「君家不宜畜此婢, 行至廬江,太守胡孟康被丞相召爲軍諮祭酒。時江淮淸宴,孟康安之,無心南渡。

郡綱 當有妖人欲稱制者、尋亦自死矣。後當有妖樹生、然若瑞而非瑞、辛螫之木也。儻有此者, 須觸 遂被一創,還其本墅。 體連戴,其物壯巨。 白,大力 紀 蹼旣過江,宣城太守殷祐引爲參軍。 時有物大如水牛,灰色卑腳,腳類象,胸前尾上皆 上祠,請殺之。 』」其精妙如 而遲鈍,來到城下,衆咸異焉。」酤使人伏而取之,令璞作卦,遇遯之蠱,其卦曰:「艮 此。耐遷石頭督護,璞復隨之。 山潛之畜,匪兕匪武。至身與鬼幷,精見二午。法當爲禽,兩靈不許。 按卦名之,是爲驢鼠。」卜適了,伏者以戟刺之,深尺餘,遂去不復見。 巫云:「廟神不悅,曰:『此是縣亭驢山君鼠,使詣荆山,暫來過我,不 時有鼯鼠出延陵,蹼占之曰:「此郡東

東南數百里必有作逆者,期明年矣。」無錫縣欻有茱萸四株交枝而生,若連理者,其年盜殺

吳興太守袁琇。 或以問蹼,璞曰「卯爻發而沴金,此木不曲直而成災也。」

樹,截斷如身長,置常寢處,災當可消矣。」導從其言。數日果震,柏樹粉碎。 王導深重之,引參已軍事。嘗令作卦,撰言:「公有震厄,可命駕西出數十里,得一柏

哉!若夫鐸發其響,鍾徵其象,器以數臻,事以實應,天人之際不可不察。」帝甚重之。 然後可以言受命矣。觀五鐸啓號於晉陵,棧鍾告成於會稽,瑞不失類,出皆以方,豈不偉 太興初,會稽剡縣人果於井中得一鍾,長七寸二分,口徑四寸半,上有古文奇書十八字,云 勒銘,應在人家井泥中得之。 繇辭所謂 『先王以作樂崇德, 殷薦之上帝』者也。 」及帝卽位, 中井沸,經日乃止。及帝爲晉王,又使璞筮,遇豫之睽,璞曰:「會稽當出鍾,以告成功,上有 受命之符。 「會稽嶽命」,餘字時人莫識之。僕曰:「蓋王者之作,必有靈符,塞天人之心,與神物合契, 時元帝初鎭建鄴,導令璞筮之,遇减之井,璞曰:「東北郡縣有『武』名者,當出鐸,以著 西南郡縣有『陽』名者,井當沸。」其後晉陵武進縣人於田中得銅鐸五枚,歷陽縣

噗著江赋,其辭甚偉,爲世所稱。後復作南郊賦,帝見而嘉之,以爲著作佐郎。于時陰

陽錯繆,而刑獄繁興,璞上疏曰:

臣聞春秋之義,貴元愼始,故分至啓閉以觀雲物,所以顯天人之統,存休咎之徵。

列

燭。 者屬坎,羣陰之府,所以照察幽情,以佐太陽者也。太白,金行之星,而來犯之,天意若 感動靈變,致若斯之怪邪!明皇天所以保祐金家,子愛陛下,屢見災異,殷勤無已。陛 年十二月中,行丞相令史淳于伯刑於市,而血逆流長摽。旧者小人,雖罪在未允,何足 去秋以來,沈雨跨年,雖爲金家涉火之祥,然亦是刑獄充溢,怨歎之氣所致。往建興四 臣 下宜側身思懼,以應靈譴。皇極之讁,事不虛降。不然,恐將來必有愆陽苦雨之災,崩 爲廢水之氣來見乘,加升陽未布,隆陰仍積,坎爲法象,刑獄所麗,變坎加離,厥象不 震薄蝕之變,狂狡蠢戾之妖,以益陛下旰食之勞也。 曰刑理失中,自壞其所以爲法者也。 臣術學庸近,不練內事,卦理所及,敢不盡言。 又 「不揆淺見,輒依歲首粗有所占,卦得解之旣濟。案爻論思,方涉春木王龍德之時,而 以義推之,皆爲刑獄殷繁,理有壅濫。[三]又去年十二月二十九日,太白蝕月。月

傲者所以招患,此自然之符應,不可不察也。案解卦繇云:「君子以赦過宥罪。」旣濟 斃之人應蒼生以悅育,否滯之氣隨谷風而紓散。 此亦寄時事以制用,藉開 塞 而曲成 云:「思患而豫防之。」臣愚以爲宜發哀矜之詔,引在予之責,蕩除瑕釁,贊陽布惠,使幽 邁政。故木不生庭,太戊無以隆,雉不鳴鼎,武丁不爲宗。夫寅畏者所以饗福,怠 臣謹尋按舊經,尚書有五事供禦之術,京房易傳有消復之救,所以緣咎而致慶,因

者也。

宗,聰悟獨斷,可謂令主,然厲意刑名,用虧純德。 秕政作,懲勸不明則善惡渾,此有國者之所愼也。 **遐武,祥靈表瑞,人鬼獻謀,應天順時,殆不尙此。 然陛下卽位以來,中興之化未闡,雖** 亦豈惟古人!是以敢肆狂瞽,不隱其懷。若臣言可採,或所以爲塵露之益,若不足採, 之糟粕者乎!夫無爲而爲之,不宰以宰之,固陛下之所體者也。 <u>廖</u>,猶能遵蓋公之一言,倚淸靖以鎭俗,寄市獄以容非,德音不忘,流詠于今。 漢之中 躬綜萬機,勞逾日昃,玄澤未加於羣生,聲敎未被乎宇宙,臣主未寧于上,黔細未輯于 之略未震,而軌物之迹屢遷。 下,鴻鴈之詠不興,康哉之歌不作者,四何也。杖道之情未著,而任刑之風先彰,經國下,鴻鴈之詠不興,康哉之歌不作者,四何也。杖道之情未著,而任刑之風先彰,經國 所以廣聽納之門。 臣竊觀陛下貞明仁恕,體之自然,天假其祚,奄有區夏,啓重光於已昧,廓四祖之 願陛下少留神鑒,賜察臣言。 夫法令不一則人情惑,職次數改則覬覦生,官方不 老子以禮爲忠信之薄,況刑又是禮 臣竊爲陛下惜之。 恥其君不爲堯舜者, 夫以區區 之曹 審則

疏奏,優詔報之。

其後日有黑氣,噗復上疏曰:

臣 .以頑昧,近者冒陳所見,陛下不遺狂言,事蒙御省。 伏讀聖詔, 歡懼交戰。

列傳

變也。 首供禦之義不顯,消復之理不著之所致也。計去微臣所陳,未及一月,而便有此變,益 之氣共相薄擊,良久方解。案時在歲首純陽之月,日在癸亥全陰之位,而有此異,殆元 云升陽未布,隆陰仍積,坎爲法象,刑獄所麗,變坎加離,厥象不燭,疑將來必有薄蝕之 此月四日,日出山六七丈,精光潛昧,而色都赤,中有異物大如雞子,又有青黑

明皇天留情陛下懇懇之至也。

懼詩人,無日天高,其鑒不遠。故宋景言善,熒惑退次,光武寧亂,呼沲結冰。 靈譴,敬天之怒,施沛然之恩,諧玄同之化,上所以允塞天意,下所以弭息羣謗。 人之懸符,有若形影之相應。應之以德,則休祥臻,酬之以怠,則咎徵作。陛下宜恭承 往年歲末,太白蝕月,今在歲始,日有咎讁。曾未數旬,大眚再見。日月告釁,見 此明天

者。此國家大信之要,誠非微臣所得干豫。今聖朝明哲,思弘謀猷,方闢四門以亮采, 訪輿誦於羣心,況臣蒙珥筆朝末,而可不竭誠盡規哉! 事之善,然不得不作者,須以救弊故也。今之宜赦,理亦如之。 臣聞人之多幸,國之不幸。赦不宜數,實如聖旨。臣愚以爲子產之鑄刑書,非政 隨時之宜,亦聖人所善

| 蹼亦以才學見重,埓於嶠、亮,論者美之。然性輕易,不修威儀,嗜酒好色,時或過度。著作 頃之,遷尙書郎。數言便宜,多所匡益。明帝之在東宮,與溫嶠、庾亮並有布衣之好,

郎干寶常誠之曰:「此非適性之道也。」璞曰:「吾所受有本限,用之恒恐不得盡,卿乃憂酒色

之爲患乎」

蹼旣好卜筮,縉紳多笑之。又自以才高位卑,乃著客傲,其辭曰:

之毛,至而不得絕霞肆、跨天津者,未之前聞也。」 韵,而希風乎嚴先,徒費思於鑽味,摹洞林乎連山,尚何名乎!夫攀驪龍之髯,撫翠禽 價不登乎千金。傲岸榮悴之際,頡頏龍魚之間,進不爲諧隱,退不爲放言,無沈冥之 旣以拔文秀於叢薈,蔭弱根於慶雲,陵扶搖而竦翮,揮淸瀾以濯鱗,而響不徹於一皐, 客傲郭生曰:「玉以兼城爲寶,士以知名爲賢。明月不妄映,蘭葩豈虛鮮。今足下

郭生粲然而笑曰:「鷦鷯不可與論雲翼,井蛙難與量海鼈。 雖然,將袪子之惑,訊

以未悟,其可乎?

于一朝,豈惟豐沛之英,南陽之豪!昆吾挺鋒,驌驦軒髦,杞梓競敷,蘭荑爭翹,嚶聲冠 於伐木,援類繁乎拔茅。是以水無浪士,巖無幽人,刈蘭不暇,爨桂不給,安事錯薪乎! 之會逸翰,爛若溟海之納奔濤,不煩咨嗟之訪,不假蒲帛之招,羈九有之奇駿,咸總之 且夫窟泉之潛不思雲暈,熙冰之采不羨旭晞,混光耀於埃藹者,亦曷願滄浪之 乃者地維中絶,乾光墜采,皇運暫迴,廓祚淮海。龍德時乘,羣才雲駭,藹若鄧林

列

溢,懸象之節,渙沍期於寒暑,凋蔚要乎春秋。青陽之翠秀,龍豹之委穎,駿狼之長暉, 豪,不小太山。蚊淚與天地齊流,蜉蝣與大椿齒年。然一闔一開,兩儀之跡,一沖一 意非我意,意得非我懷。寄羣籟乎無象,域萬殊于一歸。不壽殤子,不夭澎涓,不壯秋 傲俗者不得以自得,默覺者不足以涉無。故不恢心而形遺,不外累而智喪,無巖穴而 玄陸之短景。故阜壤爲悲欣之府,胡蝶爲物化之器矣。 冥寂,無江湖而放浪。玄悟不以應機,洞鑒不以昭曠。不物物我我,不是是非非。忘 驪不騂,支離其神,蕭悴其形。 形廢則神王,跡粗而名生。體全者爲犧,至獨者不孤,

者乎!若乃莊周偃蹇於漆園,老萊婆娑於林窟,嚴平澄漠於塵肆,梅眞隱淪乎市卒,梁 薺,擁壁而歎抱關。戰機心以外物,不能得意於一弦。悟往復於嗟歎,安可與言樂天 於數賢,故寂然玩此員策與智骨。」 生吟嘯而矯跡,焦先混沌而槁杌,CKI 阮公昏酣而賣傲,翟叟遁形以倏忽。 吾不能幾韵 夫欣黎黄之音者,不顰蟪蛄之吟, 豁雲臺之觀者,必閟帶索之歡。 縱蹈而詠採

|永昌元年,皇孫生,|蹼上疏曰:

所以興也;亡而自以爲存者,三季之所以廢也。是以古之令主開納忠讜,以弼其違;摽 太明,刑敎太峻。故水至淸則無魚,政至察則衆乖,此自然之勢也。 公也。臣竊惟陛下符運至著、勳業至大,而中興之祚不隆、聖敬之風未躋者,殆由法令 顯切直,用攻其失。至乃聞一善則拜,見規誡則懼。何者?蓋不私其身,處天下以至 有道之君未嘗不以危自持,亂世之主未嘗不以安自居。故存而不忘亡者,三代之

雖勢無所至,然不可不虞。案洪範傳,君道虧則日蝕,人憤怨則水涌溢,陰氣積則下代 甚惡之。頃者以來,役賦轉重,獄犴日結,百姓困擾,甘亂者多,小人愚嶮,共相扇惑。 秋以來,諸郡並有暴雨,水皆洪潦,歲用無年。適聞吳興復欲有構妄者,咎徵漸成,臣 然,將來必有愆陽苦雨之災,崩震薄蝕之變,狂狡蠢戾之妖。其後月餘,日果薄鸝。 上。此微理潛應已著實於事者也。假令臣遂不幸謬中,必貽陛下側席之憂。 臣去春啓事,以囹圄充斥,陰陽不和,推之卦理,宜因郊祀作赦,以蕩滌瑕穢。 去

崇恩布澤,則火氣潛消,災譴不生矣。 陛下上承天意,下順物情,可因皇孫之慶大赦**天** 下。然後明罰敕法,以肅理官,克厭天心,慰塞人事,兆庶幸甚,禎祥必臻矣。 个皇孫載育,天固靈基,點首顒顒,實望惠潤。 又歲涉午位,金家所忌。 宜於此時 臣今所陳,暫而省之,或未允聖旨,久而尋之,終亮臣誠。若所啓上合,願陛下勿

以臣身廢臣之言。 臣言無隱,而陛下納之,適所以顯君明臣直之義耳。

疏奏,納焉,即大赦改年。

肆其邪變也。臣愚以爲陰陽陶烝,變化萬端,亦是狐貍魍魎憑假作慝。願陛下採臣愚懷, 近紫闈。若以谷或是神祇告譴、爲國作眚者,則當克己修禮以弭其妖,不宜令谷安然自容, 殿省之側,塵點日月,穢亂天聽,臣之私情竊所以不取也。陛下若以俗信爲神靈所憑者,則 默居正,動遵典刑。案周禮,奇服怪人不入宮,況谷妖詭怪人之甚者,而登講肆之堂,密邇 狀,引之禁內,供給安處。臣聞爲國以禮正,不聞以奇邪。所聽惟人,故神降之吉。陛下簡 術。帝留谷于宮中。璞復上疏曰:「任谷所爲妖異,無有因由。 特遣谷出。臣以人乏,忝荷史任,敢忘直筆,惟義是規。」其後元帝崩,俗因亡走。 應敬而遠之。夫神,聰明正直,接以人事。若以俗爲妖蠱詐妄者,則當投畀裔土,不宜令褻 月將產,羽衣人復來,以刀穿其陰下,出一蛇子便去。浴遂成宦者。 時暨陽人任谷因耕息於樹下,忽有一人著羽衣就淫之,旣而不知所在,谷遂有娠。 陛下玄鑒廣覽,欲知其情 後詣闕上書,自云有道

有美名,爲敦所重,未幾而沒。撲哭之哀甚,呼曰:「嗣祖,嗣祖,焉知非福」,未幾而敦作難。 沙 璞以母 漲 ,去墓數十里皆爲桑田。未春,<u>王</u>敦起璞爲記室參軍。是時顯川陳述爲大將軍掾, 憂去職,卜葬地於暨陽,去水百步許。人以近水爲言,璞曰:「當卽爲陸矣。」其 7. 傅第四十二 郭璞

但禍吾,卿亦不免矣。天實爲之,將以誰咎」」璞終嬰王敦之禍,彝亦死蘇峻之難 |璞曰:「卿來,他處自可徑前,但不可廁上相尋耳。 必客主有殃。」|彝後因醉詣璞,正逢在廁, 邪。」答曰:「能致天子問耳。」帝甚異之。樸素與桓蘇友善,彝每造之,或值璞在婦間,便入。 以葬龍角,此法當滅族。主人曰:「郭璞云此葬龍耳,不出三年當致天子也。」帝曰:「出天子 時明帝卽位踰年,未改號,而熒惑守房。」璞時休歸,帝乃遣使齎手詔問璞。 掩而觀之,見璞躶身被髮,銜刀設醱。璞見彝,撫心大驚曰:「吾每屬卿勿來,反更如是!非 言曰赤鳥見。 蹼乃上疏請改年肆赦,文多不載。蹼嘗爲人葬,帝微服往觀之,因問主人何 會暨陽縣復上

之。曰:「南岡頭。」璞曰:「必在雙柏樹下。」旣至,果然。復云:「此樹應有大鵲巢。」衆索之 怒曰:「卿壽幾何。」曰:「命盡今日日中。」敦怒,收璞,詣南岡斬之。 璞臨出,謂行刑者欲何 構璞於敦。敦將舉兵,又使璞筮。璞曰:「無成。」敦固疑璞之勸嶠、亮,又聞卦凶,乃問<u>璞</u> 吉。」嶠等退,相謂曰:「璞對不了,是不敢有言,或天奪|敦魄。今吾等與國家共舉大事,而璞 曰:「卿更筮吾壽幾何。」答曰:「思向卦,明公起事,必禍不久。 若住武昌,壽不可測。」敦大 云大吉,是爲舉事必有成也。」於是勸帝討敦。初,璞每言「殺我者山宗」,至是果有姓崇者 王敦之謀逆也,溫嶠、庾亮使璞筮之,璞對不決。 嶠、亮復令占己之吉凶,璞曰:「大

呼其 、姓名,因以袴褶遺之。 其人辭不受,璞曰:「但取,後自當知。」其人遂受而去。 至是,果

此人行刑。時年四十九。及王敦平,追贈弘農太守。

歎恨。 帝卽位,將改元爲建元,或謂庾冰曰:「子忘郭生之言邪。 丘山上名,此號不宜用。」冰撫心 狗,蘊甚怪之。 所由來,其妾祕愛之,不令鹽知。 得発乎」其年翼卒。 墓碑生金。 若墓碑生金,庾氏之大忌也。」後冰子蘊爲廣州刺史,妾房內忽有一新生白狗子,莫知 初 ,庾翼幼時嘗令璞筮公家及身,卦成,曰:「建元之末丘山傾,長順之初子凋零。」及康 及帝崩,何充改元爲永和,庾翼歎曰:「天道精微,乃當如是。長順者,永和也,吾庸 俄而爲桓溫所滅,終如其言。 將出,共視在衆人前,忽失所在。 冰又令筮其後嗣,卦成,曰:「卿諸子並當貴盛,然有白龍者,凶徵至 狗轉長大, 蘊入, 見狗眉眼分明, 又身至長而弱, 異於常 蹼之占驗、皆如此類也。 蘊慨然曰:「殆白龍乎! 庾氏禍至矣。」又

萬言,皆傳於世。所作詩賦誄頌亦數萬言。子驚,官至臨賀太守。 注釋爾雅,別爲音義、圖譜。 又注三蒼、方言、穆天子傳、山海經及楚辭、子虛、 **| 璞撰前後筮驗六十餘事,名爲洞林。** 又抄京、費諸家要最,更撰新林十篇、小韵一篇。

葛洪

好神仙 隱學,悉得其法焉。 學,目擊而已,各無所言。時或尋書問義,不遠數千里崎嶇冒涉,期於必得,遂究覽典籍,尤 好學,家貧,躬自伐薪以貿紙筆,夜輒寫書誦習,遂以儒學知名。 局幾道,摴蒲齒名。爲人木訥,不好榮利,閉門却掃,未嘗交游。 葛洪字稚川,丹楊句容人也。祖系,吳大鴻臚。父悌,吳平後入晉,爲邵陵太守。 洪傳玄業,兼綜練醫術,凡所著撰,皆精覈是非,而才章富贍。 導養之法。從祖玄,吳時學道得仙,號曰葛仙公,以其鍊丹祕術授弟子鄭隱。 後師事南海太守上黨鮑玄。〔七〕玄亦內學,逆占將來,見洪深重之,以女 性寡欲,無所愛翫,不知棊 於餘杭山見何幼道、郭文 洪少 洪就

尉,攻冰別率,破之,遷伏波將軍。冰平,洪不論功賞,徑至洛陽,欲搜求異書以廣其學。 太安中,石冰作亂,吳興太守顧祕爲義軍都督,與周玘等起兵討之,祕檄洪爲將兵都

和初 檄命 以 騎常侍,領 洪資高 留不 洪 司 無所就。 見天下已亂,欲避地南土,乃參廣州刺史嵇含軍事。 徒導召補 聽去,洪乃止羅浮山煉丹。 不 大著作,洪固辭不就。 許。 後還鄉里,禮辟皆不赴。 洪曰:「非欲 州主簿,轉司徒掾,遷諮 爲榮, 以年老,欲錬丹以祈 | 嶽表補東官太守,又辭不就。 以有 議 丹耳。」 元帝爲丞相,辟爲掾。 參軍。 帝從之。 干寶深相親友,薦洪 遐壽,聞交阯 洪遂將子姪俱行。 及含遇害,遂停南土多年,征鎮 以平賊功,賜爵關內侯。咸 嶽乃以洪兄子望爲記室 出丹,求爲句属 才堪 國 至廣州 史,選爲散 令。 ,刺史 帝

列

參軍。在山積年,優游閑養,著述不輟。其自序曰:

之軌;飾嫫母之篤陋,云求媒陽之美談;推沙礫之賤質,索千金於和肆哉!夫僬僥之 以至駑之蹇足。自卜者審,不能者止,又豈敢力蒼蠅而慕沖天之舉,策跛鼈而追飛兔 獪 權貴之家,雖咫尺弗從也,知道之士,雖艱遠必造也。 是以望絕於榮華之途,而志安乎窮圮之域,藜藿有八珍之甘,蓬蓽有藻稅之樂也。故 步而企及夸父之蹤,近才所以躓礙也,要離之羸而强赴扛鼎之勢,秦人所以斷筋 難 欲戢勁翮於鷦鷃之羣,藏逸迹於跛驢之伍,豈況大塊稟我以尋常之短羽,造化假我 可卒解,自非至精不能尋究,自非篤勤不能悉見也。 洪體乏進趣之才,偶好無爲之業。假令奮翅則能陵厲玄霄,騁足則能追風躡景, 考覽奇書,既不少矣,率多隱語, 也。

故予所著子言黃白之事,名曰內篇, 論 蓋 所從,而意之所疑又無足諮。 其 粗言較略以示一 所先覺者耳。 雖不足藏諸名山,且欲緘之金匱,以示識者。 道 士弘博洽聞者寡,而意斷妄說者衆。 隅,冀悱憤之徒省之可以思過半矣。 世儒徒知服膺周孔,莫信神仙之書,不但大而笑之,又將謗毀眞正。 **今爲此書**, 其餘駁難通釋, 名曰外篇, 大凡內外一百一十六 粗舉長 至於時有好事者,欲有所修爲,倉卒不知 生之理。 **豈謂闇塞必能** 其至妙者不得宣之於翰墨, 窮微暢遠乎,聊

等傳各十卷,又抄五經、史、漢、百家之言、方技雜事三百一十卷,金匱藥方一百卷,肘後要 自號抱朴子,因以名書。其餘所著碑誄詩賦百卷,移檄章表三十卷,神仙、良吏、隱逸、集異

急方四卷。

當遠行尋師,剋期便發。」嶽得疏,狼狽往別。而洪坐至日中,兀然若睡而卒,嶽至,遂不及 時年八十一。視其顏色如生,體亦柔軟,舉尸入棺,甚輕,如空衣,世以爲尸解得仙云。 洪博聞深洽,江左絕倫。 著述篇章富於班馬,又精辯玄賾,析理入微。後忽與嶽疏云:

自然。 奇;襲文雅於西朝,振辭鋒於南夏,爲中興才學之宗矣。 化仙都,窮九丹之祕術。 所謂攻乎異端,斯害也已,悲夫! 雅川束髮從 於時,區區然寄客傲以申懷,斯亦伎成之累也。 鄙乎茲道。 刀被髮,遑遑於幽穢之間 史臣曰:景純篤志綈緗,洽聞强記,在異書而畢綜,瞻往滯而咸釋,情源秀逸,思業高 雖稽象或通,而厭勝難恃,稟之有在,必也無差,自可居常待終,穨心委運,何至銜 景純之探策定數,考往知來,邁京管於前圖,軼梓竈於遐篆。而宦微於世,禮薄 哉 謝浮榮而捐雜藝,賤尺寶而貴分陰,游德棲眞,超然事外。 ! 晚抗忠言,無救王敦之逆,初慚智免,竟斃「山宗」之謀。 師,老而忘倦。 若乃大塊流形,玄天賦命,吉凶修短,定乎 夫語怪徵神,伎成則賤,前修貽訓, 紬奇册府,總百代之遺編,紀 全生之

列傳

第四十

葛

洪

校勘記

道,其最優乎!

贊曰:景純通秀,夙振宏材。 沈研鳥册,洞曉龜枚。 匪寧國釁,坐致身災。 稚川優洽,

貧而樂道。 載範斯文,永傳洪藻。

校勘記

(1) 此物見死馬 「死馬」,各本作「馬死」,今從宋本。 通志一二七、册府八七六及搜神記皆作「死

馬」

[二] 匪兕匪武 「武」本作「虎」、蓋唐人避諱改。

理有壅濫 「理」下各本行「者」字,今從宋本。冊府五二八亦無「者」字。

康哉之歌 「康哉」,各本作「康衢」,今從宋本。通志一二七及册府五二八均作「康哉」,用書「庶

事康哉」之義。康衢謠固見列子,然晚出,似以「康哉」爲確。

【五〕撫翠禽之毛 各本「毛」下衍一「者」字、今依殿本删

焦先混沌而槁杌 「焦先」,各本誤作「焦光」,今從宋本。

南海太守上黨鮑玄 鮑靚傳云、靚字太玄、爲南海太守。則此「玄」字上脫「太」字,或雙名單稱。

[C] 飾嫫母之篤陋 魯藩刻本扼於子「篤陋」作「陋醜」。

晉書卷七十三

列傳第四十三

庾亮子彬羲龢弟懌冰條翼

亮妹爲皇太子妃,亮固讓,不許。轉丞相參軍。 累遷給事中、黃門侍郎、散騎常侍。時王敦在蕪湖,帝使亮詣敦籌事。敦與亮談論,不覺改 峻整,動由禮節,閨門之內不肅而成,時人或以爲夏侯太初、陳長文之倫也。年十六,東海 之好。時帝方任刑法,以韓子賜皇太子,亮諫以申韓刻薄傷化,不足留聖心,太子甚納焉 王越辟爲掾,不就,隨父在會稽,嶷然自守。 時人皆憚其方儼,莫敢造之。 元帝爲鎭東時,聞其名,辟西曹掾。及引見,風情都雅,過於所望,甚器重之。由是聘 庾亮宇元規,明穆皇后之兄也。父踩,在外戚傳。 中興初,拜中書郎,領著作,侍講東宮。其所論釋,多見稱述。與溫嶠俱爲太子布衣 預討華軼功,封都亭侯,轉參丞相軍事,掌 亮美姿容,善談論,性好莊老,風格

列

席 而前,退而歎曰:「庾元規賢於裴頠遠矣」」因表爲中領軍。

明帝即位,以爲中書監,亮上書讓曰:

姻,遂階親寵,累忝非服。 求食而已。不悟徼時之福,遭遇嘉運。 進,日爾一日,謗讟旣集,上塵聖朝。 臣凡庸固陋,少無殊操,昔以中州多故,舊邦喪亂,隨侍先臣遠庇有道,爰容逃難, 無勞受遇,無與臣比。 弱冠濯纓,沐浴芳風,頻煩省闥,出總六軍,十餘年間,位超 小人祿薄,福過災生,止足之分,臣所宜守。 始欲自聞,而先帝登遐,區區微誠,竟未上達。 先帝龍興,垂異常之顧,旣眷同國士,又申以婚 而偷榮昧

原七族、東京六姓皆非姻族,各以平進,縱不悉全,決不盡敗。今之盡敗,更由 私其姻,人皆有私,則天下無公矣。是以前後二漢,咸以抑后黨安,進婚族危。 嫌,與骨肉中表不同。雖太上至公,聖德無私,然世之喪道,有自來矣。悠悠六合,皆 復以臣領中書。 陛下踐阼,聖政惟新,宰輔賢明,庶僚咸允,康哉之歌實存于至公。 臣領中書,則示天下以私矣。 何者。臣於陛下,后之兄也。 而國恩不已, 烟呢 向使西 姻婭之

有不允,罪不容誅。身旣招殃,國爲之弊。其故何邪?由姻媾之私羣情之所不能免, 至於外戚,憑託天地,連勢四時,根援扶疏,重矣大矣。 臣歷觀庶姓在世,無黨於朝,無援於時,植根之本輕也薄也。苟無大瑕,猶或見 而或居權寵,四海側目,事

以此招禍,可立待也。 至公。今以臣之才,[1] 兼如此之嫌,而使內處心膂,外總兵權,以此求治,未之聞也; 可爲寒心者也。 是以疏附則信, 姻進則疑。 夫萬物之所不通,聖賢因而不奪。 雖陛下二相明其愚款,朝士百僚頗識其情,天下之人安可門到 疑積於百姓之心,則禍成於重閨之內矣。 冒親以求一寸之用,未若防嫌以明 此皆往代成鑒,

鑒,察臣之愚,則臣雖死之日,猶生之年矣。 是以悾悾屢陳丹款。而微誠淺薄,未垂察諒, 臣 |雖不達,何事背時違上,自貽患責邪。 實仰覽殷鑒,量已知弊,身不足惜,爲國 夫富貴榮寵,臣所不能忘也,刑罰貧賤,臣所不能甘也。今恭命則愈,違命則苦, 憂惶屛營不知所措。願陛下垂天地之 取悔,

戶說使皆坦然邪

疏奏,帝納其言而止。

追亢。事平,以功封永昌縣開國公,賜絹五千四百匹,固讓不受。轉護軍將軍。 |敦舉兵,加亮左衞將軍,與諸將距錢鳳。及沈充之走吳興也,又假亮節、都督東征諸軍事, 王敦旣有異志,內深忌亮,而外崇重之。亮憂懼,以疾去官。復代王導爲中書監。 及

與西陽王羕將有 及帝疾篤,不欲見人,羣臣無得進者。撫軍將軍、南頓王宗,右衞將軍虞胤等,素被親 異謀。亮直入臥內見帝,流涕不自勝。旣而正色陳漾與宗等謀廢大

臣,規共輔 韶輔幼主。 :政,社稷安否,將在今日,辭旨切至。 加亮給事中,徙中書令。 太后臨朝,政事一決於亮。 帝深感悟,引亮升御座,遂與司徒王導受遺

陶侃 族元老,又先帝保傅,天下咸以亮翦削宗室。 聲援,修石頭以備之。 、祖約不在其例,GBl侃、約疑亮删除遺韶,並流怨言。 先是,王導輔政,以寬和得衆,亮任法裁物,頗以此失人心。又先帝遺詔褒進大臣,而 會南頓王宗復謀廢執政,亮殺宗而廢宗兄蒙。宗,帝室近屬,蒙,國 亮懼亂,於是出溫嶠爲江州以廣

亮並不聽,而報嶠書曰:「吾憂西陲過於歷陽,足下無過雷池一步也。」旣而峻將韓晃寇宜 船上咸失色欲散。 軍未及陣,士衆棄甲而走。「亮乘小船西奔,亂兵相剝掠,亮左右射賊,誤中柂工,應弦而倒, 城,亮遣距之,不能制,峻乘勝至于京都。 止之,皆不納。 多納亡命,專用威刑,亮知峻必爲禍亂,徵爲大司農。 琅邪 人下咸,宗之黨也,與宗俱誅。 峻遂與祖約俱舉兵反。 亮不動容,徐曰:「此手何可使著賊」」衆心 溫嶠聞峻不受詔,便欲下衞京都,三吳又欲起義兵, 咸兄闡亡奔蘇峻,亮符峻送闡,而峻保匿之。 詔假亮節、都督征討諸軍事,戰于建陽門外。〔三〕 舉朝謂之不可,平南將軍溫嶠亦累書 乃安。 |峻又

嶠推陶侃爲盟主。侃至尋陽,旣有爐於亮,議者咸謂侃欲誅執政以謝天下。 院攜其三弟懌、條、翼南奔溫嶠,嶠素**欽重**亮,雖在奔敗,猶欲推爲 都統。 亮甚懼, 及見 亮固 辭,乃與

便談宴終日。 侃 ,引咎自責,風 亮噉薤,因留白。 止可觀。 侃不覺釋然,乃謂亮曰"「君侯修石頭以擬老子,今日反見求耶」」 侃問曰:「安用此爲。」亮云:「故可以種。」侃於是尤相稱歎

云:「非惟風流,兼有爲政之實。」

敗, |峻軍乃退,追斬數百級。 也」亮時以二千人守白石壘,峻步兵萬餘,四面來攻,衆皆震懼。 君侯始二。當今事急,不宜數耳。」又曰:「朝政多門,用生國 旣至石頭,亮遣督護王彰討峻黨張曜,反爲所敗。 **亮送節傳以謝侃,侃答曰:「古人三** 禍。 亮激厲將士, 並殊死戰, 喪亂之來, 豈獨 由峻

乞骸骨, |峻平,帝幸溫嶠舟,亮得進見,稽顙鯁噎, 詔羣臣與亮俱升御坐。 欲闔門投竄山海。 帝遣尚書、侍中手詔慰喻:「此社稷之難,非舅之責也。」院上 亮明日又泥首謝罪,

德授、蓋 貫自然,哀悲眷戀,不敢違距。 敢告退,遂隨牒展轉,便煩顯任。先帝不豫,臣參侍醫藥,登遐顧命,又豫聞後事,豈云 加 以陛 臣 下 凡鄙小人,才不經世,階緣戚屬,累忝非服,叨竊彌重,謗議彌興。皇家多難,未 以親也。臣知其不可,而不敢逃命,實以田夫之交猶有寄託,況君臣之義,道 初 在諒闇,先后親覽萬機,宣通外內,臣當其地,是以激節驅馳, 且先帝謬顧,情同布衣,旣今恩重命輕,遂感遇忘身。 不敢依違。

列

傅

雖知無補, 內,退不能推賢宗長,遂使四海側心,謗議沸騰。 志以死報。 而才下位高,知進忘退,乘寵驕盈,漸不自覺。進不能撫寧外

甚!不能伏劍北闕,偸存視息,雖生之日,亦猶死之年,朝廷復何理齒臣於人次,臣亦 **遐,陛下旰食踰年,四海哀惶,肝腦塗地,臣之招也,臣之罪也。** 何顏自次於人理! **所不覆,地所不載。陛下矜而不誅,有司縱而不戮。自古及今,豈有不忠不孝如臣之** 不足以謝祖宗七廟之靈,臣灰身滅族,不足以塞四海之責。臣負國家,其罪莫大,實天 祖約、蘇峻不堪其憤,縱肆兇逆,事由臣發。 社稷傾覆,宗廟虛廢,先后以憂逼登 朝廷寸斬之,屠戮之,

願陛下覽先朝謬授之失,雖垂寬宥,全其首領,猶宜棄之,任其自存自沒,則天下 臣欲自投草澤,思諐之心也,而明詔謂之獨善其身。聖旨不垂矜察,所以重其罪

疏奏, 詔曰:

粗知勸戒之綱矣。

省告懇惻,執以感歎,誠是仁舅處物宗之責,理亦盡矣。若大義旣不開塞,舅所執

理勝,何必區區其相易奪!

贼峻姦逆, 書契所未有也。是天地所不容, 人神所不宥。 今年不反, 明年當反, 愚

廟有 智所 伯,席卷來下,舅躬貫甲胄,賊峻梟懸。 乎 ·奉,豈非舅二三方伯忘身陳力之勳邪! 見也。 若以己總率征討,事至敗喪,有司宜明直繩,以肅國體,誠則然矣。 舅與諸公勃然而召,正是不忍見無禮於君者也。 大事旣平,天下開泰,衔得反正,社稷乂安,宗 方當策勳行賞,豈復議旣往之咎乎 論情與義,何得謂之不忠 且舅遂上告方 1

且 天下大弊,死者萬計,而與桀寇對岸。舅且當上奉先帝顧託之旨,弘濟艱難,使

而沖人永有憑賴,則天下幸甚。

進號征 上,至是許之。 遂苦辭不受。 州揚州之江 「夫賞罰黜陟, 趙胤、匡術 頃之,後將軍郭默據湓口 亮 一欲遁 西將軍、開府儀同 西宣城諸軍事、平西將軍、假節、豫州刺史,領宣城內史。原遂受命,鎭蕪湖 逃 進號鎭西將軍, 山 國之大信,竊怪 、劉仕等步騎二萬,會太尉陶侃俱討破之。 陶侃薨,遷亮都督江、荆、豫、益、梁、雍六州諸 海, 自暨陽東出。 三司 、假節。 [矯然獨爲君子。]亮曰:「元帥指撝,武臣效命,亮 以叛、亮表求親 叉固讓。 韶有司錄奪舟船。 亮固讓開府,乃遷鎭武 初, 以誅王敦功,封永昌縣公。 一征,於是以本官加征討都督, 率將軍路永、毛 亮還蕪湖,不受爵賞。 侃移書日: 昌 軍事,領江、荆、豫三州刺史, **亮** 比 陳讓,疏與十 何功之有」

時王導 輔政 ,主幼時艱,務存大綱,不拘細目,委任<u>趙胤、賈寧等諸將,並不奉法,大臣</u>

列

傳

第

四

+

=

庾

亮

七十三 至是,原又欲率衆黜導,又以諮鑒,而鑒又

亮與鏖牋日:

患之。

陶侃嘗欲起兵廢導,而郗鑒不從,乃止。

昔於蕪湖反覆謂彼罪雖重,而時弊國危,且令方嶽道勝,亦足有所鎭壓,故共隱

忍,解釋陶公。自茲迄今,曾無悛改。

于驕姦而遵養之也。趙賈之徒有無君之心,是而可忍,孰不可忍! 之爻,有位無人。挾震主之威以臨制百官,百官莫之敢忤。是先帝無顧命之臣,勢屈 之悖。主上知君臣之道不可以然,而不得不行殊禮之事。萬乘之君,寄坐上九,亢龍 輔導聖躬。春秋旣盛,宜復子明辟。不稽首歸政,甫居師傅之尊,成人之主,方受師臣 意乎!秦政欲愚其黔首,天下猶知不可,況乃欲愚其主哉!主之少也,不登進賢哲以 問未嘗遇君子。侍臣雖非俊士,皆時之良也,知今古顧問,豈與殿中將軍、司馬督同年 而語哉!不云當高選侍臣,而云高選將軍、司馬督,豈合賈生願人主之美,習以成德之 主上自八九歲以及成人,入則在宮人之手,出則唯武官小人,讀書無從受音句,顧

與下官並蒙先朝厚顧,荷託付之重,大姦不掃,何以見先帝於地下!願公深惟安國家、 往釁,懼而修己。如頃日之縱,是上無所忌,下無所憚,謂多養無賴足以維持天下。公 且往日之事,含容隱忍,謂其罪可宥,良以時弊國危,兵甲不可屢動,又冀其當謝

鑒又不許,故其事得息。

願陛下許其所陳,濟其此舉。淮泗壽陽所宜進據,臣輒簡練部分。乞槐棘參議,以定經 衆知存亡,開反善之路,宥逼脅之罪,因天時,順人情,誅逋逆,雪大恥,實聖朝之所先務也。 陽之石城下,幷遣諸軍羅布江沔。比及數年,戎士習練,乘釁齊進,以臨河洛。 强,並佃並守,修進取之備。襄陽北接宛許,南阻漢水,其險足固,其土足食。 城,公爲諸軍聲援,乃上疏曰:「蜀胡二寇凶虐滋甚,內相誅鋤,衆叛親離。 校尉、南郡太守,鎭江陵。以武昌太守陳囂爲輔國將軍、梁州刺史,趣子午。 會寇陷邾城,毛寶赴水而死。亮陳謝,自貶三等,行安西將軍。有詔復位。尋拜司空,餘官 如故,固 萬,回俱成邾城。又以陶稱爲南中郎將、江夏相,率部曲五千人入沔中。 至江陽,執偽荆州刺史李閎、三巴郡太守黃植, 帝下其議。 時石勒新死,亮有開復中原之謀,乃解豫州授輔國將軍毛寶,使與西陽太守樊峻精兵 讓不 時王導與亮意同,都鑒議以資用未備,不可大舉。亮又上疏,便欲遷鎮。 送于京都。亮當率大衆十萬,據石 蜀甚弱而胡尚 亮弟翼爲南蠻 大勢一舉, 又遣 臣宜移鎭襄 偏軍伐

亮自邾城陷沒,憂慨發疾。 列 傳 第 四 + Ξ 庾 亮 會王導薨,徵亮爲司徒、揚州刺史、錄尚書事,又固辭,帝許

印綬。 臣亮死且不朽。」帝從之。亮將葬,何充會之,數曰:「埋玉樹於土中,使人情何能已。」 自效以報天德,何悟身潛聖世,微志長絕,存亡哀恨,痛貫心膂。 請,將迄十年。 之弘,得效所職,事將何論!功將何賞!及後傷蹶,責踰先功,是以陛下優詔聽許。 不踰時,而凶强馘滅。計之以事,則功歸聖主,推之於運,則勝非人力。 咸康六年薨,時年五十二。追贈太尉,諡曰文康。 亮弟冰 上疏曰: 豈直好讓而不肅恭,顧**曩時之釁近出宇下,加先帝神武,算略**棄該,是以役 「臣謹詳先事,亦曾聞臣底對臣等之言,懇懇於斯事。 喪至,車駕親臨。及葬,又贈永昌公 願陛下發明詔,遂先恩,則 至如亮等,因聖略 是以屢自陳 亮實思

避之。亮徐曰:「諸君少住,老子於此處興復不淺。」便據胡牀與浩等談詠竟坐。 己,多此類也。三子:彬、巖、龢。 人」浩慚而退。亮在武昌,諸佐吏殷浩之徒,乘秋夜往共登南樓,俄而不覺亮至,諸人將起 初,亮所乘馬有的顱,殷浩以爲不利於主,勸亮賣之。 亮曰:「曷有已之不安而移之於 其坦率行

|彬年數歲,雅量過人。 溫嶠嘗隱暗怛之,|彬神色恬如也,乃徐跪謂嶠曰:「君侯何至於

此」論者謂不減於亮。蘇峻之亂,遇害。

受恩奕世,思盡絲髮。受任到東,親臨所見,敢緣弘政,獻其丹愚。伏願聽斷之暇,少垂察 **積薪之言。以古況今,所以益其憂懼。陛下明鑒天挺,無幽不燭,弘濟之道,豈待瞽言。** 「陛下以聖明之德,方隆唐虞之化,而事役殷曠,百姓凋殘。 爲勞弊,豈可具言!昔漢文居隆盛之世,躬自儉約,斷獄四百,殆致刑厝。 羲少有時譽,初爲吳國內史。 時穆帝頗愛文義,巖至郡獻詩,頗存諷諫。 以數州之資,經贈四 賈誼歎息,猶 海之務,其 因上表日: 臣

江州刺史。準弟楷,自有傳。 子準,太元中,自侍中代桓石虔爲豫州刺史、西中郎將,鎭歷陽,卒官。 準子悅,義熙中

覽。」其詩文多不載。

羲方見授用而卒。

遠略乏率然之勢。 征 醜 夕。 |荆楚,且田且戍,漸臨河洛,使向化之萌懷德而附,凶愚之徒畏威反善,太平之基,便在於且 類有徒。 夫勤役有勞來之歎。 昔殷伐鬼方,三年而克,樂生守齊,遂至歷載。今皇朝雖隆,無有殷之盛,凶羯雖衰,猶 **龢字道季,好學,有文章。叔父翼將遷襄陽,龢年十五,以書諫曰:「承進據襄陽,耀威** 而沔漢之水,無萬仞之固;方城雖峻,無千尋之險。加以運漕供繼有泝流之艱, 進退惟思,不見其可。 若窮寇慮逼,送死一決,東西互出,首尾俱進,則廩糧有抄截之患, 此明闇所共見,賢愚所共聞,況於臨事者乎!願

列

迴師 北濟,方軌齊進,水陸騁邁,亦不踰旬朔矣。 反旆,詳擇全勝,修城池,立壘壁,勤耕農,練兵甲。 若凶運有極,天亡此虜,則可泛舟 願詳思遠猷,算其可者。」翼甚奇之。

子恒,尚書僕射,贈光祿大夫。 升平中,代孔嚴爲丹楊尹,表除重役六十餘事。[+]太和初,代王恪爲中領軍,卒於官·

門霍佐 遷輔 可以 亮上疏曰:「懌御衆簡而有惠,州戶雖小,賴其寬政。 佐等同惡,大數不多。 院總統六州,以**懌寬厚容衆,故授以遠任,爲東西勢援。** 封廣饒男,出補臨川太守,歷監梁、雍二州軍事,轉輔國將軍、梁州刺史、假節,鎭魏興。時兄 選綱紀,以懌爲功曹,除暨陽令,又爲沖中軍司馬,轉散騎侍郎,遷左衞將軍。 (一安隱,無復怵惕。」從之。後以所鎭險遠,糧運不繼,詔懌以將軍率所領還屯半洲。 小故輕議進退。其文武之心轉已安定,賊帥艾秀遣使歸誠,上洛附賊降者五百餘口, 國將軍、豫州刺史,進號西中郎將、監宣城廬江歷陽安豐四郡軍事、假節,鎭蕪湖 懌字叔預,少以通簡爲兄亮所稱。 迎將士妻子,佐驅三百餘口亡入石季龍。 弱冠,西陽王羕辟,不就。 院表上, 貶懌爲建威將軍。 尋進監秦州

氐

羌

諸

軍

事。

<br 東海王沖爲長水校尉,清 且懌名號大,不 朝議欲召還, 以討蘇峻功,

天下, 嘗以毒酒餉江州刺史王允之。 弦繁奏, 夔牙先聆其音。 懌之上扇, 以好不以新。」後懌聞之, 曰:「此人宜在帝之左右。」又 小舅復欲爾邪!懌聞, 王允之覺其有毒,飲犬,犬斃, 遂飲鴆而卒, 時年五十。 贈侍中、 乃密奏之。 衛將軍, [公] 諡曰簡。 帝曰:「大舅已亂

統 ,夷護軍、專陽太守。年二十九,卒,時人稱其才器,甚痛惜之。子玄之,官至宣城內史。 統字長仁,少有令名,司空、太尉辟,皆不就。 調補撫軍、會稽王司馬,出爲建威將軍、

爲 庾氏之寶。 冰 字季堅。 司 兄亮以名德流訓,冰以雅素垂風,諸弟相率莫不好禮,爲世論所重,亮常以 徒辟,不就,徵祕書郎。預討華軼功,封都鄉侯。 王導請爲司徒右長史,出

補吳國內史。[五]

京都。 侍郎, 峻 別率張健於吳中。 尋入 會 又讓 又遣 蘇峻作逆,遣兵攻冰,冰不能禦,便棄郡奔會稽。 爲中書 不拜。 司馬滕含攻賊石頭城,拔之。 監 司空都鑒請爲長史,不就。 揚 時健黨甚衆,諸將莫敢先進。冰率衆擊健走之,於是乘勝西進, 州刺史、都督揚豫院三州軍事、征虜將軍、假節 冰勳爲多,封新吳縣侯,固辭不受。遷給事黃門 出補振威將軍、會稽內史。 會稽內史王舒以冰行奮武將軍,距 徵爲領軍將軍,又 赴于

列

軍實。 司,惠臣所乞,則愚臣之願於此畢矣。」許之。 此之厚幸,可謂弘矣,豈復得計勞納封,受賞司 功於大罪之後,建義於顚覆之餘,此是臣等所以復得視息於天壤,王憲不復必明於往諐也。 明,夷戮久矣。 消禦之道。」冰曰:「玄象豈吾所測,正當勤盡人事耳。」又隱實戶口,料出無名萬餘人,以充 殷融諫之,冰曰:「前相之賢,猶不堪其弘,況吾者哉!」范汪謂冰曰:「頃天文錯度,足下宜盡 夙夜,賓禮 是時王導新 詔復論前功,冰上疏曰:「臣門戶不幸,以短才贊務,釁及天庭,殃流邦族,若晉典休 朝賢、升擢後進、由是朝野注心、咸曰賢相。初、導輔政、每從寬惠、冰頗任威刑 而于時顚沛,刑憲暫墜,遂令臣等復得爲時陳力。 i.喪,人情恇然。

冰兄亮旣固辭不入,衆望歸冰。旣當重任,經綸時務,不捨 勳哉!願陛下曲降靈澤,哀恕由中,申命有 徇國之臣,因之而奮,立

領江州刺史、假節,鎭武昌,以爲翼援。 乃求外出。 「是必虚妄。」推問,果詐,衆心乃定。進號左將軍。 成帝疾篤,時有妄爲尚書符,[10]敕宮門宰相不得前,左右皆失色。冰神氣自若,曰: 會弟翼當伐石季龍,於是以本號除都督江荆寧益梁凌廣七州豫州之四郡 冰臨發,上疏曰: 康帝卽位,又進 車騎 將軍。 冰懼權

器,與時殲落,遂令天眷下墜,降及臣身。俯仰伏事,於今五年。上不能光贊聖猷,下 臣因循家寵,冠冕當世,而志無殊操,量不及遠。 頃皇家 多難,釁故頻仍,朝望國

不能緝熙政道,而陛下遇之過分,求之不已,復策敗駕之駟,以冀萬里之功,非天眷之

隆,將何以至此!是以敢竭狂瞽,以獻血誠,願陛下暫屏旒纊,以弘聽納。

伏膺,猶不能暢,臨疏徘徊,不覺辭盡。 將相,或借訟輿人,或求謗芻蕘,良有以也。況今日之弊,開闢之極,而陛下曆數屬當 行之難,安之難也。」願陛下旣思日側於勞謙,納其起予之情,則天下幸甚矣。臣朝夕 躬儉節用,堯舜豈遠!大布之衣,衞文何人!是以古人有云:「非知之難,行之難,非 時彥,詢於政道,朝之得失必關聖聽,人之情僞必達天聰。然後覽其大當,以總國綱, 屬運在今。誠願陛下弘天覆之量,深地載之厚,宅沖虛以爲本,勤訓督以爲務。廣引 其運,否剝之難嬰之聖躬,普天所以痛心於旣往而傾首於將來者也。實冀否終而泰, 宜忠,不引不進;百司宜勤,不督不勸。是以古之帝王勤於降納,雖日總萬機,猶兼聽 之安也,羣才之用,未之盡也。而陛下崇高,事與下隔,視聽察覽,必寄之羣下。羣下 今强寇未殄,戎車未戢,兵弱於郊,人疲於內,寇之侵逸,未可量也,黎庶之困,未

頃之,獻皇后臨朝,徵冰輔政,冰辭以疾篤。尋而卒,時年四十九。册贈侍中、司空,諡

日忠成,祠以太牢。

冰天性淸慎,常以儉約自居。 中子襲嘗貸官絹十匹,冰怒,捶之,市絹還官。

卒,無絹爲衾。 長史江彪曰:「吾將逝矣,恨報國之志不展,命也如何!死之日,斂以時服,無以官物也。」及 又室無妾媵,家無私積,世以此稱之。 冰七子:稀、襲、皮、蘊、倩、邈、柔。

情太宰長史,邈會稽王參軍,柔散騎常侍。 並顯貴。 衞將軍,遷侍中,出爲輔國將軍、吳國內史。 希字始彦。 太和中、江江希爲北中郎將、徐兗二州刺史、蘊爲廣州刺史,並假節,友東陽太守, 初拜祕書郎,累遷司徒右長史、黃門侍郎、建安太守,未拜,復爲長史兼右 倩最有才器,桓溫深忌之。 希既后之戚屬,冰女又為海西公妃,故希兄弟

友為東陽 客於晉陵 頃之,徵 初 慕容厲 爲護軍 家于暨陽。 之暨陽。 一將軍。 圍 初, 希怒,固辭。 郭璞筮冰云:「子孫必有大禍,唯用三陽可以有後。」故浠求鎭山陽 帝初免時,多盜北府軍資,溫諷 有司劾之,復 以 罪免,遂

武沈 略漁 陂澤 配以器杖,遵於外聚衆,宣令云逆賊桓溫廢帝殺王,稱海西公密旨,誅除凶逆。 八船, , 希之從母兄也, 潛餉給, 希經年。 溫後 中。 及 海 蘊 西公廢,桓溫 夜 於廣州飲鴆 入京口 城。平北司馬卞耽踰 陷情及柔以武陵王黨,殺之。 而死。 及友當伏誅,友子 城奔曲阿, 知之,遺兵捕浠。 ·婦,桓祕女也,請溫,故得**免**。 希開難, 便與弟邈及子攸之逃于海陵 吏士皆散走。 武沈之子遵與浠聚衆于海濱 希放城內囚 故青州 徒數 京都震擾, 百 刺 史

少孫討之,城陷,被擒。 又與曲阿人弘戎發諸縣兵二千,幷力屯新城以擊浠。冷戰敗,閉城自守。 內外戒嚴,屯備六門。平北參軍劉奭與高平太守郗逸之、遊軍督護郭龍等集衆距之。 潘、

邈及子姪五人斬于建康市,

遵及黨與並伏誅,

唯

皮及

蘊

語子 溫遣東海太守周

友子叔宣,右衞將軍。 蘊子廓之,東陽太守。

攻郡縣,條討平之。條於兄弟最凡劣,故祿位不至。卒官,贈左將軍。 將軍、臨川太守。豫章黃韜自稱孝神皇帝,臨川人李高爲相,聚黨數百人,乘犢車,衣阜袍, 條字幼序。 初辟太宰府,累遷黃門郎、豫章太守。 徵拜秘書監,賜爵鄉亭侯,出爲冠軍

任,必有弘濟艱難之勳。」 遠略,因言於成帝曰:「桓溫有英雄之才,願陛下勿以常人遇之,常壻畜之,宜委以方邵之 也,每語人曰:「此輩宜束之高閣,俟天下太平,然後議其任耳。」見桓溫總角之中,便期之以 翼字雅恭。風儀秀偉,少有經綸大略。 京兆杜义、陳郡殷浩並才名冠世,而翼弗之重

蘇峻作逆,翼時年二十二,兄亮使白衣領數百人,備石頭。 第 四 + 庚 亮 亮敗, 與翼俱奔。 事平,始

轉 辟 建 太 尉 及 威 料城 陶 將 侃 軍 、西陽 府 失守,石城 ,轉參軍 太守。 ,累遷從事中郎。在公府,雍容諷議。 被圍,翼屢設奇兵,潛致糧杖。 撫和 百姓、甚得歡 心 遷南 蠻校尉,領南郡太守, 石城得全,翼之勳也。 頃之,除振威將軍 加輔 賜爵都亭侯。 一、鄱陽 國將軍、假 太守。

報使請 戴開 遠,數年之中, 翼 以帝舅,年少 之利 、翼拔 率數千人詣翼 及 期。 亮卒,授都督江 夷 將 為五 因 翼雅 不 此 公私 /超居大任 品 可 知 有大志,欲以 禁。 將軍 造兵器。 降。 充實,人情翕然, 荆 叉遣 賜穀二百斛。 ,遐邇屬目,慮 司 雍梁益六州諸 翼表陳東境國 使東至遼東,西到涼州 滅胡平蜀爲己任,言論 稱其才幹。 時東土多 以其不 [家所資,侵擾不已,逃逸漸 軍 稱。 事、安西將軍、荆州 賦役,百姓乃從海道 由 翼每 是自河 ,要給二方,欲同大舉。 慷慨, 協場志 以南 能,勞謙匪懈,戎政嚴明,經略深 形于辭色。 皆懷 刺史、假節,代亮鎭武昌。 歸附,石季龍 多, 入 廣州 將 夷 兵都尉錢 人常伺 慕容 刺刺 史鄧嶽 皝 汝 隙 張 南 頎 大 陳 駿 太 知知 開 守 並 事

父羡 也。 似 旣雅敬洪遠,又與浩親善,其父兄得失,豈以小小計之。 由 時 殷浩 長沙 有 佳 在 徴 兒、弟,故不 命無 一郡貪殘,兄冰 所 就,而翼請爲司 令物 情 與翼書屬之。 難 之。 馬及 自 頃 軍司,並不 翼報 以來,奉公更退, 曰:「殷君始 肯赴。 往, 翼遺浩書,因致 私累 大較江東政, 雖 日滋, 多驕 豪, 亦 不稍 以傴儛豪强,以 實 其 意。 有 以 風 此 先 力之益, 寥 是,浩 蕭之

軍孫綽亦致書諫。 時欲向襄陽,盧朝廷不許,故以安陸爲辭。 翼不從,遂違詔輒行。至夏口,復上表曰:

論皆如 州所 東事 安席。 監 爲民蠹,時有行法,輒施之寒劣。 以 〉塞責。 統 去,實此之由也。 此 紀睦、徐寧奉王使糾罪人,船頭到渚,桓逸還復, 二十郡,唯長沙最惡。 山遐作餘姚半年,而 兄弟不幸,横陷此中,自不能拔腳於風 惡而 爲官出二千戶,政雖不倫,公强官長 如往年偸石頭倉米一百萬斛,皆是豪將輩,而直打殺倉督 不黜,與殺督監者復何異耶!」翼有風力格裁,發言立 而二使発官。 塵之外,當共明目而治之。 也, 雖皆前宰之惛謬, 而羣共驅之, 不得 江 荆

不顧 遼東。 守王愆期、江夏相謝尚、尋陽太守袁眞、西陽太守曹據等精銳三萬,風馳 驢馬,百姓嗟怨。 **聖聽,不可廣詢同異,以乖事會。 兵聞拙速,不聞工之久也。」於是並發所統六州奴及** 臨許洛,竊謂桓溫 軍恒宣撲取黃季,欲幷丹水,搖蕩溱雍。 一念咎。然東西形搜未必齊舉,且欲北進,移鎭安陸,入沔五百,損水通流。 康 帝卽位,翼欲率衆北伐,上疏曰:「賊季龍年已六十,奢淫理盡,醜類怨叛, 可渡戍廣陵,何充可移據淮泗赭圻,路永進屯合肥。 若北無掣手之虜,則江南將不異遼左矣。 御以長轡,用逸待勞,比及數年,興復 帝及朝士皆遣使譬止,車騎參 伏願表御之日便決 上道, 臣所 以輒發良 **幷勒**平 瓢 率南 可冀。 又欲決死 那太 北 車 臣 牛 旣 將

列

艱阻。 皆遠,百姓所稸,穀草不充,並多羸瘠,難以涉路。加以向冬,野草漸枯,往反二千,或 九月十九日發武昌,以二十四日達夏口,輒簡卒搜乘停當上道。而所調借牛馬,來處 容躓頓,輒便隨事籌量,權停此舉。又山南諸城,每至秋冬,水多燥涸,運漕用功,實爲 臣 |近以胡寇有弊亡之勢,暫率所統,致討山北,並分見衆,略復江夏數城。 臣等以

荷國重恩,志存立效。是以受任四年,唯以習戎爲務,實欲上憑聖朝威靈高略,下藉士 險峻,水路流通,轉運無滯,進可以掃盪|秦趙,退可以保據上流。 臣雖不武,意略淺短, 釁,而值天高聽邈,未垂察照,朝議紛紜,遂令微誠不暢。 民義慨之誠,因寇衰弊,漸臨逼之。而八年春上表請據樂鄉,廣農稸穀,以伺二寇之 計襄陽,荆楚之舊,西接益梁,與關隴咫尺,北去洛河,不盈千里,土沃田良,方城

尚、王愆期等,悉令還據本成,須到所在,馳遣啓聞。 ,馘截凶醜,亦不可以不進據要害,思攻取之宜。是以輒量宜入沔,徙鎭襄陽。其謝 自爾以來,上參天人之徵,下採降俘之言,胡寇衰滅,其日不遠。臣雖未獲長驅中

我 、之行也,若此射矣。」 遂三起三疊,徒衆屬目,其氣十倍。 初, 翼遷襄陽,舉朝謂之不可, 翼時有衆四萬、韶 加都督征討軍事。[1三]師次襄陽,大會僚佐,陳旌甲,親授弧矢,曰: 撫、西陽太守曹據伐蜀,破蜀將李桓於江陽。〔18〕 成襄陽,還鎭夏口,悉取冰所領兵自配,以兄子<

統爲專陽太守。 陽太守,參軍司馬勳爲建威將軍、梁州刺史,戊西城。 刺史,辭豫州 置典賓參軍。 將軍曹據追擊於撓溝北,破之,死者近半,獲馬百匹。 議謂冰不宜出,冰乃止。 議者或謂避衰,唯兄<u>冰意同,桓溫及譙王無忌贊成其</u>計。 桓宣卒,翼以長子方之爲義成太守,口司代領宣衆,司馬應誕爲龍驤將軍、襄 復欲移鎭樂鄉,詔不許。繕修軍器,大佃積穀,欲圖後舉。 又進翼征西將軍,領南蠻校尉。 康帝崩,兄冰卒,以家國情事,留方之 翼綏來荒遠,務盡招納之宜,立客館, 至是,冰求鎭武昌,爲翼繼援。 胡賊五六百騎出樊城,翼遣冠軍 詔使翼還督江州,又領豫州 遣益州刺史周

誅之。 翼卒未幾,部將干瓚、口思戴義等作亂,殺將軍曹據。 馬朱熹爲南蠻校尉,以千人守巴陵。永和元年卒,時年四十一。追贈車騎將軍,諡曰肅 如厠,見一物如方相,俄而疽發背。疾篤,表第二子爱之行輔國將軍、荆州刺史,司 翼長史江獻、司馬朱燾、將軍袁眞等共

守,代方之。而方之、爱之並遷徙于豫章。 爰之有翼風,尋爲桓溫所廢。溫旣廢爰之,又以征虜將軍劉惔監沔中軍事,領義成太

而智小謀大,昧經邦之遠圖;才高識寡,闕安國之長算。璿萼見誅,物議稱其拔本;牙尺垂 福,非晉政之不綱明矣。 懌恣凶懷,鳩加連率,再世之後,三陽僅存,餘殃所及,蓋其宜也。 必且戎車犯順,則與夫台、產、安、桀,自己亦何以異哉!幸漏吞舟,免淪昭憲,是庾宗之大 訓,帝念深於負芒。是使蘇祖尋戈,宗祧殆覆。已而猜嫌上宰,謀黜負圖。向使郗鑒協從, 之災,是以厚贈瓊瑰,罕升津要。塗山在夏,靡與禼稷同驅;姒氏居周,不預燕齊等列。 金穴,地使其驕,馬控龍媒,勢成其逼。古者右賢左戚,用杜溺私之路,愛而知惡,深愼滿覆 人慮遠,殊有旨哉!晉昵元規,參聞顧命。然其筆敷華藻,吻縱濤波,方駕搢紳,足爲翹楚。 贊曰:元規矯迹,寵階椒掖。 史臣曰:外戚之家,連輝椒掖,舅氏之族,同氣蘭閨,靡不憑藉寵私,階緣險謁。 門藏 識闇釐道,亂由乘隙。 下拜長沙,有慚忠益。 季堅淸貞,

毓德馳名。 處泰逾約,居權戒盈。 稚恭慷慨,亦擅雄聲。

校勘記

[一] 今以臣之才 册府三〇五「才」上有「不」字,似是。

[1] 不在其例 通志一二七及册府三三八「例」作「列」。

戰于建陽門外 斠注:成帝紀云亮敗于宣陽門,此「建」字爲「宜」之譌。

- 樊峻 成紀「峻」作「俊」。
- ハガリ 李閎 石季龍載記作「李宏」。
- 據石城 原作「據石頭城」。 商権…下文亮上疏言「臣宜移鎮襄陽之石城下」,時亮欲北伐,石城 通鑑九六、建康實錄七並作「石城」,今據删

「頭」字。

在襄陽,

故足爲諸軍聲援。

按:王說是。蔡謨傳、

てもコ 表除重役六十餘事 宋本及通志一二七「重」作「衆」。

贈侍中衞將軍 各本脱「中」字、今據殿本補。

八九山 吳國內史 局本、殿本等「吳國」作「吳興」,今從宋本。 通志一二七、册府三三〇、三五〇、通鑑

九四並作「吳國」。

妄爲尙書符 「尙書符」,局本、殿本等作「中書符」,今從宋本。通鑑九七、通志一二七、册府三

二〇亦均作「尙書符」。

太和中 周校"「太和中」當作「隆和初」。

都督征討軍事 「義成」、各本作「義城」、今從殿本。義成立郡見桓宣傳。 通鑑九七、御覽七四四引「軍事」上有「諸」字。

李桓 勞校:康紀作「李恒」。 義成太守

列 傅 第 四 + Ξ 校 勘 記

晉書卷七十四

列傳第四十四

桓彝 子雲 雲弟豁 豁子石虔 虔子振 虔弟石秀 石民 石生 石綏

石康 豁弟秘 秘弟沖 沖子嗣 嗣子胤 嗣弟謙 謙弟脩 徐寧

瓢,處之晏如。 遷中書郞、尚書吏部郞,名顯朝廷。 家州主簿。 方之許、郭。 桓彝字茂倫,譙國龍亢人,漢五更榮之九世孫也。父顥,官至郎中。彝少孤貧,雖簞 赴齊王冏義,拜騎都尉。 少與庾亮深交,雅爲周顗所重。顗嘗歎曰:「茂倫嶔崎歷落,固可笑人也。」起 性通朗,早獲盛名。 有人倫識鑒,拔才取士,或出於無聞,或得之孩抱,時人 元帝爲安東將軍, 版行逡遒令。尋辟丞相中兵屬, 累

之,欣然停留累日,結交而別。 於時王敦擅權,嫌忌士望,鄰以疾去職。嘗過輿縣,縣宰徐寧字安期,通朗博涉,彝遇 先是,庾亮每屬彝覓一佳吏部,及至都,謂亮曰:「爲卿得一

列

傅

第

四

十四四

桓鄰

吏部矣。」亮問所在,彝曰:「人所應有而不必有,人所應無而不必無。 徐寧眞海岱清士。」因

爲敍之,卽遷吏部郎,竟歷顯職。

深自撝挹,內外之任並非所堪,但以墳柏在此郡,欲暫結名義,遂補彝宣城內史。 言:「宣城阻帶山川,頻經變亂,宜得望實居之,竊謂桓彝可充其選。」帝手詔曰:「適得太眞 明帝將伐王敦,拜彝散騎常侍,引參密謀。及敦平,以功封萬寧縣男。丹楊尹溫嶠上 在郡有惠

後舉。 將敗,左右勸縱退軍。縱曰:「吾受桓侯厚恩,本以死報。吾之不可負桓侯,猶桓侯之不負 能忍垢蒙辱與醜逆通問!如其不濟,此則命也。」遣將軍愈縱守關石。峻遣將韓晃攻之。縱 州郡多遣使降峻,裨惠又勸彝僞與通和,以紓交至之禍。廢曰:「吾受國厚恩,義在致死,焉 國也。」遂力戰而死。晃因進軍攻擊。擊固守經年,勢孤力屈。賊曰:「鄭若降者,當待以優 遂長驅逕進。 軍朱綽討賊別帥於燕湖,破之。彝尋出石硊。 政,爲百姓所懷。 蘇峻之亂也,霽糾合義衆,欲赴朝廷。其長史裨惠以郡兵寡弱,山人易擾,可案甲以須 ||彝厲色曰:「夫見無禮於其君者,若鷹鸇之逐鳥雀。 今社稷危逼,義無晏安。」乃遣將 彝以郡無堅城,遂退據廣德。 會朝廷遣將軍司馬流先據慈湖,爲賊所破,

列傳第四十四 桓鄉

禮。」將士多勸彝爲降,更思後舉。 時賊尙未平,諸子並流迸,宣城人紀世和率義故葬之。賊平,追贈廷尉,諡曰簡。 鄭不從,辭氣壯烈,志節 不撓。 城陷, 爲晃所害,年五十 咸安

此非命,如何!」竟如其言。有五子:溫、雲、豁、祕、沖。 初,彝與郭璞善,嘗令璞筮。卦成,璞以手壞之。 溫別有傳。 彝問其故。 日:「卦與吾同。 丈夫當

中,改贈太常。

俞縱亦以死節,追贈興古太守。

後莅 所枉 守。[1] 遭母憂去職。葬畢,起爲江州刺史,稱疾,廬於墓次。詔書敦逼,固辭不行,服闋,然 職 一濫,衆皆嗟怨。 雲字雲子。 加都督司豫二州軍事、領鎭蠻護軍、西陽太守、假節。 初爲驃騎何充參軍、尙書郎,不拜。襲爵萬寧男,歷位建武將軍、義成太 時溫執權,有司不敢彈劾。 **医招集衆力,志在足兵,多**

|升平四年卒,贈平南將軍,諡 日貞。子序嗣,官至宣城內史。

中七 遷黄 郡軍事 豁字朗子。 (門郞、未拜。 建威將軍、新野義成二郡太守、擊慕容屈塵、日一破之、 初辟司徒府、祕書郎、皆不就。 時謝萬敗於梁濮,許昌、潁川諸城相次陷沒,西藩騒 簡文帝召爲撫軍從事中郎,除吏部郎,以疾 進號右將軍。 動。 溫 命豁督沔 溫旣內

以梁盆 鎭,以 豁 與竟陵太守羅崇討破之。 豁 叛 監荆 ,豁使其參軍桓羆討之。 揚 雍州 軍事、領護南蠻校尉、荆州刺史、假節,將軍如故。 又攻偽南中郎將趙盤於宛,盤退走,豁追至魯陽,獲之,送於京 而南陽督護趙弘、趙懚等逐太守桓淡,這據宛城以叛 時梁州刺史司馬勳

師,置戍而旋。

又監寧益

軍事。

溫

薨,遷征西將軍,進督交廣幷前五州軍事

涼州 州刺史毛憲祖監沔北軍事,兗州刺史朱序爲南中郎將、監沔中軍事,鎮襄陽,以固北 游軍沔漢,為涼州聲援。 弟沖遣輔 苻堅寇蜀,豁遣江夏相竺瑶距之。

[四] 廣漢太守趙長等戰死, 國將軍朱序與豁子江州刺史石秀泝流就路,稟節 俄而張天錫陷沒,詔遣中書郎王尋之詣 度。 豁, 路引軍退。 豁遣 諮謀邊事。 督護 頃之, 桓羆 豁表以梁 與序等 鄙 堅又寇

以敢 弼,王猷以之時邕。 必將仰參神契,對揚成務,弘易簡以翼化,暢玄風於宗極。 時望,成典所不虛授,功微賞厚,賢達不以擬心。 陋,登庸賢雋,使版築有沖天之舉,渭濱無垂竿之逸。 及 存 冒成 堅陷仇池,豁以新野太守吉挹行魏興太守、督護梁州五郡軍事,戍梁州。 進不能闡揚皇風,贊明其政道,退不能宣力所莅,混一華戎。 太元初、遷征西大將軍、開府。 命,歸陳丹款。伏願陛下迴神玄覽,追收謬眷,則具瞻革望,臣知所免。」竟不許。 豁上疏固讓曰:「臣聞三台麗天,辰極以之增耀,論 臣實凡人,量無遠致, 。用乃功濟蒼生,道光千載 尸素積載,庸績 階藉 門寵, 堅陷涪城、梁 故宜 是以德非 遂叨非 明 道作 湯仄

列傳第四十四 桓莽

不拜開府。 州刺史楊亮、盆州刺史周仲孫並委戍奔潰。 尋卒,時年五十八。 贈司空,本官如故,諡曰敬。 豁以威略不振,所在覆敗,又上疏陳謝,固辭, 贈錢五十萬, 布五百匹,使者

持節監護喪事。腳時譽雖不及沖,而甚有器度。 但遇强寇,故功業不建。

初,豁聞苻堅國中有謠云:「誰謂爾堅石打碎。」有子二十人,皆以「石」爲名以應之。 唯

石虔、石秀、石民、石生、石綏、石康知名。

如此。 拔一箭以歸。從溫入關。沖爲苻健所圍,垂沒,石虔躍馬赴之,拔沖於數萬衆之中而還,莫 敢抗者。 三軍歎息,威震敵人。 時有患瘧疾者,謂曰「桓石虔來」以怖之,病者多愈,其見畏 將素知其勇,戲令拔箭。一一處因急往,拔得一箭,猛獸跳,石處亦跳,高於獸身,猛獸伏,復 石處小字鎭惡。有才幹,趫捷絕倫。從父在荆州,於獵圍中見猛獸被數箭而伏,諸督

器幹,御戎有方。古人絕哭,金革弗避,況在餘哀,豈得辭事!可授奮威將軍、南平太守。」 尋進冠軍將軍。 鑒於石橋,獲馬五百匹。除竟陵太守,以父憂去職。 尋而苻堅又寇淮南,詔曰:「石虔文武 初,袁眞以壽陽叛,石虔以寧遠將軍、南頓太守帥諸將攻之,克其南城。又擊苻堅將王 苻堅荆州刺史梁成、「哥裏陽太守閻震率衆入寇竟陵,「云石虔與弟石民距

陽,許之。 |州五郡軍事、豫州刺史。尋以母憂去職。服闋,復本位。久之,命移鎭馬頭,石虔求停歷 東太守,進據樊城,逐堅兗州刺史張崇,納降二千家而還。 級,俘獲萬人,馬數百匹,牛羊千頭,具裝鎧三百領。 賊阻滶水,屯管城。 石處設計夜渡水,旣濟,賊始覺,力戰破之,進克管城,擒震,斬首 成以輕騎走保襄陽。 沖卒,石虔以冠軍將軍監豫州 石虔復領 揚 河

洪,襄城太守。 太元十三年卒,追贈右將軍。 洪弟振。 追論平閻震功,進爵作塘侯。日第五子誕嗣。 誕長兄

振 字道全。 少果銳,而無行。 玄爲荆州,以振爲揚武將軍、淮南太守。 轉江夏相,以兇

横見黜。

宮。 在江 復歸於晉,更奉進璽綬,以琅邪王領徐州刺史,振爲都督八州、鎭西將軍、荆州刺史。 報 一陵,振乃聚黨數十人襲江陵。 振 振云:「桓欽已克京邑,

云]馮稚等復平尋陽, 及玄之敗也,桓謙匿於沮中,振逃於華容之涌中。 聞桓昇死,大怒,將肆逆於帝,謙苦禁之,乃止。 比至城,有衆二百。 劉毅 諸軍並敗於中路。」振大喜。 謙亦聚衆而出,遂陷江陵,迎帝 遂命羣臣,辭以楚祚不終,百姓之心 玄先令將軍王稚徽戍巴陵,稚徽遣 時 帝侍 安帝

御左右,皆振之腹心。旣而歎曰:「公昔早不用我,遂致此敗。 若使公在,我爲前鋒,天下不

今獨作此,安歸乎一遂肆意酒色,暴虐無道,多所殘害。

陣斬之。 休之奔襄陽,振自號荆州刺史。 破馮該,平江陵。 於道,弗之識也,乃問宗之所在。 將馮該守營,自率衆與宗之大戰。 少,左右皆力戰,每一合,振輒瞋目奮擊,衆莫敢當。 振營於江津。 **振聞該敗,衆潰而走。** 南陽太守魯宗之自襄陽破振將溫楷於柞溪,進屯紀南。 建威將軍劉懷肅率寧遠將軍索邈,與振戰於沙橋。 紿曰:「已前走矣。」宗之於是自後而退。[元] 版勇冠三軍,衆莫能禦,宗之敗績。 振追奔,遇宗之單騎 後與該子宏出自溳城,復襲江陵。荆州刺 振時醉,且中流矢,廣武將軍唐興臨 振聞楷敗、留其 尋而 振 史司馬 劉毅等 兵雖

純。 遠將軍、江州刺史、領鎭蠻護軍 善騎射,發則 謝安嘗訪 甚爲簡文帝所重。 石秀,幼有令名,風韵秀徹,博涉羣書,尤善尧莊。 命中。 以世務,默然不答,安甚怪之。 嘗從沖獵,登九井山,徒旅甚盛,觀者傾坐,石秀未嘗屬目,止嘯詠而 **豁爲荆州,請爲鷹揚將軍、竟陵太守,** 、西陽太守、居尋陽。 他日,安以語其從弟嗣,嗣以問之,石秀曰: 性放曠,常弋釣林澤,不以榮爵嬰心。 常獨處一室,簡於應接,時人方之順 非其好也。 尋代叔父沖爲寧

列

後將軍,後改贈太常。 世事 此公所諳,吾又何言哉!」在州五年,以疾去職。 子稚玉嗣。」玄之篡也,以石秀一門之令,封稚玉爲臨沅王。 年四十三卒於家,朝野悼惜之。 追贈

攻長社 洛陽。 荆州 將慕容變降之。始置湖陝二戍。獲關中擔幢伎,以充太樂。時苻堅子不僭號於河北,謀襲 南陽太守高茂衞山陵。時壓雖破敗,而慕容垂等復盛。石民遣將軍晏謙伐弘農,賊東中郎 夏侯澄之破苻堅將慕容垂、姜成等於漳口。復領譙國內史、梁郡太守。沖薨,韶以石民監 武將軍,領裏城太守,成夏口,與石處攻苻堅荆州刺史梁成等於寬陵。明年,又與隨郡太守 丁零翟遼復侵逼山陵,日日五民使河南太守馮遵討之。 功,進左將軍。 軍事、西中郎將、荆州刺史。桓氏世蒞荆土,石民兼以才望,甚爲人情所仰。 初,沖遣竟陵太守趙統伐襄陽。至是,石民復遣兵助之。尋而苻堅敗於淮肥,石民遣 石民,弱冠知名,衞將軍謝安引爲參軍。叔父沖上疏,版督荆江豫三州之十郡軍事、振 · ,衆數千人。

石民復遣南平太守郭銓、松滋太守王遐之擊滩,斬之,遼走河北。 石民遣將軍馮該討之,臨陣斬丕,及其左僕射王孚、吏部尚書苟操等,傳首京都。 卒,無子。 時乞活黃淮自稱幷州刺史,與遼共 以前 m

石生,隆安中以司徒左長史遷侍中,歷驃騎、太傅長史。 會稽世子元顯將伐桓玄,石生

馳書報玄,玄甚德之。 及玄用事,以爲前將軍、江州刺史。尋卒於官。

中,自己聚衆攻壓陽,後爲梁州刺史傳歆之所殺。自己 石綏, 元顯時爲司徒左長史。玄用事, 拜黃門郎、 左衞將軍。 玄敗, 石綏走江西塗

石康,偏爲玄所親愛,玄爲荆州,以爲振威將軍。 累遷荆州刺史。 計庾仄功,封武陵

王,事具玄傳。

溫入朝,窮考煉事,收尙書陸始等,罹罪者甚衆。 溫 城內史。 爲散騎常侍,徙中領軍。 疾篤,祕與溫子熙、濟等謀共廢沖。 後臨喪。 秘字穆子。 時梁州 秘於是廢棄,遂居於墓所,放志田園,好遊山水。後起為散騎常侍,凡三表自 刺史司馬勳叛入蜀,祕以本官監梁益二州征討軍事、假節。 少有才氣,不倫於俗。 孝武帝初即位,妖賊盧竦入宫,口忌祕與左衞將軍殷康俱入擊之。 |沖密知之,不敢入。 頃溫氣絕,先遣力士拘錄熙、濟, 初拜秘書郎,兄溫抑而不用。 祕亦発官,居于宛陵,每憤憤有不平之色。 **外之,為輔國將軍** 勳平,還郡。後

列

傳

其所 陳。 觀,其文多引簡文帝之眄遇。先沖卒。 執。」秘素輕沖, 詔日 : 「祕受遇先朝,是以延之,而頻有讓表,以棲尙告誠, 兼有疾疢,省用 沖時貴盛, 秘恥常侍位卑, 長子廝,官至散騎常侍、游擊將軍。 故不應朝命。 與謝安書及詩十首, 玄篡,以爲醴 增歎。 辭理 可順 可

守。 百人殺江州督護趙毗,掠武昌府庫,將妻子北叛。 周成,進號征虜將軍,賜爵豐城公。尋遷振威將軍、江州刺史、領鎭蠻護軍、西陽譙二郡太 京光揚州之義成七郡軍事、寧朔將軍、義成新野二郡太守,鎭襄陽。 揚將軍、鎭蠻護軍、西陽太守。從溫征伐有功,遷督荆州之南陽襄陽新野義陽順陽雍州之 溫之破姚襄也,獲襄將張駿、楊凝等,徙于尋陽。沖在江陵,未及之職,而駿率其徒五 沖宇幼子,溫諸弟中最淹識,有武幹,溫甚器之。弱冠,太宰、武陵王晞辟,不就。 沖遣將討獲之,遽還所鎮。 又從溫破姚襄。 除鷹 及

之,謂曰:「我買德也。」遂厚報之。 頃之,進監江荆豫三州之六郡軍事、南中郎將、假節,州 言不欲爲質`幸爲養買德郞。買德郞,沖小字也。及沖爲江州,出射,羊主於堂邊看,沖識 初,彝亡後,沖兄弟並少,家貧,母患,須羊以解,無由得之,溫乃以沖爲質。 羊主甚富,

郡如故。

疏 凶事、求還官庫。 史、假節。 以爲生殺之重,古今所愼,凡諸死罪,先上,須報。 在江州凡十三年而溫薨。 時詔賻溫錢布漆蠟等物, 韶不許,沖猶固執不受。 孝武帝詔沖爲中軍將軍、都督揚江豫三州軍事、揚豫二州刺 而不及大殮。 初,溫執權,大辟之罪皆自己決。 沖上疏陳溫素懷每 沖旣代溫居任,盡忠王室。 存清儉, 沖旣莅 且私 或勸沖誅 物足 事 上

除時望,專執權衡,沖不從。

口,假節。 非計,莫不扼腕苦諫,翻超亦深止之。沖皆不納,處之澹然,不以爲恨,忠言嘉謀,每盡 安意欲出蘊爲方伯,乃復解沖徐州,直以車騎將軍都督豫江二州之六郡軍事,自京口遷鎮 於是改授都督除院豫靑揚五州之六郡軍事、車騎將軍、徐州刺史,以北中郎府幷中軍,鎭京 謝安以時望輔政,爲羣情所歸,沖懼逼,寧康三年,乃解揚州,自求外出。桓氏黨與以爲 又韶沖及謝安並加侍中,以甲杖五十人入殿。時丹楊尹王蘊以后父之重昵於安, 心力。

淮泗,乘虚致討,以救凉州,乃表曰: 旣而持堅寇涼州,沖遣宣城內史朱序、豫州刺史桓伊率衆向壽陽,淮南太守劉波汎舟

而天未剿絕,屢爲國患。 氐賊自幷東胡, 醜類實繁, 而蜀漢寡弱, 西涼無備, 臣聞勝於無形,功立事表,伐謀之道,兵之上略。 斯誠暴與疾顚,祇速其亡。 況此財陸

列傳第四十四 桓拳

勢在西門。

梁, 複,又潍泗通流,長江如海,荆楚偏遠,密邇寇讎,方城、漢水無天險之實,而過備之重 終必越逸。 北狄陵縱,常在秋冬。 今日月迅邁,高風行起, 臣輒較量畿甸,守衛重

憚皇威,闚閻計屈,則觀兵伺釁,更議進取,振旅旋旆,遲速唯宜。 伏願陛下覽臣所陳, 穢,不復重勞王師,有事三秦,則先帝盛業永隆於聖世,宣武遺志無恨於在昔。 特 臣豁參同謀猷。賊若果驅犬羊,送死沔漢,庶仰憑正順,因致人利,一舉乘風,掃淸氛 垂 一聽許。 臣雖凡庸,識乏武略,然猥荷重任,思在投袂。 請率所統,徑進南郡,與征西將軍 如其懾

高算。 深長,思算重復,忠國之誠,形於義旨。覽省未周,以感以慨。寇雖乘間 之,黷武窮兇,虐用其衆,滅亡之期,勢何得久!然備豫不虞,軍之善政。 韶答曰:「醜類違天,比年縱肆,梁益不守,河西傾喪。 每惟宇內未一,憤歎盈懷。 將軍經略 叉以酒三百四十石、牛五十頭犒賜文武。 史、持節,將軍 都督江 荆 想與征 梁益 、侍中如故。 寧交廣七州揚州之義成雍州之京兆司 西協參令圖,嘉謀遠猷,動靜以聞。」會張天錫陷沒,於是罷兵。俄 又以其子 嗣爲江州刺 謝安送至溧洲 史。 州之河東軍事、領護南蠻校尉、荆州刺 沖將之鎮,帝餞於西堂,賜錢五十萬。 竊利,而以無道臨 輒詢于羣后,敬從 而 豁卒,遷

軍將 者詭 轉。 不欲出。 亦 子石民堪居此任,輒版督荆江十郡軍 苻熙、石越寇新野。 解 相 歲運米三十萬斛以供軍資,須年豐乃止。 上明,使冠軍將軍劉波守江陵,諮議參軍 壁不戰,接會濟江,路不云遠,乘其疲墮,撲翦爲易。 業 一任 劉 軍 職,不許。 奭 軍石虔等伐苻堅,拔堅筑陽。 人。 道,示之以弱,今宜全重江南,輕戍江北。 臣亡兄溫以石季龍死,經略中原,因江陵路便,即 堅遣其將苻融寇樊、鄧,石越寇魯陽,姚萇寇南鄉, 之要。 、南中郎將朱序擊之,而 列 於是 在吳時樂鄉城以上四十餘里,北枕大江,西接三峽。 遣左衞將軍張玄之詣沖諮謀軍事。 衛將軍謝安更以中領軍謝賴代之。 今府州旣分,請以王薈補江州刺史。詔從之。 沖旣憚堅衆,又以疾疫,還鎭上明。 **颠畏懦** 攻武當,走堅兗州刺 事、振武將軍、襄城太守。 不進,序又爲賊所擒。 楊亮守江夏。 南平孱陵縣界,地名上明,田土膏良,可以資 沖率前將軍劉波及兄子振威將軍石民、冠 沖聞之而怒,上疏以爲輶文武無堪,求自 臣司存閫外,輒隨宜處分。」於是移鎮 而鎭之。 史張崇。 韶以荆州水旱饑荒,又冲新移草創, **韋鍾寇魏興,所在陷沒。沖遣江夏** 表以「夏口江 時資始遭兄砌喪,口巴將葬,辭 沖深自咎責, 若狂狡送死,則舊郢以 事 尋陽北接强蠻, 堅遣慕容垂、毛當 與時遷,勢無常定。且兵 沔衝要,密邇 上疏送章節, 西連 寇鄧城, 强寇,兄

沖

旣

到江陵,時苻堅强盛,沖欲移阻江南,乃上疏曰:「自中興以來,荆州所鎮,隨宜迴

北堅

刜

郢,

沖府。 並降之。新城太守麴常遁走,三郡皆平。詔賜錢百萬,袍表千端。 焚燒沔北田稻,拔六百餘戶而還。 領江州,帝許之。 以平震功,封次子謙宜陽侯。 沖使石處伐壓裹陽太守閻震,擒之,及大小帥二十九人,送於京都,詔 。又遣上庸太守郭寶伐堅魏興太守褚垣、上庸太守段方, 堅使其將郝貴守襄陽、三三沖使揚威將軍朱綽討之,遂

寡弱,天下事可知,吾其左衽矣!」俄而聞壓破,大勳克舉,又知朱序因以得還,沖本疾病,加 歎曰:「謝安乃有廟堂之量,不閑將略。 今大敵垂至,方遊談不暇,雖遣諸不經事少年,衆又 革無闕,西藩宜以爲防。」時安已遣兄子玄及桓伊等諸軍,沖謂不足以爲廢興,召佐吏,對之 謝安謂三千人不足以爲損益,而欲外示閑暇,聞軍在近,固不聽。報云:「朝廷處分已定,兵 序沒於賊,沖深用愧惋。旣而苻堅盡國內侵,沖深以根本爲慮,乃遣精銳三千來赴京都。 將相異宜,自以德望不逮謝安,故委之內相,而四方鎭扞,以爲己任。又與朱序款密。俄而 以慚恥,發病而卒,時年五十七。贈太尉,本官如故,諡曰宣穆。賻錢五十萬,布五 初,沖之西鎮,以賊寇方强,故移鎭上明,謂江東力弱,正可保固封疆,自守而已。 又以 百匹。

之,禮之甚厚。又辟處士長沙鄧粲爲別駕,備禮盡恭。|粲威其好賢,乃起應命。初,郗鑒、 曰:「衣不經新,何緣得故!」沖笑而服之。命處士南陽劉驎之爲長史,驎之不屈,親往迎 沖性儉素,而

|謙虚愛士。嘗浴後,其妻送以新衣,|沖大怒, 促令持去。 其妻復送之, 而

此爲恨」言不及私,論者益嘉之。及喪下江陵,士女老幼皆臨江瞻送,號哭盡哀。 庾亮、庾翼臨終皆有表,樹置親戚,唯沖獨與謝安書云:「妙靈、靈寶尙小,亡兄寄託不終,以 後玄篡

位,追贈太傅、宣城王。有七子:嗣、謙、脩、崇、弘、羡、怡。

代之,版付船官。 之三郡豫州之四郡軍事、建威將軍、江州刺史。莅事簡約,修所住齋,應作版檐,嗣命以茅 日靖。子胤嗣。 嗣字恭祖。少有淸譽,與豁子石秀並爲桓氏子姪之冠。沖旣代豁西鎭,詔以嗣督荆州 轉四陽、襄城二郡太守,鎭夏口。 後領江夏相,卒官。 追贈南中郎將,諡

忠誠王室。諸子染凶,自貽罪戮。念沖遺勤,用悽於懷。其孫胤宜見矜宥,以獎爲善。可 特全生命,徙于新安。」及東陽太守殷仲文、永嘉太守駱球等謀反、江心陰欲立胤爲玄嗣,事 則祚遠,勳彰故事殊。以宣孟之忠,蒙後晉國,子文之德,世嗣獲存。故太尉沖,昔藩陝西, 玄甚欽愛之,遷中書令。 玄篡位,爲吏部尚書,隨玄西奔。 玄死,歸降。 詔曰:「夫善著 胤宇茂遠。少有淸操,雖奕世華貴,甚以恬退見稱。初拜秘書丞,累遷中書郎、 秘書

之亂 玄,以桓氏 謙 謙 字 出 敬祖 世 奔 無錫。 在陝西,賺父沖有遺惠於荆楚,懼人情向背,乃用賺爲持節、 ,詳正有器望。 徵拜尚書,驃騎大將軍元顯引爲諮議參軍,轉司 初以父功封宜陽縣開國侯, 累遷 輔國將軍 馬。 元興初, 吳國 都督荆益寧梁四 內 朝廷 史。 孫恩 將伐

不 玄篡位,復領揚州刺史,本官如故,封新安王。 能 善也 玄旣 用事,以謙爲尚書左僕射,領吏部,加中軍將軍。 改封 謙爲寧都侯,拜尙書令,加散騎常侍。 遷侍中、衞將軍、開府、錄尚書事。 謙兄弟顯列, 玄甚倚杖之,

州諸

軍事

、西中郎將、荆州刺史、假節,以安荆楚。

循通 於龍 位, 己守江陵。 姓處沖遺惠,投者二萬人。 足以 皆是逼 格 濟 使 及 桓 事 使 潛 T,亦不 振 人守 迫 相影響,乃表興請謙共順 振旣 作亂,謙保護乘輿,頗有 一人神所明。 之。 假君爲鱗翼。 輕賺 謙向諸弟泣曰:「姚主言 用 事,故不從。 今臣 劉道規破謙,斬之。 宜自求 與縱東下,百姓自 流東下。 功焉。然而暗愞,尤不可以造事。 及振敗,謙奔於姚興。 多福。」遂遣之。 一神矣 興問謙,謙曰:「臣門著恩荆楚,從弟」玄末雖篡 ____後 [應駭 動。」 與縱引譙道福俱下,謙於道占募,百 謙至蜀,欲虛懷引士,縱疑之,乃置謙 興日:「小水不容大舟、若縱 先是,譙縱稱藩於姚興,縱與盧 初,勸振率軍下戰, オカ

列傳第四十四 桓彝

宣傳不盡,以爲身計,疑誤朝算,請收付廷尉。 破仲堪、佺期、韶以脩爲征虜將軍、江州刺史。尋復爲中護軍。 堪無罪,獨被降黜。 劉牢之以千人送之。轉仲堪爲廣州。脩未及發,而玄等盟於尋陽,求誅牢之。尚之幷訴仲 怪期,使並順命。」朝廷納之。以脩爲龍驤將軍、荆州刺史、假節,權領左衞文武之鎭。 又令 曰:「殷、桓之下,專恃王恭,恭旣破滅,莫不失色。今若優詔用玄,玄必內喜,則能制仲堪、 而 遣 [|恭敗,無終遣書求降。脩旣旋軍,而楊佺期已至石頭,時朝廷無備,內外崩駭。脩進說 何澹之、孫無終向句容。脩以左衞領振武將軍,與輔國將軍陶無忌距之。脩次句容。 脩字承祖。 尚簡文帝女武昌公主,歷吏部郎,稍遷左衞將軍。 王恭將伐譙王尚之,先 於是詔復仲堪荆州。 御史中丞江績奏脩承受楊佺期之言,交通信命, 特詔発官。尋代王凝之爲中護軍。 頃之,玄

篡,以爲撫軍大將軍,封安成王。劉裕義旗起,斬之。 玄執政,以脩都督六州、右將軍、徐克二州刺史、假節。

陵 。 。 專親舊,還遇風,停浦中,累日憂悒,因上岸,見一室宇,有似廨署,訪之,云是興縣。 徐寧者,東海郯人也。少知名,爲輿縣令。 時廷尉桓彝稱有人倫鑒識,彝嘗去職,至廣

得一佳東部郎。」語在彝傳。 寧淸惠博涉,相遇欣然,因留數夕。廢大賞之,結交而別。 即遷吏部郎、左將軍、江州刺史,卒官。 至都,謂庾亮曰:「吾爲卿

歲,晦風雨於將晨,喈響或以變其音,貞柯罕能全其性。 |虔振北門之威,秀坦西陽之務,外有扞城之用,裏無末大之嫌,求之名臣,抑亦可算。 下。仁者之勇,不其然乎!至夫基構迭汙隆,龍蛇俱山澤,沖逡巡於內輔,豁陵厲於上游, 邁周庾之淸塵,遵許郭之遐軌。懼臨危於取免,知處死之爲易,揚芬千載之上,淪骨九泉之 泗上微言,朝聞而夕死。原軫発胄,懍然於往策,季路絕纓,邈矣於前志。 爲亢極之資,玄遂履霜之業,是知敬仲之美不息檀臺之亂,寧兪之忠無救弈棊之禍。 之不血食,悲夫! 史臣曰:醨風潛煽,醇源浸竭,遺道德於情性,顯忠信於名敎。 桓茂倫抱中和之氣,懷不撓之節, 首陽高節,求仁而得仁, 況交霜雪於杪

家推才子。 贊曰:矯矯宣城,貞心莫陵。身隨露天,名與雲興。虔豁重世,沖秀雙美。 版武謙文, 專邑爲羣。歸之篡亂, 曷足以云。 國賴忠臣,

義成太守 「義成」 原作「義城」。 地理志無義成郡。 前後文均作「義成」,今據改。 參卷七三

校記

ヘニン 慕容屈塵 哀紀、通鑑一〇一並作「慕容塵」。

桓淡 海西公紀、通鑑一〇一作「桓澹」。

竺 瑤 「瑤」,各本均作「瑗」,今據海西公紀、苻堅載記上、桓溫傳及通鑑一〇二、一〇三改。下

同。

万五

荆州刺史梁成

舉正"「梁成」、堅載記作「都貴」。

按

孝武紀、通鑑一〇四並作「都貴」。

貴以

秦建元十六年十二月爲荆州刺史。

八公山 閻震 苻堅載記上作「閻振」。

フセン 作塘侯 桓欽 通鑑一一三作「桓歆」。 啟、溫子、又見桓玄傳。 **斠注:「塘」當從地理志爲「唐」。**

へ た し 宗之於是自後而退 局本、 殿本等無「宗之」二字,今從|宋本。通志一二七句首亦有「宗之」

疑「欽」爲誤字。

翟遼 見卷九校記。

塗中 商權:「塗」當作「涂」。 涂中卽今滁縣。

列 傅 第 四十 四 椌 勘 記

- 傅歆之 通鑑一一五作「傅韶」。勞校:宋書傅弘之傳作「傅韶」。
- [1] / 盧竦 · 孝武紀、毛安之傳及通鑑一〇三「竦」並作「悚」。
- 〔四〕始遭兄劭喪 「劭」,各本作「邵」,今從宋本及王劭傳。
- 呈 郝貴 勞校:"孝武紀作「都貴」。按:通鑑一○四亦作「都貴」。 疑「郝」「都」形近誤。
- 駱球 「球」, 各本作「駅」,今從南監本。安紀、 般仲文傳、 通志一二七、朱書武帝紀上亦均

作「球」。

